


SC. SUP. 23. PL. 5.





Ex Alphonsi sacularis libris



# CLYPEUS SCOTICÆ THEOLOGICÆ

Contra novos ejus Impugnatores,

*AUTHORE P. F.*

BARTHOLOMÆO DURAND

Antipolenſi, Ordinis Minorum Regularis Obſervantiæ, Provinciæ Sancti Ludovici, ſacræ Theologiæ Lectore Jubilato.

TOMUS QUARTUS

Continens Tractatus de Incarnatione Verbi Divini, & de Sacramentis in communi.

EDITIO TERTIA

*Auctior, & Correctior.*




VENETIIS,  
Apud PAULUM BALLEONIUM

M. DCCIX.

*Superiorum Permissu, ac Privilegio*







# I N D E X

## DISPUTATIONUM ET QUÆSTIONUM

Quæ in hoc quarto Tomo conti-  
nentur.

**T**RACTATUS I. *De Incarnatione Ver-  
bi divini.* pag. 11.

*Disputatio I. De possibilitate Incarnationis .*  
*ibid.*

*Quæstio I. An Incarnatio sit possibilis ,*  
*12.*

*II. An possibilitas Incarnationis , naturali  
lumine ab intellectu creato evidenter cognos-  
ci possit.* 18.

*Disputatio II. De convenientia Incarnatio-  
nis .* 23.

*Quæstio I. An conveniens fuerit Deum incarna-  
ri .* 24.

*II. An fuerit magis conveniens Filium incarna-  
ri , quàm Patrem vel Spiritum sanctum ; &  
naturam humanam potius quàm Angelicam ab  
illo assumi.* 27.

*Disputatio III. De necessitate Incarnatio-  
nis .* 30.

*Quæstio I. An homo purus sit impotens ad sa-  
tisfaciendum de condigno , pro suo vel alieno  
peccato mortali.* 31.

*II. An satisfactio Christi fuerit de se sufficiens  
& superabundans , pro omnium hominum pec-  
catis.* 39.

# I N D E X.

- III. *An satisfactio Christi sit valoris simpliciter infiniti.* 47.
- IV. *An satisfactio Christi fuerit de rigore iustitiæ.* 61.
- V. *A qua virtute satisfactio Christi processerit.* 69.
- Disputatio IV. *De motivo Incarnationis.* 74.
- Quæstio I. *An Deus ex vi decreti quod habuit, carnem sumpisset, Adamo non peccante.* ibid.
- II. *An solo existente peccato originali, & e contra solis existentibus actualibus, futura esset Incarnatio ex vi præsentis decreti.* 92.
- Disputatio V. *De quidditate Incarnationis.* 95.
- Quæstio I. *An unio Verbi incarnati sit facta in natura vel persona.* ibid.
- II. *An persona Christi verè & propriè possit dici composita ex natura divina & humana, & ex humanitate & substantia Verbi.* 100.
- III. *An inter Verbum & humanitatem mediet quidam modus substantialis, per quem natura humana formaliter conjungatur personalitati Verbi.* 101.
- IV. *Quisnam sit terminus totalis & formalis actionis unitivæ Dei, seu assumptionis humanitatis ad Verbum.* 112.
- V. *An unio hypostatica in ratione unionis sit omnium maxima.* 116.
- Disputatio VI. *De causa physica & morali Incarnationis.* 117.
- Quæstio I. *An aliqua creatura possit esse causa physica unionis hypostaticæ, saltem instrumentaliter, & an reipsa beata Virgo fuerit causa instrumentalissimus.* 118.
- II. *An Christus per opera, prioritate temporis vel naturæ præcedentia unionem hypostaticam, eam promeruerit, vel saltem mereri potuerit.* 119.
- III. *An Christus per opera subsequentiâ Incarnationis*

# I N D E X.

*nationem, eam mereri potuerit.* 127.

*IV. An SS. Patres meruerint, aut saltem mereri potuerint Incarnationem, ejusque circumstantias de congruo.* 131.

*Disputatio VII. De persona assumente* 136.

*Quaestio I. An persona verbi immediate & proximè terminaverit humanitatem assumptam, ratione substantiae absolutae & communis, vel ratione substantiae relativae & personalis.* ibid.

*II. An Verbum assumendo humanitatem, non solum ejus substantiam, sed etiam illius existentiam suppleverit.* 140.

*III. An Deus, ut communis tribus personis, ratione substantiae absolutae possit alienam naturam assumere.* 150.

*IV. An plures personae divinae possint terminare immediate eandem numero humanitatem, & plures humanitates ab eadem persona assumi.* 153.

*V. An incasu quo una persona divina plures humanitates assumeret, vel e contra, essent tunc unus homo, vel plures.* 161.

*VI. An persona creata, de potentia Dei absoluta, possit terminare naturam alienam.* 164.

*Disputatio VIII. De natura assumptibili & assumpta.* 175.

*Quaestio I. An qualibet natura substantialis completa, sit assumptibilis à divina persona.* ibid.

*II. An etiam substantia incompleta & partialis, sit assumptibilis à divina persona.* 178.

*III. An accidentia immediate à Deo assumptibilia sint.* 181.

*IV. An humanitas Christi, ut actu conjuncta Verbo divino, ejusque personalitate terminata, appetitu innato, substantiam propriam & sibi connaturalem appetat.* 186.

# I N D E X .

- V. *An Verbum divinum ad suam subsistentiam , sanguinem , aliosque humores corporis Christi assumpserit.* 193.
- Disputatio IX. *De ordine assumptionis .* 198.
- Quæstio I. *An prius fuerint assumptæ partes humanitatis , quàm tota humanitas , & anima Christi prius fuerit unita verbo , quàm corpus .* ibid.
- II. *An gratia habitualis habuerit rationem medii , seu dispositionis physicæ aut moralis , ad unionem hypostaticam .* 204.
- Disputatio X. *De gratia Christi .* 206.
- Quæstio I. *An humanitas Christi sanctificetur formaliter per aliquod donum substantiale , à gratia habituali distinctum .* ibid.
- II. *Ad quid in Christo gratia habitualis necessaria fuerit .* 216.
- III. *An omnes virtutes fuerint in Christo .* 218.
- IV. *An in Christo fuerint dona Spiritus sancti , & gratiæ gratis datæ .* 222.
- Disputatio XI. *De perfectione gratiæ Christi .* 224.
- Quæstio I. *An gratia Christi habitualis infinita sit .* 229.
- II. *An in Christo sit gratiæ plenitudo , subindeque gratia tam intensa , ut omnem gratiam Angelorum & hominum collectivè sumptam excedat .* 229.
- III. *An gratia habitualis Christi , de potentia Dei absoluta augeri possit .* 233.
- Disputatio XII. *De gratia Christi capitali .* 236.
- Quæstio I. *An Christus sit actu caput hominum viatorum , in statu peccati vel infidelitatis existentium .* ibid.
- II. *An Christus ut homo sit ita caput Angelorum , quòd ipsis gratiam & gloriam essentialem meruerit .* 240.
- III.

# I N D E X.

- III. *Per quam gratiam Christus in ratione capitis Ecclesiae constituitur.* 253.
- Disputatio XIII. *De scientia beata animae Christi.* 256.
- Quaestio I. *An Christus, dum esset viator & in terris degens, scientiam beatam habuerit, illamque à primo conceptionis instanti receperit.* 257.
- II. *An anima Christi per scientiam beatam omnes creaturas possibles in essentia divina cognoscat.* 259.
- Disputatio XIV. *De scientia infusa animae Christi.* 263.
- Quaestio I. *An omnia objecta naturalia, ab anima Christi per scientiam infusam supernaturalem, distinctè & in particulari cognita fuerint.* 264.
- II. *An anima Christi per scientiam infusam supernaturalem, cogitationes cordium occultas, & futura contingentia cognoverit.* 268.
- III. *An Christi anima per scientiam infusam, evidenter cognoverit mysterium Trinitatis, quoad an. est.* 271.
- Disputatio XV. *De scientia Christi acquisita.* 273.
- Quaestio I. *An præter scientiam beatam & infusam, constituenda sit in anima Christi Domini scientia per se acquisibilis.* ibid.
- II. *An Christus scientias per se acquisibiles, propriis actibus sibi comparaverit, vel eas à Deo per infusionem receperit.* 275.
- Disputatio XVI. *De potentia animae Christi.* 282.
- Quaestio unica, *An humanitas Christi, seu Christus ut homo, instrumentaliter physice, vel solum moraliter ad productionem gratiae & miraculorum, aliorumque effectuum supernaturalium concurrat.* ibid.
- Disputatio XVII. *De impeccabilitate & merito Christi.* 290.

# I N D E X.

- Quæstio I. *An Christus de potentia absoluta peccare potuerit.* ibid.
- II. *An Christus meruerit adimplendo præceptum Patris, de subeunda morte pro salute generis humani.* 302.
- III. *An Christus gloriam sui corporis, sui-  
que nominis exaltationem sibi meruerit.* 310.
- Disputatio XVIII. *De servitute, oratione, &  
sacerdotio Christi.* 312.
- Quæstio unica, *An Christus ut homo sit ve-  
rè servus Dei? an oraverit? an sit Sa-  
cerdos? & an potestatem regiam, non so-  
lùm spirituales, sed etiam temporalem ha-  
buerit?* 313.
- Disputatio XIX. *De adoptione & prædestina-  
tione Christi,* 315.
- Quæstio I. *An Christus in quantum homo, sit  
filius adoptivus Dei.* ibid.
- II. *Quisnam sit terminus primarius & principa-  
lis prædestinationis Christi.* 320.
- III. *An Christus meruerit prædestinationem no-  
stram, ut est comparativa, & electio unius  
præ alio.* 323.
- TRACTATUS II. *De Sacramentis in  
communi.* 328.
- Disputatio I. *De essentia Sacramenti.* ibid.
- Quæstio I. *An solum in genere signi, vel etiam  
in genere causæ, Sacramentum in communi de-  
beat constitui.* 329.
- II. *Cujus rei sacræ Sacramentum sit signum, &  
an sit signum unius rei tantum.* 333.
- III. *An Sacramentum sit semper res aliqua  
sensibilis, & hoc sit illi ita essentiale, ut  
de potentia Dei absoluta non possit institui  
Sacramentum in aliqua re spirituali & in-  
sensibili.* 337.
- IV. *An res sensibiles quibus in Sacramen-  
tis utimur, debeant esse determinatæ à  
Deo.* 340.

V. *An*



# I N D E X.

- V. *An omnia Sacramenta novæ legis componantur ex rebus & verbis, sicut ex materia & forma, tamquam ex partibus essentialibus.* 345.
- VI. *Quæ mutatio ex parte materiæ vel formæ, reddat Sacramentum invalidum.* 358.
- Disputatio II. *De existentia Sacramentorum.* 364.
- Quæstio I. *An aliqua Sacramenta fuerint de facto in statu innocentia, vel futura fuissent Adamo non peccante, supposito saltem quod posterius ejus peccassent.* ibid.
- II. *An in statu legis naturæ fuerint vera Sacramenta, tam pro adultis, quam pro parvulis, eaque immediate à Deo determinata fuerint, & necessaria necessitate mediæ ad salutem.* 373.
- III. *An in lege Mosaica, præter circumcissionem, alia fuerint vera Sacramenta, & quot.* 380.
- Disputatio III. *De gratia Sacramentali.* 383.
- Quæstio I. *An Sacramenta novæ legis sint causæ gratiæ, eamque conferant ex opere operato non ponentibus obicem.* ibid.
- II. *Quomodo Sacramenta producant gratiam, an instrumentaliter physice, vel solum moraliter.* 387.
- III. *Quam gratiam causent Sacramenta novæ legis, an primam, vel secundam.* 407.
- IV. *Quid addat gratia Sacramentalis supra gratiam habituales.* 415.
- Disputatio IV. *De charactere Sacramentali.* 419.
- Quæstio I. *An & quæ Sacramenta novæ legis imprimant characterem.* ibid.
- II. *Quid sit character Sacramentalis.* 423.
- III. *Quodnam sit subiectum proximum & immediatum characteris Sacramentalis.* 428.
- Disputatio V. *De Sacramentorum institutore, ministro, numero, & ordine.* 435.
- Quæstio I. *An potestas ministerialis instituendi*

# I N D E X .

- Sacramenta, & potestas excellentiæ quæ fuit  
in Christo, homini puro communicari potue-  
rit.* 436.
- II. Quinam sint Sacramentorum ministri.* 442.
- III. An ad valorem Sacramenti requiratur in-  
tentio ministri qua intendat Sacramentum per-  
ficere.* 446.
- IV. An per malos ministros valide possint Sacra-  
menta conferri.* 455.
- V. An ministri Sacramenta in peccato mortali  
ministrantes, semper peccent mortaliter.* 458.
- VI. Denumero & ordine Sacramentorum.* 462.





# TRACTATUS I.

*De Incarnatione Verbi divini :*



UM Christus sit totius gratiæ & virtutis fons, visis omnibus quæ ad gratiam sanctificantem & ad virtutes, tum Theologicas, tum Cardinales spectant, modò ad ipsius Christi cognitionem occupanda est Theologia nostra; imò utinam unusquisque diceret cum Apost. I. Cor. 2. *Non enim iudicari me scire aliquid inter vos, nisi Iesum Christum & hunc crucifixum*: ut ergo in quantum patitur humana fragilitas, de ineffabili incarnationis mysterio notitiam habeamus, sit



## DISPUTATIO. I.

*De possibilitate Incarnationis.*

OMitto disputationem proemiale, in qua Gonetius refert hæreticorum errores qui circa incarnationis mysterium fuerunt. Tum quia videri possunt apud ipsum & alios Theologos. Tum quia in propriis locis in quibus agi-randa erit difficultas, aut potius erit dicenda veritas quam hæretici impugnaverunt, nominantur; ideo sit

## Q U Æ S T I O I.

*An Incarnatio sit possibilis ?*

**S**uppono tamquam certissimum apud omnes qui nomine Christiano gloriantur, Messiam jam venisse. Tum quia constat in sacra Scriptura: nam Joan. 4. legitur Samaritanam dixisse, *Scio quia Messias venit, qui dicitur Christus*; cui Jesus respondens dixit, *Ego sum qui loquor tecum*. Et Joan. 1. *Verbum caro factum est*. Tum quia authoritas Judæorum, quæ in adventu Messie auferenda erat, juxta illud Genes. 49. *Non auferetur sceptrum de Iuda & dux de femore ejus, donec veniat qui mittendus est, & ipse erit expectatio gentium*; penitus extincta est, ut patet. Unde examinandum est, an incarnatio illa sit possibilis, vel non?

Dico igitur, quod incarnatio Verbi est possibilis. Hæc conclusio est evidens, quia de actu ad posse valet consequentia; sed incarnatio facta est, ut suadet illud Joan. 1. *Verbum caro factum est*: ergo est in se possibilis. Prob. tamen ex Scoto in 3. dist. 1. quæst. 1. Incarnatio est quædam unio naturæ humanæ cum Verbo in unitate suppositi divini; sed hæc unio est possibilis: ergo. Prob. minor: Ut unio illa sit possibilis, sufficit, quod divina voluntas possit separare à natura humana proprium suppositum, & quod suppositum Verbi divini possit ejus munus, & officium supplere, quoniam hoc supposito, natura humana erit unita cum Verbo in unitate suppositi divini; sed voluntas divina auferre potest à natura humana proprium suppositum. Tum quia natura est prior substantia seu personalitate; idèoque potentia Dei, natura potest privari substantia propria. Tum quia natura realiter distinguitur

tur à personalitate. Tum quia suppositum creatum consistit in duplici negatione: nam natura est ex se communicabilis; unde hæc negatio communicationis convenit ei contingenter & extrinsecè, id est, per defectum causæ extrinsecæ assumptis, & quia non assumitur in illo instanti in quo producit, per negationem illam in se personatur; subindeque proprium suppositum potest auferri à Deo. *Deinde*, suppositum Verbi supplere potest officium & munus suppositi humani: nam persona divina continet in se perfectiones & virtutes suppositi creati, sicut divina voluntas continet perfectiones voluntatis creatæ; ideòque terminare & personare potest naturam creatam, ipsamque incommunicabilem reddere, sicuti suppositum proprium, cum sit infinita & independens; & independens, dependens terminare valeat: ergo possibilis est unio naturæ humanæ cum Verbo in unitate suppositi divini.

*Dices* 1. Essentia divina est infinita & perfecta sicut persona divina; tamen impossibile est, quòd sit essentia alicujus creaturæ: ergo etiam impossibile est, quòd una persona divina sit persona alicujus naturæ creatæ. Resp. negando consequentiam: Ratio est, quia essentia naturæ creatæ, est tota ipsa natura; & divina, totus Deus; unde cum implicet Deum esse essentialiter creaturam, & creaturam esse essentialiter Deum, implicat etiam essentiam Dei, esse essentiam creaturæ, & implicat etiam creaturam habere essentiam Dei. At subsistentia aut personalitas, est modus naturæ constitutæ in proprio esse, terminans naturam & reddens ipsam incommunicabilem ut *quod* & ut *quo*; unde ut natura humana fiat incommunicabilis, sufficit, quòd sustentetur personalitate Verbi quæ est incommunicabilis, quòd sit absque ulla mutatione in Verbi personalitate sustentante & terminante dependentiam natura:

ræ : nam personalitas Verbi non fit formaliter natura humana, nec natura humana fit formaliter personalitas Verbi; sed fieri non posset sine mutatione intrinseca, si essentia Dei esset essentia creaturæ, cum tale sit constitutum, quale est constitutum; & personalitas, non fit talis, qualis est natura personata; aliàs personalitas Patris. esset communis sicut natura, quod est falsum: ergo non valet paritas.

*Dices 2.* Ratio terminandi quam habet personalitas Verbi, exhauritur & completur terminando naturam divinam infinito modo: ergo personalitas Verbi nequit terminare nec reddere incommunicabilem naturam humanam. *Resp.* distinguendo antecedens: Ratio terminandi quam personalitas divina habet, exhauritur & completur ad intra, & in ordine ad actum primum & adæquatum, concedo; ad extra & in ordine ad actum secundarium, nego antecedens & consequentiam. Nam divina voluntas quæ est principium productivum Spiritus sancti & creaturarum, in productione Spiritus sancti exhauritur ad intra, & habet terminum adæquatum, sed non exhauritur ad extra, aliàs non esset causa rerum, quod est falsum: ergo licet personalitas exhauriatur ad intra, terminando naturam divinam; tamen non exhauritur ad extra, ideoque terminare potest naturam creatam, eamque personare, licet personet etiam divinam naturam.

*Instabis:* Personalitas creata, dum terminat naturam humanam, non potest terminare divinam; ergo nec divina humanam naturam, dum terminat naturam divinam. *Resp.* negando instantiam. Tum quia natura divina non potest sustentari in personalitate creata, cum sit ens in se infinitum per se & à se, humana verò sustentari potest in divina personalitate, cum sit dependens & finita. Tum quia divina est indistincta à natura divina, humana verò est distincta realiter.

*Instabis:* ergo si personalitas creata nequeat terminare naturam divinam, quia est finita & natura divina infinita; Divina quæ est infinita nequit personare naturam humanam, quæ est finita. Resp. negando paritatem, quia persona divina licet infinita sit, personat naturam humanam modo finito & convenienti: At persona finita nequit personare modo infinito naturam divinam. Nec hoc implicat infinito; nam essentia divina est infinita, tamen perficit intellectum beati modo finito, nempe per finitam & limitatam terminationem: non enim implicat, quod infinitum, finitum attingat & producat: At implicat, quod finitum, infinitum attingat & terminet. Intellectio divina terminatur ad creaturas quæ finitæ sunt, sed intellectio creata non terminatur ex se ad Deum qui infinitus est.

*Dices* 3. Nulla est proportio inter personalitatem Verbi divini & naturam humanam, ut manifestum est, cum nulla sit major distantia, quam illa quæ est inter Deum & hominem: ergo unio naturæ humanæ cum Verbo in unitate suppositi, non est possibilis. Resp. negando antecedens: Nam inter personam divinam & naturam humanam, datur proportio habitudinis & dependentiæ; qualis est illa quam terminabile dicit ad terminativum, & creatura in ratione effectus ad Deum quatenus est causa; aliàs creatura non esset producta à Deo, cum nulla esset proportio inter Deum & creaturam.

*Instabis,* Duo contraria non possunt esse simul: ergo nec Deus & creatura in incarnatione uniri possunt. Resp. negando consequentiam: quia duo contraria non se expellunt ratione distantiae aut contrarietatis entitativæ, seu entis ad ens, sed ratione oppositionis aut repugnantiae quam habent ratione qualitarum oppositarum, ut patet in nigredine & albedine:

nem non mutatur sicut humanitas, quamvis ipsi humanitati uniatur. Præterea, natura humana completur & perficitur, Verbum verò perficit & complet: ergo non se habet respectu humanitatis, sicut humanitas se habet respectu Verbi, quamvis sit homo, sicut homo est Deus.

*Instabis*, Verbum divinum non potest esse compar respectu humanitatis: ergo nequit eam complere, nec perficere. Resp. negando consequentiam, quia complere & perficere spectat etiam ad terminum alicujus dependentiæ. *Instabis* iterum: Implicat, quòd Verbum divinum compleat dependentiam naturæ humanæ, in ratione termini, cum terminare, ad entitatem spectet, & omnia quæ in Deo sunt, sint una & eadem entitas. Resp. negando instantiam. Tum quia formalitas potest esse terminus, sed Verbum terminat naturam humanam, formalitate relativa sibi propria, & formaliter distincta à natura. Tum quia in divinis sunt tres substantiæ realiter distinctæ: ergo non implicat, quòd una terminet dependentiam naturæ humanæ, cum substantia divina munus substantiæ creatæ gerere valeat, & consequenter non implicat, quòd Verbum incarnetur.

## Q U Æ S T I O I.

*An possibilitas Incarnationis, naturali lumine ab intellectu creato evidenter cognosci possit?*

**D**ico. 1. quòd solo lumine naturæ non potest possibilitas incarnationis, seu unionis substantiæ divinæ cum aliqua natura creata, evidenter cognosci. Ita omnes Theologi, Patres, & Scriptura. Ad Ephes. 3. dicitur: *Sacramentum*  
ab.



*abſconditum à ſæculis in Deo. Et Cyril. Alexandr. ad reginas: Ænigma ſacraſſimum; quod nulla mens creata poteſt intelligere.*

Prob. 1. Rationis naturalis lumen attingit & demonſtrat dumtaxat omne quod eſt naturale; quia nullum medium tendere poteſt extra ſuum finem, nec potentia agere extra ſphæram activitatis ſuæ, ut manifeſtum eſt apud omnes: ſed incarnatio eſt extra finem & limites luminis naturæ. Tum quia eſt in ordine ſupernaturali. Tum quia eſt extra ſphæram activitatis noſtræ: nam cum Deus ſit artifex infinitus, ipſi concedendus eſt effectus aliquis activitatem totius naturæ excedens, ut ait Auguſt. ep. 3. ad Voluſianum: *Demus ergo aliquid Deum poſſe, quod nos fateamur inveſtigare non poſſe: nam in rebus ſola ratio facti, eſt potentia facientis: Qui quidem effectus eſt incarnatio Verbi divini, ſeu unio qua Deus ſit homo, & homo Deus; idcirco incarnatio excedit activitatem naturæ: ergo lumen naturale nequit demonſtrare incarnationis myſterium.* 2. Ut intellectus proprio lumine cognoſcat incarnationem eſſe poſſibilem; oportet, quod cognoſcat naturam creatam privari poſſe propria ſubſiſtentia, cum ratio naturalis demonſtret evidenter naturam ſubſiſtentem eſſe inſumptibilem: ſed lumine naturali intellectus non cognoſcit ſubſiſtentiam ſeparari poſſe à propria ſubſiſtentia, cum hanc ſeparabilitatem probet ſolum incarnationis myſterium: ergo &c. 3. Nullum eſt medium in rebus creatis, ex cujus cognitione cognoſci poſſit incarnationis poſſibilitas, quia incarnatio nullam connexionem habet cum creaturis, quæ omnem perfectionem & naturaliter debitam haberent, etiam ſi incarnatio impoſſibilis eſſet: ergo intellectus nequit naturaliter, ſecluſo auxilio, aut medio fidei, cognoſcere incarnationis poſſibilitatem, cum ut cognoſcat, tali medio inducente indigeat.

*Dices*

## 20 DE INCARNATIONE.

*Dices 1.* Lumen naturale evidenter demonstrat mysterium incarnationis non esse impossibile, ut est manifestum: ergo demonstrat, quod est possibile; cum ex repugnantia impossibilitatis, sequatur necessarium evidentia possibilitatis. Resp. distinguendo antecedens: Lumen naturale evidenter demonstrat negativè mysterium incarnationis non esse impossibile, id est, non probat esse impossibile, concedo; Demonstrat positivè non esse impossibile, id est, probat esse possibile, nego antecedens & consequentiam: quia possibilitas non sequitur ex non repugnantia negativè, sed positivè probata: multa enim sunt quæ non cognoscimus impossibilia, quia nullam rationem habemus, unde probari possit eorum impossibilitas; quæ tamen non cognoscimus possibilia, quoniam nullam rationem habemus, unde à nobis probari possit eorum possibilitas.

*Inflabis:* Ratio naturalis probat positivè mysterium incarnationis esse credibile, probando negativè non esse impossibile: ergo probat positivè, quod est possibile. Resp. negando consequentiam: quia credibilitas sumitur ex auctoritate dicentis, possibilitas verò ex principiis intrinsicis rei; idcirco licet cognoscamus mysterium incarnationis esse, propter auctoritatem revelantis; non cognoscimus tamen ipsum mysterium esse possibile, cum non cognoscamus naturali lumine ejus principia intrinseca.

*Dices 2.* Ratio naturalis evidenter cognoscit omnipotentiam Dei: ergo cognoscit incarnationis possibilitatem. Prob. consequentia: Omnipotentia non potest verè cognosci, quin cognoscantur ejus opera; sed incarnatio est opus omnipotentiae: ergo. Resp. negando consequentiam, ad cujus prob 1. distinguo majorem: Omnipotentia non potest verè cognosci, ut causa naturalis, quin cognoscantur omnia ejus opera naturalia, concedo; quin cognoscantur omnia

omnia ejus opera absolute, seu tam supernaturalia, quam naturalia, nego majorem & consequentiam: quia incarnatio est opus supernaturale & gratiæ, quod omnipotentia producit, ut causa supernaturalis & gratiæ, quam ratio naturalis non cognoscit seclusa fide, aut gratiæ auxilio.

*Dices* 3. Ratio naturalis evidenter cognoscere potest, quod Deus ut author naturæ cognoscit, quia nobis communicat cognitiones naturales: sed ut author naturæ cognoscit incarnationem; ergo homo potest illam cognoscere lumine naturali. Resp. negando minorem; Deus enim consideratus ut author naturæ, nihil cognoscit nec facit quod non sit intra ordinem naturæ, & consequenter sic non cognoscit incarnationem, nec eam in hoc sensu velle potest. Nam Deus ut author naturæ nequit esse nostra perfecta beatitudo; nec unire humanitatem Verbo divino in unitate suppositi, cum sit opus supernaturale.

*Dico* 2. quòd etiam supposita fide & revelatione incarnationis, non potest ejus possibilitas naturali ratione demonstrari: sed solum ratione probabili suaderi. Prob. Fides est obscura, ut dictum est in tract. præcedenti: ergo impossibile est, quòd ex fide, intellectus habeat evidentem notitiam de incarnationis mysterio quod fides docet. *Deinde*, supposita fide aut revelatione incarnationis, incarnatio est semper effectus supernaturalis, & intellectus est potentia naturalis: ergo nequit cognoscere incarnationis possibilitatem. Verum est, quòd eam suadere potest ratione probabili ex certitudine fidei deducta.

*Dices* 4. Supposita fide, Angelus potest cognoscere naturaliter subsistentiam Christi non esse humanam, sed divinam; cognoscit enim per revelationem, illam non esse humanam: ergo inferre debet illam subsistentiam esse di-




vinam; cū certus sit lumine naturali omnem personam esse increatam vel creatam. Resp. negando consequentiam, quia licet Angelus naturaliter cognoscat subsistentiam Christi non esse humanam, tamen nescit, an sit divina: scimus enim, inquit Aug. Deum non esse corpus, nec materiam, &c. nescimus tamen *quid sit Deus*.

*Instabis:* Inter personalitatem divinam & creatam non datur medium: ergo si Angelus evidenter cognoscat personam Christi non esse humanam, certus est & evidenter cognoscit, quod est divina; subindeque non valet paritas. Resp. negando consequentiam, quia Angelus, licet evidenter cognoscat personam humanam non esse in Christo; tamen non cognoscit evidenter in Christo esse unam personam; rationabiliter enim dubitare potest, an Deus utendo sua potentia absoluta, conservet humanitatem absque ulla subsistentia; vel an creaverit aliquid ordinis supernaturalis gerens vices subsistentiæ humanæ: ergo licet certus sit personam humanam non esse in Christo, non infert evidenter humanitatem subsistere subsistentia Verbi.

*Dices iterum:* Dæmon de facto cognovit subsistentiam Christi esse divinam, & ipsum Christum esse Deum: nam Luc. 4. dicebat illi, *Scis quod sis sanctus Dei*; & alibi, *Exibant autem dæmonia à multis clamantia & dicentia, quia tu es filius Dei*: ergo de facto cognoverunt incarnationis mysterium, non supernaturaliter nec per revelationem, cū sint incapaces omnis divini beneficii; sed naturali cognitione, ut insinuare videtur Scotus pluribus in locis, ubi docet angelum posse naturaliter intelligere mysteria gratiæ jam existentia.

Respondeo negando antecedens; ad cujus probationem, dico, quod dæmones ob mirabilia Christi virtute effecta quamdam Christi notitiam habuerunt, quæ non est evidens, sed conjecturalis, sicut ea quam habuit mulier Samaritana

na dicens, *Scio quia Messias venis*; nec certa, sed dubia, quia non obstantibus plurimis divinæ virtutis signis in Christo elucescentibus, dæmones dubitabant, quia in eo conspiciebant etiam humanæ infirmitatis exempla: Unde ad eum accessit Tentator dicens: *Si Filius Dei es &c.* Math. 4. Neganda est igitur consequentia; ad cuius probationem, dico Doctorem subtilem loqui de mysteriis gratiæ supernaturalibus, quæ nullum dicunt ordinem ad aliquid increatum, & quæ in ente naturali subsistunt, ut sunt v. g. habitus infusi, ut in Tractatu de Angelis dictum est cum eodem Doctore: quod de mysterio Incarnationis verificari minimè potest, cum involvat ordinem ad Verbum increatum, & iidem non possunt illud cognoscere naturali lumine, supposita etiam divina revelatione de eodem mysterio; alioquin Angelus non dixisset Mariæ: *Non erit impossibile apud Deum*, sed dixisset, *Erit possibile*, ut observat Paulus Aretius Episcopus Dertonensis, quia cognovisset illud evidenter: quod implicat ratione fidei, quæ cum necessario obscura sit, notitiam evidentem parere non potest: quamvis ipsa mediante, naturalis ratio possit conjecturis & exemplis suadere Incarnationis possibilitatem.



## DISPUTATIO II.

*De convenientia Incarnationis.*

**C**Um aliud sit aliquid esse possibile, & aliud esse conveniens (plura enim sunt possibilis quæ non conveniunt) visa disputatione de possibilitate, examinanda est hæc de convenientia.

QUA-

## Q U Æ S T I O I.

*An conveniens fuerit Deum incarnari ?*

**D**ico 1. *Mysterium Incarnationis esse conveniens Deo.* Illud opus est maximè Deo conveniens, in quo specialiter resplendent omnipotentia, misericordia, bonitas Dei &c. sed incarnatio est opus in quo omnipotentia plus facere non potuit, misericordia plus dare non potuit, & bonitas plus communicare nescivit, ut est manifestum: ergo incarnatio est opus Deo conveniens. *Deinde*, creatio universi est Deo conveniens, cum cedat in gloriam Dei, ut docet Scriptura: ergo à fortiori restauratio universi, seu incarnatio Verbi quæ cedit in majorem gloriam Dei, debet esse Deo conveniens.

*Dices* 1. Incarnatio est punitio justì pro injustis; ergo non convenit Deo, cui non convenit puniri, nec punire innocentem. *Resp.* distinguendo antecedens, Incarnatio est punitio per modum vindictæ & castigationis, nego antecedens; per modum satisfactionis & reparationis, concedo antecedens, & nego consequentiam. Quia licet non conveniat Deo puniri, nec punire innocentem per modum vindictæ & castigationis, quæ peccatum proprium supponunt & vindicant sub spe emendationis; convenit tamen ipsi puniri, ut fidejussor in natura innocente, & punire innocentem per modum reparationis & satisfactionis, quoniam gloriosum est Christo reparare homines lapsos & pro ipsis satisfacere, nec dedecet summam Dei majestatem assumere carnem non relinquendo divinitatem, ut homo fiat Deus.

*Dico* 2. quòd Incarnatio est conveniens natu-

rae humanæ. Prob. Quod est bonum naturæ humanæ, commodum, utile & gloriosum, est ipsi conveniens: sed incarnatio Verbi est summum bonum: quid enim melius, utilius, commodius, & gloriosius accidere potest naturæ humanæ quàm unio hypostatica, inviolabilis conjunctio; & admirabile commercium cum divinitate? ergo est conveniens ipsi. *Deinde*, per incarnationem homo fit Deus, caput Angelorum &c. Ergo incarnatio est conveniens naturæ humanæ.

*Dices*: Proprii boni privatio non est conveniens naturæ; sed incarnatio privat naturam bono proprio & naturaliter debito, nimirum subsistentia: ergo non est ipsi conveniens. Resp. distinguendo majorem: Proprii boni privatio non est conveniens naturæ, si per privationem illam remaneat nuda & privata simpliciter proprio bono, concedo; Si privatio sit ordinata ad melius bonum, nego majorem. Et distincta similiter minori, nego consequentiam, quia privatio propriæ subsistentiæ ordinatur ad meliorem, nempe ad subsistentiam Verbi. *Instabis*: Melius est naturæ habere propriam subsistentiam, quàm subsistentiam Verbi: ergo. Resp. distinguendo instantiam: Melius est naturæ secundum appetitum innatum, concedo; secundum appetitum elicatum, nego.

Dico 3. Incarnationis mysterium fuisse conveniens toti universo: nam omnes res creatæ in homine continentur: ergo si incarnatio sit perfectio, & conveniat homini, convenit omni creaturæ, cum homo sit omnis creatura, ut colligunt Patres ex illo Luc. 16. *Prædicato Evangelium omni creaturæ*. Deinde, omnes creaturæ invitantur ad hoc mysterium perficiendum, his verbis, *Rorate cæli desuper & nubes pluant justum, aperiatur terra & germinet Salvatorem*: sicut per peccatum Adæ, omnis creatura fuit læsa, & peccatum fuit disconveniens

## 16 DE INCARNATIONE.

toti universo; ita incarnatio fuit gaudium conveniens toti universo. Præterea, per incarnationem datur in universo perfectissimus gradus entis & gratiæ in generationis ordine, dum femina genuit sine viro, quod est miraculosum: ergo incarnatio est perfectio universi, subindeque fuit ipsi conveniens. Tandem, major diversitas est universo conveniens; cum ejus pulchritudo in varietate consistat: sed per incarnationem est major varietas: nam in universo quælibet substantia habet suum suppositum; at per incarnationem habetur diversus modus, cum una natura humana careat proprio supposito, & subsistat in supposito increato; ergo est conveniens toti universo.

*Dices:* In Incarnatione plura dantur humanitati assumptæ dona, quàm in universo mundo, cum in ipsa inhabitet plenitudo divinitatis, ut monet Apostolus: ergo incarnatio non fuit universo conveniens, quia non convenit toti minus habere, imò incongruum videtur plus dare parti quàm toti. Nego consequentiam, quia ex eo quod datur parti, illustratur totum cujus est pars. Undè cum humanitas assumpta intra creaturarum ambitum includatur, ut est manifestum, & in ipsa Deus proposuerit instaurare omnia, sive quæ in cœlis, sive quæ in terris sunt, sequitur, quòd ex donis humanitati assumptæ exhibitis, ens creatum pervenit ad apicem gloriæ, & summam obtinuit perfectionem, sicque incarnatio fuit conveniens universo mundo.



## QUÆSTIO II.

*An fuerit magis conveniens Filium incarnari, quàm Patrem vel Spiritum sanctum; & naturam humanam, potius quàm Angelicam, ab illo assumi?*

**D**ICO I. Quòd convenientius fuit Filium incarnari, quàm Patrem, & Spiritum sanctum. Prob. Peccatum Adæ, licèt sit offensa contra Deum ut unum & ut trinum, tamen specialiter est contra Patrem, cui attribuantur potestas & imperium: ergo convenientius fuit Filium incarnari! & pro homine satisfacere, quàm Patrem satisfacere sibi, Filio & Spiritui sancto: nam Pater ex D. August. est principium totius divinitatis: ergo ad ipsum fieri debet omnis satisfactio, & ipsi offerri debet omne sacrificium; subindeque convenientius fuit Filium incarnari, quàm Patrem, etiam quàm Spiritum sanctum: nam convenientius erat reparare hominem per id, per quod factus fuerat; sed factus fuerat per Verbum, in quo facta sunt omnia: ergo magis conveniens fuit Filium, seu Verbum incarnari, quàm Spiritum sanctum. Deinde, per incarnationem homo debebat fieri Filius Dei: ergo potius per Filium, quàm per Spiritum sanctum. Tum quia nō est Filius Dei; & ille per quem homo debebat fieri Filius Dei, debebat esse caput & primogenitus, subindeque Filius. Tum quia Spiritus sanctus non est imago Dei: ergo non conveniret nobiscum in omnibus ( absque peccato ) sicut Filius: ergo fuit magis conveniens Filium incarnari. Præterea, magis conveniens fuit Virginem concipere, Spiritu sancto cooperante, quàm Filio, cùm Spiritus sanctus sit fons totius doni & gratiæ ad extra: ergo ma-

## 28 DE INCARNATIONE.

gis conveniens fuit Filium incarnari, quàm Spiritu sanctum.

*Dices* 1. Magis conveniens est hominem dependere à Patre, quàm à Filio: ergo magis conveniens fuit Patrem incarnari, quàm Filium, cùm homo dependeat à persona incarnata. Resp. Magis conveniens est hominem dependere à Patre quàm à Filio, principaliter & imperativè, concedo; Ministerialiter & obedientialiter, nego antecedens & consequentiam: Quia homo non dependet à persona incarnata, principaliter & imperativè, sed tantùm ministerialiter, quia Pater præcepit Filio, & misit ipsum, & Filius fuit missus, juxta illud ad Gal. 4. *Misit Deus Filium suum &c.* Instabis: tres personæ habent easdem perfectiones: ergo non est magis conveniens unam incarnari, quàm aliam. Resp. negando consequentiam, quia major convenientia non fundatur in perfectione, sed in proprietate notionali.

Dico 2. Magis conveniens fuisse naturam humanam assumi à Verbo, quàm Angelicam. Prob. 1. Verbum assumendo naturam humanam, adoptavit omnes homines, & fuit cohæres & confrater omnium hominum; at si assumpsisset naturam Angelicam, non adoptasset omnes Angelos, nec fuisset confrater omnium; cùm quilibet Angelus speciem suam constituat: ergo &c. 2. Adamo peccante, nullus homo remansit innocens: Lucifero verò peccante, plures Angeli remanserunt in gratia: ergo magis conveniens fuit assumere naturam humanam, quàm Angelicam. 3. Si assumpsisset naturam Angelicam, ille Angelus Deus fuisset invisibilis hominibus, & homo Deus est visibilis Angelis: ergo fuit magis conveniens. 4. Homo erat minùs indignus, & erat capax poenitentiae: ergo magis conveniens fuit medicum esse hominem quàm Angelum. 5. Convenientius fuit satisfacere Deo læso per effusionem sanguinis & mor-

mortem: ergo magis conveniens fuit naturam humanam assumi, quàm Angelicam, quæ est mortis incapax. *Tandem*, magis conveniens fuit deificare totum universum, quàm unam partem duntaxat: sed Verbum assumendo naturam humanam deificavit totum universum, & assumendo Angelicam deificasset tantùm Angelum, qui non est omnis creatura, sicut homo: ergo magis conveniens fuit naturam humanam assumi, quàm Angelicam.

*Dices 2.* Natura Angelica est perfectior: ergo magis decebat Deum assumere naturam Angelicam. *Resp.* negando consequentiam, quia magis decet medicum, infirmiores, quàm digniores visitare; at homines erant infirmiores: nullus enim post peccatum Adæ, sanus permanfit. Præterea, homo erat magis capax remedii & medicinæ, quia Angelus erat inflexibilis: ergo Verbum potius assumere debuit naturam humanam. *Tandem*, Christus mortuus est ex motivo humilitatis: ergo magis conveniens fuit naturam humanam assumere, quæ est humilior, quàm Angelicam.

*Quæres*, An incarnatio convenienti tempore facta fuerit? *Resp.* affirmative. *Prob.* Convenientius fuit, ut incarnatio non fieret ab initio mundi, nec differretur ad ejus finem: ergo facta fuit tempore convenienti. *Prob. 1.* pars: Verbum incarnatum, est medicus, sacerdos & victima; & peccator est infirmus, reus & debitor: ergo convenientius fuit, medicum venire rogatum, & diu desideratum: Et infirmum, quia reus erat, pati, ut culpam cognosceret: ergo non debuit venire statim post peccatum. Nec post finem sæculorum; alias post mortem venisset medicus. *Deinde*, venit ut glorificator & pater: ergo incarnatio facta fuit tempore convenienti, quia in principio mundi & post ejusdem finem, non erant homines, in quorum conspectu, & ad quorum instructionem & salutem, Deum Patrem exaltare potuisset.

*Dices* : Si Christus venisset statim post peccatum, majorem amoris significationem exhibuisset, & suis plures illustrasset exemplis & doctrina, quos non illustrasse certum est; & si venisset in fine mundi, fecisset id quod fecit in medio seculorum : ergo non venit convenientiori tempore. *Nego* consequentiam, quia convenientius est differre usque ad plenitudinem temporis, quod est plenum & maximum beneficium, quàm illud dare in principio temporum, ut notat D. Bonaventura; & in hoc exhibetur major amoris significatio, cum commune bonum privato præponatur & profit pluribus : sicut enim sol in medio planetarum positus, superiores & inferiores illuminat, & in meridie magis lucet & ardet quàm in principio & in fine diei; sic Christus sol justitiæ veniens in plenitudine temporum, illuminavit anteriora sæcula per fidem & spem adventus sui, & sequentia per Evangelium; quod non fecisset, si venisset statim post peccatum Adæ, cum nullus habuisset fidem nec spem de adventu ipsius, nec si venisset in fine sæculorum, cum nulli reliquisset Evangelium & Sacramenta, subindeque in principio temporum, nec in fine eorundem fecisset omne id quod fecit in medio.



## DISPUTATIO III.

*De necessitate Incarnationis.*

**Q**Uoniam aliquid conveniens esse potest quin simul sit necessarium, visa & examinata incarnationis convenientia, inquirenda est ejus necessitas.

## QUÆSTIO I.

*An homo purus sit impotens ad satisfaciendum de condigno pro suo vel alieno peccato mortali?*

**A**Dvertendum est, quæstionem non procedere de homine in statu puræ naturæ, quia per *Ly purus*, excludimus tantum unionem hypostaticam cum divinitate, non autem gratiam sanctificantem, dona supernaturalia &c. Unde difficultas est, an homo, quin sit Deus ut Christus, licet sit sine peccato originali conceptus, & habeat tantam gratiam, quantum Christus habuit, possit condignè satisfacere pro peccatis hominum, eosque redimere, supposito decreto de condigna satisfactione exhibenda?

Dico igitur, quod purus homo potuisset de potentia Dei extraordinaria, pro peccatis totius generis humani condignam satisfactionem exhibere. Ita Scotus in 3. dist. 20. §. contra illud, ubi ait, *Vnus purus homo potuisset satisfacere pro omnibus, si fuisset conceptus sine peccato, & habuisset summam gratiam quam Christus habuit, sicut potuisset neri de possibili*. Prob. Ut homo satisfacere valeat de condigno, sufficit, quod eliciat opus, quod sit tantæ dignitatis, quantæ indignitatis est peccatum; sed homo constitutus caput totius generis humani, gratia summa, aliisque donis supernaturalibus præditus, potuit elicere actum charitatis & obedientiæ, tantæ dignitatis, quantæ indignitatis fuit peccatum Adæ: ergo &c. Prob. minor: Ille charitatis actus haberet omnia principia, unde sic dignificari posset, opposita principis quibus indignificatum & malum fuit peccatum Adæ: ergo esset condignus & æqualis.

### 32 DE INCARNATIONE.

Consequentia patet, quia tota peccati gravitas provenit à principiis, & motivis, & circumstantiis. Prob. antecedens: Peccatum fuit tantæ gravitatis, vel ratione personæ peccantis, vel ratione Dei offensi, vel ex ipsa natura actus peccaminosi; sed hæc omnia essent in actu charitatis illius hominis puri: ergo &c. Prob. minor 1. Adamus qui est persona peccans, non erat dignior isto homine puro, quem supponimus sine peccato originali conceptum, omni gratia præditum. 2. Deus propter quem eliceretur charitatis actus, esset idem Deus quem peccatum Adæ offenderat; at Actus charitatis est magis gratus Deo, quàm peccatum displicens & dissonum. Tum quia Deus est promior ad bonum quàm ad malum: ergo opus malum non tam displicet Deo, quàm opus bonum & sanctum placet. Tum quia actus malus non est magis oppositus Deo, quàm actus bonus est ipsi conformis. Tum quia actus ex se malus non specificatur ab objecto, nempe Deo, intentiori modo quàm actus ex se bonus, qui fit propter Deum: ergo nec ex parte personæ offendentis, nec ex parte personæ offensæ, peccatum esset majus in indignitate, quàm opus illius puri hominis in dignitate: Nec ex natura peccati, nam ut expressè probatum est in 2. tom. tract. de peccatis, disput. 9. quæst. 4. peccatum non est infinitum in ratione offensæ & injuriæ: ergo non implicat de potentia absoluta, actum charitatis intendi usque ad gradum correspondentem ultimo gradui malitiæ peccati.

Confr. 1. Sicut peccatum Adæ est infinitæ gravitatis ex eo quòd fit contra Deum prohibentem comestionem esus vitæ, ita posset opus illius puri hominis esse infinitæ perfectionis, ex eo quòd respiceret Deum infinitæ perfectionis, talem actum præcipientem & volentem, elicirum cum tanta obedientia & humilitate, quanta fuit malitia, inobedientia & superbia Adæ. Ra-

tio

tio hujus rei est, quia sicut malitia crescit ex dignitate personæ offensæ; ita etiam crescit perfectio amoris, & reverentiæ, & obedientiæ ex dignitate personæ amatæ & honoratæ, cum tam defumat ac specificetur amor ab objecto, quàm odium, & tantus sit amor Dei in linea boni, quantum est odium in linea mali.

Confirm. 2. Sicut per peccatum aufertur à Deo ratio ultimi finis, ita per actum charitatis restituitur; ut est evidens: ergo ille homo purus sine peccato originali conceptus, constitutus caput totius generis humani & omnibus donis supernaturalibus præditus, condignè satisfecisset pro peccatis hominum: nam ille qui centum abstulit, dum centum reddit, condignè & perfectè æqualitate satisfacit.

Resp. Gonet. quòd eliciens actum charitatis, reddit Deo totum, quod peccatum abstulerat, actu non adæquante in valore gravitatem offensæ, non verò actu illam adæquante; & explicat solutionem: duplex (inquit) datur satisfactio, una pro re ablata, quæ vocatur restitutio; altera pro injuria illata, quæ dicitur propriè satisfactio: ad illam sufficit restitutio æquivalentis, ad hanc verò requiritur æqualitas valoris obsequii cum gravitate injuriæ; unde si plebeus aliquid à Rege auferret per rapinam, & æquivalens restitueret, satisfaceret quidem pro re ablata, non tamen pro injuria illi irrogata, quantumcumque Regi se subiiceret, eo quòd illius humiliatio in ratione satisfactionis non adæquaret injuriæ gravitatem: quia ergo actus charitatis in ratione satisfactionis & obsequii, non est æqualis in valore cum gravitate offensæ, Deo per peccatum mortale irrogatæ: nam ista in genere moris est infinita simpliciter; ille verò habet valorem & bonitatem infinitam tantùm objective & secundum quid; hinc fit, quòd licet actus charitatis affectivè reddat Deo totum quod peccator

### 34 DE INCARNATIONE.

affectivè illi abstulit per peccatum, non potest tamen dici sufficiens satisfactio, sed duntaxat sufficiens restitutio.

Contra, & probò, quòd reddat Deo actu adæquante in valore gravitatem offensæ, quod peccatum abstulerat. Restitutio rei ablatæ æquivalentis, est condigna satisfactio pro re ablata, ut fatetur Gonet. unde qui abstulit centum, & centum reddit, plenè satisfacit pro re ablata; at dum satisfactio non debet fundari in rebus datis & acceptis, nec in rebus ablatis & restituendis, sed tantum in actibus honorificis humiliationis & obedientiæ, restitutio plena est etiam plena satisfactio: v. g. si persona vilis verbis contumeliosis personam digniorem afficeret, restituere non posset nisi per retractationem, & dicendo se esse mentitum, & exponendo se manifesto vitæ periculo pro persona illa digniori, à morte aut captivitate liberanda, quæ quidem restitutio sanè esset satisfactio; & si hæc omnia faceret, non satisfaceret, si aliquam rem abstulisset, nisi eam redderet; hinc fit, quòd in actibus honorificis humiliationis aut obedientiæ, restitutio est satisfactio, & satisfactio est restitutio, non verò in rebus datis & acceptis, ablatis & restitutis: at satisfactio de qua loquimur, fundatur in actibus honorificis & obedientiæ, cum nulla sit res Deo restituenda, & ab ipsomet Deo accipienda, sed tantum actus humiliationis, obedientiæ & honoris Deo exhibendus: ergo non valet distinctio de restitutione & satisfactione, cum in hoc casu restitutio sit satisfactio, & consequenter si actus charitatis affectivè redderet Deo totum, quod peccator affectivè illi abstulerat per peccatum, nedum debet dici sufficiens restitutio, sed etiam sufficiens satisfactio, & præsertim cum ex dictis constet gravitatem offensæ non esse simpliciter infinitam, sed tantum secundum quid & objectivè, sicut actus charitatis infinitus est.

Prob.



Prob. denique; Ille purus homo satisfaceret ex iustitia: ergo exhiberet condignam satisfactionem. Consequentia patet, antecedens prob. Ille satisfacit ex iustitia, qui reddit quantum reddi potest, & quantum debitum exigit; sed ille homo de quo est quæstio, redderet Deo quantum reddi potest à peccatoribus; cum esset caput omnium, & summa gratia præditus: Nec peccatum exigeret maiorem satisfactionem, quia major est impossibilis apud homines, & ideò peccatum non exigeret aliam, cum impossibile non exigatur. Tum quia peccatores non tenerentur ad aliam satisfactionem exhibendam, cum ad impossibile nemo teneatur. Tum quia persona offensa non potest exigere satisfactionem, nisi à persona offendente; ideòque non potest exigere aliam satisfactionem, nisi illam quam peccator exhibere potest, vel quæ ex ipso extrahere potest persona offensa: ergo purus homo de quo est quæstio, exhibuisset condignam satisfactionem pro peccatis nostris.

Obj. Gonetus ex Vasquesio & Suarior, sed omitto argumenta, licet contra nostram conclusionem militent; quia ipse Gonetus ea reiicit & solvit; idcirco omittenda sunt, cum soluta sint apud ipsum. Omitto etiam primum argumentum, quod contra Scotum proponit, quia desumit illud ex infinitate offensæ peccati mortalis, & finitate valoris satisfactorii cujusvis puræ creaturæ; hinc fit, quòd cum constet ex dictis, peccatum esse formaliter finitum in ratione offensæ; sicut actum charitatis in ratione obsequii & satisfactionis, superfluum est hic ponere argumentum de verbo ad verbum, illudque solvere. Ponendum est igitur secundum.

Obj. 1. Pœnitentia non est vera & stricta iustitia, sed duntaxat pars potentialis illius: at pœnitentia non deficit à ratione strictæ & veræ iustitiæ, propter defectum stricti debi-

### 36 DE INCARNATIONE.

ti, ut patet: ergo solum propter inæqualitatem satisfactionis, quam pœnitens Deo exhibet pro peccatis propriis, & impotentiam offerendi Deo illis æqualem & condignam satisfactionem: Sicut religio non deficit à ratione strictæ justitiæ, & constituitur pars potentialis illius, ob carentiam stricti debiti ad exhibendum Deo cultum & honorem ipsi debitum, & infinitati majestatis ejus æqualem; sed propter insufficienciam & impotentiam, quæ est in homine puro ad talem cultum & honorem reddendum.

Resp. 1. Pœnitentiam esse veram & strictam justitiam, cum ad virtutem justitiæ reducatur; & peccatum, rationem propriæ & strictæ injustitiæ, essentialiter includat. Tum quia peccator in Scriptura dicitur injustus. Tum quia peccatum est contra legem, quæ justitia est. Resp. 2. argumentum valere secundum præsentem justitiam & providentiam: pœnitens enim per actus contritionis multiplicatos, & in gratia sanctificante elicitos, potest de potentia Dei absoluta, ad æqualitatem satisfacere pro peccatis suis; quia si pœnitentia non sit æqualis, hoc non provenit ex natura pœnitentiæ, nec ex impotentia intrinseca pœnitentis, nec ex infinitate peccati. Tum quia pœnitentia est actus intrinsecè bonus, ideòque potest esse tantæ dignitatis, quantæ indignitatis est peccatum. Tum quia pœnitens divina gratia adjutus, non habet minorem virtutem in linea boni, quam peccator in linea mali. Tum quia peccatum non est simpliciter infinitum, nec crefcit juxta dignitatem personæ offensæ, arithmeticè, sed tantum geometricè, ut dicunt omnes Scotistæ.

Obj. 2. & probat nullam puram creaturam posse condignè satisfacere pro culpa mortali etiam aliena, ex SS. Patribus qui peccati gravitatem ed usque extollunt, ut affirmant non po-

tuisse

tuisse nisi personam aliquam divinam pro eo satisfacere; sic Ambros. in cap. 9. ad Heb. dicens, *Tantum fuit peccatum nostrum, ut salvari non possimus aliquando, nisi unigenitus Filius Dei moreretur pro nobis.* Leo Pap. serm. 1. de Nat. *Nisi esset verus Deus, non afferret remedium, & nisi esset homo verus, non præberet exemplum.* Idem sentiunt August. Cyril. Alexandr. Basil. & D. Thom. ergo juxta doctrinam SS. Patrum, purus homo non potest Deo satisfacere ad æqualitatem pro peccatis aliorum, sed ad talem satisfactionem exhibendam requiritur necessario homo Deus, seu persona divina, in natura creata subsistens.

Resp. 1. negando consequentiam, quia SS. Patres loquuntur de homine puro, prout excludit gratiam sanctificantem & alia dona supernaturalia, seu de homine existente in peccato originali; non verò de homine puro, prout excludit dumtaxat unionem cum Deo, seu de homine justo & sine peccato originali; alias sequeretur, quòd Christus non potuisset homines redimere nisi per mortem, quòd est contra Gonetum. Resp. 2. SS. Patres loqui de necessitate conditionata, seu ex suppositione quòd Deus voluerit, ut superabundaret gratia aut medicina, ubi abundaverat delictum aut infirmitas. Resp. 3. SS. Patres loqui ad suadendam bonitatem Dei erga homines, id est, supposita divina bonitate quæ voluit hominem redimi per Creatorem, ut majoris beneficii vinculo ei devinceretur; non verò ad ostendendam impossibilitatem satisfactionis, ita ut absolutè nullus homo satisfacere valeat: ergo SS. Patres non militant contrarios. Omitto aliud argumentum, quod probat ex infinitate offensæ, nullum hominem posse satisfacere pro peccato alieno; quia, ut patet ex dictis, peccatum non est formaliter infinitum.

Ex dictis, inferes, incarnationem non esse  
absq.

### 38 DE INCARNATIONE.

absolutè & simpliciter necessariam ad salvandos homines. Tum quia purus homo potuit divinitus satisfacere. Tum quia Deus potuit salvare homines absque morte Christi. Tum quia Deus potuit relinquere homines, sicut malos Angelos: ergo incarnatio Verbi fuit necessaria ex suppositione decreti de hominibus redimendis per mortem justì, non verò absolutè & simpliciter.

Primum patet ex dictis, quibus addo cum Doctore subtili, quòd *Sicut Christus innocens homo, non debitor satisfecit, sic si placuisset Deo, potuisset unus bonus Angelus satisfacere, offerenda aliquid placitum Deo pro nobis, quod ipse acceptasset pro omnibus peccatis: quia tantum valet omne creatum oblatum, pro quanto acceptat Deus, & non plus; ita Scotus loco laudato: ergo purus homo in sensu supposito constitutus, potuisset de condigno satisfacere. Secundum etiam patet, quia Deus salvavit nos liberè, juxta illud Sap. 12. vers. 12. *Quis enim dicet tibi, quid fecisti? aut quis stabit contra judicium tuum? aut quis in conspectu tuo veniet vindex iniquorum hominum? aut quis tibi imputabit, si perierint nationes quas tu fecisti?* ergo liberè salvavit nos per mortem Christi, ex quo sequitur tertium, scilicet Deum potuisse relinquere homines sicut malos Angelos, vel salvare eos alio medio, videlicet condonando delicta.*

*Dices: Si Deus condonasset delicta sine debita satisfactione à Christo dumtaxat exhibenda, fecisset contra justitiam, ut inquit D. Anselmus lib. 1. Cur Deus homo? cap. 12. quia justitia vult peccatum puniri, & ablatum Deo honorem rependi: sed Deus non potest facere contra justitiam: ergo nec salvare nos nisi per mortem Christi. Respondeo, argumentum valere secundum præsentem dispositionem & ordinationem rerum, seu supposito decreto quo decrevit nullum fore peccatum impunitum, nec remittendum*

dum absque satisfactione: falsum verò secundum ordinationem quam Deus statuere poterat, si altero medio voluisset nos liberare à peccato; cum omnia tum physica, tum moralia à divina ordinatione pendeant, ut ait Scriptura Sap. 12. vers. 18. dicens, *Cum magna reverentia disponis nos; subest enim tibi, cum volueris, posse: quibus suadetur punitionem peccati pendere à Deo, & ipsum potuisse nos salvare alio medio, si voluisset.*

## Q U Æ S T I O II.

*An satisfactio Christi fuerit de se sufficiens & superabundans pro omnium hominum peccatis?*

**A**dvertendum est condignitatem satisfactionis Christi dupliciter sumi posse. 1. In ordine ad debitum & ad offensam. 2. In ordine ad Deum offensum aut ad Deum creditorem. Unde dum Doctor subtilis, ejusque discipuli dicunt satisfactionem Christi fuisse sufficientem, imò & superabundantem pro omnium hominum peccatis, solum ex acceptance Dei, qui tali satisfactione fuit contentus, non loquuntur de satisfactione Christi in ordine ad debitum: certum enim est, quòd ex intrinseca dignitate, & ratione Christi operantis, secluso quocumque pacto aut acceptance, fuit superabundans & excedens pro peccatis hominum; sed loquuntur de satisfactione Christi in ordine ad Deum satisfaciendum, & obligandum ad offensæ remissionem, in quo sensu nullus Theologorum concedere potest satisfactionem Christi ex sua dignitate intrinsecè obli-

obligare Deum ad remissionem offensæ, seclusa divina acceptatione: ergo Gonetus non impugnatur Scotum in hac quæst.

Dico 1. Quòd Christi satisfactio sumpta in ordine ad debitum aut ad offensam, & in ordine ad præmium, ex sua intrinseca dignitate & valore, seclusa acceptatione seu extrinseco Dei favore, fuit non solum condigna & sufficiens; sed etiam superabundans & excedens pro omnibus peccatis generis humani. Ita Scotus in 3. dist. 19. §. *in ista quæst. lib. B.* ubi ait, *Si autem illud meritum fuisset alterius personæ, tunc nec ratione operis, nec ratione operantis fuisset congruitas acceptationis illius pro infinitis.* Mastrius, Frassen, Delgadillo & alii.

Prob. 1. Satisfactio Christi Domini in ratione operis, & ex sola intrinseca dignitate personæ satisfaciens & operantis, est major quam gravitas offensæ primi hominis: ergo si satisfactio Christi sumatur in ordine ad debitum & peccatum, non solum est condigna, sed etiam superabundans & excedens. Consequentia patet. Prob. antecedens. 1. Tota offensæ gravitas oritur ex persona offendente, vel ex persona offensa; & dignitas satisfactionis ex persona satisfaciens, vel satisfacta; sed persona Christi est major persona hominum, ideoque est potentior ad influendum valorem in actum satisfactorium, quam homo ad influendam malitiam in actum peccaminosum. Deinde, satisfactio fuit ordinata in Deum, sicut offensa; idcirco persona satisfacta tam influit in actum satisfactorium, quam persona offensa in actum peccaminosum: ergo satisfactio Christi comparata cum peccato hominum & cum remissione peccati, est major ex natura sua & ratione operantis.

Prob. 2. Christus Dominus est dignior & ex se persona perfectior cæteris hominibus: ergo opera ejus sunt majora operibus hominum,

num, id est, dignior actio Christi est major in linea bonitatis, quàm indignior actio hominum in linea malitiæ, & ejus bonitas excedit hominum malitiam; sed satisfactio Christi est ejus actio dignior, & peccatum est actio indignior hominum: ergo satisfactio Christi comparata cum peccato, est ex se superabundans & excedens; peccatum verò est quædam actio purè humana; & satisfactio Christi est theandrica: ergo est major & excedit peccatum. 4. Opera Christi ex se excedunt opera illius puri hominis de quo agit quæst. præcedens; sed opera illius hominis, ex Scoto, essent condigna: ergo opera Christi sunt superabundantia pro peccatis hominum.

Confir. Deus acceptavit satisfactionem Christi Domini, quia erat condigna pro peccatis hominum, vel non? Si primum: ergo antecederet ad acceptationem, opera Christi sunt condigna. Si secundum: ergo supposita acceptatione Dei, remissio peccatorum esset mera gratia, & Christus non esset verè redemptor. Prob. Ut debitor ex justitia solvat debitum, & redemptor verè redimat & à captivitate liberet, oportet, quòd exhibeat creditori aliquid proportionatum debito: nam si accipiat valorem aliquem à creditore, ut fiat condignum; valor ille à creditore acceptus, minuit justitiam operis personæ satisfaciens, & opus satisfactorium denominat etiam creditorem & acceptantem, satisfaciens; ideòque redempti & liberati, possent considerare creditorem, ut redemptorem, cum exhibuisset pretium aut valorem pro eorum redemptione: ergo ut Christus sit solus redemptor; dicendum est, quòd exhibuit Deo opus, quod secundum se & ratione Christi consideratum antecederet ad acceptationem, erat condignum pro peccatis hominum, & dignum acceptari, ut probat illud Pauli, *Exanditus est pro sua reverentia.*

Prob. 2.

## 42 DE INCARNATIONE.

Prob. 2. Opera hominis iusti, præcisè quia  
proveniunt à gratia sanctificante, sunt de con-  
digno meritoria vitæ æternæ: nam actus con-  
tritionis quem peccator elicit gratia actuali  
adjuvante, licèt acceptetur à Deo, non est ta-  
men de condigno meritorius ex defectu gratiæ  
sanctificantis: ergo opera Christi, præcisè quia  
proveniunt à persona infinita & ab omnium gra-  
tiarum fonte, debent esse de condigno meritoria  
& satisfactoria pro peccatis, & digna accepta-  
ri, sicut opera hominis iusti. Prob. conse-  
quentia 1. Homo iustus non est sanctior Chri-  
sto, qui est omnium sanctorum princeps: er-  
go si opus ab homine iusto elicitum & ad Deum  
per charitatem ordinatum, antecederet ad  
acceptationem habeat valorem condignum &  
æqualem cum vita æterna, licèt non ha-  
beat jus ad illam (quod provenit ex pacto  
& acceptatione) opera Christi sunt etiam  
condigna, præcisè quia sunt opera Christi.  
2. Una gutta sanguinis propter unionem ad  
Verbum pro redemptione totius generis hu-  
mani sufficisset, ait Clemens V. in extrava-  
ganti *Unigenitus*: ergo sanguis Christi propter  
unionem ad Verbum & ex se, est tanti pretii &  
valoris, quanti sunt lacrymæ hominis iusti, &  
habet tantam dignitatem, quantam indignita-  
tem habebant peccata hominum. 3. ad Cor. 6.  
dicitur 3. *Empti estis pretio magno*, & Psal.  
129. redemptio dicitur, *copiosa*: ergo sanguis  
Christi ex se & ratione Christi morientis, ha-  
bet tantum valorem, quantum peccatum ex se  
exigit, ut solvatur; imò & superexcedentem &  
copiosum.

*Dices*: Hæc argumenta esse vera, supposita di-  
vina acceptatione, quæ etiam ad meritum con-  
dignum iusti requiritur.

Contra: Si redemptio Christi esset copiosa,  
& pretium esset magnum ex vi acceptationis, se-  
queretur 1. quòd res in se minima posset hoc mo-  
do



do dici pretium magnum, quod est falsum. 2. Quòd contritio peccatoris quam Deus acceptat, esset copiosa & pretium magnum, & consequenter condigna & æqualis gratiæ ad quam acceptatur, quod est falsum, cum gratia sanctificans gratis detur. 3. Quòd opera puri hominis iusti, supposito decreto de satisfactione exhibenda, potuissent de via ordinaria satisfacere de condigno, quia Deus de potentia ordinaria potuisset ea acceptare: sed hoc est contra Scotum judicantem, hoc esse impossibile de via ordinaria: ergo verba Scripturæ intelligenda sunt de operibus Christi secundum se sumptis. 4. Opera Christi habebant valorem pro debito malorum Angelorum, juxta illud Joan. 2. *Ipse est propitiatio pro peccatis nostris, non pro nostris tantum, sed etiam pro totius mundi; sed non fuerunt acceptata pro malis: ergo habent valorem sine acceptatione.*

Confirm. Sacrificia veteris legis erant ex intrinseca ratione insufficientia ad delenda peccata, ut ait Apost. ad Hebr. 10. *Impossibile enim est (inquit) sanguine taurorum & hircorum auferri peccata.* Et ex eodem Apost. sacrificium corporis Christi fuit sufficiens; ait enim, *Idea ingrediens mundum dicit; hostiam & oblationem (id est in veteri lege) noluisse, corpus autem aptasti mihi:* Noluit igitur hostias & oblationes in veteri lege, & voluit sacrificium Christi, quia istud erat condignum, illæ verò non: nam si sacrificium Christi esset ex natura sua & ratione Christi insufficient, sicut sacrificium antiquorum, Apostolus non dixisset, *Impossibile est &c.* cum acceptari potuisset, & ratione acceptationis esse sufficiens, sicut sacrificium Christi: ergo ex Apost. satisfactio Christi est ex se condigna.

Dico 2. Quòd satisfactio Christi, si sumatur in ordine ad Deum creditorem, non est con-

#### 44 DE INCARNATIONE.

condigna pro omnibus peccatis ex sua intrinseca dignitate & valore, seclusa acceptatione divina. Ita Scotus supra citatus. Prob. Ut satisfactio Christi sit condigna pro peccatis in ordine ad Deum offensum & creditorem, oportet, quod ipsa posita, Deus teneatur remittere offensam, & satisfaciens habeat jus in præmium, ut patet; sed Deus non potest strictè obligari ad aliquid præstandum, nullumque opus potest habere jus in præmium cœleste. Tum quia Deus est supremus Dominus, & nulla creatura potest eum obligare ad remittendam offensam, nisi ipse velit. Tum quia opera Christi sunt Deo debita diversis titulis: ergo non possunt obligare Deum, nisi ipse velit, ad delenda peccata. Tum quia si opera Christi sine acceptatione aut pacto obligarent Deum ad remittendam offensam, sequeretur Christum satisfacisse pro malis Angelis, quia habebant ex se valorem ad hoc condignum, quod est tamen falsum: ergo satisfactio Christi, si sumatur in ordine ad Deum offensum & creditorem, non est condigna, id est, non est sufficiens ad obligandum Deum, ut teneatur remittere offensam, seclusa acceptatione vel pacto Dei, cujus mentio habetur Isa. cap. 53. *Si posuerit animam suam pro peccato, videbit semen longævum, & voluntas Domini in manu ejus dirigetur.*

Obj. contra 1. conclusionem: Peccatum est infinitum in ratione offensæ & malitiæ, cum sit contra Deum qui est infinitus, & offensæ creseat juxta dignitatem personæ offensæ: sed satisfactio Christi est finita in ratione pretii & meriti; ut dicemus quæst. sequenti: ergo satisfactio Christi ex sua intrinseca dignitate, seclusa acceptatione Dei, non est sufficiens pro peccatis hominum; nec superabundans, cum finitum nequeat excedere infinitum.

Resp. negando majorem, ut patet ex dictis. Ad 1. prob. dico, quod licet peccatum sit contra Deum

um qui est infinitus; tamen non valet infer-  
 peccatum esse etiam infinitum. Tum quia  
 ccatum veniale est contra Deum; tamen est  
 itum. Tum quia actus charitatis est propter  
 eum, tamen est finitus. Ad 2. Dico offen-  
 m crescere juxta dignitatem personæ, geo-  
 etricè, id est, ita ut offensa contra personam  
 igniorem, sit major illa quæ sit contra perso-  
 am minùs dignam; non verò arithmeticè, ita  
 ut crescat ad proportionem & æqualitatem di-  
 gnitatis personæ offensæ: ergo licet Deus sit in-  
 initus, offensa contra ipsum non debet esse in-  
 finita sicut Deus, sed tantum major ea quæ sit  
 contra personam creatam: nam quemadmodum  
 amor quo Deum diligimus, non est infinitus si-  
 cut Deus, nec crescit arithmeticè juxta digni-  
 tatem Dei, sed tantum geometricè, id est, est ma-  
 jor amore quo diligimus creaturam, quia Deus  
 est major creatura; ita similiter peccatum quo  
 offendimus Deum infinitum, non debet esse infi-  
 nitum; sed tantum majus peccato quo offendi-  
 mus creaturam, quia Deus est major.

*Dices:* Peccatum est magis vitandum quàm  
 quodcumque aliud malum, imò quàm omnia  
 mala simul sumpta: ergo est infinitum in linea  
 mali. Resp. negando consequentiam: Tum  
 quia peccatum veniale est magis vitandum  
 quàm omnia mala physica; tamen peccatum  
 veniale non est infinitum in linea mali & offen-  
 sæ, ut fatentur adversarii. Tum quia pecca-  
 tum est malum in genere moris, cætera verò  
 mala sunt mala in genere physico: ergo ut  
 peccatum sit magis vitandum quàm omnia  
 mala physica, non requiritur, quòd sit infi-  
 nitum, quamvis excedat infinita mala diversi  
 generis: nam actus charitatis est major quàm  
 omnes actus aliarum virtutum, & excedit omnia  
 accidentia, tum supernaturalia, tum naturalia,  
 quorum numerus infinitus est; tamen habitus  
 aut actus charitatis non est infinitus: Actus vi-  
 talis

talis est major ceteris accidentibus naturalibus, tamen non est infinitus: ergo &c.

Obj. 2. Si satisfactio Christi fuisset ex se superabundantis valoris pro peccatis omnium hominum secluso pacto aut acceptatione, sequeretur, quod opera nostra essent superflua, nihilque addendum esset passioni Christi Domini; sed hoc est falsum: ergo. Prob. sequela: Posita satisfactione æquali, nulla alia pro debito exigenda est: ergo si satisfactio Christi esset ex se æqualis, imò & superabundans, nostra esset superflua.

Resp. negando sequelam: Nam ut satisfactio Christi sit nobis meritoria, oportet, quod nobis applicetur, & quod de fontibus Salvatoris hauriamus aquas per Sacramenta, aut per contritionis & dilectionis actus, aut per opera pœnalia; ergo licet posita Christi satisfactione, ponatur æquale pretium pro peccatis nostris, non valet inferre opera nostra esse superflua, cum per ipsa nobis applicemus opera Christi, ejusque merita, quemadmodum causa particularis per suum consortium sibi applicat influxum causæ universalis.

Obj. 3. Christus non satisfecit de condigno pro beneficiis acceptis in humanitate, ut patet apud omnes: ergo non satisfecit de condigno pro debito. Resp. negando consequentiam. Tum quia beneficia quæ Christus accepit, in linea boni & virtutis, sunt majora quàm peccata hominum in linea mali. Tum quia beneficia sunt id quo satisfecit pro peccatis; unde ut pro istis satisfaceret, indigeret aliis, & sic in infinitum; beneficia enim sunt principium satisfaciendi & merendi, sicque sub merito aut satisfactione cadere non possunt: ergo licet Christus non satisfecerit pro beneficiis quæ à Deo recepit, potuit tamen pro peccatis satisfacere.

Obj. 4. Christus non meruit unionem hypostaticam: ergo non meruit nec satisfecit pro omni-

in quibus peccatis. Prob. consequentia: Per peccatum, contractum fuit debitum carendi. Immo decreto de incarnatione, seu unione humanitatis cum Verbo. Resp. negando consequentiam, ad cuius prob. nego antecedens: Quia ipsum decretum de incarnatione, præcedit revelationem peccati, & hominum redemptionem, ut dicemus infra: ergo carentia hujus decreti non debebatur naturæ peccato infectæ, nec peccatum eam meruit; aliàs meruisset etiam destructionem omnium entium existentium, & omnium quæ Deus creare decreverat propter gloriam suam.

- Obj. 5. contra 2. conclusionem: Offensa secluso pacto habet condignitatem in ordine ad Deum punientem: ergo satisfactio Christi habet etiam condignitatem in ordine ad Deum satisfaciendum, secluso pacto; alioquin peccatum esset validius quàm opera Christi. Resp. negando antecedens, quia Deus non habet jus, ut tali vel tali pœna peccatum puniat, independentem à lege divina qua statuit & ordinavit peccatum tali pœna esse puniendum; unde quamvis peccatum ex se habeat condignitatem ad pœnam seclusa lege Dei, non habet tamen condignitatem ad talem pœnam, nec obligat Deum ad puniendum tali pœna, independentem à divina voluntate.

### Q U Æ S T I O III.

*An satisfactio Christi sit valoris simpliciter infiniti?*

Certum est apud omnes, meritum Christi esse extensivè infinitum, cum sufficientem valorem habeat pro peccatis numero infiniti.

## 48 DE INCARNATIONE.

finitis, & sic infinitus Ecclesiæ thesaurus. Unde difficultas est, an sit intensivè, formaliter & simpliciter infinitum, non in ratione entis vel operis, seu secundum entitatem physicam, sed in ratione meriti & pretii, seu secundum moralem æstimationem quam recipit à persona Verbi?

Dico igitur satisfactionem Christi non esse valoris simpliciter & intrinsecè infiniti, sed tantum extensivè & objectivè. Ita Scotus in 3. dist. 19. quem sequuntur Scotistæ omnes. Prob. 1. ratione: Velle animæ Christi non est tanti valoris, nec pretii, nec acceptabilitatis aut æstimationis apud Deum Patrem, nec apud homines, quanti valoris aut pretii est velle Verbi divini: ergo velle animæ Christi, seu actus voluntatis humanæ Christi, quibus meruit, non sunt valoris simpliciter & intrinsecè infiniti, sed tantum extrinsecè & secundum quid. Consequentia patet, nam opus quod est infinitæ æstimationis, aut valoris simpliciter, non potest excedi in valore, cum nullum opus majorem valorem habere valeat quam infinitum. Prob. antecedens 1. Velle animæ Christi est physicè finitum, creatum & dependens sicut voluntas humana; velle autem Verbi divini est substantialiter infinitum, independens & increatum: ergo istud velle verbi, *Ecce ego, mitte me*, est majoris pretii & valoris, quam istud velle animæ Christi, *Pater ignosce illis*, apud Deum Patrem & apud homines, cum valor rei in genere moris, à valore ejusdem in genere physico proveniat. 2. Velle aut opus animæ Christi non est tam gratum Deo & acceptum, quam velle Verbi: ergo non est tanti valoris, nec tanti pretii. 3. Velle aut opus voluntatis humane Christi est theandricum, & velle Verbi est merè divinum: ergo velle Verbi, *Ecce ego, mitte me*, excedit in valore, & æstimatione, & acceptabilitate apud Deum Patrem, velle & opus animæ Christi.

risti; *Pater ignosce illis*, & consequenter  
era Christi non sunt intrinsecè & simpliciter  
intrinsicæ valoris, sed tantùm extrinsecè & secun-  
dum quid.

Confirm. Si Spiritus sanctus humanitatem as-  
sumeret, opera quæ in humanitate eliceret, es-  
sent tantæ valoris, pretii aut æstimationis, quan-  
tæ valoris sunt opera Christi: ergo opera Chri-  
sti non sunt intrinsecè & simpliciter infiniti valo-  
ris, sed tantùm extrinsecè. Prob. consequentia:  
non possunt dari duo simpliciter infinita realiter  
distincta, cum de ratione infiniti sit non habere  
superius, nec æquale, & sibi indentificare om-  
ne aliud ejusdem ordinis & perfectionis: ergo  
omne meritum Spiritus sancti, si carnem assu-  
meret, esset æquale merito Christi, & ex utrius-  
que meritis resultaret majus meritum, certum  
est, quod meritum Christi non est intrinsecè &  
simpliciter infinitum.

Resp. Gonet. n. 77. quod licet infinitum phy-  
sicè, & in genere entis non possit esse nisi unum,  
infinitum tamen in aliquo genere, multiplicari  
potest, ut docet S. Doctor; cum ergo satisfac-  
tio Christi (inquit) sit infinita solum in aliquo  
genere, nimirum in genere moris & in ratione  
satisfactionis, non verò physicè & in genere en-  
tis, non repugnat posse dari aliam satisfactionem  
ibi æqualem, qualis esset satisfactio alterius per-  
sonæ divinæ subsistentis in aliena natura, vel  
non æqualem, qualis est satisfactio Angeli, vel  
puræ hominis.

Contra 1. Si infinitum physicè non possit  
esse nisi unum, hoc provenit ex natura infini-  
tatis, ratione cujus includit omnem perfectio-  
nem illius generis: ergo si satisfactio Christi sit  
infinita in genere moris & in ratione satisfac-  
tionis, ut vult Gonet. oportet, quod infini-  
tas illius satisfactionis includat omnem perfe-  
ctionem ejusdem generis, moris scilicet & sa-  
tisfactionis; allàs non esset infinita simpliciter.

in linea satisfactionis; unde si infinitum physicè & in genere entis, non possit esse nisi unum, quia oportet, quòd includat omnes perfectiones quæ competunt enti Physico, oportet etiam, quòd infinitum in genere moris & satisfactionis, nequeat esse nisi unum, cum includere debeat omnes perfectiones satisfactioni morali convenientes. 2. Infinitum debet excedere cætera quæ sunt in linea, in qua est infinitum: v. g. si domus aliqua esset pretii infiniti, nulla alia domus posset esse majoris pretii, nec æqualis. Tum quia infinitum est incomparabile. Tum quia summum positivè, est illud quod in sua linea non exceditur, nec habet æquale, licèt illud habere possit: ergo infinitum in sua linea nequit habere æquale, & consequenter tam implicat dari duo infinita in genere moris, quàm in genere entis. 3. De ratione intrinseca infiniti est excludere rationem partis: sed si darentur duo infinita in genere moris, haberent rationem partis; cum simul in unum copulari posset, & unam satisfactionem aut unum pretium efficere: ergo non essent duo infinita, sed unum, quod est contra suppositum. Tandem, omnes repugnantia quæ dicuntur de illis, de istis etiam dicuntur: ergo, &c.

Prob. 2. Christus non satisfecit Deo pro peccatis hominum in quantum Deus, sed in quantum homo. Tum quia satisfecit per mortem & passionem, & mortuus est in quantum homo. Tum quia persona satisfaciens, ut talis, est inferior & subdita illi cui fit satisfactio. Tum quia si satisfecisset ut Deus & secundum divinitatem, Pater & Spiritus sanctus pro nobis satisfecissent, sicut Filius: sed Christus in quantum homo non potuit operationibus suis satisfactoriis communicare valorem infinitum. Tum quia ut homo, est agens finitum, licèt cæteris dignius. Tum quia non potest communicare tantum valorem, quantum communicasset, si ut Deus

satis-



## DE INCARNATIONE: 51

atisfecisset: ergo satisfactio Christi non potuit  
 sie valoris infiniti simpliciter & intrinsecè.

Resp. Gonet. quòd si *Ly in quoniam* redupli-  
 et supra principium *quo* & formale satisfactio-  
 is, Christus satisfecit in quantum homo;  
 verò reduplicet supra principium *quod*,  
 icit ipsum satisfecisse ut Deum; subindeque  
 otuisse communicare valorem infinitum sim-  
 pliciter suis operationibus satisfactoriis, cum  
 aliorum satisfactionis præcipuè à principio *quod*  
 desumatur.

Contra 1. Gonetus tom. 1. disp. proæm. art.  
 . ait, quòd virtus causæ remotæ & radicalis mo-  
 dificatur, determinatur & veluti deprimatur per  
 influxum & operationem causæ proximæ & im-  
 mediata: sed Verbum divinum influit aut  
 communicat valorem operationibus satisfacto-  
 riis mediante humanitate quæ est principium  
*quo*, proximum & formale satisfactionis, ut fa-  
 cetur Gonet. ergo oportet, quòd influxus aut  
 communicatio Dei modificetur, determinetur  
 & veluti deprimatur per influxum aut commu-  
 nicationem humanitatis; subindeque valor com-  
 municatus non est infinitus. 2. Principium *quod*  
 igitur juxta mensuram & virtutem principii *quo* &  
 formalis; v. g. dum Christus intelligit intellectu  
 humano, intellectio non est infinita ut princi-  
 pium *quod*, nempe ut persona intelligens, sed fi-  
 nita ut principium *quo*, nimirum intellectus hu-  
 manus. Si Deus ageret per potentiam creatam  
 & limitatam, effectus esset naturalis & limitatus:  
 Aqua calida ut sex, nō potest influere in aquam,  
 calorem ut octo: ergo valor operum Christi non  
 desumitur à principio *quod*, nempe à Deo, sed  
 à principio *quo*, seu humanitate.

Contra 3. Si natura divina subsisteret sub-  
 sistentia humana, sicuti natura humana sub-  
 sistit in Christo subsistentia Verbi, certum est  
 quòd operum valor non desumeretur à suppo-  
 sito, seu à principio *quod*, sed à natura, nec

esset finitus, sed infinitus: ergo à pari opera Christi non desumunt valorem à persona aut à principio *quod*, sed à principio *quo* & formali. 4. Id quod Deus communicat operibus Christi, nequit esse intentius, nec majus communicatione, aut unione Dei cum homine, quia communicat ratione unionis: sed Deus communicatur aut unitur homini modo finito, hominique conveniente, cum Deus se habeat per modum termini, ut dictum est: ergo valor communicatus, aut influxus à Deo derivatus, nequit esse intensivè & formaliter infinitus.

Prob. 3. Christus non potuit plus mereri, quam Deus potuit præmiare: ergo meritum Christi non est intrinsecè & formaliter infiniti valoris. Antecedens patet. Tum quia ex possibilitate præmii sequitur possibilitas meriti. Tum quia inter præmium & meritum est necessaria proportio. Tum quia Christus non est Deo major. Prob. consequ. 1. Deus non potest conferre gratiam vel gloriam intrinsecè & formaliter infinitam, ut advertit Mastrius hic n. 317. quia quidquid Deus producat tanquam præmium creaturæ conferendum, erit intrinsecè finitum; aliàs sequeretur, quòd ille qui præmiaretur tali gloria, frueretur tanta gloria aut mercede, quanta Deus fruitur: ergo si Deus nequeat dare præmium infinitum, certum est, quòd Christi meritum non est intrinsecè infinitum, vel quòd Christus plus meruit quam Deus præmiare potuit, cum infinitum sit majus finito: sed hoc est falsum: ergo Christi meritum est formaliter finitum sicut præmium. 2. Si Deus conferre posset creaturæ præmium intrinsecè infinitum, exhauriret potentiam præmiandi: ergo ex impossibilitate præmii infiniti simpliciter, infertur meritum Christi non esse simpliciter infinitum, sed tantum extrinsecè. 1. ratione suppositi divini. 2. ratione peccati quod est extrinsecè infinitum. 3. tandem,

parte divinæ acceptationis, scilicet quia Deus ceptat illa Christi merita pro salvandis infinitis hominibus, si tot occurrerent salvandi. *Præced*, Deus potuit plus præmiare, quàm Christus potuit mereri. Tum quia opera Christi ite revera theandrica, sed opera Dei sunt divi. Tum quia major perfectio est tribuenda o, quàm Christo: ergo opera Christi non t simpliciter infinita in ratione meriti & satisfactionis. Prob. consequentia: Nullum potest i præmium excedens meritum infinitum: ex ex excessu Dei in ratione præmiantis, seu emii ex parte Dei acceptantis opera merito, insertur finitas Christi merentis aut satisfantis, seu meriti Christi, cùm infinitum simpliciter excedi nequeat.

Obj. 1. Gonetus ex Clemente VI. in extravatic, *Vnigenitus*, de penitentiis & remissionib, ubi affirmat unicam sanguinis Christi guttun propter unionem humanitatis cum Verbo, o totius generis humani redemptione sufficere potuisse, ubi nota verba illa *propter unionem*, e aperte declarant merita & satisfactiones Christi fuisse infiniti valoris ab intrinseco, & a propter acceptationem Dei extrinsecam. Ita etiam, Pontificem ibidem asserere, ob tati infinitatem meritorum & satisfactionum Christi, non esse metuendum, ut peccatorum multitudo exhauriantur: verba ejus sunt, *Deus consumptione* (scilicet thesauri Ecclesiæ) *diminutione*, non est aliquatenus formidandum ppter infinita merita Christi: Si autem illa non nt valoris simpliciter & ab intrinseco infiniti, posset formidari, ne peccatorum multitudinem exstinguerentur aut consumerentur: o, &c.

Resp. Autoritatem Clementis VI. probare Christi meritum esse infinitum & infiniti valoris, non quidem intrinsecè & simpliciter, seu ex & ex vi personæ infinitæ, licet addat *propter*

*unionem ad Verbum*; sed extrinsecè, quia persona infinita influit in merita Christi, juxta mensuram humanitatis, quæ est principium quo. Unde quamvis persona sit simpliciter infinita, cum natura humana sit intrinsecè finita; sequitur, quòd merita Christi sunt intrinsecè finita; Et propter unionem ad Verbum sunt infinita solum extrinsecè, suntque sufficientissima pro solvendis omnibus hominibus: idcirco non abs re Clemens VI. recurrit ad unionem, ut suadeat præstantissimum fuisse Christi meritum, & sufficientissimum pro peccatis omnium hominum. *Præterea*, Christi merita, propter unionem, à Deo acceptantur tanquam pretium ad remittendam penam omnibus peccatis debitam: ergo non est aliquatenus formidandum propter infinita Christi merita. Omitto secundum argumentum probans conclusionem esse Doctoris Angelici.

Obj. 2. Satisfactioni quæ in valore non est simpliciter infinita, vis satisfactoria pro culpis syncategorematicè infinitis competere nequit; at satisfactio Christi gaudet vi satisfactoria sufficiente pro peccatis syncategorematicè infinitis: ergo in ratione valoris satisfactorii est infinita simpliciter. Minor est certa, quia si satisfactio Christi talem vim non haberet, ejus sufficiencia in determinato numero peccatorum terminaretur, & consequenter posset formidari, ne in tantum multiplicarentur peccata, ut terminum præfixum excederent, & satisfactio Christi extingueretur, quod repugnat verbis Clementis VI. supra relatis. Major verò sic ostenditur: Vis effectiva physica effectuum inæqualis perfectionis usque in infinitum syncategorematicè, non potest causæ non infinitæ physicè convenire; unde omnipotentia Dei infinitatem ex eo colligunt Theologi, quòd ad effectus syncategorematicè infinitos inæqualis perfectionis extenditur: ergo pariter vis effectiva moralis effectuum inæqualium sine termino, convenire nequit  
actio-

Etioni quæ in genere moris simpliciter infinita non est.

**Confirm.** Effectus nequit causæ perfectionem excedere: ergo effectus infinitus nequit in causa finita contineri, & consequenter ut aliqua causa habeat vim causativam effectuum in infinitum multiplicabilium, debet habere infinitatem physicam, si continentia sit physica; moralem vero, si continentia sit moralis; subindeque si satisfactio Christi gaudeat vi satisfactoria sufficiente pro culpis syncategorematicè infinitis, continebit valorem moralem simpliciter infinitum: Sicut si esset pecunia tanti valoris quæ sola sufficeret ad emendum quascumque res, quantumvis in valore & pretio crescerent, illa requireret infinitum valorem; & charitas quæ immutata manens, potens esset elicere actus intentiones & intentiones in infinitum, esset actu infinitè intentia.

**Resp.** negando majorem; quia sufficientia extrinsecè & extensivè infinita, non est terminabilis nec reducibilis ad terminum, neque ad determinatum numerum, cum determinatus numerus sit extrinsecè & extensivè finitus, & consequenter non posset forpidari, ne in tantum multiplicarentur peccata, ut terminum præfixum excederent, & satisfactio extingueretur; inextinguibile siquidem & interminabile est pretium satisfactionis extensivè & extrinsecè infinitæ: ergo ut satisfactio Christi sit sufficiens pro culpis syncategorematicè infinitis, non debet esse simpliciter & intrinsecè infinita; sed sufficit, quod ut infiniti valoris extensivè & extrinsecè; seu quod ratione alicujus circumstantiæ, seu personæ divinæ, aut pacti, careat fine & termino in solvendis culpis. Ad prob. majoris, nego consequentiam & paritatem: Quia vis effectiva physica effectuum continet in se & ex natura sua ipsos effectus; at vis effectiva moralis non eos continet in se & ex natura sua, ut

pātet in moneta quæ non continet ex natura sua effectus quos causat ex voluntate Principis; idcirco licet Theologi inferant omnipotentiam divinam esse infinitam, quia extenditur ad effectus syncategorematicè infinitos inæqualis perfectionis, non valet tamen inferre merita Christi esse intensivè infinita, quia ad effectus syncategorematicè infinitos extenduntur, quia omnipotentia est causa physica, physicè effectiva effectuum; merita verò sunt causa moralis & ex divina ordinatione, & consequenter cum non contineant actu & physicè remissionem peccatorum, sicut omnipotentia continet creaturas, non debent esse intrinsecè infinita sicut omnipotentia, sed tantum extrinsecè & extensivè, quoniam infinitum syncategorematicum exceditur, extensivè & extrinsecè infinito.

Ad confirm. distinguo consequentiam: Effectus infinitus actu & simpliciter, nequit in causa simpliciter finita contineri, concedo; Effectus infinitus potentialiter & secundum quid, nequit in causa extensivè infinita moraliter contineri, nego: Unde ut satisfactio Christi gaudeat vi satisfactoria sufficiente pro culpis syncategorematicè infinitis, non requiritur, quòd contineat valorem simpliciter infinitum, sed sufficit, quòd valor ejus sit extensivè & extrinsecè infinitus, id est, quòd ratione alicujus circumstantiæ, careat termino & limitatione, sicut v.g. ut pecunia sufficiat ad emendum quascumque res, quantumvis in valore & pretio crescerent, non requiritur, quòd valor ejus sit simpliciter infinitus, sed sufficit, quòd ratione alicujus circumstantiæ, scilicet personæ ementis vel pacti, sit infinitus, & extensivè infinitum.

Resp. 2. cum alijs Scotistis, ut satisfactio Christi sit sufficiens pro culpis syncategorematicè infinitis, sufficere, quòd sit superioris ordinis ad offensam, cum res inferioris ordinis, quamvis infi-

infinita, adæquare nequeat id quod in superiori ordine existit, ut patet in omnibus speciebus & individuis materialibus, quæ non adæquant perfectionem naturæ humanæ.

Resp. 1. Gonet. responsionem esse falsam in moralibus, ut constat (inquit) in actibus misericordiæ vel justitiæ, qui specificè inferiores sunt actui charitatis; & tamen plures actus repetiti misericordiæ & justitiæ, vel actus magnæ intentionis, adæquare & excedere possunt in valore meritorio unum actum charitatis. Peccatum etiam charitati oppositum, est gravius specificè peccatis oppositis aliis virtutibus; & tamen peccata aliis virtutibus opposita, sæpius repetita, vel intensissimo conatu patrata, excedere possunt in gravitate unum peccatum contra charitatem commissum: ergo si valor satisfactionis Christi non sit infinitus simpliciter, quamvis sit superioris ordinis ad offensas ab hominibus commissas, poterit tamen offensarum multitudine adæquari, & consequenter extinguui. *Secundò*, esto (inquit) infinita ordinis inferioris nequeant phylicè adæquare rem ordinis superioris, in illa tamen, nisi phylicè sit infinita, efficienter contineri non possunt; aliàs ex continentia effectuum sine termino in divina omnipotentia, non colligeretur ejus infinitas; sed solum quòd esset in ordine superiori ad res omnes creabiles constituta: ergo pariter esto infinita ordinis inferioris in genere moris, adæquare nequeant id quod existit in ordine superiori, in illo tamen moraliter effectivè contineri non poterunt, nisi in illo ordine illud infinitum sit; unde cum satisfactio condigna pro culpis mortalibus syncategorematicè infinitis, contineat effectivè moraliter remissionem peccatorum sine termino, non solum est ordinis superioris, sed etiam in genere moris simpliciter infinita.

Contra: Responsio non valet, quia plures

actus misericordiae & iustitiae sunt inferiores actui charitatis, secundum excessum intensivum, suntque in eodem supremo ordine & genere virtutis. Peccata etiam sunt graviora secundum excessum intensivum; & sunt in eodem ordine & genere malitiae, & diversificantur per magis & minus intensum; ideòque possibile est quòd actus inferiores intendantur actuum multiplicatione, vel intensissimo conatu, usque ad gradum superioris: At peccata hominum & satisfactio Christi sunt in diversis lineis oppositis, & genericè diversis; satisfactio enim non est superior ex excessu intensivo dumtaxat, sed ex ordine generico & oppositionis. Unde sicut impossibile est, quòd actus spei naturalis, aut fidei humanae adaequant in valore meritorio unum actum spei supernaturalis aut fidei infusae, nec quòd omnes actus visionis ocularis adaequent in laude & valore visionem intellectualem; ita similiter impossibile est, quòd peccata syncategorematicè infinita adaequent satisfactionem Christi, quae est superioris ordinis secundum genus & secundum ordinem oppositionis ad offensas hominum; nam ex Goneto tom. r. tract. de visione disput. 3. num. 26. ideò intellectus non potest videre Deum sine lumine gloriae per assistentiam specialem, quia (inquit) improprio quae est inter intellectum & visionem, non provenit ex excessu velut intensivo, sed ex eo, quòd visio beata sit operatio ordinis altioris & divini: ergo cum improprio quae est inter peccata & satisfactionem Christi, non proveniat ex solo excessu intensivo, ut patet; sed ex eo quòd satisfactio sit in ordine superiori & altiori, & theandrico, sequitur, quòd peccata per multiplicationem nequeunt eam adaequare in valore meritorio. Quantum ad 2. responsionem nihil dico, quia rejicitur ex dictis supra in nostra responsione ad confirmationem:

Obj. denique. Tantò major est valor satisfac-



factionis, quāto major est dignitas personæ satisfaciētis; sed dignitas personæ satisfaciētis est simpliciter infinita: ergo &c. Minor est certa de fide: Major verò sic ostenditur: Satisfactio pro offensa seu injuria, de qua hic est sermo, fit per exhibitionem honoris & reverentiæ; sed honor est major, quò dignior est persona honorans, qua de causa honorari à Rege, magis æstimatur quàm honorari ab equite, & magis ab hoc, quàm à plebejo, quia honor est in honorante: ergo tantò major est valor satisfactionis, quāto major est dignitas personæ satisfaciētis.

Resp. Majorem esse veram secundum proportionem Geometricam, non autem secundum gradum, nec secundum proportionem Arithmeticam, hoc est, æqualem dignitatem cum persona satisfaciēte participando; unde licet persona Christi sit dignitatis simpliciter infinitæ, cum satisfactio non crescat arithmetice, seu secundum gradus dignitatis personæ satisfaciētis, sed tantum geometricè, id est, taliter, quòd si persona satisfaciens sit superior, illius etiam satisfactio satisfactionem personæ inferioris excedat, sequitur, quòd non est infinita simpliciter sicut persona, sed tantum quòd est major satisfactionibus aliarum personarum, sicut satisfactio regis est major satisfactione aliorum hominum; non verò tantæ dignitatis, quantæ dignitatis est persona Regis.

Resp. Gonet. contra sic: Si satisfactio non crescit arithmetice, sed tantum geometricè ad incrementum dignitatis personæ satisfaciētis, poterit adeò crescere satisfactio puræ creature, ut in valore & dignitate, Christi satisfactionem adæquet; sed hoc dici nequit: ergo. Sequela majoris prob. argumento ad hominem, desumpto ex principiis adversariorum (inquit) qui docent, quòd offensa non crescit arithmetice ad incrementum personæ offensæ, sed solum geometricè, ex quo inferunt offensa

## 60 DE INCARNATIONE.

Sam contra Deum commissam, tantæ gravitatis non esse, ut pro illa à pura creatura, condigna satisfactio exhiberi non possit. Prob. sequela: Si enim distantia personæ divinæ offensæ à persona creata satisfaciēte, non obstat, quominus satisfactio adæquare possit offensam, quia persona cui irrogatur, non dat illi infinitatem, etiam distantia personæ Christi satisfaciētis à persona satisfaciēte creata, impedire non poterit, quin satisfactio creaturæ adæquare valeat Christi satisfactionem; quandoquidem persona infinita satisfaciens, juxta adversarios, non dat satisfactioni suæ valorem infinitum.

Contra: Nam sequela est falsa, quia cum persona Christi à qua merita aliquam denominationem desumunt & dignitatem tanquam à principio *quod*, sit dignior persona creata, sequitur, quod nulla satisfactio puræ creaturæ potest in valore adæquare satisfactionem Christi. Ad prob. nego paritatem; nam persona Christi satisfaciētis se habet respectu operis satisfactorii ut principium *quod*, sicuti persona creata se habet respectu sui operis; unde cum persona Christi sit dignior quam persona creata, & existat in ordine altiori & superiori ad personam creatam, certum est, quod nullum opus puræ creaturæ potest in valore adæquare opus Christi, quia nulla persona creata potest tam influere in opus suum, nec illud tam dignificare, quam persona Verbi influit & dignificat opera Christi; licet tam distet persona Christi à persona creata, quam persona divina offensa distat à persona creata satisfaciēte; cum excessus non proveniat ex objecto, sed ex principio *quod*, non arithmetice, ut dixi supra, sed geometricè.

Confirmatur: Valor operationis non debet magis crescere ex dignitate personæ, quam valor visionis ex dignitate objecti; hæc quippè accipit nobilitatem ab objecto *quod*, sicut illa seu  
ope-

operatio, à persona quæ est principium quod :  
 alioquin visio objecti perfectioris non esset præ-  
 stantior visione objecti imperfectioris, quod est  
 falsum; sed visio licet crescat ex dignitate obje-  
 cti, ita ut visio objecti perfectioris sit perfectior  
 visione objecti imperfectioris, tamen non cres-  
 cit arithmetice, ita ut visio objecti infiniti sit in-  
 tensivè & simpliciter infinita sicut objectum, &  
 infinite perfecta, ut patet in actu visionis bea-  
 tificæ, qui non est in eodem gradu perfectionis  
 in quo est ejus objectum, utpotè Deus visus :  
 ergo opera satisfactoria Christi, licet crescant  
 ex dignitate suppositi divini, tamen non cres-  
 cunt arithmetice, ita ut sint simpliciter & in-  
 tensivè infinita sicut suppositum, sed solum geo-  
 metricè, ita ut sint perfectiora operibus puri  
 hominis; quin inde sequatur, satisfactionem pu-  
 ræ creaturæ posse adæquare satisfactionem Chri-  
 sti, quia persona Christi semper remanet di-  
 gnior persona creata.

---

## Q U Æ S T I O . IV.

*An satisfactio Christi fuerit de  
 rigore justitiæ?*

**D**ico, satisfactionem Christi fuisse de toto  
 rigore justitiæ. Hæc conclusio est Pon-  
 cii, Frassen & aliorum Scotistarum, & videtur  
 conformior principiis Scoti. Prob. Nam ex  
 Doctore, opera satisfactoria Christi fuerunt ta-  
 lia in ordine ad debitum, ut eisdem justitiæ  
 divina contenta esse debeat, nec possit aliquid  
 amplius in rigore exigere pro sui juris læsi re-  
 paratione, etiam posito decreto de satisfactione  
 de condigno exhibenda. Tum quia sunt superas-  
 biles.

## 62 DE INCARNATIONE.

bundantia. Tum quia nullum opus majus potest Deo exhiberi pro peccati reparatione: ergo Christus, juxta Doctoris principia, satisfecit de toto rigore juris. Prob. consequentia: Satisfactio rigorosa est illa quæ est æqualis debito, & quæ est tanta ex se, quanta exigere potest à creditore, secundum totum justitiæ rigorem; debitor enim dicere potest, Solvi debitum secundum leges strictæ & rigorosæ æquitatis aut justitiæ, dum tantum solvit, quantum debebat, nec debuit plus exhibere secundum leges; sed Christus dum pro peccatis nostris satisfecit, tantum solvit, quantum exigere poterat Deus creditor, secundum justitiæ rigorem: exhibuit enim premium ex se æquale, condignum, imò superabundans, ut ait Doctor Proclus Cizicenus orat. de nat. cap. 7. *Pro nostris peccatis ejusmodi impensum fuit premium, quod exactum debitum ad justitiæ amissum exæquaret.* Et Paulus ad Rom. 3. ait, *Quem proposuit Deus ad ostensionem justitiæ:* ergo satisfecit de toto rigore justitiæ; plus enim dare non potuit, nec Deus plus exigere debuit secundum justitiam, peccatorem ad satisfactionem deputantem: non erat enim, unde Deus eum recusaret, quia satisfactio Christi excedebat debitum, & fuit exhibita secundum justitiam commutativam, quæ dicitur rigorosa, ut patet in emptione & venditione.

Prob. 2. Satisfactio Christi Domini habuit omnes conditiones ad rigorosam satisfactionem requisitas: ergo fuit de toto rigore justitiæ & ad strictos juris apices exhibita. Consequentia patet, nec melius, nec aliter probari potest, ut ait Gonet. quàm examinando seorsim & in particulari singulas conditiones, & solvendo argumenta quæ adducuntur ad ostendendum aliquam ex illis satisfactioni Christi non competere.

Obj. 1. Ut satisfactio sit de toto rigore justitiæ, & ad strictos juris apices exhibeatur, oportet,

tet, quòd sit ad alterum; qua ratione ait Arist., inter Patrem & Filium, Dominum & Servum, non potest esse rigorosa justitia, quia perfecta justitia perfectam injuriæ alteritatem includere debet; sed satisfactio Christi non fuit ad alterum; nam satisfecit Deo, & ipse est Deus: ergo, &c.

Resp. distinguendo majorem: Ut satisfactio sit rigorosa, oportet, quòd sit ad alterum, alteritate personæ, nego majorem; Alteritate naturæ, concedo majorem: Distinguo similiter minorem; Satisfactio Christi non est ad alterum alteritate personæ, concedo; Alteritate naturæ, nego minorem, & consequentiam. Quòd autem ad satisfactionem rigorosam sufficiat, quòd sit ad alterum alteritate naturæ, sic evinco. 1. Distinctio duarum naturarum existentium, sufficit, ut sit vera & rigorosa injuria aut offensa: ergo cum Christus ut homo & secundum naturam humanam sit alter & distinctus à Deo offenso, potuit satisfacere de toto rigore juris. Consequentia patet, nam non potest requiri major alteritas ad injuriam, quàm ad satisfactionem. Prob. antecedens 1. Si Verbum assumpsisset in unitate suppositi duas numero naturas humanas, certum est, quòd una potuisset injuriam inferre alteri: ergo naturarum alteritas in eodem supposito, sufficit, ut sit vera & rigorosa injuria. 2. Christus ut homo erat propriè servus, ut constat ex Apost. & minor Patre & Deo: ergo potuit verè & rigorosè satisfacere Deo, cujus erat servus, & quo erat minor, cum non requiratur major distinctio ad servitutem & ad minoritatem, quàm ad satisfactionem. 3. Obedientia & religio debent esse ad alterum, sicut justitia: sed Christus fuit verè obediens: ergo potuit etiam esse verè & propriè satisfaciens. 4. Si duæ personæ essent in una natura, certum est, quòd una non posset alteri rigorosè satisfacere. Ratio est >

## 64 DE INCARNATIONE.

est, quia ibi esset unica voluntas, unica libertas, unicum agens formale: ergo cum duarum naturarum in una persona, sint duæ voluntates, duæ libertates, duo agentia formaliter, sequitur, quod alteritas naturarum sufficit ad rigorosam satisfactionem. Unde Aristoteles loquebatur de justitia quæ inter homines reperitur, ubi datur semper distinctio personarum, non verò de justitia in proprio conceptu & in propria exigentia considerata; sic enim diversitatem naturarum personarum postulat.

Obj. 2. Satisfactio rigorosa non fundatur in gratia creditoris; quando enim aliquis dat alteri, unde debitum sibi solvat, tunc illa solutio non potest censi ex rigore justitiæ, quia gratia minuit justitiam; sed satisfactio Christi fundatur in gratia Dei creditoris, scilicet in unione hypostatica, quæ est gratia, ex qua nascitur valor satisfactionis Christi: ergo satisfactio Christi non est de rigore justitiæ.

Resp. distinguo majorem: Satisfactio rigorosa non fundatur in gratia creditoris supplente defectum valoris satisfactionis, vel gratia indistincta à satisfactione, concedo; verum enim est, quod quando aliquis dat alteri, unde debitum sibi solvat, & per hoc solvit, tunc illa solutio non censetur rigorosa, quia dat creditori, quod ab ipso gratis accepit: Satisfactio rigorosa non fundatur in gratia creditoris, antecedente & concurrente in ratione principii ad satisfactionem, aut ad rem pro satisfactione exhibendam, nego majorem; nam si Petrus v. g. deberet Paulo viginti nummos, Paulus autem videns Petrum impotentem ad solvendum, daret ipsi gratis viginti nummos, ut lucrando posset mutuum & debitum solvere, certò Petrus posset inter negotiandum, quinquaginta lucrari, & deinde dare Paulo quinquaginta, & sic solveret ad rigorem juris, quia non solveret ex gratia, id est, non daret viginti

ginti nummos, quos gratis accepit, pro solutione debiti, seu pro viginti nummis debitis; sed daret suum, in quo nulla est gratia, licet principium & medium quibus acquisivit, sint ex gratia; nec Paulus posset ex toto rigore iustitiæ aliam satisfactionem exigere. Unde distincta pariter minori, nego consequentiam: Quia licet unio hypostatica, auxiliorumque adjumenta ex gratia collata sint humanitati pro solutione debitorum nostrorum; tamen cum hæc gratia non ingrediatur formaliter solutionem, nec Christus eam exhibuerit pro satisfactione, sed eam sibi retinuerit, & per merita aut opera quæ ipsa mediante lucratus est, satisfecerit, satisfactio est rigorosa, non obstante illa gratia unionis.

Obj. 3. Satisfactio rigorosa debet esse ex bonis propriis satisfaciens, seu debitoris, non vero ex bonis ipsius creditoris, quia oportet quod creditor acquirat rem seu opus satisfactorium; sed Christus satisfecit per operationes creatas, quæ erant sub dominio & potestate Dei: ergo &c.

Resp. distinguendo maiorem: Debet esse ex bonis propriis debitoris, absolute, id est, tam secundum jus commune quam particulare, nego; aliàs nulla fieri posset satisfactio rigorosa, cum nulla detur quæ sit in sola potestate, dependentia & dominio debitoris; nihil enim est in potestate subditorum, in quod rex non habeat aliquod jus; tamen subditi satisfaciunt regi de rigore juris, dum solvunt, quod ipsi debent: Debet esse ex bonis propriis secundum aliquod jus particulare & sibi proprium, concedo maiorem; unde similiter distincta minori, nego consequentiam: Quia Christus non exhibuit Deo opera satisfactoria, secundum jus & dominium, quod Deus habet super omnia entia creata, sed secundum jus sibi proprium & particulare; non enim solvit  
dan-

dando Deo quod erat solius Dei, sed dando quod suum erat, nimirum actus liberos; alias Christus nullatenus satisfecisset pro nobis, nec esset verus redemptor, quod est hæreticum.

Obj. 4. Satisfactio rigorosa debet fieri ex bonis solius justitiæ titulo debitæ; qui enim debet Paulo viginti nummos titulo venditionis v. g. & viginti titulo furti, dum reddit viginti pro furto, non satisfacit rigorosè, sed debet adhuc viginti; unde si Paulus sit satisfactus, hoc non est de rigore juris: sed opera Christi erant Deo exhibenda, & ipsi à Christo debita aliis titulis, gratitudinis scilicet, religionis, obedientiæ, &c. ergo Deus non est satisfactus operibus Christi juxta rigorem juris.

Resp. negando majorem, modò alii tituli quibus materiæ aut bonum debetur, non multiplicent ipsam materiam debitam; nam qui deberet Petro centum nummos titulo justitiæ ratione contractus, satisfaceret de toto rigore juris, reddendo ipsi centum nummos, etiamsi teneretur eos reddere titulo obedientiæ, quæ judex præciperet hujusmodi solutionem, & ex titulo misericordiæ, si ipse Petrus esset pauper propter defectum hujus solutionis, quia illi tituli non multiplicant materiam debitam; unde concessa minori, nego consequentiam, quia tituli obedientiæ, gratitudinis, misericordiæ, &c. non multiplicant materiam debitam in Christo. Ad prob. majoris, dico, quòd supponit materiam titulis multiplicatam; qui enim debet Paulo viginti nummos titulo venditionis, & viginti titulo furti, multiplicat debita; idèdque ut de rigore solvat, oportet, quòd exsolvat quadraginta; at ea quæ Christus debuit titulis gratitudinis, religionis, obedientiæ, misericordiæ, sunt ea quæ debuit titulo justitiæ: ergo dum ad æqualitatem ex justitia solvit, perfectè & rigorosè solvit, & ita perfectè solvit, ac si ex solo titulo justitiæ debuisset.

Obj.



**Obj. 5.** Satisfactio rigorosa obligat creditorem ad illam acceptandam; sed satisfactio Christi non obligabat Deum ad acceptationem operis satisfactorii: ergo non fuit de toto rigore juris. **Resp.** distinguendo majorem: Satisfactio rigorosa obligat creditorem ad eam acceptandam, absolute & ex se, nego; facta suppositione, quod creditor satisfactionem postulet, concedo; satisfactio enim ex se liberat debitorem, sed non ligat creditorem, nisi ipse velit satisfactionem, & cum ipso debitor conveniat, quia conventio ligat utrumque: hinc est, quod satisfactio Christi fuit de toto rigore juris, quoniam Deus qui liberè incarnationem operatus est, & qui alia via mundum reparare potuisset, promisit acceptare opera Christi, quæ ex natura sua sunt condigna & superabundantia, ut docet Scotus.

*Dices:* Justitia rigorosa obligat personam quæ debet, Christus enim non erat persona rea: ergo non satisfecit de toto rigore juris. **Resp.** quod justitia rigorosa ex se non obligat personam ream ad satisfaciendum, sed tantum exigit satisfactionem: nam si Petrus deberet Paulo centum nummos, certum est, quod satisfactio esset ad strictos juris apices, si Petro & Paulo consentientibus & convenientibus, Joannes solveret & daret centum nummos; unde licet Christus non sit persona rea, tamen de rigore juris satisfecit, quia Deus voluit satisfactionem Christi acceptare, & Christus ut fidejussor satisfacere voluit pro redimendis hominibus.

**Obj. ultimò:** Satisfactio rigorosa abdicat à persona satisfaciente dominium, quod habet in rem, qua fit satisfactio, & tribuit illud creditori; sed hæ conditiones non reperiuntur in satisfactione Christi: ipse enim habet idem dominium, & Deus nihil de novo accepit: ergo non est secundum rigorosos juris apices. **Resp.** majorem esse veram, quando satisfactio fit in rebus.

bus datis & acceptis; falsam verò, quando fit in materia honoris, & per actus honorificos quibus fama & honor personæ offensæ restituuntur: tunc enim debitor nihil à se abdicat, & creditor nihil in se recipit: ergo satisfactio Christi fuit de toto rigore juris, licet deficient ipsi hæ conditiones, quia facta fuit in materia honoris & per actus honorificos.

Vel respondeo negando minorem; abdicavit à se aliquo modo voluntatem suam, dum dixit Deo Patri offenso; *Non mea, sed tua voluntas fiat*, & Deus Pater voluntatem Filii acceptavit: sed Christus satisfecit per actus voluntatis oppositos actibus voluntatis Adæ qui Deum offenderat: ergo Christus à se abdicavit dominium rei, qua facta fuit satisfactio, & tribuit illud Deo Patri, cui factus est obediens usque ad mortem, teste Apostolo. Omne id suadetur testimonio ipsiusmet Christi dicentis Joan. 10. vers. 17. *Propterea me diligit Pater, quia ego pono animam meam, ut iterum sumam eam; nemo tollit eam à me, sed ego pono eam à meipso, & potestatem habeo ponendi eam, & potestatem habeo iterum sumendi eam; hoc mandatum accepi à Patre meo*: Quæ omnia apertè significant Christum à se abdicasse moraliter animam suam, & Deum eam acceptasse pro satisfactione primi hominis delicto debita. Unde Ecclesiasticus unicuique nostrum ait cap. 29. vers. 18. *Gratiam fidei jussoris ne obliviscaris, dedit pro te animam suam; & ideo satisfecit de rigore juris, & omnem justitiæ rationem explevit, ut inquit D. Basilius Seleuciensis Homil. 1. de Incarnat.*

## QUÆSTIO V.

*A qua virtute satisfactio Christi  
processerit?*

**D**ico 1. Satisfactionem Christi non fuisse elicita[m] ab aliqua virtute speciali, sed à pluribus. Prob. Satisfactio Christi fuit elicita ab omnibus illis virtutibus, quarum motiva Christo proponebantur tempore satisfactionis, & quæ ad ipsius objectum spectabant; sed Christo, tempore satisfactionis, proposita fuerunt plura motiva, obedientiæ scilicet, religionis, misericordiæ & justitiæ, quæ ad objectum spectabant: ergo elicita fuit à pluribus virtutibus. Major patet. Prob. minor: Christo propositum fuit præceptum aut pactum de morte subeunda; aspiciebat etiam Deum honorandum satisfactione, hominem sublevandum, sicuti respiciebat Deum satisfaciendum, aut injuriam compensandam: ergo motiva obedientiæ, religionis & misericordiæ, proposita fuerunt Christo tempore satisfactionis, sicut motivum justitiæ. *Deinde*, satisfactionis Christi objectum, utpotè compensatio injuriæ; præter rationem justitiæ, includit rationem actuum obedientiæ, religionis & misericordiæ. Tum quia Christus in hac compensatione fuit obediens Deo Patri, glorificavit ipsum, & homines lapsos liberè redemit, ut constat. Tum quia in ipsa relucebant bonitas præcepti, bonitas cultus divini, & bonitas humanæ salutis: ergo Christus, dum satisfecit, hæc omnia motiva sibi proposuit, & ex motivo harum virtutum mori voluit.

Confirm. 1. Ex hoc nullum sequitur inconveniens, nullaque imperfectio, imò major perfectio in satisfactione & morte Christi; nam eum perfectio actus ex nobilitate motivi &  
finis

finis desumatur, ubi sunt plura motiva, majorem perfectionem desumit actus. 2. Satisfactio Christi nedom est debita, nec Christus est tantum fidejussor noster; sed etiam servus, *formam enim servi accepit*, ait Paulus; sacerdos & victima pro peccatis nostris: ergo mortuus est nedom ex motivo justitiæ correspondentis debitori, sed etiam ex motivo obedientiæ correspondentis servo Dei, religionis correspondentis sacerdoti, & misericordiæ correspondentis hostiæ pacis & amoris; aliarumque virtutum, quarum motiva sibi proposuit.

Dico 2. quod satisfactio Christi elicita fuit ex motivo justitiæ commutativæ. Ita plures Scottistæ. Prob. 1. Justitia ex qua Christus satisfacit, ex pacto & contractu quo se obligavit reddere Deo tantum honorem, quantum homo per peccatum abstulerat, & Deus obligavit se acceptare satisfactionem à Christo exhibitam, processit: ergo est commutativa. Tum quia obligatio ex pacto dandi & recipiendi juxta æqualitatem proveniens, semper sequitur justitiam commutativam. Tum quia injuriarum reparatio & pro illis æqualis restitutio, ad justitiam commutativam spectant. 2. Satisfactio ex justitia rigorosa seu juxta strictos juris apices, spectat ad justitiam commutativam; sed Christi satisfactio talis fuit: ergo. 3. Actus emptionis, venditionis & pretii solutionis, sunt actus justitiæ commutativæ; sed satisfactio Christi pro peccatis nostris est actus emptionis & venditionis & pretii solutionis, ut patet ex illo 1. Cor. 6. *Empti estis pretio magno*. Et 1. Petr. 1. *Non corruptibilibus auro & argento redempti estis, sed pretioso sanguine quasi agni immaculati*. Et Psal. 88. vers. 52. *Quod exprobraverunt inimici tui Domine, quod exprobraverunt commutationem Christi tui*: ergo satisfactio Christi est actus justitiæ commutativæ. 4. Dum aliquis teneturolvere ad æqualitatem, & sic solvit, solvit ex justitia

justitia commutativa, ut patet; sed Christus solvit ad æqualitatem, *copiosa enim fuit apud eum redemptio*: ergo solvit ex justitia commutativa.

*Dices 1.* Christi satisfactio non supponit læsionem justitiæ commutativæ ratione peccati; aliàs in quolibet peccato præter malitiam quam habet ex objecto, daretur specialis malitia contra iustitiam Dei: ergo satisfactio pro peccatis nostris non fuit ex justitia commutativa. Resp. negando antecedens; nam quodlibet peccatum est injuria contra Deum facta: ergo habet specialem malitiam contra justitiam; aliàs peccatum non esset injustitia, nec injustum.

*Dices 2.* Patris ad Filium, & Domini ad Servum non potest esse vera obligatio ex justitia; ergo nec Christi ad Deum, cujus est Filius. Resp. antecedens esse verum de Filio non emancipato, & quatenus est Filius; falsum verò de Filio emancipato, & quatenus satisfacit ut fidejussor aliorum; unde cum Christus satisfecerit Deo non pro se, sed pro nobis; nec ut Filius reus, sed ut fidejussor noster; potuit satisfacere Deo Patri ex justitia commutativa, licet sit Filius ejus.

*Dices 3.* Homo non tenebatur satisfacere ex justitia commutativa: ergo nec Christus, cum fidejussor non sit magis obligatus, quam debitor. Resp. distinguendo antecedens: Non tenebatur satisfacere ex justitia commutativa ex se & secundum propriam virtutem, concedo quia non poterat exhibere satisfactionem condignam, & cum ad impossibile nemo teneatur, sequitur, quod homo ex se non tenebatur satisfacere ex justitia commutativa: Secundum exigentiam debiti, & secundum satisfactionem convenientem peccato, nego antecedens & consequentiam, quia Christus non satisfecit secundum virtutem quam homo habet ad satisfaciendum; alioquin satisfactio ejus non fuisset condigna

gna, nec superabundans: sed secundum exigentiam debiti, & condignitatem satisfactionis peccato correspondentem; ideoque satisfacit ex iustitia commutativa, cum satisfecerit, ut potuit, ut debuit, & ut oportuit.

Obj. 1. Gonetus contra 1. conclusionem: Actus qui versatur circa objectum honestum, quod à pluribus virtutibus non respicitur, non elicitur à pluribus virtutibus, sed ab aliqua speciali quæ circa tale objectum versatur; atqui satisfactio Christi versatur circa objectum honestum, quod à pluribus virtutibus non respicitur; ergo non à pluribus virtutibus, sed ab aliqua speciali fuit elicta. Major est certa; nulla enim virtus potest elicere aliquem actum, in quo non reluceat ratio formalis sui objecti. Minor verò sic ostenditur: Objectum satisfactionis Christi est compensare injuriam Deo illatam per peccatum, & inter Deum offensum & homines peccatores perfectam constituere æqualitatem; at hoc, ut per se constat, ad omnes virtutes non spectat, sed ad aliquam specialem: ergo &c.

Confirm. Quotiescumque in aliquo actu reperitur speciale bonum habens difficultatem objectivam, debet poni specialis virtus ad illud eliciendum; virtutes enim non ponuntur in anima nisi ad vincendas difficultates, quæ reperiuntur in prosecutione honesti; sed in satisfactione Christi reperitur speciale bonum, specialem habens difficultatem objectivam, scilicet compensationem divinæ injuriæ ad æqualitatem: ergo debet poni specialis virtus ad illam eliciendam.

Confirm. amplius: In nobis satisfactio imperfecta quam Deo exhibemus pro peccatis nostris, non procedit à pluribus virtutibus, sed ab aliqua speciali & determinata, scilicet à penitentia: ergo etiam satisfactio perfecta & cōdigna quam Christus Deo obtulit pro peccatis nostris, debuit ab aliqua virtute determinata procedere.

Resp.

## DE INCARNATIONE. 73


Resp. negando minorem. Ad prob. negom-  
 norem; quia, ut probat argumentum nostrum,  
 in compensatione injuriæ Deo illatæ, relucet  
 bonitas præcepti, bonitas cultus Deo exhib-  
 endi, bonitas sublevationis in homine & ejus-  
 dem reparationis: satisfactio enim Christi est  
 actus obedientiæ, actus religionis, misericor-  
 diæ & justitiæ. Ad 1. confirm. concessa majori,  
 distinguo minorem: In satisfactione Christi re-  
 peritur speciale bonum, specialem, id est, uni-  
 cam difficultatem habens, nego; Specialem,  
 id est, sibi propriam, concedo: Nam compen-  
 satio injuriæ divinæ ad æqualitatem, est specia-  
 lis difficultas satisfactioni Christi conveniens,  
 cum nulla alia fuisset sufficiens nec condigna: At  
 in illa compensatione plures sunt speciales diffi-  
 cultates objectivæ, nempe præceptum obser-  
 vandum, honor Deo exhibendus, homo à mi-  
 seria sublevandus, peccatum vindicandum, de-  
 bitum solvendum: ergo in compensatione illa  
 plures sunt difficultates vincendæ, subindeque  
 exhibita fuit ex motivo plurium virtutum. Ad  
 2. confirm. 1. nego antecedens, quia satisfactio  
 nostra procedit etiam à virtute justitiæ, ut pa-  
 tet suprâ. 2. nego consequ. 1. quia licet satisfac-  
 tio nostra à virtute poenitentiae tantum proce-  
 dat, cum etiam ab alia virtute procedere possit,  
 ut est manifestum, & esset perfectior, si ab aliis  
 procederet, non valet inferre Christi satisfactio-  
 nem procedere etiam ab una virtute dumtaxat.  
 2. quia Christus non tenebatur satisfacere secun-  
 dum virtutem, ex cujus motivo homo satisfac-  
 cere potuisset, sed tenebatur satisfacere absolu-  
 tē: ergo potuit satisfacere ex motivo plurium  
 virtutum, licet homo ex motivo unius satisfac-  
 cisset, & nos satisfaciamus.

Obj. 2. Ad religionem pertinet exhibere de-  
 bitum honorem Deo, in quantum est primum  
 principium creationis & gubernationis rerum,  
 & per hoc distinguitur ab aliis virtutibus; ac

## 74 DE INCARNATIONE.

Christi satisfactio non ordinabatur formaliter ad exhibendam reverentiam Deo ut primo rerum principio, sed potius ut offenso per peccata hominum: ergo non procedebat à virtute religionis.

Resp. nego maiorem absolutè: nam exhibere etiam debitum honorem Deo in quantum est author gratiæ & gloriæ, pertinet ad virtutem religionis, cuius objectum est exhibere Deo honorem debitum absolutè; unde satisfactio Christi debet esse actus religionis, sicut est actus iustitiæ, quia ordinabatur formaliter ab ipsomet Christo Domino ad exhibendam Deo reverentiam debitam, sicuti ad restituendum honorem ablatum.



## DISPUTATIO IV.

### *De motivo Incarnationis.*

**P**riusquàm de Incarnationis substantia agamus, ejus causa motiva & finalis investiganda est, cum finis in qualibet re executionem & existentiam in intentione præcedat.

## Q U Æ S T I O I.

*An Deus ex vi decreti, quod habuit, carnem sumpisset, Adamo non peccante?*

**N**Ot. est incarnationem Verbi posse dupliciter sumi. 1. Secundum substantiam, seu prout



prout dicit præcisè unionem divinitatis cum humanitate in unitate personæ. 2. Secundùm circumstantias, seu secundùm mortem, passionem, generis humani redemptionem &c. Unde Christus simpliciter sumptus, & Christus ut redemptor arguunt diversa decreta in Deo; in primo signo Filius decretus fuit homo ante prævisionem peccati hominum, & in signo sequenti ad prævisionem peccati, decretus fuit peccatorum redemptor: hinc est, quòd si Adam non peccasset, Christus ex vi primi decreti fuisset, cum redemptio non sit finis nec motivum primi decreti; reverà non fuisset redemptor, quoniam salus hominum est motivum incarnationis quantum ad circumstantias, sed fuisset glorificator, ut docet Scotus, cum quo

Dico, quòd ex vi præsentis decreti, Verbum divinum carnem humanam assumpsisset, si homo non peccasset. Ita omnes Scotistæ, Prob. 1. Si Christus non venisset Adamo non peccante, vel quia Deus non potuisset, vel quia non voluisset? sed utrumque falsum est: ergo venisset. Prob. minor quoad secundum, quoniam primum est certum apud Gonetum: Potuisset enim mittere Verbum Adamo non peccante: si non voluisset, maximè quia nulla fuisset necessitas, ut est evidens; sed fuisset necessitas, etiamsi Adam non peccasset: ergo venire voluisset, & de facto venisset. Prob. minor 1. Si Adam non peccasset, Deus fuisset semper summè glorificandus, sicut Deus offensus erat de condigno satisfaciendus, & homo peccator erat redimendus; sed non potuisset summè glorificari, nisi per Christum: sicut Deus offensus non potuit de condigno satisfieri, nec homo peccator redimi, nisi per Christum: ergo fuisset necessitas & sufficiens motivum. 2. Ecclesia (que fuisset, etiamsi Adam non peccasset, quoad sanctitatem & gratiam) indiguisset capite visibili & sanctiore membris: sed nulla creatura

D 2 fuisset

fuiſſet Adamo ſanctior, niſi fuiſſet Deus & hoſtio ſimul: ergo fuiſſet neceſſitas. 3. Amor non minùs movet & excitat amantem, ut ſe communicet amato, ut in ipſo ſubſiſtat, dum poſſibile eſt, quàm ut ipſi adjuvet, ut eſt evidens; ſed amor Dei miſit Verbum, juxta illud Joan. 3. *Ita dilexit mundum, ut Filium ſuum daret*, ut redimeret hominem: nec fuit alia neceſſitas, nullumque motivum præter illud, ex Goneto: ergo amor invenifſet neceſſitatem ſubſiſtendi ſubſtantialiter in homine amato, imò urgentiorem, juxta illud Proverb. 8. *Deliciæ meæ eſſe cum filiis hominum*. 4. Natura humana fuiſſet dignificanda per unionem hypſtaticam, ſicuti fuit poſt peccatum Adæ, cum non fuiſſet deterioris conditionis: ergo veniſſet ex amore aut neceſſitate dignificandi per perſonalitatem divinam, humanam naturam, ut inſinuare videtur Apoſt. ad Rom. 5. dicens, *Si enim cum inimici eſſemus, reconciliati ſumus Deo per mortem Filii ejus, multò magis jam reconciliati, ſalvi erimus in vita ipſius*. Et 1. Cor. 2. ubi ait de Incarn. *Quam prædeſtinavit Deus ante ſæcula in gloriam noſtram*. Tandem, ſi Adam non peccaſſet, Deus proſecutus fuiſſet homines beneficiis: ſed tribuit Chriſtum peccatoribus tanquam ſummum beneficium: ergo dediſſet illum etiam juſtis, ſi perſeveraſſent; ideòque ſi Adam non peccaſſet, non defuiſſet motivum nec neceſſitas veniendi in mundum.

*Inſtare poſſet Gonet. hæc omnia non fuiſſe neceſſaria. 1. Quia Deus potuiſſet alia vi aglorificari, Eccleſia habere aliud caput, amor Dei ſatiari, & humana natura dignificari. 2. Quia non fuiſſet incongruum, nec indecens relinquere hominem in prædictis neceſſitatibus, ſicuti fuiſſet relinquere ipſum in peccato, & conſequenter nulla fuiſſet neceſſitas veniendi in mundum, ſi Adam non peccaſſet. At hæ rationes non infirmant argumentum: nam potuit,*  
ut

ut fatetur Gonet. redimere genus humanum, alia via & sine incarnatione, tamen venit & fuit necessitas veniendi : ergo venisset. Deinde, magis incongruum fuisset & indecens relinquere hominem in prædictis necessitatibus, quàm in peccato. Tum quia peccatum exigebat punitionem, & pœna æterna dignum erat. Tum quia congruum & decens est, relinquere peccatorem in reatu, dum liberè & malitiosè peccare voluit; at Deus exigebat summè glorificari; congruum, & decens erat dare Ecclesiæ caput, visitare justos & dilectos, dignificare naturam humanam per unionem hypostaticam &c. ergo si Adam non peccasset, Christus venisset propter motiva assignata, cum ut ex dictis constar, sint sufficientia.

Prob. 2. Christus Dominus est volitus & prædestinatus ante præscientiam peccati hominum: ergo venisset ex vi præsentis decreti, etiamsi homo non peccasset. Consequentia patet: Nam si sit à Deo volitus independentè à peccato, executioni etiam mandatus fuisset, licèt homo non peccasset. Prob. antecedens *Primo*: Deus voluit & prædestinavit Christum antecedenter ad decretum aut intentionem producendi homines, quis intentio producendi hominem, fuit producendi illum ad instar & exemplar Christi, ut docet D. Athanas. serm. de Deipara, his verbis: *Potius loquendum est, quòd Deus fecerit hominem secundum imaginem Dei; secundum imaginem enim, & similitudinem ipsius modì incarnationis & acceptæ humanitatis, hominem Deus fecit.* Ejusdem sententiæ est Tertul. lib. de resurrectione carnis: ergo Christus fuit volitus ante decretum producendi homines, cum exemplar sit prius exemplato. Tum quia ex vi unionis est Filius naturalis Dei & primogenitus: ergo intentio prædestinandi Christum est prior decreto producendi homines; hinc est, quòd prædestinatus fuit ante præscientiã peccati, &

consequenter quòd venisset ex vi præsentis decreti, licet homo non peccasset.

*Secundò*: Adam fuit prædestinatus ad gloriam ante prævisionem peccati. Ratio est, quia fuit prius prædestinatus ad gloriam quàm ad gratiam, cum gloria sit finis, qui in intentione est semper prior mediis; sed fuit prædestinatus ad gratiã ante prævisionem peccati originalis: quòd ex Gonetò consistit in privatione gratiæ, quæ non potest in cognitione præcedere formam, cuius est privatio; sed decretum prædestinandi Christum ad gloriam, est prius decreto prædestinandi hominem: ergo si homo non peccasset, Christus prædestinatus fuisset. Prob. minor: Deus prædestinavit homines in Christo: ergo prius prædestinavit Christum ad gloriam, quàm homines. Consequentia patet. Prob. antecedens: Ad Ephes. 1. dicitur, *Benedixit nos in omni benedictione spiritali in cælestibus in Christo, sicut elegit nos in ipso ante mundi constitutionem*: ergo homo fuit prædestinatus ad gloriã in Christo, subindeque venisset ex vi prædestinationis suæ, si Adam non peccasset, vel vana fuisset Christi prædestinatio, quòd est falsum.

*Tertiò*: Ordinatè volens, prius vult finem, & ex mediis illa quæ sunt fini propinquiora: sed ad manifestationem bonitatis divinæ, quæ est finis intentus à Deo in creatione omnium rerum, propinquius se habet incarnatio Verbi quàm omnes aliæ creaturæ, ut patet: ergo in intentione producendi creaturas, Deus qui est ordinatè volens, prius voluit Christum quàm homines: & consequenter venisset ex vi illius intentionis & decreti.

Huic argumento triplex solutio adhibetur à Thomistis apud Gonetum. *Primæ*, concessio antecedente, negat consequentiam; quia (inquiit) etsi Christi prædestinatio antecedit in intentione Dei, præscientiam peccati & decretum homines redimendi, eo ipso tamen quòd non alio modo,

modo, neque alio medio, voluit Deus illam exequi, nisi media permissione peccati, sit inde quòd si homo non peccasset, Christus non venisset: Eo proportionali modo quo licet intentio quam habet Deus dandi suam gloriam electis, sit prior decreto de bonis operibus ipsorum, atque adeò prævissionem ejusdem operum antecedit, nihilominus quia Deus non aliter statuit voluntatem illam sive intentionem adimplere, quàm per bona opera, verum est dicere quòd nullus electorum absque bonis operibus salvabitur. Hanc solutionem probabilem judicat Gonet, & illustrat alio exemplo, puta ex orationibus Sanctorum; quod omitto, quoniam est simile exemplo adducto.

Contra 1. Ad quid enim Deus prius decrevisset Christum, quàm permittere peccatum & redimere homines, si nolisset decretum illud exequi, nisi medio decreto permittendi peccatum & redimendi homines? nulla certè esset necessitas; conformius siquidem fuisset rectæ rationi, prius videre homines lapsos & velle redimere ipsos, quàm decernere aut velle remedium, cum volitio medici supponat cognitionem mali & volitionem sanitatis. 2. Quæ revelatione novere Thomistæ, Deum voluisse prædestinationem Christi (quæ ex concessis præcedit in intentione Dei decretum homines redimendi) exequi non alio modo, nec alio medio, nisi media permissione peccati, cum hoc colligi non possit ex sacra Scriptura; imò ex locis apud ipsos adductis, infertur Christum fuisse prævisum post præscientiam peccati: ergo si antecedit peccati præscientiam, cum sit prædestinatio absoluta & perfectissima, antecedit nedum secundum rem, sed etiam secundum modum & medium. *Ad exemplum* (quod tamen apud nos, ut patet in tract. de prædest. non valet) nego paritatem; quia intentio dandi gloriam includit essentialiter intentionem merito-

rum, quia gloria est præmium, quod necessario respicit meritum; unde fit, quod licet intentio dandi gloriam præcedat præscientiam meritorum, nullus salvatur sine meritis, à quibus salus dependet; at intentio prædestinandi Christum, non includit necessario nec essentialiter intentionem redimendi homines; nec peccatum est medium ad unionem hypostaticam requisitum; aliàs sequeretur, quod Christus venire non potuisset, si homo non peccasset, sicut prædestinatus non potest habere præmium sine meritis; quod est contra Gonetum in principio quæst. ergo non valet paritas.

*Secunda Thomist. solutio negat antecedens.*

Ad cujus 3. prob. respondent majorem esse veram de his quæ sunt fini propinquiora ordine causalitatis, falsum verò de his quæ sunt propinquiora illi tantum ordine perfectionis: Christus autem licet sit perfectior universo, & in ordine gratiæ; non tamen est propinquior fini à Deo intento, ordine causalitatis, ita ut res naturales, & ordinis gratiæ, in attingendo finem intentum à Deo, scilicet manifestationem bonitatis suæ, ab illo ut intermedio dependeant, sed seipsis immediatè ad talem finem conducunt; ac proinde potuit Deus discernere omnia simul, vel minùs perfectum ad perfectius ordinare, vel denique perfectius ordinare ad minùs perfectum; cumque hoc ex sola voluntate Dei dependeat, qualiter de facto contigerit, ex Scriptura, Conciliis & Patribus indagandum est, & quia ex illis constat Deum decrevisse mysterium incarnationis propter hominum salutem, asserendum est, non priùs prædestinasse Christum, quàm decreverit universum producere & peccatum permittere. Omitto modum disponendi decreta Dei, quem ex dictis deducunt, cum ex dicendis alter deducendus sit.

Contra 1. Christus positus fuit in statu futuro-  
ritio-

ritionis antecedenter ad omnes creaturas propter manifestationem bonitatis Dei creandas: ergo est fini propinquior in ordine causalitatis.

Consequentia patet; nam causalitatis ordo non consistit in existendo, sed in futuritione decernenda. Prob. antecedens: In statu possibilitatis nulla creatura juxta exigentiam finis, nempe manifestationis bonitatis Dei, erat Christo aptior, nec divinæ voluntati ipso dignior, nec magis conducebat ad talem finem, nec proximius: ergo Deus prius decrevit Christum, quam alias creaturas. Vel saltem dicendum est, quod decrevit ipsum eo modo quo decrevit alias creaturas, tum quia non erant media aptiora ad finem, nec digniora ad laudem Dei, nec perfectiora ad complementum operis: ergo sicuti in ordine causalitatis, homo fuit volitus independenter à Christo, Christus etiam fuit volitus independenter ab homine. 2. Verum est, quod Deus potuit ordinare medium perfectius ad minus perfectum; sed cum nulla fuerit necessitas, quoniam redemisset mundum, sicut de facto redemit, servavit ordinem sapienter ordinantium. Ad Scripturam, Concilia & Patres dico, quod loquebantur de dispositione decretorum in ordine reparationis, non verò in ordine naturæ: Et de bonitate Dei satisfacienda, non autem de bonitate Dei manifestanda, nec de omnipotentia exaltanda.

*Tertia solutio est Gonetii, dicentis, quod ordine intentionis prius fuit volitus Christus, quam omnia alia, sive ordinis naturalis, sive ordinis supernaturalis, quam permissio peccati in genere causæ finalis; posterius tamen in genere causæ materialis. Vel, ut alii dicunt, licet Christus fuerit prævisus & intentus in ratione finis cui, quam ordo naturæ & gratiæ, & quam peccatum intelligatur esse permissum à Deo; tamen prioritatem finis cui, prius volitum fuit remedium peccati, seu genus humanum ut,*

redimendum, quàm fuerit prævisa & volita incarnatio. Quod ut magis declaretur, tradit definitionem finis *qui*, & finis *cui*, & utitur exemplo de medico; sed omitto hæc omnia brevitatis gratia, quoniam ex dictis ipsius satis constat Christum non venisse, si Adamus non peccasset, licet fuisset prævisus, sicuti non daretur medicina, si nullus esset ægrotus, quamvis finis *qui*, nempè sanitas, esset.

Contra. 1. Quilibet finis, siue sit *qui*, siue *cui* est semper nobilior mediis, quorum est finis. Tum quia nobilitas mediorum desumitur ex nobilitate & bonitate finis *qui* & *cui*, ut patet in medicina, quæ est ignobilior sanitate, & homine cui desideratur. Tum quia media sunt propter finem *qui*, & propter finem *cui*, & non e converso: nam medicina est propter sanitatem, ratione cujus est, & propter hominem ægrotum cui datur, & non e contra: ergo finis *cui* est nobilior mediis. Subsumo: sed homo redimendus non est nobilior Christo, nec incarnatione seu unione humanitatis cum Verbo, ut patet: ergo redemptio hominum non potest esse finis *cui* incarnationis, quatenus est unio humanitatis cum Verbo. 2. Quilibet finis, siue sit *qui*, siue *cui*, magis diligitur & appetitur quàm media. Tum quia media diliguntur propter finem tam *cui* quàm *qui*, ut patet etiam in medicina. Tum quia in sola adeptione finis satiatur amans: sed salus aut redemptio hominum non magis diligitur à Deo quàm Christus, aut incarnatio quoad substantiam sumpta: ergo non voluit Christum fore propter amorem salutis, seu propter homines redimendos, sicut medicus vult medicinam & potiones propter ægrotum, & consequenter non est finis *cui* incarnationis primariò sumptæ. 3. Christus est glorificator & redemptor, finis *qui* Christi sub conceptu glorificatoris est manifestatio gloriæ aut bonitatis Dei, finis *cui* est Deus glorificandus.

Finis



Finis *qui* Christi redemptoris est manifestatio bonitatis Dei, & finis *cui* est homo redimendus: ergo si Adam non peccasset, Christus venisset, cum habuisset finem *qui* & finem *cui*, revera non ut redemptor, sed ut glorificator; idcirco solutio probat salutem esse finem redemptoris tantum.

Prob. 3. Si Adamo non peccante, Christus non venisset, ut vult Gonet. sequeretur, quod Adamo non peccante, Deus nihil creasset: sed hoc est falsum. Tum quia peccatum esset causa motiva creationis. Tum quia Deus non operatus fuisset omnia propter semetipsum, quod est inauditum: ergo venisset Adamo non peccante. Prob. sequela: Deus voluit & fecit omnia propter Christum: ergo si homine non peccante, Christus non venisset, nec ea quæ propter Christum facta sunt; unde si omnia propter Christum facta sint, tanquam propter finem *qui*, & Christus non fuisset; Adamo non peccante, nihil fuisset. Prob. antecedens: Paulus ad Cor. 3. ait, *Omnia vestra sunt, vos autem Christi, Christus autem Dei*. Gonet. hic §. 6. n. 55. habet, *Ubi D. Thomas ait significari, quod quemadmodum omnia propter prædestinatos creata sunt, ita omnia creata, & ipsi prædestinati, sunt propter Christum, ut est homo, tanquam propter finem, sicut & illa omnia, & ipse semet Christus, sunt propter Deum ut ultimum finem*: hinc est, quod Deus voluit & fecit omnia propter Christum: ergo si Deus non voluisset nec misisset Christum si Adam non peccasset, sequeretur, quod nihil creasset: nam ex Gonet fecit omnia propter Christum tanquam propter finem *qui*, & Christum propter peccatum tanquam propter finem *cui*; unde sicuti peccatum efficiente, non fuisset Christus, deficeret Christo, non fuissent omnia.

Prob. 4. Si Christus non venisset Adamo non peccante, sequeretur 1. quod incarnatio non

esset simpliciter & absolute bona, sed tantum occasionaliter, sicut poenitentia, quoniam esset ex occasione peccati, seu facta fuisset propter peccatum, sicut poenitentia; sed hoc est falsum: ergo, &c. Major patet: Minor vero prob. Incarnatio seu unio humanitatis cum Verbo, est melior redemptione hominum: ergo non debet esse ex occasione peccati hominum, sed bona simpliciter & absolute; nunquam etenim bonum simpliciter & absolute nascitur ex occasione minoris boni: poenitentia non est melior remissione peccatorum, nec justificatione, propter quam fit: at melior est unio hypostatica, quam iustitia originalis: ergo unio hypostatica non est precise & principaliter propter reparationem iustitiae originalis, nec ex occasione peccati, sed propter aliud motivum dignius & nobilius, & ab omni occasione independens.

*Secundo* sequeretur, quod peccatum Adami utile fuisset. 1. Omnibus praedestinati, quia si Adam non peccasset, Christus qui est eorum caput, non venisset. 2. Omnipotentiae Dei, cum non produxisset perfectissimum opus. 3. Christo, qui non haberet suam existentiam. 4. Beatę Virgini, cum non esset mater Dei; sed haec omnia absurda sunt. Tum quia melius fuisset, si Adam non peccasset; alias in vanum Deus praecepisset primis parentibus, ne comederent de ligno vitae. Tum quia peccatum est inutile: ergo si Adam non peccante, Christus venisset, ratio est, quia gloriosius est praedestinati habere Christum, Omnipotentiae ipsum produxisse, Virgini genuisse, & ipsimet Christo existere, quam esse in statu innocentiae: ergo si Adam non peccasset, Christus venisset.

*Obj. 1.* Gonetius: Decretum incarnationis, cum sit supra naturae debitum, non nisi per revelationem nobis innotescere potest; at quotiescumque Scriptura sacra, Concilia, vel SS. Patres quibus Deus suam voluntatem revelavit,

de

de hujusmodi decreto faciunt mentionem, aliam ejus causam motivam non assignant, quàm liberationem à peccato, seu redemptionem hominis à servitute peccati: ergo ex vi decreti quod Deus habuit de facto, Verbum carnem non assumpsisset Adamo non peccante. Major est certissima, unde tota difficultas devolvitur ad minorem, quæ quoad singulas partes probatur.

In primis ergo plura extant Scripturæ testimonia, quibus apertè significatur Deum non venisse in mundum per incarnationem, nisi ut peccatores salvos faceret; Math. 18. & Luc. 19. *Venit Filius hominis quærere & saluum facere quod perierat.* Sunt aliæ autoritates Scripturæ, sed eas omitto brevitatis gratia, quia cum omnes habeant eandem virtutem, ratione qua solvetur ista, solventur & aliæ. Eadem etiam & non alia assignatur ratio à Conciliis, præcipuè à Nicæno in Symbolo fidei, ubi dicitur, *Qui propter nos homines & propter nostram salutem descendit de cælis, & incarnatus est de Spiritu sancto, & homo factus est.* Accedunt testimonia SS. Patrum: Iræneus enim lib. 5. adversus hæreses, cap. 14. sic ait, *Si non haberet caro salvari, nequaquam Verbum Dei caro factum esset.* Athanas. orat. 3. contra Arrianos, *Quod autem Filius Dei homo factus est, numquam accidisset, nisi hominum necessitas causam præbuisset.* Omitto auctoritatem aliorum Patrum, quia habent eundem sensum, & eadem ratione solvi possunt.

Resp. negando minorem: Colligitur enim ex pluribus sacre Scripturæ locis, Christum fuisse decretum independentem à præscientia peccati; Proverb. 8. dicitur, *Dominus possedit me in initio viarum suarum, antequàm quidquam faceret à principio: ab æterno ordinata sum & ex antiquis, antequàm terra fieret: nondum erant abyssi & ego jam concepta eram;* quæ verba de

Christo

Christo intelliguntur à SS. Patribus, & insinuant Christum fuisse prævium independentem à peccato. *Nec valet dicere cum Gonet, Christum esse priorem dignitate & excellentia, non verò causalitatis ordine, quia Paulus ad Coloss. 1. ait de Christo: Qui est principium, primogenitus ex mortuis, ut sit in omnibus ipse primatum tenens.* Adverte, quòd *Ly In omnibus primatum tenens*, indicat Christum esse primum in divina intentione. Joan. 17. Christus alloquens Patrem ait, *Ego te clarificavi super terram, opus consummavi, quod dedisti mihi ut faciam, & nunc clarifica me tu Pater apud te ipsum, claritate quam habui, priusquam mundus esset apud te: manifestavi nomen tuum hominibus, quos dedisti mihi de mandato:* Ex quo constat opus primum & principalius Christi fuisse clarificare Patrem, non verò pro salute nostra mori: dixit enim, *Opus consummavi, quod dedisti mihi.* Et nondum redemerat nos passione aut morte, sed manifestaverat Trinitatem personarum & divina attributa: ergo ex Scriptura, primaria causa motiva incarnationis non est redemptio hominum.

Unde ad prob. minoris, dico, quòd sacra Scriptura in locis citatis, Patres & Concilia assignant motiva secundaria incarnationis, sed non assignant omnia, cum non loquantur de motivis Christi, quatenus venit ut glorificator, sed tantum quatenus venit ut redemptor: hinc est, quòd probant, quòd si Adamus non peccasset, non venisset ut redemptor, nec ut medicus, nec ut Salvator; sed non probant, quòd non venisset ut glorificator & ut amicus; ideoque Scriptura non est contra nos, cum assignando reparationem hominum pro motivo incarnationis, excellentiam mysterii, manifestationem divinorum attributorum, glorificationem Dei & alia motiva non improbet.

Gonet. resp. Verum. hæc responsio (inquit.) nul-

nullius est momenti, cum ex illis quæ ex sola Dei voluntate dependent, non possumus aliam habere notitiam, nec aliter sentire, quam secundum quod in Scriptura traduntur, & ex sola Dei voluntate pendeat ordinare incarnationem ad hunc aut illum finem, benè sequitur, quod si alia non assignatur ratio à Scriptura & SS. Patribus, præter generis humani reparationem, nos aliam quoque assignare non possumus. Addo (inquit) quod in rebus magni momenti, optimum est argumentum ex autoritate negativa; unde quia Scriptura sacra, ubi loquitur de mundi creatione, unius tantum facit mentionem, per legitimam consequentiam deducimus esse tantum unum mundum. Similiter quia facit tantum mentionem de incarnatione secundæ personæ Trinitatis, credimus eam tantum fuisse incarnatam. Item quia tres solum personas in Deo nominat, nusquam verò quatuor, tres tantum esse personas in Deo, ut certissimum fide dogma recipitur. Addo etiam, quod aliqui ex SS. Patribus, non solum dicunt Verbum fuisse incarnatum ob reparationem generis humani, sed insuper etiam asserunt, quod non fuisset incarnatum, peccato non existente; & sic hæc solutio eorum testimoniis applicari nequit.

Contra: Nam ut ait Mastr. Scriptura in locis in nostra responsione citatis, assignat aliud motivum incarnationis præter redemptionem. Zachar. incant. ait, *Benedictus Dominus Deus Israel*, & ratio, ob quam laudat, est duplex, quia (inquit) *visitavit, & fecit redemptionem plebi suæ* aliud enim est visitare, & aliud redimere. Tum quia potuit visitare nos, & non redimere. Tum quia cum impossibile sit redimere nos & non visitare, si visitatio & redemptio essent unum & idem motivum, aut si redimere esset motivum primarium, dixisset duntaxat, *Quia fecit redemptionem plebi suæ*; unde inferendum est, quod si peccatum non fuisset, certò redemptionem non fecisset.

fecisset, nihilominus adhuc nos visitasset. Non venit tantum propter peccatum, sed etiam propter nos, juxta illud Symboli, *Propter nos homines, & propter nostram salutem descendit de caelis, & homo factus est*. Ex quibus verbis assignatur aliud motivum præter reparationem generis humani. Et si liceat Thomistis ista verba interpretari, licebit etiam Scotistis interpretari alia.

*Ad additum*, dico, quod authoritas Scripturæ, *Venit Filius hominis salvum facere, quod perierat, &c.* & Patrum, non est negativa positivè, ita ut excludat, aut neget aliud motivum; sed negativè, ita ut omittat aliud motivum. Unde licet nemo inferat esse alium mundum, aliam personam esse incarnatam præter Filium, &c. valet tamen inferre esse aliud incarnationis motivum, præter redemptionem hominum. Tum quia authoritates Scripturæ de unius mundi creatione, incarnatione Verbi, & Trinitate personarum, sunt negativæ positivè, id est, excludunt & negant: at Authoritates de motivo incarnationis, sunt negativæ negativè, id est, omittunt aliud motivum: v. g. dum Abraham Genes. 22. ait de Sara, *Verè soror mea est*, hæc authoritas licet sit negativa sicut illa, *Filius hominis &c.* tamen non excludit, nec negat Saram esse etiam uxorem Abraham; ita similiter quamvis authoritates Scripturæ asserant Christum venisse propter peccatum, tamen non negant, nec excludunt alia motiva, sicut Authoritates negativæ, seu negantes positivè, & excludentes aliud. Tum quia ratio convincit non esse alium mundum existentem præter istum; at ratio non suadet non esse aliud motivum incarnationis præter reparationem generis humani. Tum quia fides docet secundam Trinitatis personam dumtaxat assumpsisse carnem, & in Deo esse tantum tres personas; sed fides non docet nullum esse incarnationis motivum, præter redemptionem: ergo non valet paritas.

Obj.

Obj. 2. Cùm Deus incarnationem primò efficaciter decrevit, voluit Verbum incarnari in carne passibili; at decretum incarnationis in carne passibili pendet à præscientia peccati Adami: ergo si Adam non peccasset, Deus ex vi decreti, quod habuit sese hypostaticè communicandi naturæ humanæ, nullo modo incarnatus fuisset. Minor & consequentia patent: Major verò in qua est difficultas, sic ostenditur: Cùm primò Deus efficaciter voluit incarnationem, vel voluit Verbum incarnari in carne impassibili, vel in carne passibili, vel absolute in communi & quoad substantiam, nihil in particulari decernendo de passibilitate, aut impassibilitate? Primum aut tertium dici nequeunt: ergo secundum necessario asserendum est. Major patet ex sufficienti enumeratione omnium modorum, quibus potest intelligi Deum primò decrevisse incarnationem Verbi. Minor autem prob. Si Deus primò voluisset Verbum incarnari in carne impassibili, de facto assumpsisset carnem impassibilem; sed hoc est contra fidem passionis & resurrectionis Christi: ergo &c. Sequela patet. Omitto probationem sequelæ, quia est vera & concedenda, ideòque minimè adducenda est ejus probatio. Omitto etiam probationes secundæ partis, nempe Deum non decrevisse primò incarnationem, abstrahendo à carne passibili aut impassibili, quia concedimus Deum decrevisse incarnationem modo determinato.

Resp. distinguendo majorem: Cùm Deus primò incarnationem efficaciter decrevit, voluit Verbum incarnari in carne passibili, passibilitate intrinseca, quæ quodlibet corpus constans quatuor qualitatibus contrariis, est passibile & mortale, concedo; Passibilitate extrinseca, seu inflicta propter peccatum, quæ est illa subjectio, quam habemus tanquam effectum peccati, ad mortem & ad misérias, qua

mo.

modò caro nostra passibilis est propter peccatum, de qua Paulus ait, *Per unum hominem peccatum intravit in mundum, & per peccatum mors, nego majorem*. Distinguo similiter minorem; Decretum incarnationis in carne passibilitate intrinseca, pendet à præscientia peccati Adami, nego minorem: Passibilitate extrinseca, concedo minorem & nego consequentiam. Duplīciter igitur passibilis erat caro Christi; primò passibilitate proveniente ex quatuor qualitatibus & elementis contrariis quibus constabat, qua passibilis fuisset omnis caro, si status innocentiae durasset; secundò passibilitate ex peccato hominum proveniente, quia fuit peccatorum fidejussor, quæ passibilitas tendit ad mortem, quatenus est effectus & stipendium peccati; unde ex vi primi decreti venisset in carne passibili in primo sensu, & de facto sic venit, & propter redemptionem venit in carne passibili in secundo sensu.

Confirm. responsio & Quæro, an in illo signo antecedenti ad peccati prævisionem, in quo ex Goneto Deus determinavit producere Adamum, decreverit producere illum in carne impassibili, vel passibili, vel absolutè incommuni & quoad substantiam, nihil in particulari discernendo de passibilitate, aut de impassibilitate? Non primum, quia si Deus decrevisset producere Adamum in carne impassibili, de facto produxisset illum in carne impassibili. Nec secundum, quia ex Goneto caro est passibilis propter peccatum duntaxat: ergo cum ex Goneto, Deus decreverit Adamum producere ante præscientiam peccati, ex vi illius decreti Deus non voluit producere illum in carne passibili. Nec tertium propter easdem rationes, quibus Gonet. probat Deum non decrevisse Christum incarnari abstrahendo à carne passibili aut impassibili. Afferendum est igitur, quòd Deus decrevit producere Adamum in carne passibili passibilitate intrinseca suprà explicata, qua passibi-



fibilis fuisset, etiam si non peccasset; ita à pari dico, quòd Deus primò efficaciter decrevit & voluit Verbum incarnari in carne passibili, passibilitate intrinseca, & sic venisset Adamo non peccante in carne passibili, sicuti Adam fuisset in statu innocentie.

*Instare posset Gonet.* Ergo primum decretum fuit mutatum: decreverat enim Deus mittere Christum in carne impassibili passibilitate extrinseca; & in alio signo post præscientiam peccati, decrevit mittere illum in carne passibili passibilitate extrinseca. *Resp.* negando instantiam; quia ex vi primi decreti, Christus non fuit prævisus in carne impassibili passibilitate extrinseca, sed tantum passibilis passibilitate intrinseca: ergo posterius decretum non mutavit primum, cum ex vi primi sit in carne passibili passibilitate intrinseca, & ex vi secundi in carne passibili passibilitate extrinseca; quæ quidem passibilitates non opponuntur.

*Instare posset Gonet.* Incarnatio est unica actio: ergo circa ipsam non fuerunt in Deo duo decreta, nec facta fuit propter duo motiva, nec in duplici passibilitate. *Resp.* negando consequentiam quoad omnes partes, quia Christus includit diversos conceptus, & diversa munera, & varias operationes; est enim glorificator & redemptor: ergo non implicat, quòd incarnatio ordinetur ad diversa motiva, nec in duplici passibilitate, cum una alteram non excludat; nec quòd de ipsa in Deo sint duo decreta, unum de glorificatione & aliud de redemptione, licet sit unica actio.

## QUÆSTIO II.

*An solo existente peccato originali, & econtrà solis existentibus actualibus, futura esset incarnatio ex vi præsentis decreti?*

**D**Ico 1. Quòd solo existente peccato originali, venisset Christus ex vi præsentis decreti, quia venit ut redemptor pro redemptione & salute hominum: *Venit enim querere & salum facere, quod perierat.* Luc. 19. sed existente solo peccato originali, homines essent salvandi & redimendi: ergo &c. *Deinde*, peccatum originale est origo cæterorum, & radix aut causa lapsus totius naturæ humanæ: ergo venisset Christus ex vi præsentis decreti, propter peccatum illud. *Tandem*, venit principaliter propter peccatum Adami (quod in nobis est originale) ut canit Ecclesia in benedictione cerei Paschalis, *O verè necessarium Adæ peccatum, quod Christi morte deletum est; ò salix culpa quæ talem ac tantum meruit habere redemptorem*: ergo venisset existente solo peccato originali.

*Dices* 1. Si Adam non peccasset, Christus venisset ut redemptor: ergo non venit ut redemptor ex vi præsentis decreti propter peccatum originale. Consequentia patet: Prob. antecedens: Ex vi præsentis decreti B. Virgo fuit præservata à peccato originali, ex morte Christi prævisa; subindeque in eodem signo, in quo Christus ex Scoto fuit prævisus ante præscientiam peccati, Virgo fuit præservata ab omni peccato ex morte Christi: ergo Christus ex vi primi decreti venisset in carne passibili, seu ut redemptor. Et cum ex Scoto venisset, Adamo non peccante, secluso peccato originali, venisset etiam ut redemptor. Resp. negando antecedens,  
ad

ad cuius prob. dico, quòd in Deo sunt duo decreta circa Virginem: per unum electa fuit in matrem Dei seu Christi glorificatoris, quia in eodem signo in quo Christus fuit volitus & prævius, Virgo etiam fuit prævifa ut mater, propter merita Christi glorificatoris, nempe propter actus charitatis, religionis &c. per aliud præservata ab omni peccato ex morte Filii, in eodem signo in quo Christus fuit prævius redemptor; unde si Adam non peccasset, Virgo fuisset mater Christi, sed non fuisset efficienter & in actu secundo præservata à peccato, quoniam nulla fuisset necessitas præservandi: ergo si Adam non peccasset, seu secluso peccato originali, Christus non venisset ut redemptor.

*Dices 2.* Congeries omnium peccatorum tam originalium, quam personalium, fuit motivum incarnationis in carne passibili: *Sanguis enim Christi Domini emundat nos ab omni peccato*, ait Joan. 11. *Et ipse est propitiatio pro peccatis nostris & totius mundi*: ergo ex vi præsentis decreti non venit pro solo originali, sed etiam pro actualibus. Resp. distinguendo antecedens: Congeries omnium peccatorum virtualiter, & radicaliter, aut causativè, concedo; Formaliter, actu & effectivè, nego antecedens: Nam peccata actualia, à quibus emundavit nos sanguis Christi, fuerunt motivum incarnationis, quatenus in originali tamquam in radice continebantur, & quatenus ad ipsum reducenda sunt tanquam ad fontem & ad motivum primarium & principalius: ergo existente solo peccato originali venisset ex vi præsentis decreti.

*Dico 2.* Quòd solis peccatis actualibus existentibus, non venisset Christus ut redemptor ex vi præsentis decreti: nam D. Gregor. lib. 4. in Reg. cap. 1. ait, *Si Adam non peccaret, redemptorem nostrum carnem nostram suscipere non oporteres*: ergo ex D. Gregorio, si alii homines pec-


peccassent, modò Adam non peccasset, Christus non venisset ut redemptor ex vi præsentis decreti. *Deinde*, deficiente primario & principali motivo, cessat operatio; sed peccatum originale est primarium & principale motivum incarnationis in carne passibili, ut constat: ergo &c. *Tandem*, Christus ex vi præsentis decreti venit propter peccatum naturæ humanæ, juxta illud Isa. 53. *Propter scelus populi mei percussus est eum*: at solum peccatum originale est peccatum illud quod dicitur peccatum naturæ humanæ, seu quo omnis homo est reus: ergo &c.

*Dices* 1. Christus venisset & mortuus fuisset pro uno solo peccatore, ut patet ex Apost. ad Galat. 2. *Dilexisti me, & tradidisti semetipsum pro me*. 2. Venit vocare peccatores; sed solis peccatis actualibus existentibus, fuissent in mundo peccatores: ergo &c. Resp. Quòd si fuissent tantum peccata actualia, Christus venisset ut redemptor, non ex vi præsentis decreti, sed ex vi alterius; dato, quòd divina iustitia condignam satisfactionem postulasset, quoniam summus erat amor Christi erga homines salvandos.

Ex vi præsentis decreti, Christus venit tollere peccatum quod dicitur peccatum mundi, ut significat illud Joan. 1. *Agnus Dei qui tollis peccatum mundi*; ibi enim non dicit *peccata mundi*, sed *peccatum mundi*, vers. 29. Nec obstat, quòd vulgata habeat, *peccata mundi*; quia peccatū originale dici potest plura peccata, cum sit fons & radix omnium peccatorum: qua de causa, Prophetà Regius psal. 50. considerat illud ut multiplex; dicens, *Ecce enim in iniquitatibus conceptus sum, & in peccatis concepit me mater mea*. licet conceptus fuerit in solo peccato originali: atqui peccatū mundi est peccatum originale, cum sit commune, sitque totius mundi, ut notat glossa ordinaria desumpta ex venerabili Beda, & ab omnibus hominibus contrahatur, ut in proprio loco dictum est, cum Scriptura sacra, Patribus &

Con-

Conciliis : ergo si venisset pro uno solo, aut pro solis actualibus, non venisset ex vi præsentis decreti, sed ex vi alterius : quippè præsens decretum de Christo redemptore, Adæ peccatum respicit, ut suadet Ecclesia in benedictione cerei Paschalis, his verbis, *O vere necessarium Adæ peccatum, quod Christi morte deletum est : o felix culpa, quæ talem ac tantum meruit habere redemptorem ;* quibus de solo originali fit mentio.



## DISPUTATIO V.

*De quidditate Incarnationis.*

**D**Emonstrato divinæ incarnationis motivo, explicanda est ejus quidditas, nedum in se, sed etiam quantum ad modum ; unde sit

## QUÆSTIO I.

*An unio Verbi incarnati sit facta in natura, vel persona ?*

**D**ico. I. Quod unio Verbi divini cum humanitate in Christo, non est facta in natura ; ac proinde necessario asserendum est, Christum duabus constare naturis, divina scilicet & humana, in eadem persona Verbi unitis. Hæc conclusio est de fide contra Eutychem, qui asserbat unionem hypostaticam factam fuisse in unitate naturæ. Prob. Christus est verè Deus & verè homo, juxta illud Athanas. *Æqualis Patri secundum divinitatem, &*  
*minor*

*minor Patre secundum humanitatem*: ergo Christus constat natura divina, aliàs non esset verè Deus; & natura humana, alioquin non esset verè homo, ut suadet D. Leo epist. 11. *Non esses Dei hominumque mediator, nisi idem Deus idemque homo utroque & unus esset & verus*; sed est mediator, ut ait Paulus 2. ad Timoth. 2. ergo Christus est verè Deus & verè homo; subindeque constat natura humana & natura divina.

*Dices*. 1. Athanas. in Symb. ait, *Sicut anima rationalis & caro unus est homo, ita Deus & homo unus est Christus*; sed anima & caro constituunt unam naturam: ergo similiter in Christo, Deus & homo efficiunt unam naturam, quæ non est divina nec humana; quod verum esse probat autoritas D. Cyrilli, quæ refertur in Concilio Calcedon. actione 1. *Non oportet intelligere duas naturas, sed unam naturam Verbi Dei incarnatam*: ergo incarnatio facta est in unitate naturæ, & consequenter Christus non constat duabus naturis.

Resp. Exemplum D. Athanas. non valere simpliciter & adæquatè, seu in omnibus, aliàs unio hypostatica non esset singularis; sed tantum in aliquibus, nimirum in inseparabilitate & in communicatione proprietatum; quemadmodum enim homo constat anima & corpore, ita Christus constat divinitate & humanitate; unde D. Athanas. non intendit probare Deum & hominem se habere absolutè in Christo, eodem modo quo anima & corpus se habent in homine, sed tantum esse in Christo, ut anima & corpus sunt in homine, in unitate personæ, non verò in unitate naturæ, ut suadet hæc particula, *Unus est homo*. Ad D. Cyrillum dico, quod non loquebatur de natura simpliciter, & ut natura nudè sumpta, sed de natura personata, seu de persona aut de substantia, quia impugnabat hæresim Nestorii.

*Dices*

## DE INCARNATIONE. 97

*Dices 2. Joan. 1. Verbum caro factum est ; ergo in incarnatione natura divina in humanam conversa est. Prob. consequentia : Verbum non potest esse caro , quin mutetur in carnem : ergo. Resp. negando consequentiam, ad cujus prob. nego antecedens : quia Ly fieri non importat semper conversionem unius in aliud , ut v. g. dum aqua fit vinum , ex Joan. 2. Ut autem gustavit Architrictlinus aquam vinum factam ; sed aliquando importat acquisitionem, ut dum dicitur ad Hebr. 6. Iesus Pontifex factus ; Genes. 20. Homo factus est in animam viventem . Ita similiter in nostro casu , Verbum caro factum est , accipitur absque mutatione aut conversione unius in aliud, sed per solam assumptionem aut acquisitionem, ut ait Athanas. Non conversione divinitatis in carnem , sed assumptione humanitatis in Deum .*

*Dico 2. quòd unio Verbi divini cum humanitate facta est in persona, ac proinde necessario asserendum est, quòd in Christo est unica persona, quæ est divina. Hæc conclusio definita est in variis Conciliis contra Nestorium. Prob. 1. ex Symb. Non confusione substantiæ, sed unitate personæ ; sed persona illa est divina : nam persona divina est indistincta & inseparabilis à natura divina, humana verò est distincta : ergo illa persona quæ est in Christo est divina. 2. Per incarnationis mysterium , homo est Deus & Deus est homo : ergo in Christo qui est Deus & homo , est tantum una persona. Prob. conseq. Tum quia duæ naturæ non possunt in concreto de se invicem prædicari, nisi ratione unitatis suppositi quo subsistunt, & in quo conveniunt. Tum quia suppositum reddit naturam incommunicabilem ut quod & ut quo : ergo in Christo in quo communicantur duæ naturæ , divina scilicet & humana, nequeunt esse duæ personæ, sed tantum una qua duæ naturæ subsistunt.*

*Dices* 1. In Christo sunt duæ filiationes reales & duæ generationes: ergo sunt etiam duæ personæ. Antecedens est certum apud Scotistas. Prob. consequentia: Filiatio fundatur in supposito, & generatio terminatur ad ipsum: ergo ubi sunt duæ filiationes reales & duæ generationes, ibi sunt etiam duo supposita. Resp. negando consequentiam, quia unum & idem suppositum ratione duplicis naturæ, potest fundare duas filiationes reales & terminare duas actiones, cum filiatio sit suppositi mediante natura, & generatio terminatur etiam ad suppositum ratione naturæ: ergo cum natura divina sit suppositata, humana etiam licet unico & eodem supposito, tamen sunt duæ naturæ suppositatæ, & consequenter fundare possunt duas filiationes reales, & terminare duas generationes.

*Dices* 2. Ubi est aliud & aliud, ibi sunt duo supposita; sed in Christo est aliud & aliud. Tum ex D. Leone epist. 10. de Christo dicente, *Aliud coruscat miraculis, & aliud succumbit injuriis*. Tum quia persona Verbi non est humana, nec creata: ergo in Christo sunt duo supposita, unum divinum & aliud humanum. Resp. negando majorem, quia *aliud* & *aliud* neutraliter significant naturam, sicut *alius* & *alius* masculinè significant suppositum. Ratio est, quia *aliud* neutraliter sumptum cadit supra rem assumptam, aut receptam, vel supra aliquid rei; *alius* verò cadit supra totam rem & substantiam, ut v. g. dum dicimus, aliud est vivere, & aliud est mori in Petro, non intelligimus duo supposita esse in Petro, sed tantum unum: ita similiter D. Leo per *Ly* aliud coruscat miraculis, & aliud succumbit injuriis, non intelligit duo supposita, sed duas naturas. Ad illud de persona Verbi, dico, quòd licet non sit humana nec creata formaliter & in se, est tamen humana quoad munus, id est, gerit vices suppositi humani:



mani: ergo in Christo non sunt duo supposita, sicut duæ naturæ.

*Instabis:* ergo Verbum non assumpsit hominem, quia homo denotat suppositum seu personam, & naturam: sed hoc est falsum, tum ex Nicæno Symbolo, in quo de filio Dei decantatur, *Et homo factus est.* Tum ex Hymno, *Te Deum laudamus*, à divinis Ambrosio & Augustino composito, in quo legitur, *Tu ad liberandum suscepturus hominem:* igitur in Christo persona divina non gerit vices personæ creatæ, subindeque in ipso sunt duæ personæ. Nego instantiam: Tum quia Patres Concilii Nicæni non loquebantur de ordine assumendi, nec de his quæ Verbum aut Filius Dei assumpsit, sed de existentia Christi, qui verè est homo per naturam humanam quam hypostaticè assumpsit; nec definiunt in hoc symbolo, an in Christo sint duæ personæ? Sufficit, quòd inde nullo modo inferri possit in Christo esse duas personas, ut de facto inferri minimè potest; cùm reverà Filius Dei sit homo, supplendo vices personalitatis creatæ per propriam personalitatem: Tum quia Ambrosius & Augustinus loquebantur in concreto, usurpando concretum pro abstracto, ut exigit usualis loquendi modus, & ut evidentius explicaretur natura mysterii.

*Dices* 3. Natura divina non gerit vices naturæ creatæ, imò nec gerere potest: ergo persona divina nequit gerere vices personæ, sicque in Christo sunt duæ personæ sicut duæ naturæ. Probatur consequentia; In Deo idem realiter est natura & persona: ergo quod nequit fieri à natura, nequit fieri à persona. Nego consequentiam: ratio est, quia natura humana est essentialiter totus homo, & divina totus Deus; unde cùm Deus nequeat esse essentialiter homo, nec e converso, sequitur, quòd natura divina non potest gerere vices naturæ humanæ: at persona creata est quid complens naturam

humanam, quam divina etiam complere potest seu ejus dependentiam ad suppositum complere ac terminare. Nec valet probatio ob distinctionem formalem; multa enim dicuntur de persona divina, quæ naturæ repugnant, ut manifestum est.

---

## QUÆSTIO II.

*An persona Christi verè & propriè possit dici composita ex natura divina & humana, & ex humanitate & substantia Verbi?*

**A**Dvertendum est, quòd si compositio sumatur pro unionem plurium realiter distinctorum, quorum unum est extra realem conceptum aut existentiam alterius, Christus est persona verè & propriè composita, cum constet duabus naturis realiter distinctis & unitis. Si verò sumatur pro unionem duorum incompletorum, quorum unum est actus & aliud potentia, ex quibus resultat tertia entitas à partibus simul sumptis & unitis realiter distincta; certum est, quòd Christus non est persona composita. Scotus igitur, dum dicit Christum non esse personam verè & propriè compositam, intelligendus est in hoc ultimo sensu: in 3. dist. 6. q. 3. §. *Secunda ergo opinio*, ubi ait, *Sed illa opinio, in hoc, quòd dicit personam Christi esse compositam, non tenetur communiter propriè loquendo de compositione scilicet ex actu & potentia, sicut ex materia & forma, vel ex duobus potentialibus*. Unde cum Gonetus nonumat compositionem in hoc ultimo sensu, ut patet ex argumentis quibus conclusionem probat, sed tantum in primo sensu; aliàs concederet naturam

turam divinam habere rationem partis, ac ex natura divina & humana resultare tertiam entitatem aut naturam, sequitur, quòd non impugnat Scotum: admittit enim Doctor compositionem in Christo, in primo sensu, sicut Thomistæ.

Dico 1. Quòd Christus est persona composita ex natura divina & humana, compositione in primo sensu explicata: nam plura Concilia dicunt unionem Verbi cum humanitate esse secundum compositionem, ut patet in sexta Synodo Constantinop. Act. 8. SS. Patres etiam sic sentiunt, ut D. Dionys. lib. de divin. nomin. cap. 1. Cyril. lib. de Incarn. Damas. lib. 3. de fide cap. 3. ergo Christus est persona verè composita, seu constat ex duabus naturis unitis, non per informationem, nec per inhæssionem, sicuti actus & potentia uniuntur, sed per terminationem. Hinc sequitur Christum esse verè compositum, in primo sensu explicato, non verò in secundo. *Deinde*, compositio corporis cum anima, seu materiæ cum forma, est major compositione divinitatis cum humanitate in Christo. Tum quia materia & forma sunt duæ partes, ex quibus resultat totum, quod apud Scotistas non est materia, nec forma. Tum quia mutantur ad invicem. Tum quia subordinantur composito tamquam fini: ergo in Christo datur compositio vera & propria, sumpta pro unionem extremorum; alias in ipso esset unica & indistincta realitas, quod est falsum, nec in ipso essent duæ existentia, quod est contra Scotum, ut dicemus infra: At si sumatur in rigore Philosophico & absque ulla exceptione, falsum est, quòd Christus sit verè & propriè compositus, ut ex Goneto colligitur hic n. 32. ubi docet in Christo esse compositionem seu unionem extremorum, non verò compositionem, seu actum informantem & potentiam informandam. Unde hæc difficultas pendet

ab alia apud Philosophos agitanda, nimirum an ad veram compositionem requiratur unio partium incompletarum, quarum una sit actus & altera potentia? Si sufficiat distinctorum seu extremorum unio, certum est, quod Christus est verè compositus; si verò requiratur unio partium incompletarum, impossibile est, quod Christus sit verè & propriè compositus, ut colligitur etiam ex Goneto: ergo ut salventur Auctoritates Conciliorum & Patrum, admittenda est compositio in Christo, seu unio extremorum.

*Dices:* Scotus loco citatus in fine ait, *Sed verius negari potest compositio, in Christo, quia una non perficit aliam: ergo ex Doctore Christus non debet dici verè compositus.* Resp. Scotum loqui de compositione, quæ fit ex actu informante & potentia informanda, ex quibus resultat totum & tertium, ut patet ex verbis sequentibus, *Nec ex eis est aliqua natura tertia* unde patet, quod non excludit unionem. *Ita naturarum, sed tantum unionem actus & potentiae, ex quibus fit tertia natura.*

Idem sentiunt D. Augustinus contra Maximinum Arianum cap. 10. ubi ait, *Porro autem Christus una persona est geminae substantiae, quia & Deus & homo est; nec tamen Deus pars huius personae dici potest, alioquin Filius Dei Deus, antequàm susciperet formam servi, non erat totus, & crevit, cum homo divinitati ejus accessit:* quibus monet in Christo non dari partem & partem, ut ad compositum in secundo sensu consideratum requiritur, Et D. Athanasius lib. de uno Christo ait, *Ita Deum & hominem unam esse hypostasim, & unam personam, ut non sit expletivum corpus hypostaseos; id enim impium esset, quando quidem Deus imminutionis capax non est, ut potè uniformis, & non compositus, nec in partes dividitur:* ergo Christus non potest dici compositus compositione rigorosa, quæ fit ex duabus

bus partibus incompletis, seu ex actu & potentia; sed solum ea compositione quæ fit ex duobus unitis absque ulla informatione, quæ solito inter incompleta reperitur.

### Q U Æ S T I O III.

*An inter Verbum & humanitatem mediet quidam modus substantialis, per quem natura humana formaliter conjungatur personalitati Verbi?*

**D**ifficultas est, an illa actio qua Verbum unitur humanitati, sit productiva alicujus termini formalis, tam à Verbo quàm ab humanitate distincti, quo actu & formaliter mediante tamquam nexo, humanitas cum Verbo uniatur?

Dico Verbum uniri humanitati, mediante medio, aut modo, seu nexu ab extremis realiter distincto. Ita Scotus in 3. dist. 1. q. 1. §. *ad primum dico*, ubi docet unionem hypostaticam esse per se relationem extrinsecus advenientem. Quem sequuntur omnes Scotistæ & plures Thomistæ, quos Gonetus refutat & citat. Prob. 1. Quod non est de se tale, debet fieri & denominari tale per aliud in seipso receptum; cum constitutio aut denominatio, à forma constituyente & denominante necessario proveniat: sed humanitas est de facto & denominatur actu unita Verbo divino: ergo per aliquid de novo in ipsa humanitate receptum & ad Verbi personam terminatum. Major patet, minor verò prob. 1. Humanitas non se habet respectu Spiritus sancti (cui est præsens) sicut se habet respectu personæ Filii: sed nihil aliud, est nisi quia est unita perso-

næ Filii, & non est unita personæ Spiritus sancti: ergo. 2. Humanitas alterius individui non magis est indistans à Verbo divino, quàm humanitas Christi, cùm Deus immensitate divinitatis suæ non longè sit ab unoquoque nostrum, ut ait Apost. sed humanitas alterius individui non est actu hypostaticè unita Verbo, sicut humanitas Christi: ergo habet in se aliquid, per quod sit & denominatur unita; quod cæteræ humanitates non habent. 3. Humanitas est ab intrinseco indifferens ad hoc ut terminetur, vel non terminetur à Verbo: ergo per aliquid intrinsecè in se receptum debet determinari, ut uniatur.

Resp. Gonet. n. 61. ad hoc sufficere actionem unitivam Dei, quæ cùm efficacissima sit, potest ea unire quæ longissimè etiam ad invicem distant: Et licet (inquit) talis actio secundùm se extrinseca sit humanitati, & transeat facta unione, tamen est intrinseca ratione sui termini formalis, in quo etiam virtualiter semper manet, nimirùm ratione subsistentiæ Verbi divini ut communicatæ humanitati, quæ est terminus formalis actionis unitivæ Dei.

Contra sic insurgo, & iterum probò conclusionem. *Primò*, Actio unitiva Dei licet efficacissima sit, non potest unire ea quæ longissimè distant, nisi in ratione causæ efficientis, nec esse nisi id quò Deus denominatur uniens: sed causa efficiens nequit esse causa formalis, quæ in quolibet opere necessariò requiritur: ergo licet actio unitiva sit causa efficiens, humanitas debet in se aliquid recipere, quo constituatur & denominetur intrinsecè unita Verbo; sed non recipit actionem unitivam Dei, quia non esset actu unita, sed uniens, quod est falsum: ergo recipit unionem qua formaliter unitur Verbo.

*Secundò*: Ut actio unitiva Dei, quæ ex Gonet. est extrinseca humanitati, & transit facta unione, sit intrinseca ratione sui termini formalis, & virtualiter remaneat ratione subsistenti-

flentia Verbi divini ut communicatae humanitati, oportet, quod in humanitate quae est unita, sit aliquid quod gerat vices actionis unitivae quae transivit, alias sicuti sublata causa tollitur effectus, sequeretur, quod si actio unitiva esset causa formalis unionis, sublata actione unitiva humanitas non amplius remansisset unita; sed hoc non potest esse persona Verbi, quae cum increata sit, nequit gerere vices actionis incarnativae quae est actio temporalis; nec humanitas, ex se sola, secluso quocumque medio de novo recepto & per actionem incarnativam derelicto, quia ex hoc sequeretur, quod humanitas Christi esset unita, etiam si esset à Verbo separata: nam si per actionem unitivam nihil in se de novo & reale acceperit, per actionem separativam nihil deperdere potest: ergo humanitas per actionem incarnativam Dei non unitur formaliter & intrinsecè Verbo, sed per aliquid ab ipsa productum & in humanitate receptum.

*Tertio:* Ut actio unitiva Dei remaneat virtualiter ratione subsistentiae Verbi divini ut communicatae humanitati, oportet, quod virtus illius remaneat: dicimus enim solem esse virtualiter in visceribus terrae, quia virtus ejus est in ipsis; sed actio unitiva nihil sui habere potest, nisi unionem ab humanitate & Verbo distinctam: nam humanitas non est virtus actionis unitivae, cum sit producta per actionem distinctam & praecedentem actionem unitivam, ut fatetur Gonet. nec subsistentia Verbi, cum sit increata & ab aeterno existens: ergo est unio medians. *Nec valet*, quod dicit Gonet. nempe Christum esse id quod per actionem unitivam producitur, sicut suppositum humanum est id quod per generationem humanam producitur; *non valet inquam*, tum quia humanitas est saltem natura unita subsistentiae Verbi prius quam Christus sit productus: nam Deus unit huma-

nitatem supposito Verbi, ut Christus sit productus, non econtra: ergo prius quàm actio unitiva producat Christum, producit aliquid quo humanitas fit & denominatur intrinsecè unita. Tum quia Deus nequit producere Christum actione unitiva, quin uniat humanitatem Verbo divino; cum Christus constet duabus naturis unitis: ergo licet Christus sit terminus *qui* actionis unitivæ, nequit esse id quo actio unitiva formaliter unit humanitatem Verbo, nec id quod per actionem unitivam primò, producitur. Tum quia in composito humano datur etiam unio à partibus simul sumptis distincta. Tum quia Christus includit essentialiter divinitatem & humanitatem unitas: ergo nequit esse id quo naturæ uniuntur, sed tantum id propter quod uniuntur, nec id quod per actionem unitivam primò attingitur, & consequenter nec id quod primò producitur; cum illa actio unitiva prius tangat humanitatem uniendam, ut uniat ipsam, quàm compositum, nempe Christum: ergo actio unitiva, cum sit productiva, producit aliquid in humanitate quam primò tangit.

Quæres, an assumptio humanæ naturæ ad personalitatem Verbi, sit una eademque realiter actio cum creatione animæ, & productione humanitatis Christi? Resp. negativè: quia naturæ assumptio tribuitur Verbo divino, & est supernaturalis; creatio animæ est actio trium personarum, præcedens assumptionem ejusdem à Verbo, & productio humanitatis est actio quæ tribuitur Virgini; aliàs non esset mater Christi: ergo sunt tres actiones realiter inter se distinctæ.

Obj. 1. Gonetius: Per illud Verbum divinum unitur actu & formaliter humanitati assumptæ, per quod exercet in ea rationem termini & ultimi complementi: sed exercet in ea rationem termini formaliter per suam personalitatem absque aliquo alio intermedio: ergo. Major est



evidens, nam cùm Verbum uniatur naturæ humanæ per modum termini ultimi & completi, necesse est, ut id per quod illi unitur, sit ipsum actuale exercitium terminandi; sicut quia forma unitur materiæ per modum actus informantis, illud per quod ei unitur, est exercitium actuale informandi. Minor verò prob. Nihil creatum potest esse actuale exercitium, siue actus secundus virtutis terminativæ personalitatis Verbi ad extra: ergo Verbum divinum exercet formaliter rationem termini naturæ humanæ, seu terminat naturam humanam in actu secundo per solam suam personalitatem. Consequentia est evidens, antecedens verò prob. Non minùs est infinitum Verbum divinum & actus purus in ratione termini naturæ, quàm Deus ipse absolutè in ratione principii productivi: sed ex eo quòd Deus est simpliciter infinitus & actus purus in ratione principii productivi, exercitium producendi res ad extra non potest esse aliquid ab illius infinita virtute productiva in recto distinctum; unde docent communiter Thomistæ Deum non operari ad extra per actionem formaliter transeuntem, sed virtualiter tantùm, quæ est ipsamet actio increata, sine virtuali distinctione identificata cum virtute illius operativa: ergo ex eo, quòd Verbum divinum est infinitum & actus purus in ratione termini naturæ, exercitium terminandi naturam non potest esse aliquid creatum, & ab ejus personalitate realiter distinctum.

Confirm. Subsistentia creata immediatè unitur per seipsam naturæ creatæ: ergo multò magis debet concedi subsistentiæ divinæ. Antecedens videtur certum, consequentia prob. Personalitas Verbi est simpliciter infinita & actualissima in ratione terminandi, continet enim omnem perfectionem & rationem terminandi, seculis imperfectionibus quæ in creatis subsistentiis reperiuntur: ergo si subsistentia creata

immediatè per seipsam terminet naturam creatam, multò magis id debet concedi subsistentiæ increatæ Verbi.

Resp. distinguendo majorem: Per illud Verbum divinum unitur actu & formaliter humanitati assumptæ, per quod exercet in ea rationem termini & ultimi complementi, ut *quo*, concedo: ut *quod*, nego. Distinguo pariter minorem: Exercet in ea rationem termini *quod*, formaliter per suam personalitatem, id est personalitas Verbi est id quod unitur humanitati, concedo: Exercet in ea rationem termini *quo*, formaliter, seu est id quo unitur humanitati, nego minorem & consequentiam, quia unio distincta ab extremis non est quid utriusque unitum, sed quid uniens utrumque; nec est ratio unita, sed ratio uniendi; nec mediat ut *quod* sicut brachium v. g. mediat inter manum & collum, sed ut *qua*, sicut actio mediat inter agens & passum. Ad prob. minoris, dico unionem quantumvis distinctam ab extremis non esse exercitium actuale, sive actum secundum virtutis terminativæ personalitatis Verbi ad extra, sed tantum esse conditionem *sine qua non* actualis exercitii; cum non sit pars essentialis compositi, ut patet in physico, nec hoc implicat personalitati Verbi divini, cum compositum theandricum exigat illam unionem distinctam, ut duæ naturæ actu & formaliter uniantur. Ad prob. nego paritatem, licet Verbum sit infinitum in ratione termini ad extra, sicut Deus in ratione principii productivi ad extra: Quia Deus in producendo agit juxta suam virtutem, at in incarnatione Verbum non agit activè juxta suam virtutem, sed merè passivè terminando se habet, & terminat juxta exigentiam naturæ assumptæ, & servat conditiones compositi; unde cum incarnatio sit quoddam compositum, servat conditiones quas compositum necessariò exigit; sed unio est medium.

dium quod extrema exigunt : ergo humanitas non potest terminari ad Verbum sine unione distincta, quamvis res producantur à Deo sine medio.

Ad confirm. concessio antecedente ( quod tamen ex Scoto in 4. dist. 12. q. 1. §. & *vers. ad quantum*, negari potest ) nego consequentiam; quia substantia creata non advenit naturæ ab extrinseco, sicut substantia Verbi; ideòque non exigit unionem, ut uniatur humanitati, sicut substantia aliena ab extrinseco proveniens.

Obj. 2. Si Pater vel Spiritus sanctus unirentur humanitati à Verbo assumptæ, aut alteri naturæ creatæ, unio ipsorum fieret sine ullo modo substantiali intermedio: ergo & unio Verbi cum humanitate assumpta, sine tali medio facta est. Consequentia patet ex paritate rationis; Antecedens verò sic ostenditur: Si ad hoc ut Pater & Spiritus sanctus unirentur naturæ creatæ, esset necessarius aliquis unionis modus, vel ille esset ejusdem rationis cum eo qui de factò conjungit Verbum humanitati, vel diversæ; neutrum dici potest: ergo &c. Minor quoad 1. partem prob. Illi unionum modi non possunt esse ejusdem rationis, qui habent terminos diversæ rationis, quasi specificè; sed modi unionum copulantes Patrem & Spiritum sanctum naturæ creatæ, habent terminos diversæ rationis ab eo qui Verbum conjungit naturæ humanæ: ergo non essent ejusdem rationis cum eo. Minor patet, quia in ratione personæ sunt quasi diversæ speciei, cum constituentur proprietatibus relativis diversæ rationis. Major verò prob. Modus unionis debet à termino specificari: ergo cum diversitate quasi specifica terminorum non potest stare unitas specifica unionum; unde propterea in sententia probabili quæ ponit unionem inter materiam & formam, unio illa quæ conjungit corpori animam rationalem, est diversæ

rationis ab illa quæ unit corpori animam equi. Suadetur etiam minor principalis, quoad 2. partem: In entibus absolutis diversæ speciei, reperitur excessus & defectus secundum perfectionem specificam, quia species se habent veluti numeri, ut docet Arist. sed tam perfectus esse deberet unus illorum modorum unionis qui conjungerent tres personas naturæ creatæ, quàm alius: ergo non possent esse diversæ rationis specificæ. Major patet: Minor etiam videtur certa: quia non esset, unde inæqualitas eorum dedumeretur, cùm divinæ personæ, per ordinem ad quas essentialiter constituerentur, sint æquales in perfectione.

Resp. negando antecedens. Ad cujus prob. dico, quòd ille modus esset ejusdem rationis cum eo qui de facto conjungit Verbum humanitati. Tum quia essent relationes ejusdem generis & prædicamenti; unio enim hypostatica est relatio extrinsecus adveniens, de prædicamento habitus, ut dicunt Scotistæ. Tum quia licet tres divinæ personæ, in ratione personæ sint quasi diversæ speciei, tamen eodem modo terminarent unionem, sicque in ratione termini essent ejusdem rationis. Tum quia dato, quòd divinæ personalitates sint formaliter infinitæ, ut volunt Thomistæ, sequitur, quòd uniones propter infinitatem terminorum essent ejusdem perfectionis, æqualitatis & rationis. Ad cujus prob. nego minorem: Modi enim unionum copulantes Patrem & Spiritum sanctum naturæ creatæ, in ratione termini essent ejusdem rationis, quia terminarent sub eadem ratione formali, licet in ratione constitutivi principii sint diversæ rationis. Tum quia eodem modo natura subsisteret in persona Patris, quo subsistit in persona Filii. Tum quia unio esset ratio uniendi naturam creatam cum persona Patris, ut persona est & subsistentia præcisè, non verò in ratione talis personæ, seu Patris aut Spiritus sancti. Tum quia,  
quod

quod resuleret ex illis extremis unitis, esset Deus homo. Tum quia ex Gonet. tom. 1. de visione, Visiones hominum & Angelorum sunt ejusdem speciei & rationis, quoniam intellectus Angeli & intellectus humanus, licet in ratione proprietatum distinguantur specie, in ratione potentiae & respectu visionis beatificae sunt ejusdem rationis: ergo unio qua natura uniretur personae Patris, & unio qua unitur de facto personae Filii, essent ejusdem rationis, quia personae in ratione termini & sustentantis naturam, essent ejusdem rationis. Tandem, omnes uniones quae mediant inter corpus & animam rationalem, sunt ejusdem rationis & speciei: ergo multò magis uniones quae mediarent inter Patrem & naturam, essent ejusdem rationis, cum essent creatae à Deo.

*Deinde*, relatio reverà specificatur à fundamento & termino, si ex ipsis oriatur ex sola positione extremorum, ut de facto oriuntur relationes intrinsecus advenientes, non verò si aliter se habeat, seu si sit creata à Deo; quippe cum non recipiat suum esse ab extremis, nec potest ab ipsis suam recipere specificationem. Unde cum unio qua Pater & Spiritus sanctus unirentur naturae à verbo assumptae, esset creata, sicut ea qua verbum unitur eidem naturae: ergo hujusmodi uniones essent ejusdem rationis, & distinctae realiter ab extremis, sicuti modò unio hypostatica distinguitur: nam humanitatem esse unitam verbo, est aliquid reale positivum & physicum, ut constat ex Concilio Ephesino; quod quidem reale & physicum non est sola humanitas; in alio enim homine est humanitas praesens personae verbi, cum Verbum sit ubique quia est Deus, nec sola subsistentia per eandem rationem, ac proinde est ipsamet unio hypostatica, qua humanitas & subsistentia de praesentibus fiunt unitae; sicque unio illa quae est realis & physica, distinguitur realiter ab extremis.

QUAE

## QUÆSTIO IV.

*Quisnam sit terminus totalis & formalis actionis unitivæ Dei, seu assumptionis humanitatis ad Verbum?*

**N**ot. est, actionem productivam duos habere terminos, quorum unus est totalis seu *qui*; alter verò est formalis seu *quo*. Prior nihil aliud est quàm id quod producitur, seu tota res producta: Posterior autem est illa forma qua mediante terminus ille totalis completur & perficitur: v. g. in generatione substantiali terminus *qui* est suppositum, seu compositum ex natura & subsistentia: & terminus *quo* est ipsa forma substantialis, qua compositum habet esse.

Not. est 2. actionem unitivam multipliciter considerari posse. 1. In ordine ad divinam volitionem, quæ est causa & principium per quod fit, & sic considerata dicitur *unitio*. 2. In ordine ad personam Verbi quam unit humanitati, & sic dicitur *communicatio*. 3. Tandem in ordine ad naturam assumptam, in quo sensu dicitur *humanatio*, aut *incarnatio*. His suppositis

Dico 1. Quòd terminus totalis, sive *qui* assumptionis seu actionis unitivæ Dei, est Christus. Ita omnes Theologi: Quia Christus est id quod actioni unitivæ Dei correspondet. Tum quia est totum id quod Deus intendit, dum unit humanitatem cum Verbo divino. Tum quia est ipsum Verbum subsistens in humanitate, *Non in confusione substantiæ, sed in unitate personæ*, ait Athan. in Sym. per quam natura divina & humana sociantur invicem & subsistunt: ergo Christus est terminus totalis, seu *qui* actionis unitivæ Dei.

Dices: Terminus qui actionis unitivæ debet esse

esse quid creatum & temporale, cum nihil increatum produci valeat; sed Christus non est quid creatum: hæc enim propositio, *Christus est creatura*, est falsa: ergo Christus non est terminus actionis unitivæ. *Resp.* distinguo minorem: Christus non est quid creatum, si sumatur formaliter & copulativè, nego minorem; sic enim est quid creatum & de novo productum, quia ante illam actionem unitivam, quæ temporalis est, non erat: Materialiter & disjunctivè, concedo; quia sic non est simpliciter quid creatum, cum unum extremum, quod est de materiali & integritate Christi, non sit creatum; unde nego consequentiam, quia Christus sumptus formaliter & copulativè est terminus *qui* actionis unitivæ, cum sic dici possit creatura, non simpliciter & absolutè, quoniam sic divinitatem excluderet; sed secundum quid, nempe secundum humanitatem unitam, quæ est creatura.

Dico 2. Quòd unio hypostatica qua humanitas unitur formaliter Verbo divino, est terminus formalis assumptionis seu actionis unitivæ Dei. Hæc conclusio est contra Gonetum. Prob. 1. Terminus formalis actionis unitivæ est id quod primò ac immediatè producitur, & ad cuius positionem terminus totalis resultat & fit; sed unio hypostatica sic se habet: ergo est terminus formalis. Major patet. Prob. minor: Actio unitiva est actio nova: ergo ejus terminus formalis, sicut & totalis, est novus: sed nihil fit de novo præter Christum, nisi unio hypostatica: ergo. Prob. antecedens: In Christo tria dumtaxat considerari possunt, scilicet divinitas, humanitas & unio: sed divinitas non fit de novo, cum sit increata; humanitas non fit per actionem unitivam: ergo dato quòd fit unio distincta (ut supponit Gonet. hinc conclusione secunda) debet esse terminus formalis actionis unitivæ.

*Dices:*

*Dices*: Actio unitiva Dei est substantialis: ergo ejus terminus formalis debet esse substantia, non verò unio quæ est accidens. *Resp.* nego consequentiam, quia ut aliqua actio dicatur substantialis, non requiritur, quòd terminus productus sit substantia, sed sufficit, quòd terminus communicatus per illam actionem sit substantia; unde cum personalitas Verbi sit terminus per actionem unitivam communicatus, actio dicitur substantialis, quamvis terminus formalis per ipsam productus, sit accidens.

*Obj. 1. Gonet*: Licet daretur modus unionis inter materiam & formam, ille tamen non esset terminus formalis generationis: ergo similiter quando poneretur modus aliquis substantialis unionis, quo Verbum humanitati assumptæ copularetur, non esset propterea terminus formalis assumptionis, seu actionis unitivæ Dei. *Consequentia* patet, antecedens verò docetur communiter à Philosophis, solis Conimbricensibus exceptis, & hac ratione suadetur: Terminus formalis generationis est ille per quem constituitur terminus totalis; at terminus totalis generationis, nempe compositum vel suppositum, non constituitur per ipsam unionem, cum unio non sit pars, sed purus nexus partium, sed per ipsam formam, sive totalem qualis est humanitas, sive partialem qualis est anima rationalis: ergo terminus formalis generationis non est unio, sed forma: terminus quidem formalis totalis, forma totalis, v.g. humanitas, terminus verò formalis partialis, forma partis, puta anima rationalis.

*Resp.* distinguendo antecedens: Modus unionis inter materiam & formam non est terminus formalis generationis in ratione communicationis, concedo; in ratione unionis, nego antecedens & consequentiam: Nam id per quod constituitur terminus totalis, est terminus formalis communicatus, seu generationis, quatenus est actio.



actio communicativa: at terminus formalis productus seu generationis, quatenus est actio unitiva materiæ cum forma, est unio seu nexus, quo materia & forma uniuntur per generationem: hinc est, quod argumenta Gonetii probant personalitatem seu subsistentiam Verbi esse terminum formalem actionis unitivæ, quatenus est communicatio, cum persona sit id quod per ipsam humanitati communicatur, non verò quatenus est unio, cum id quo unit, sit unio hypostatica quæ terminat generationem, prout est actio unitiva materiæ cum forma, & formæ cum materia; unde superfluum esset adducere alia argumenta Gonetii, cum non probent personalitatem Verbi esse terminum formalem actionis incarnativæ aut unitivæ, seu quatenus est unio, sed tantum quatenus est communicatio, quod nemo negat: certum enim est, quod personalitas Verbi est id quod per actionem incarnativam communicatur naturæ humanæ, & habet rationem actus & perfectivi in ratione termini communicati, non verò in ratione termini producti, unioni correspondentis.

*Dices:* Terminus formalis actionis est id quo res habet esse; sed compositum de quo est questio, seu Christus, non habet esse per unionem distinctam realiter ab extremis: ergo non habet rationem termini formalis. *Distinguo* majorem: Terminus formalis actionis communicativæ, est id quo res habet suum esse specificativum ac perfectivum, concedo; actionis unitivæ, nego. Unde nego etiam consequentiam in eodem sensu acceptam, quia unio est id quo humanitas assumpta unitur verbo divino, & consequenter est terminus formalis actionis Dei, quatenus est unio; quamvis non sit id quo Deus est homo, nec id quo homo est Deus.

## QUÆSTIO V.

*An unio hypostatica in ratione unionis  
sit omnium maxima?*

**S**uppono unionem hypostaticam esse omnium maximam in ratione doni & beneficii. Tum quia est maxima perfectio entitativa in natura humana. Tum quia includit omnia dona supernaturalia, ut patet in Christo qui habuit gratiam summam, visionem beatificam, propter unionem humanitatis cum divinitate, ut suadet D. Aug. cap. 17. de prædest. Sanctorum, *Hæc unio, scilicet divinitatis cum humanitate, est excellentissima, tantoque naturæ nostræ subjectio erecta est per ipsam, ut quo altius opponeretur, non haberet.* Unde quærendum est, an sit maxima omnium unionum?


Dico 1. Quòd unio hypostatica ex parte extremorum quæ uniuntur, scilicet naturæ humanæ & divinæ, non est maxima omnium. Ita Scotus in 3. dist. 6. q. 1. §. *ad argumenta*. Prob. Unio corporis & animæ est major in ratione unionis: ergo &c. Prob. 1. Ex unione corporis & animæ resultat aliquid, quod est omnino unum, tam in natura, quam in persona; at ex unione hypostatica resultat Christus qui est tantum unus unitate personæ, cum duas naturas includat. 2. Corpus & anima uniuntur ut actus & potentia: ergo hæc unio est major in ratione unionis.

Dico 2. Quòd unio hypostatica ex parte ejus in quo uniuntur in Christo natura humana & divina, est maxima omnium; quia persona Verbi in qua natura divina & natura humana uniuntur, est simplicissima: ergo ratione hujusmodi personæ unio hypostatica est major. Est etiam maxima ratione dignitatis extremorum, & ratione inseparabilitatis: nam natura divina quæ est

## DE INCARNATIONE. 117

est unum ex extremis, est major quocumque ente, & est inseparabilis ab humanitate Christi, qui in æternum erit Deus homo: ergo unio hypostatica est maxima omnium unionum ex parte personæ Christi & ex parte extremorum.

*Dices:* Extrema unionis hypostaticæ maximè distant: ergo est maxima in ratione unionis & ex parte extremorum. *Resp.* negando consequentiam, quia hæc ratio probat tantum unionem hypostaticam esse maximæ virtutis, quia unio eò est major quò compositum est simplicius & magis unum. *Dices;* Unio physica corporis & animæ Christi in triduo mortis dissoluta fuit, alioquin Christus in triduo mortis fuisset homo, quod est falsum: ergo non est major unio quàm unio hypostatica. *Resp.* concessio antecedente, negando consequentiam. Tum quia ratio probat solum unionem hypostaticam esse indissolubiliorem. Tum quia unio physica corporis & animæ Christi habuit contrarium, quod unio hypostatica non habuit, nimirum mortem: ergo hoc non evenit ratione majoris unionis, sed ratione divinæ voluntatis, quæ divinitatem ab humanitate separare noluit, sicut animam à corpore.



## DISPUTATIO VI.

### *De causa Physica & Morali Incarnationis.*

**E**Xaminatis causis, finali scilicet seu motiva, & formali incarnationis Verbi divini, modò de causa efficiente tam Physica, quàm Morali seu meritoria agendum est.

QUÆ

## Q U Æ S T I O I.

*An aliqua creatura possit esse causa Physica unionis hypostaticæ, saltem instrumentaliter, & an reipsa beata Virgo fuerit causa instrumentalis illius?*

**Q**Uæstio agit de causa instrumentali dumtaxat, quia certum est tres divinas personas esse causam efficientem & principalem, ut definitum fuit in pluribus Conciliis.

Dico 1. Quòd de facto B. Virgo non fuit elevata à Deo tanquam instrumentum ad conjungendam hypostaticè humanitatem Verbo divino. Hæc conclusio est communis. Prob. Incarnatio seu unio hypostatica est opus Dei, nullamque causam sui agnoscit præter omnipotentiam: ergo B. Virgo non est causa instrumentalis. Consequentia patet. Prob. antecedens 1. Ex illo Psal. 135. vers. 4. *Qui facit mirabilia magna solus*: ac omnium mirabilium maximum est unio hypostatica: ergo solus Deus seclusa quacumque alia causa eam fecit. 2. Ex illo Abac. 3. *Domine opus tuum in medio annorum vivifica illud*, id est, opus ita tibi proprium & singulare, ut fieri possit à te solo; sed opus illud est incarnatio, ut exponunt SS. Patres, & ut indicant hæc verba, *In medio annorum vivifica illud*; ergo incarnatio nullam causam habet præter divinam voluntatem, quæ nulla causa secunda concurrente creavit novum super terram. 3. Ex Luc. 1. *Quomodo fiet istud?* Angelus respondens Mariæ, ait, *Non est impossibile apud Deum omne Verbum*; ac si dixisset: Opus illud impossibile esset, nisi virtus Altissimi illud efficeret, cujus tota ratio est virtus facientis: ergo incarnatio seu unio hypostatica est opus omnipoten-

potentiæ Dei, nulla creaturarum efficientia concurrente.

Prob. 2. Instrumentum attingit effectum causæ principalis, per virtutem ab illa derivatam, ut patet: sed B. Virgo unionem hypostaticam attingere non potuit: ergo nec esse causa instrumentalis. Prob. minor: Quod ex se petit creari, à creatura attingi minimè potest, aliàs creatura creare posset: sed unio hypostatica est creata: ergo. Deinde, B. Virgini concedendus est concursus ille qui necessarius est, ut sit verè mater Dei: concurrat enim ut mater & est verè mater, quia verè ut mater concurrat: sed ad salvandam maternitatem Christi in B. Virgine, non requiritur concursus instrumentalis in ordine ad unionem hypostaticam. Tum quia concursus matris in productione Filii non est instrumentalis, cum sit activus, sed principalis; idcirco concursus Virginis non potest esse instrumentalis. Tum quia cum unio non sit de essentia Christi, sed tantum conditio, non respicit Virginem seu matrem Christi, tanquam causam. Tum quia mater non est mater, quia unit materiam cum forma, sed tantum quia præstat & ministrat materiam; sed Deipara ministravit materiam quam Verbum divinum complevit propria subsistentia in eodem instanti in quo persona creata resultasset: ergo B. Virgo est verè mater Dei, sine concursu ad unionem hypostaticam.

Dico 2. De potentia absoluta non potuisse B. Virginem, aut aliam creaturam elevari à Deo tanquam instrumentum ad conjungendam hypostaticè humanitatem Verbo divino. Hæc conclusio est contra Gonetum. Prob. 1. B. Virgo non habet potentiam obedientialem ad habitus supernaturales per se infusos, sed unio hypostatica, quæ, ut ex dictis disput. præced. patet, distinguitur ab extremis unitis, est per se infusa & petit creari, & est extra  
sphæ.

sphæram activitatis B. Virginis, sicut visio beatifica est extra sphæram oculi corporei: ergo sicut implicat, quòd oculus corporeus videat Deum; ita implicat etiam, quòd B. Virgo producat unionem hypostaticam, & hypostaticè conjungat humanitatem Verbo. 2. Nulla creatura potest instrumentaliter concurrere ad missionem personæ divinæ: sed incarnatio seu unio hypostatica, est missio terminativè, & actualis communicatio aut datio personæ divinæ: ergo, &c.

*Dices 1.* B. Virgo apud Patres frequenter dicitur instrumentum incarnationis: ergo est instrumentum unionis hypostaticæ. Resp. Patres esse intelligendos de concursu dispositivo, quia B. Virgo præparavit & subministravit purissimum sanguinem ad formandam humanitatem hypostaticè uniendam Verbo, non autem de concursu effectivo.

*Dices 2.* Intellectus elevatur ad visionem beatificam quæ supernaturalis est: ergo elevari potuit B. Virgo ad productionem unionis hypostaticæ. Resp. negando consequentiam, quia visio beatifica est actus qui non petit creari, sed produci à potentia vitali; ideòque intellectus qui vitalis est, potest elevari ad videndum Deum: At unio hypostatica petit creari, ergo non potest instrumentaliter produci à creatura, cui repugnat virtus creandi, ut dicunt Philosophi.

*Dices 3.* B. Virgo est causa humanitatis: ergo est causa unionis hypostaticæ quæ sequitur ad humanitatem. Resp. negando consequentiam, quia unio non sequitur ex influxu & natura humanitatis, sed ex influxu creativo Dei, qui creat unionem, ut uniat humanitatem Verbo: ergo B. Virgo non est causa unionis, licèt sit causa humanitatis.

Respondeo 2. negando consequentiam alia ratione. Generans potest dici causa principalis corporis, & causa instrumentalis unionis corporis

poris cum anima ; quia generans virtute sua activa ultimè disponit corpus ad recipiendam animam rationalem, quæ connaturaliter debetur corpori, ita ut non possit non infundi, secluso miraculo ; sicque videtur esse instrumentum unionis causando humanitatem : at humanitati productæ per beatam Virginem non debetur connaturaliter divinitas, sicut debetur illi anima rationalis : ergo ex eo quòd beata Virgo sit causa humanitatis, non sequitur ipsam esse causam etiam instrumentalem unionis hypostaticæ.

*Dices* 4. Beata Virgo potuit esse instrumentum unionis hypostaticæ : ergo fuit, quia Deus contulit ei quidquid dare potuit, ut esset mater filii sui. Antecedens probatur : Elementa sunt instrumenta gratiæ & salutis : ergo Beata Virgo potuit esse instrumentum unionis hypostaticæ. *Nego* antecedens, quia implicat contradictionem, quòd creatura aliqua eleveretur ad creandum. Ad probationem, dico elementa elevari ad productionem gratiæ moraliter, cum Sacramenta sint instrumenta moralia gratiæ, ut dicetur in proprio loco ; & quæstio præsens est de instrumento physico unionis hypostaticæ.

---

## QUÆSTIO II.

*An Christus per opera, prioritate temporis vel naturæ præcedentia unionem hypostaticam, eam promeruerit, vel saltem mereri potuerit ?*

**D**ICO I. Quòd Christus per nullam operationem præcedentem prioritate temporis vel naturæ unionem hypostaticam, eam meruit.

*Durand Tom. IV.*

**F**

**Prob.**

Prob. 1. pars: Meritum est actus secundus libere productus à persona, cui conferendum est præmium; sed Christus ante unionem hypostaticam, nullum actum liberum producere potuit, quia in ipso nulla datur persona nisi persona Verbi, cui humanitas unita fuit per unionem hypostaticam: ergo Christus per opera præcedentia unionem hypostaticam, non eam promeruit.

2. Si Christus per opera præcedentia unionem hypostaticam, eam de condigno meruisset, incarnatio Verbi non esset simpliciter donum, cum haberet rationem præmii: nec esset opus ex gratia factum, sed ex iustitia; at hoc est contra illud Luc. 1. *Per viscera misericordiae Dei nostri, in quibus visitavit nos oriens ex alto*: ergo Christus per opera præcedentia non meruit unionem hypostaticam.

Dices: D. Basil. homil. de humana generat. Christi, ait, *Digna fuit humanitas divinitati conjungi*: ergo unio supponit aliquod meritum præcedens. Resp. D. Basil. non loqui de dignitate meriti, sed convenientiæ, aut necessitatis.

Dices: Ps. 44. habetur, *Dilexisti iustitiam & odisti iniquitatem, propterea unxit te Deus, Deus tuus, oleo latitiæ præ consortibus tuis*; sed unctio illa ex SS. Patribus, est unio humanitatis cum Verbo: ergo. Resp. cum omnibus Theologis *Ly propterea* apud August. Anselm, Bedam & alios Patres, non denotare causam meritoriam, sed finalem; ac si Propheta dixisset, *Dilexisti iustitiam & odisti iniquitatem*; quia propterea unxit te Deus Deus tuus oleo latitiæ; unde dilectio iustitiæ & odium iniquitatis, non sunt causa meritoria unionis, sed potius econtra. Dices: Apoc. 5. dicitur de Christo, *Dignus est agnus qui occisus est, accipere divinitatem*: ergo meruit unionem cum divinitate. Resp. negando consequentiam, quia *Ly accipere divinitatem* non denotat assumptionem humanitatis à Verbo, quia in morte agni, humanitas non erat assu-

men-



menda, nec divinitus hypostaticè accipienda; sed denotat fruitionem divinitatis, vel manifestationem ejusdem, quæ de facto manifestata fuit: Judæi etenim dixerunt, *Verè Filius Dei erat iste.*

Prob. 2. pars: Meritum fundatur in operatione, ut dictum est in tract. de merito, & ut insinuat primum argumentum; sed licet creatio animæ Christi & productio humanitatis ejusdem, natura præcedant unionem hypostaticam, & humanitas prius natura sit producta quàm unita Verbo; tamen nulla operatio animæ Christi est natura prior unionem hypostaticam, quia operatio supponit subiectum subsistens, cum operatio sequatur esse, & actiones sint suppositorum saltem de materiali, id est connotent suppositum. Unde cum in Christo nulla sit subsistentia aut persona præter divinam, per unionem hypostaticam humanitati unitam, sequitur, quòd Christus per opera præcedentia prioritate naturæ, non meruit unionem hypostaticam.

*Dices:* Ex Scotistis actiones sunt singularium; sed humanitas Christi ante unionem erat singularis: ergo aliquam actionem meritoriam in illo instanti elicere potuit. Resp. distinguo majorem: Actiones sunt singularium simpliciter, scilicet tam de formali quàm de materiali, nego; Sunt singularium pro formali tantum, concedo majorem; & concessa minori, nego consequentiam: Quia licet actiones sint singularium, nequeunt tamen esse sine supposito, seu quin natura singularis cujus sunt, subsistat, & consequenter humanitas Christi antecederet ad unionem qua fuit unita subsistentiæ, nullam actionem producere potuit.

Dico 2. Per opera prioritate temporis antecederet unionem hypostaticam, potuisse humanitatem Christi de potentia absoluta mereri incarnationem, nedum de congruo, sed etiam de condigno. Prob. 1. destruendo fundamen-

tum Gonet. Ut opera antecedentia ad unionem hypostaticam, sint de condigno meritoria unionis hypostaticæ, non requiritur, quòd sint infiniti valoris, ut supponit Gonet. Tum quia unio non est infiniti valoris, ut dictum est suprà. Tum quia purus homo in gratia constitutus, potuit de condigno satisfacere pro peccatis; ac potuit humanitas Christi priùs tempore produci, quàm uniretur ad Verbum, & in supposito sibi connaturali subsistere; sicque subsistens, opus supernaturale elicere ordinatum ad incarnationem merendam, ut fatetur Gonet. Sed opus illud posset esse tanti meriti, quanti valoris est unio, cum ille valor non sit infinitus: ergo de potentia Dei absoluta, nedùm de congruo, sed etiam de condigno, humanitas quæ est in Christo, potuit mereri unionem hypostaticam in ordine executionis. 2. Justus potuit de potentia absoluta mereri de condigno substantiam incarnationis; nam Deus potuit illi conferre gratiam de potentia absoluta, liberaliter & non ex meritis Christi, cum qua elicuisset opera meritoria de condigno incarnationis Verbi divini, cum non requiratur meritum infinitum: ergo de potentia absoluta, humanitas Christi quæ existere potuit proprio supposito, & elicere opera meritoria, & postea privari propria subsistentia, & assumi à Verbo, potuit habere merita condigna unionis hypostaticæ.

*Dices:* Christus prædestinatus est principium totius gratiæ & meriti: ergo nullum opus potest esse meritorium incarnationis. Resp. antecedens esse verum secundum præsentem providentiam Dei, non autem de potentia absoluta.

Dico 3. Humanitatem Christi, etiam de potentia absoluta, non potuisse mereri incarnationem de condigno vel de congruo, per opera prioritate naturæ illam antecedentia. Hæc

con-

conclusio intelligitur de humanitate Christi, ut assumpta à Verbo; si enim fuisset prius alteri personæ increatæ, aut subsistentiæ Dei absolutæ unita, ut advertit Gonet. vel alteri supposito creata, ut intelligitur in præcedenti conclusione, certum est, quod potuisset de potentia absoluta mereri de condigno unionem hypostaticam: sic ergo intellecta conclusio. Prob. Humanitas Christi prout unita Verbo divino, nullum actum liberum elicere potuit, etiam divinitus, in illo instanti naturæ, in quo prius fuit producta, quàm unita: ergo in illo instanti non potuit mereri unionem. Consequentia patet, quia omne meritum fundatur in operatione. Prob. antecedens: Actio nequit fieri nisi ab agente subsistente, vel in se, vel in alio, nedùm de lege ordinaria, sed etiam divinitus, quia est actus rei completæ: nam in re non subsistente & communicabili ut *quod & quo*, nihil reperitur nisi appetitus ad subsistentiam & terminum suæ dependentiæ; aliàs actiones subsistentiam præcedentes, terminarent dependentiam quam agens dicit ad suppositum, & illud complerent, quod est falsum; sed in illo instanti naturæ, in quo humanitas Christi antecedit unionem cum Verbo, non subsistit, nec est completa, cùm in Christo nulla sit subsistentia nisi divina; ergo humanitas Christi ut unita Verbo divino, seu prout destinata & ordinata ad subsistentiam Verbi, non potuit divinitus mereri incarnationem.

Confirmatur: Meritum non solum est actus à voluntate liberè elicitus, ita ut voluntas possit mereri in eodem instanti sive naturæ, sive temporis, in quo existit, sed etiam gratiæ habitualis, quæ, ut ex dictis in tractatu de merito constat, necessariò requiritur ad meritum condignum: sed voluntas animæ Christi non potuit etiam de potentia absoluta, in eodem signo naturæ produci, & recipere gratiam; hæc.

enim, cum sit accidens, quod supponit subiectum præexistens, seu prius existens, ad minus prioritate naturæ, sive sit eductum, ut volunt Thomistæ, sive sit creatum; quia de natura receptibilis est præsupponere recipiens: ergo voluntas Christi non potuit per opera antecedentia unionem prioritate naturæ, etiam nitente divina virtute, mereri incarnationem. Deinde, de natura accidentis est recipi in ente substantialiter completo, ut ex definitione accidentis tradita à Philosopho certum est: sed humanitas Christi completur substantialiter per subsistentiam Verbi: ergo gratia non potuit conferri animæ Christi, nisi post assumptionem seu subsistentiam.

*Dices:* Gratia requiritur ad meritum ex divina ordinatione, nam ex Scotistis communiter, sanctificat &c. ex divina ordinatione, qua de causa voluntas Christi potuit divinitus mereri sine gratia habituali: ergo potuit de potentia absoluta mereri unionem hypostaticam per opera præcedentia prioritate naturæ. Probatur consequentia: Humanitas Christi, ex Scoto, fuit prius producta & existens, saltem prioritate naturæ, quam assumpta; in quo signo potuit operari divinitus, subindeque mereri sine gratia, quæ divinitus non requiritur ad meritum.

Respondео negando consequentiam: quia natura non potest operari nisi habeat suum esse completum, quia ex Philosopho operari sequitur esse. Unde cum subsistentia, in Doctrina Scoti, sit ultimum complementum substantiale naturæ singularis, necesse est absolute naturam singularem compleri substantialiter per suppositum, sive proprium, sive alienum, priusquam apta censeatur ad operandum; atqui in illo signo naturæ, in quo humanitas intelligitur prius producta, quam assumpta, non intelligitur cum sua subsistentia: ergo in illo signo priori prioritate naturæ, non potest operari, nec mereri, etiamsi divinitus gratia non requi-

requiratur, cùm impossibile sit etiam divinitus, quòd operetur.

*Dices*: Non minùs dependet accidens à sub-  
jecto, ut operetur, quàm natura à subsistentia;  
sed accidentia divinitus operari possunt sine sub-  
jecto, ut patet in Eucharistia: ergo & natura  
sine subsistentia. *Nego* majorem: ratio dispari-  
tatis est, quia accidens dependet à subiecto tam-  
quam à termino sustentante, quod munus po-  
test supplere Deus removendo dependentiam  
accidentis, ut operetur: natura autem depen-  
det, ut operetur, à supposito tamquam à prin-  
cipio connaturali, quod reverà Deus remove-  
re potest, & operationes in natura esse; sed hujus-  
modi operationes non essent naturæ, sed Dei.

### Q U Æ S T I O III.

*An Christus per opera subsequencia  
Incarnationem, eam me-  
reri potuerit?*

**D**ico, Christum per actus subsequentes  
unionem, & à Verbo ut unito humanita-  
ti procedentes, neque de condigno, neque de  
congruo potuisse mereri incarnationem. Prob.  
Opus meritorium debet præcedere præmium,  
seu rem cujus est meritorium, cùm meritum  
se habeat ad præmium, sicut medium ad fi-  
nem; sed opera subsequencia incarnationem  
non præcedunt eam, aliàs non essent subse-  
quentia: ergo &c. Major patet. Minor prob.  
Opera subsequencia incarnationem non possunt  
esse meritoria ejusdem, quin sint ordinata &  
acceptata propter incarnationem: sed opéra in-  
carnationis ut incarnationis sunt, & subse-

quentia, non possunt ordinari nec acceptari, quin prius volita sit incarnatio; aliàs causa finalis non esset prius visa & volita, quàm medium; quod est falsum: ergo impossibile est quòd opera subsequētia, ut talia, præcedant incarnationem.

*Dices 1.* Deus posset dare unionem hypostaticam naturæ humanæ in præmium operum quæ faceret mediante unione, per modum anticipatæ solutionis; sicut Rex potest dare arma & equum militi, in præmium victoriæ quam iis mediantibus consequeretur, & sine quibus victoriam consequi non posset; at opera subsequētia arma & equum, essent meritoria eorundem; ergo etiam opera Christi essent de condigno meritoria unionis hypostaticæ, per modum anticipatæ solutionis.

*Resp.* negando maiorem quoad utramque partem: quia datio equi esset mera gratia requisita ad victoriam in certamine consequendam. Tum quia non dependeret à victoria, imò econtra. Tum quia equus tribueretur militi, ut vinceret, sicque non posset equus ille habere rationem præmii anticipati respectu dationis, quia gratia non cadit sub merito. Tum quia, quod datur ut præmium, oportet, quòd detur ex iustitia, & propter meritum receptum; sed Rex non dat equum militi ex iustitia, nec propter laborem receptum; imò potius miles pugnat ex iustitia: ergo Rex non potest dare equum per modum præmii anticipati, propter victoriam subsequētem; nec Deus unionem per merita subsequētia incarnationem. Hinc est quòd Christus non meruit dationem unionis, quæ cum sit principium meriti, non potest cadere sub merito, nec esse propter meritum, cum ex ipsa meritum procedat.

*Dices 2.* Merita Christi ut futura, potuerunt prius prioritatem naturæ prævideri à Deo, quàm executio incarnationis: ergo Christus per illa

la merita, mereri potuit executionem. Consequentia patet. Prob. antecedens: Intentio quam habuit Deus sese incarnandi, est prior decreto illam exequendi; sed in illa intentione incarnationis, merita prævideri potuerunt ut futura: ergo. Resp. negando antecedens, cum merita Christi ut futura, à futuritione incarnationis quoad executionem dependeant. Ad prob. 1. nego minorem, quia merita cum à voluntate Christi dependeant, non possunt prævideri nisi post prævisam voluntatem Christi, quæ prævideri non potest nisi post decretum exequendi incarnationem, non verò in intentione incarnationis, quia merita cum sint actus secundi, non spectant ad rem in intentione, sed in executione. 2. Nego majorem, quia intentio quam Deus habuit sese incarnandi, cum sit efficax, non est prior decreto illam exequendi; sic enim includit voluntatem executionis.

Ex dictis colliges 1. Christum nec meruisse, nec potuisse mereri suæ incarnationis continuationem; nam decretum exequendi incarnationem, includit continuationem ejusdem, cum sit opus Dei, seu opus æternum; sed Christus non meruit, nec mereri potuit decretum exequendi incarnationem. Tum quia dictum est suprâ. Tum quia ex se incarnationis executio est principium totius meriti Christi, cum Christus ab ipsa incarnatione essentialiter dependeat ut sit & existat. Tum quia unio hypostatica est perpetua ex vi decreti executivi: ergo incarnatio tam in primo sui esse, quàm in continuatione, nequit esse præmium.

Colliges 2. Christum non meruisse Virginis maternitatem, hoc est ex beata Virgine concipi & nasci, nec alias circumstantias incarnationem antecedentes vel concomitantes. Prob. August. lib. de prædest. Sanctorum cap. 15. loquens de conceptione Christi, ait, *Neque retributa ista generatio, sed tributa, ut*

*alienus ab omni obligatione peccati de Spiritu & Virgine nasceretur; at si fuisset præmium meritum Christi prævisi, non dixisset tributa, vel saltem non posuisset hæc verba expressè, neque retributa, cum datio præmii sit retributio. Deinde, maternitas & filiatio sunt simul natura & cognitione: ergo si Christus unionem seu incarnationem mereri non potuerit, propter easdem rationes ex Virgine matre nasci mereri non potuit, nec alias circumstantias antecedentes & concomitantes.*

Colliges 3. Christum meruisse circumstantias incarnationem consequentes. Tum quia non tenent ex parte principii merendi, sed ad illud subsequuntur: ergo sub merito cadere possunt: meruit ergo Christus Magorum & Pastorum adorationem, fugam in Ægyptum ad evitandam præmaturam mortem, laudem Angelorum, curam, sollicitudinem sacratissimæ Virginis & B. Josephi; extensionem unionis hypostaticæ ad eas substantiæ partes, quas per nutritionem acquirebat. Meruit etiam reunionem totius humani cum Verbo; nam anima Christi in triduo fuit separata ab anima, ideòque totum humanum fuit destructum, & in resurrectione reunitum Verbo, ut advertit Gonet. quia hæc resurrectio consequitur ad unionem hypostaticam, cum sit effectus virtutis Christi, qui propria virtute resurrexit à mortuis & ascendit in cælum.

Ne inferas tamen indè, partes, seu animam & corpus fuisse separatas à divinitate per mortem Christi, cum quod semel assumpsit, nunquam dimiserit; sed solum hominem, seu totum in nostra scola à partibus, seu anima & corpore unitis realiter distinctum, fuisse per mortem à divinitate separatum; alioquin in triduo Christus fuisset homo, quod omnes negant. destructio quidem hominis non consistit in separatione corporis & animæ à supposito



cto Verbi, sed solum in separatione corporis ab anima. Unde cum in morte Christi anima fuerit separata à corpore Christi (quod remansit in sepulchro forma corporeitatis informatum, ipsa anima existente in limbo, aliàs Christus non fuisset verè mortuus) & corpus & anima remanserit unita Verbo, sequitur hominem seu compositum humanum apud Scotistas à partibus realiter distinctum, fuisse in morte destructum, & à Verbo separatum, & in resurrectione reassumptum, anima & corpore remanentibus semper unitis Verbo: de ipsis enim dumtaxat intelligendum est illud axioma tritum apud Theologos, *Quod semel assumpsit, nunquam dimisit.*

---

## Q U Æ S T I O I V.

*An SS. Patres meruerint, aut saltem mereri potuerint incarnationem, ejusque circumstantias de congruo?*

**D**Ico 1. SS. Patres nec meruisse, nec potuisse mereri de condigno incarnationem, quoad substantiam. Nam ad Tit. 3. Apost. ait, *Apparuit benignitas & humanitas Salvatoris nostri Dei, non ex operibus justitiæ quæ fecimus nos, sed secundum misericordiam suam salvos nos fecit.* Et D. August. 1. de Trinit. cap. 19. ait, *In rebus per tempus actis, illa summa est gratia, quod homo in unitate personæ conjunctus est Deo: ergo SS. Patres, seu viri illi sancti quibus facta fuerat promissio Messiz, non meruerunt incarnationem, cum sic donum misericordiæ: Prob. ratione: Nullum opus Patrum fuit, nec potuit esse ejusdem*

valoris cum substantia incarnationis : ergo nullum fuit nec potuit esse meritorium ejusdem . Consequentia patet , quia condignitas præmi consistit in æqualitate ad præmium . Prob. antecedens : Opera SS. Patrum non erant in ordine unionis hypostaticæ , nec procedere poterant ex gratia , aut entitate æquali , cum gratia sic summa positivè : ergo nullum opus SS. Patrum potuit esse ejusdem valoris cum substantia unionis hypostaticæ . Tandem , incarnatio quoad substantiam fuit prævisa ante præscientiam meritorum Patrum : ergo non potuit esse eorum præmium .

*Dices* 1. Deus potuit promittere alicui operi Abrahæ v.g. incarnationem , quo peracto in justitia & dilectione Dei , incarnatio esset debita Abrahæ , & consequenter Abraham meruisset incarnationem quoad substantiam . Resp. negando consequentiam , quia non esset debita ex condignitate operis meritorii , sed ex fidelitate , propter rationes prædictas , vel meritum illud esset quantum ad incarnationis circumstantias .

*Dico* 2. Quòd SS. Patres non meruerunt de congruo incarnationem quantum ad substantiam , sed quantum ad accelerationem & alias circumstantias extrinsecas dumtaxat . Prob. 1. pars : Substantia incarnationis determinata fuit & prævisa , ante præscientiam SS. Patrum . Tum quia Deus prædestinavit eos in Christo , ut essent Sancti . Tum quia Christus est finis prædestinatorum : ergo nequit esse præmium operum quæ SS. Patres fecerunt in via , nedùm de condigno , sed etiam nec de congruo . 2. Nullum opus Patrum exigebat incarnationem ex congruentia . Tum quia incarnatio præcedebat . Tum quia opera Patrum ad accelerationem tantùm erant ordinata : ergo &c.

*Obj.* Gonet. SS. Patres plis & instantibus precibus , & ferventibus desideriis , Deum sollicitaverunt , ut mitteret Filium suum in mundum ,

dum, ut patet ex illo Isa. 45. *Rorate cali desuper, & nubes pluant iustum, aperiatur terra & germinet Salvatorem*: Et cap. 64. *Vtinam disrumperes calos & descenderes*: Illæ autem preces & desideria habebant rationem meriti de congruo respectu adventus Filii Dei. Tum quia congruum erat, ut Deus eos exaudiret, qui ipsi obediebant. Tum quia, ut docet S. Thomas, orationes de necessariis ad salutem, merentur de congruo orantibus, ea quæ postulant. Addo, quod sancta illa desideria disponebant antiquos Patres ad recipiendum Christum; sed illæ dispositiones morales habebant rationem meriti de congruo: ergo SS. Patres meruerunt de congruo substantiam incarnationis, seu adventum Filii Dei in mundum.

Resp. negando consequentiam, quia SS. Patres desiderabant, & Deum sollicitabant, ut mitteret Filium suum promissum, seu ut citò mitteret, quem mittere decreverat, ut patet ex illis locis sacre Scripturæ, *Veni Domine & noli tardare, visita nos in salutare tuo*: ergo nihil meruerunt præter accelerationem, ut probant hæc verba Malach. *Ecce statim veniet ad templum sanctum suum dominator quem vos queritis, & Angelus testamenti quem vos vultis*; aliàs plus meruissent, quàm mereri voluissent, quod falsum est.

Prob. 2. pars ex Psal. 11: *Propter gemitum pauperum & miseriam inopum, nunc exurgam, dicit Dominus*: ergo miseriæ pauperum, oratio, & suspiria SS. Patrum meruerunt accelerationem, seu ut in tali tempore veniret; dicebant enim, *O sapientia.... veni ad docendum nos viam prudentiæ, veni ad liberandum nos, jam noli tardare*; sed illa suspiria habebant rationem meriti de congruo respectu adventus Christi & accelerationis incarnationis: ergo &c.

Ex dictis inferes Virginem nec meruisse, nec

potuisse mereri de condigno, ut esset mater Dei, benè tamen de congruo. Prob. 1. pars: Maternitas non fuit concessa Virgini ex meritis; Deus enim gratia speciali præelegit eam: ergo non meruit de condigno maternitatem. 2. Maternitas fuit volita ante præscientiam meritorum B. Virginis; ergo non potuit de condigno mereri maternitatem. Prob. antecedens: Ordinatè volens, priùs vult finem, quàm ea quæ sunt ad finem, sed maternitas est finis meritorum Virginis; tanta enim gratia fuit ipsi collata, quia erat mater Dei, & fuit præservata à peccato originali, quia electa fuit in matrem Christi: ergo non potuit mereri de condigno, ut esset mater Dei.


*Dices* 2. B. Virgo meruit de condigno gloriam, quæ est major maternitate: ergo potuit mereri maternitatem de condigno, quia qui potest majus, potest etiam minus. Resp. negando consequentiam: Tum quia, ut qui potest majus, possit etiam minus, oportet, quòd majus & minus sint in eadem linea, & ejusdem rationis; at gloria & maternitas non sunt ejusdem rationis: majus enim est diligere Deum, quàm volare; & tamen qui Deum diligit, non volat. Tum quia augmentum gratiæ & gloriæ includunt rationem præmii & coronæ: at maternitas includit rationem puri doni, sicut prima gratia: ergo quemadmodum prima gratia nequit esse præmium, ita nec maternitas Deiparæ.

*Dices* 3. B. Virgo meruit de condigno illum sanctitatis aut gratiæ gradum, quo ultimò fuit disposita ad maternitatem Dei: ergo meruit de condigno suam maternitatem; quoniam qui de condigno meretur dispositiones ad formam, videtur etiam mereri ipsam formam. Resp. nego antecedens. Nam Deus qui elegit eam in matrem, eam disposuit, & super flumina preparavit illam, ut canit sancta mater Ecclesia in Officio Immaculatę Conceptionis Ordini nostro concessio.

Prob.

Prob. 2. pars. 1. Abraham & David meruerunt de congruo, ut Christus ex ipsis originem duceret: Ita colligitur ex illo Genes. 22. *Per me metipsum juravi, ait Deus Abraham, quia fecisti rem hanc, benedicam tibi, & multiplicabo semen tuum, & benedicentur in semine tuo omnes gentes:* ergo B. Virgo meruit de congruo, ut esset mater Christi. 2. Ecclesia in Antiphona tempore Paschali canit, *Regina celi letare, quia quem meruisti portare, resurrexit;* sed non meruit de condigno: ergo de congruo. 3. Maternitas Virginis dependebat à consensu illius, ut patet ex illo Luc. 1. *Ecce ancilla Domini, fiat mihi secundum verbum tuum:* ergo per consensum meruit, non de condigno, sed de congruo, maternitatem secundum ordinem executionis, & actualis generationis Christi.

Nemo meruit effectus Incarnationis, nempè quòd merita Christi applicarentur pro salute generis humani, quamvis sancti Patres meruerint, saltem de congruo, Incarnationis circumstantias extrinsecas, puta temporis, loci & propagationis ex eorum stirpe: quia effectus Incarnationis pertinent ad ipsius substantiam, quam nullus meruit. Deinde, sequeretur, quòd mors Christi non fuisset sanctis Patribus opus misericordiae, sed opus præmii, aut gratitudinis, aut fidelitatis, quod est falsum; cùm per viscera misericordiae visitaverit nos oriens ex alto, eodemque motivo misericordiae fecerit redemptionem plebis suae.



## DISPUTATIO VII.

*De persona assumente .*

**I**N hac disputatione examinanda sunt media ratione quorum Verbum divinum, quod est persona assumens, terminat naturam humanam .

## QUÆSTIO I.

*An persona Verbi immediate & proximè terminaverit humanitatem assumptam, ratione subsistentiæ absolute & communis, vel ratione subsistentiæ relative & personalis ?*

**D**Ico I. Quòd ratio formalis & proxima, per quam Verbum divinum terminavit humanitatem, non est ipsa subsistentia absoluta & communis, sed personalitas, seu subsistentia relativa & personalis, per quam constituitur in ratione personæ distinctæ à Patre & Spiritu sancto. Prob. Si ratio formalis & proxima, per quam Verbum terminat naturam humanam, esset subsistentia Dei, sequeretur quòd cum illa subsistentia sit communis Patri & Spiritui sancto sicut Filio, quemadmodum ratio per quam omnia creantur, est communis, Pater esset incarnatus sicut Filius, quemadmodum est creator sicut Filius: sed solus Filius est incarnatus,

tus, ut fides docet: ergo ratio per quam terminavit humanitatem assumptam, non debet esse communis, sed propria & particularis Filio. Prob. major in qua est difficultas. 1. Ideò Verbum dicitur caro, quia terminat dependentiam quam natura humana dicit ad suppositum: ergo si Pater haberet id quo Verbum terminat illam humanitatem, sicut habet id quo Filius v. g. videt, sequeretur, quòd esset caro sicut Filius, quemadmodum est videns sicut Verbum. 2. Ex 6. Synodo Gener. act. 8. ubi dicitur solum Verbum esse incarnatum, ista ratio assignatur, *Quia Pater & Spiritus sanctus nihil in incarnatione habent commune, nisi benignissimam voluntatem*: ergo natura humana terminatur per substantiam particularem, aliàs Pater qui dicitur volens incarnationem sicut Filius, quia habet voluntatem qua Filius eam vult, diceretur etiam incarnatus sicut Filius, quia haberet id per quod Filius terminat & immediatè sustentat carnem.

Confirm. ex Concilio Toletano 6. in confessione fidei, dicente, *Incarnationem Filii tota Trinitas operata est, quia inseparabilia sunt opera Trinitatis*; quia ratio, per quam mediatè Deus operatur, est communis, nimirum omnipotentia, *Solus tamen Filius formam servi accepit in singularitate personæ, in id quod proprium est Filii, non quod Trinitati commune*: ergo ratio, per quam Filius immediatè terminat humanitatem, non est communis, sed singularis: sed nihil est singulare & proprium Filio, nisi substantia relativa: ergo per ipsam terminat humanitatem.

Resp. Durandus negando majorem: Ut enim (inquit) personæ dicantur incarnatæ, præter unionem humanitatis cum substantia absoluta, requiritur insuper alia unio ejusdem humanitatis cum substantia personali; unde cum humanitas Verbo unita fuerit, non solum secundum substantiam absolutam, sed etiam

secun-

secundum relationem personalem, Patri verò & Spiritui sancto uniatur tantum secundum substantiam communem; hinc fit, quòd Pater & Spiritus sanctus non dicuntur nec sunt incarnati, sicut Filius.

Contra: Hæc ratio non valet, nam duæ substantiæ completæ non possunt terminare dependentiam unius naturæ creatæ. Tum quia si humanitas terminaretur primò ad substantiam absolutam, in illo signo redderetur subsistens, & consequenter inassumptibilis à Verbo; ideòque non posset insuper & secundariò terminari ad personalitatem seu substantiam re'ativam & propriam Filii: ergo humanitas Christi non terminatur primariò ad substantiam absolutam, sed ad personalitatem Verbi. Tum quia si substantia absoluta & communis esset ratio primaria & immediata terminandi humanitatem, & substantia relativa Verbi esset secundaria & mediata, verum esset dicere, Pater terminat & immediatè sustentat, aut supponit humanitatem; dicimus enim, quòd Filius supponit & terminat humanitatem, quia ejus personalitas ex Durando, est ratio mediata & secundaria terminandi; at ratio proxima & primaria terminandi est in Patre, & ipsi convenit, sicut mediata & secundaria convenit Filio, & tam ab illa dependet humanitas, quàm ab ista, nimirum personali; imò magis, cum ratio immediata & primaria sit principalior: ergo Pater dici potest verè & propriè incarnatus, & unionis hypostaticæ terminus, sicut dicitur causa efficiens, cum nedum habeat rationem quæ creata fuit humanitas, sed etiam ad quam terminatur; sed hoc est falsum, quia solus Filius est causa terminativa unionis hypostaticæ: ergo &c.

*Dices* 1. Omnis dependentia est ad independens & ad absolutum, quia quod non est absolutum, est dependens: ergo dependentia naturæ hu-



humanæ non terminatur per personalitatem Verbi, quæ est relativa. Resp. concessa primæ parte antecedentis, negando secundam; quia ut aliquid terminet dependentiam alterius immediate, sufficit, quod sit independens à supposito, sive sit absolutum, sive relativum; solito tamen dicitur independens est absolutum, quoniam in creatis omne relativum est dependens & accidens. At in divinis subsistentia relativa Filii, licet non sit absoluta, est independens: ergo potest primario & immediate terminare dependentiam naturæ humanæ Christi.

*Dices 2.* Relativum non potest gerere vices absoluti: ergo Verbum non assumpsit nec gerit vices personæ humanæ per propriam personalitatem, quæ est relativa. Resp. distinguendo majorem; Relativum non potest gerere vices absoluti, simpliciter & totaliter, concedo; In his in quibus cum ipso convenit, nego: Unde cum personalitas Verbi, quamvis relativa, sit suppositum & reddat naturam incommunicabilem, gerere potest in natura humana Christi, vices personæ creatæ.

*Dices 3.* Verbum assumpsit humanitatem per rationem, per quam convenit ipsi assumere; sed convenit ipsi per naturam divinam in tribus personis subsistentem: assumpsit enim naturam nostram & homo factus est, quia est Deus: ergo assumpsit humanitatem immediate per rationem absolutam & communem. Resp. distinguendo majorem: Per quam convenit ipsi assumere efficienter & activè, seu per quam est incarnans, nego majorem; Per quam convenit ipsi assumere terminativè, seu per quam Filius est incarnatus, concedo majorem: & similitè distincta minori, nego consequentiam; quia natura divina in tribus personis subsistens non est ratio immediata, per quam Verbum divinum terminat & supponit naturam humanam; sed est tantum ratio efficiens, seu per quam se in-

car-

carnat, non verò per quam est formaliter incarnatum, seu per quam formaliter terminat & sustentat carnem.

*Instabis*: Personæ Filii competit subsistere per naturam divinam: ergo per eandem terminat naturam humanam, quia terminat per id, per quod subsistit. *Nego* instantiam: quia per naturam divinam competit filio subsistere essentialiter, non autem personaliter, aliàs in Deo esset tantum una persona: unde neganda est pariter instantiæ consequentia, quia filius est incarnatus ut persona est, seu terminat dependentiam naturæ humanæ ad suppositum, per suam personalitatem, in qua est ratio formalis terminandi unionem, ut expressè docet Scotus in 3. dist. 1. q. 5. §. *in ista questione*, ubi agitatur nostram questionem, & concludit Verbum divinum terminare humanitatem assumptam ratione subsistentiæ relativæ & personalis. Huic sententiæ adhærent plures sancti Patres, & præsertim Anselmus lib. de incarnatione cap. 4. & alibi.

## Q U Æ S T I O II.

*An Verbum assumendo humanitatem, non solum ejus subsistentiam, sed etiam illius existentiam suppleverit?*

Certum est ex fide, in Christo esse unicum esse subsistentiæ & personale, cum in ipso sit unica persona, & natura humana Christi subsistat per ipsam Verbi subsistentiam; unde difficultas est, an natura humana Christi, quæ habet proprium esse naturæ & essentielle, habeat etiam propriam existentiam?

Dico igitur Verbum non supplere existentiam  
in

in humanitate Christi, sed solum subsistentiam, subindeque illam non per existentiam divinam & increatam dumtaxat existere, sed per existentiam creatam & sibi propriam: nam essentia & existentia non distinguuntur: aliter in sententia omnium Scotistarum: sed in Christo sunt duæ essentiæ seu naturæ, ut fides docet: cum sit Deus & homo: ergo datur in Christo existentia creata indistincta à natura creata, & existentia divina indistincta à natura divina.

Prob. 1. Datur in Christo existentia hominis seu humana: ergo Verbum non supplet existentiam in humanitate Christi. Consequentia patet, cum Verbum non suppleat id, quod est actu in Christo. Prob. antecedens 1. Christus verè mortuus est, & per mortem aliquid corruptum & destructum fuit; cum mors sit destructio rei, & per mortem res existere desinat: at nihil fuit destructum nisi existentia humana, seu hominis, quia divina est incapax corruptionis: ergo in Christo, mors destruxit existentiam hominis, quia in triduo Christus non erat homo, sicut erat Deus; subindeque humanitas quæ verè mortua est, & modò verè vivit vita humana in cælo, existentia humana existit; cum ex Philosopho, vita & mors existentiam sequantur temporalem. 2. Si Verbum divinum dimitteret humanitatem, per illam volitionem aut actionem qua dimitteretur, non annihilaretur, ut est manifestum, & consequenter existeret; non in alio, cum non sit accidens; nec existentia divina, ut suppono; nec existentia de novo producta: nam esset de novo producta vel à Virgine, vel à Deo immediatè, vel resultaret ex ipsa natura humana, quemadmodum resultaret subsistentia humana, si divina deesset? Non primum; quia Virgo non generaret iterùm humanitatem: Nec secundum; quia si à Deo immediatè produceretur, sequeretur, quòd B. Virgo non esset mater illius homi-

minis, sed esset sicut Adam: Nec resultaret; tum quia existentia, est id quo responitur extra suas causas, seu id quo causa emittit effectum extra se, & consequenter oportet, quòd sit à causa agente. Tum quia existentia est terminus generationis & corruptionis, ideòque nequit ex effectū, seu ex re resultare: ergo humanitas in Christo habet existentiam humanam & propriam, sicut naturam,

Prob. 2. Humanitas Christi prius prioritate naturæ, in rerum natura extitit, quàm fuerit assumpta ad personalitatem Verbi divini: ergo ut existens sua connaturali existentia, elevata fuit ad subsistentiam Verbi divini. Consequentia patet. Prob. antecedens: Humanitas Christi prius prioritate naturæ fuit producta, quàm assumpta: ergo & existens. Consequentia patet, cum esse productum & esse existens sint unum & idem, & productio terminetur ad existentiam. Prob. antecedens: Licet productio & assumptio humanitatis Christi fuerint in eodem instanti, fuit tamen prius prioritate naturæ, humanitatem produci, quàm assumi: ergo similiter prius prioritate naturæ fuit, quòd esset producta, quàm quòd esset assumpta.

Resp. Gonet. negando antecedens, & ad ejus prob. negat iterum antecedens; potius enim (inquit) e contra prius prioritate naturæ humanitas Christi assumpta est, quàm fuerit producta; siquidem non potuit esse existens sive producta, quin prius prioritate naturæ esset subsistens, atque adeò assumpta. Ad prob. in contrarium, concessio antecedente, negat consequentiam: Ratio disparitatis est, quia produci est nondum habere subsistentiam; quamvis autem non sit inconveniens admittere, quòd prius prioritate naturæ humanitas Christi fuerit in via ad subsistentiam & ad existentiam, quàm assumeretur à Verbo divino; non possumus tamen dicere, quòd prius habuerit subsistentiam.

stentiam, subindeque nec existentiam, quàm fuerit assumpta; sed potius econtra dicendum est, quòd priùs fuerit assumpta, quàm unita.

Contra 1. Humanitas Christi in illo instanti in quo fuit assumpta à Verbo, erat extra suas causas, vel in suis causis? Si primum: ergo habebat existentiam in illo signo in quo fuit assumpta à Verbo, cùm existentia apud omnes Philosophos, sit id quo res ponitur extra suas causas, & nihil concipi possit extra suas causas, quin existat extra ipsas. Si secundum: ergo Verbum assumpsit etiam causas humanitatis cùm res in sua causa nihil aliud sit, quàm ipsa-met causa: sed hoc est falsum, aliàs assumpsisset Virginem & Spiritum sanctum: ergo humanitas Christi priùs extit, quàm fuerit assumpta, saltem prioritate naturæ, & consequenter priùs natura fuit producta, quàm assumpta.

2. Assumptio humanitatis ad personam Verbi & productio ejusdem, sunt duæ actiones realiter distinctæ, ut ait Gonet. disput. præced. art. 4. sed assumptio supponit productionem: ergo humanitas Christi fuit priùs producta, quàm assumpta. Prob. minor 1. Beata Virgo non concurrat efficienter ad assumptionem humanitatis à Verbo, & concurrat ad productionem: sed Verbum non assumpsit humanitatem antecederet ad actionem generativam Virginis. Tum quia sequeretur, quòd Virgo non esset mater; nam in illo signo, humanitas fuisset completa & unita Verbo, cùm per assumptionem, substantiam suscepit independentem ab influxu Virginis, & consequenter non fuisset producta à Virgine & à Spiritu sancto. Tum quia Verbum non assumpsit humanitatem, ut à Virgine produceretur; sed potius econtra Virgo Spiritu sancto concurrente produxit humanitatem, ut à Verbo assumeretur: ergo humanitas Christi priùs fuit producta, quàm assumpta. 2. Assumptio aut actio unitiva Dei, ex Gonet, non est cau-

causa productiva humanitatis: ergo assumptio supponit prioritate naturæ productionem humanitatis, quia actio unitiva unit humanitatem Verbo divino: ergo supponit eam, sicut applicatio supponit extrema applicanda. 2. Assumptio est actio à re assumptibili aut assumenda, determinata & specificata; aliàs non distingueretur ab actione creativa: ergo humanitas quæ est res assumenda, ad quam tendit assumptio, non potest esse prius assumpta, quàm producta.

3. Ratio disparitatis est falsa: ergo. Probi. antecedens; Produci est esse extra suas causas, & recepisse ab ipsis quidquid effectui dare possunt; aliàs nullum esset discrimen inter *produci* & *producibile*, quod est falsum; sed nihil potest esse extra suas causas, quin existat extra ipsas, cum sola existentia sit id quo res est extra suas causas, quæ nihil dare possunt effectui ultra existentiam, quia ex Gonet. tract. de Trinit. disput. de relat. div. quæst. 6. producere rem, est illam existentem constituere: ergo produci non est nondum habere existentiam, licet sit nondum habere subsistentiam quæ reddit rem omnino incommunicabilem, quæ quidem subsistentia non est terminus generationis, nec quid productum, cum consistat in duplici negatione, ut volunt Scotistæ, vel in positivo resultante, ut volunt alii. *Deinde*, existentia non est ultimus modus rei supponens subsistentiam, ut putat Gonet. nam in divinis ubi absoluta præcedunt relativa, nulla datur ex Gonet. existentia relativa, ut dictum est in tract. de Trinit. datur tamen per ipsum subsistentia relativa: ergo existentia est prior subsistentia, ideoque licet natura assumatur ut subsistat, non valet tamen dicere, quod assumitur etiam ut existat. *Tandem*, si humanitas esset prius assumpta à Verbo quàm existens, sequeretur, quod natura humana in illo instanti in quo fuit assum-

sumpta, non fuisset singularis, nec Verbum assumpsisset naturam actu singularem, quod est falsum, sed ut esset singularis: nam natura, in sententia Gonetii, fit singularis per materiam signatam quantitate; at humanitas Christi non potest signari quantitate, quin existat, aliàs accidens, quod per Thomistas existit existentia subiecti, extitisset in aliquo instanti naturæ in humanitate Christi sine existentia, quod est falsum: ergo natura humana Christi quæ est verè singularis, habet propriam existentiam quæ intrinsecè pertinet ad singularitatem.

Obj. 1. Gonetus ex epist. Soph. recepta & approbata à Patribus 6. Synod. act. 11. ubi de Christi humanitate sic dicitur, *In illo itaque (scilicet Verbo) & non in semetipsa, existentiam habuit unam*, ex quibus verbis hoc argumentum conficitur: Naturam habere existentiam in alio, est existere per ejus existentiam; existere verò in semetipsa, est existere per propriam existentiam; at juxta Soph. humanitas Christi habet existentiam in Verbo, & non in semetipsa: ergo &c.

Resp. Sophronium non velle humanitatem Christi existere formaliter per existentiam Verbi, sicuti per ejusdem subsistentiam subsistit & fit incommunicabilis, sed eam existere dependenter à Verbo, seu Verbo inexistere, quia *Ly non in semetipsa* idem est ac non independenter & in se: nam accidens existit in subiecto, tamen habet existentiam propriam, cum existentia non sit proprietas suppositi & personæ, ut putat Gonet. sed proprietas naturæ, imò sit ipsa natura prout est in actu: ergo licet humanitas existat in Verbo, non autem in semetipsa, tamen habet existentiam propriam; unde ad argumentum, nego majorem: nam materia existit per existentiam formæ, tamen ex Doctore habet existentiam propriam. Omitto 2. argumentum quo

probat contra recentiores conclusionem esse D. Thome.

Ob. 2. Si humanitas Christi non fuisset assumpta ad existentiam increatam Verbi divini, sed per propriam & connaturalem existeret, darentur in Christo duæ existentia substantiales; consequentia non potest admitti: ergo nec antecedens. Sequela majoris est evidens: Esset enim in Christo præter existentiam propriam & connaturalem humanitati, existentia Verbi divini. Minor verò prob. Si in Christo darentur duæ existentia substantiales, non esset ens substantialiter unum, sed plura; atqui est ens substantialiter unum, non verò plura, ut fatentur omnes Catholici cum D. Athanas. in Symb. ergo in ipso non datur duplex existentia substantialis. Sequela majoris prob. Ut Christus esset unum substantialiter, non obstante, quòd constaret duplici existentia, necessarium omninò esset, quòd una ex illis duabus existentis haberet rationem potentia respectu alterius; impossibile enim est ex duobus fieri unum per se sive substantiale, nisi se habeant per modum potentia & actus: sed omninò repugnat, quòd una existentia habeat rationem potentia respectu alterius: ergo & quòd Christus sit ens substantialiter unum, si constet pluribus existentis. Major patet, minor prob. Impossibile est id quod essentialiter est ultima rei actualitas substantialis, habere rationem potentia ad aliam actualitatem similiter substantialem; aliàs enim esset & non esset ultima actualitas substantialis, esset ut supponitur, non esset verò; quia ad eam sequeretur alia, nimirum illa ad quam diceretur esse in potentia: sed omnis existentia quæcumque illa sit, est essentialiter ultima rei actualitas, in hoc enim consistit conceptus essentialis existentia: ergo impossibile est, quòd existentia substantialis sit in potentia ad aliam existentiam similiter substantialem.

Resp.



Resp. concessa majori, negando minorem. Ad prob. distinguo majorem: Si in Christo darentur duæ existentie substantiales, non esset ens substantialiter unum, sed plura, secundum naturam, & essentiam, concedo; Secundum suppositum & subsistentiam, nego. Distinguo similiter minorem: Est ens substantialiter unum secundum suppositum, seu unitate personæ, concedo minorem; Secundum naturam seu unitate naturæ, nego minorem & consequentiam; quia Athanas. in Symb. excludit tantum pluralitatem suppositorum. Ad prob. nego minorem, quia existentia habet rationem potentie respectu subsistentie & respectu alterius existentie etiam, ut patet in materia quæ habet existentiam & subsistentiam partialem independentem a forma physica, ad quam est in potentia. Ad prob. nego minorem; falsum enim est, quod existentia sit ultima actualitas rei, ut docent omnes Scotistæ. Tum quia res est complenda, donec fiat incommunicabilis alteri, ut *quod* & *ut quo*: & dum est incommunicabilis, est completa, cum communicetur alteri, ut terminetur & compleatur; sed per subsistentiam fit incommunicabilis alteri, non verò per existentiam: ergo potius subsistentia quam existentia, est ultima rei actualitas. Tum quia subsistentia supponit existentiam: hæc actio productiva rei terminatur ad existentiam primò & immediatè, ut docent Philosophi: ergo subsistentia supponit existentiam, cum subsistentia sequatur ad rem productam.

Obj. denique: Natura humana non habuit existentiam prius prioritate etiam dumtaxat naturæ, quam assumeretur à Verbo: ergo assumpta fuit ad Verbi existentiam. Consequentia patet. Prob. antecedens: Si natura humana prius prioritate etiam naturæ quam assumeretur à Verbo, fuisset existens existentia sibi propria, sequeretur B. Virginem non fuisse propriè matrem

Dei; sed hoc est in Conc. Eph. damnatum; ergo &c. Sequela majoris prob. Ut B. Virgo dicatur propriè mater Dei, debet terminus concursus ejus in generatione Filii esse Deus homo; at si humanitas Christi priùs prioritate naturæ quàm assumeretur à Verbo, fuisset existens existentia sibi connaturali, terminus concursus B. Virginis in generatione Filii non fuisset Deus homo: ergo B. Virgo non fuisset propriè mater Dei. Major constat, minor verò prob. Illud non est terminus concursus B. Virginis in generatione Filii, ante quod concursus iste concipitur totaliter terminatus: at si humanitas priùs prioritate naturæ quàm assumeretur à Verbo, habuit propriam existentiam, priùs eadem prioritate quàm suppositum divinum illam terminaverit, atque adeò quàm fuerit Deus homo, concursus B. Virginis intelligitur totaliter terminatus: nam ex una parte tunc concursus causæ, quæcumque illa sit, intelligitur omninò terminatus, quando ejus effectus habet existentiam, utpotè cum existentia sit ultimus terminus dependentiæ effectus à suis causis, totaliter ipsum constituens extra illas; ex alia verò parte si humanitas Christi priùs quàm assumeretur à Verbo, habuit existentiam priùs prioritate saltem naturæ quàm suppositum divinum illam terminaverit, fuit existens: ergo terminus concursus B. Virginis non fuit Deus homo.

Resp. negando antecedens. Ad prob. ejus, nego sequelam majoris. Ad prob. concessa majori, nego minorem, quia in eodem instanti temporis in quo produxit humanitatem in rerum natura existentem, humanitas fuit unita Verbo, quapropter in eo instanti verum fuit dicere, Deus conceptus est ex Virgine, Deus homo est terminus actionis generativæ Virginis; nam actio generativa non exercetur in instanti naturæ, sed temporis: ergo cum in

eodem instanti temporis humanitas fuerit producta & unita Verbo, terminus concursus B. Virginis non fuit purus homo, sed homo Deus. Ad prob. concessa majori, nego minorem, quia concursus Virginis non concipitur totaliter terminatus in instanti naturæ in quo attingit solam existentiam humanitatis, sed solum in instanti temporis in quo humanitas existit incommunicabiliter per subsistentiam Verbi divini; ideoque concursus Virginis non fuit totaliter terminatus ante terminationem aut unionem humanitatis ad Verbum. Tum quia concursus causæ non intelligitur totaliter terminatus, nisi effectus habeat subsistentiam. Tum quia persona est terminus secundarius generationis, ut dicunt Philosophi nostri: ergo quamvis existentia humana sit terminus primarius generationis Christi prioritate naturæ dumtaxat, concursus Virginis non est totaliter terminatus nisi effectus sit personatus: ergo terminus concursus Virginis fuit Deus homo & consequenter est mater Dei.

*Instabis:* ergo Verbum existit existentia creata. Resp. concedendo instantiam de Verbo quatenus est homo: nam vult per velle creatum &c. Per communicationem idiomatum Deus dicitur natus, mortuus &c. ergo eadem ratione potest dici existens, vivens &c. *Instabi:* ergo existentia humana est perfectio Verbi. Resp. negando instantiam, quia Verbum non est subiectum existentiae humanæ, sed purus terminus: ergo non perficitur.

Existentia humana quam in Christo admittit Scotus, non potest magis perficere Verbum, quam ipsa natura humana; sed natura humana non perficit Verbum divinum, ut tenent omnes: ergo existentia creata nequit illud perficere, quamvis admittatur in Christo; quia ut unum perficiat aliud, necesse est, quod illi inhaereat, aut informet illud, quod de existentia

creata, nec de natura humana Christi potest verificari. Insuper, si Verbum assumpsisset naturam Angelicam, hæc natura retinisset propriam existentiam, ut tenent plures ex adversariis, qui docent existentiam in substantiis spiritualibus non distingui realiter ab essentia; sed in tali casu, existentia Angelica non perficeret Verbum divinum, nec sequerentur absurda quæ Thomistæ sequi prætendunt ex nostra sententia; ergo idem dicendum est de existentia humanitatis quam in Christo admittimus, putà ipsam non perficere Verbum divinum.

---

### Q U Æ S T I O III.

*An Deus, ut communis tribus personis, ratione subsistentiæ absolutæ possit alienam naturam assumere?*

**D**ico Deum, ut communem tribus personis, ratione subsistentiæ absolutæ posse alienam naturam assumere, illique immediatè uniri, subsistentiis relativis, eam solum secundariò terminantibus. Ita Doctor in 3. dist. 1. q. 2. §. ad questionem. lit. D. Prob. Subsistentia absolutæ divinæ naturæ continet eminenter subsistentiam creatam, sicut subsistentia personæ eam continet: ergo potest terminare dependentiam naturæ ad subsistentiam, cum sit omninò independens sicut subsistentia Verbi, & natura creata dicat potentiam obedientialem ad subsistentiam absolutam, sicut ad subsistentiam Verbi. Deinde, subsistentia absoluta Dei, est ratio qua Deus subsistit, & est ratio infinita, sicut subsistentia relativa qua persona in ratione personæ subsistit: ergo natura creata subsistere potest per sub-

subsistentiam absolutam, sicut subsistit per subsistentiam Verbi.

*Dices 1.* Hæc unio esset in unitate naturæ, vel in unitate suppositi? Non primum; quia ex natura creata & ex natura divina resultaret una natura, quod est falsum. Nec secundum; quia subsistentia communis non est suppositum, nec persona; aliàs in Deo essent quatuor personæ, quod est hæreticum: ergo subsistentia absoluta non potest assumere naturam. Resp. Unionem non fieri in unitate naturæ, nec personæ, sed in unitate subsistentis; unde ex unione naturæ divinæ & humanæ in subsistentia absoluta non fieret una natura, nec una persona, sed unum subsistens, *Instabis*: Implicat dari hominem, quin sit persona; ergo ex unione humanitatis cum subsistentia absoluta resultaret aliqua persona, vel hæc unio est impossibilis. Resp. negando consequentiam, quia in natura creata, subsistentia, hypostasis & suppositivitas non differunt formaliter, sed solum materialiter, seu ex parte naturarum in quibus reperiuntur, ut advertit Delgadillo cap. 1. diff. 7. n. 9. ergo licet subsistentia absoluta in se, nec in natura non sit persona, tamen in natura humana quæ per subsistentiam personatur, esset persona de materiali, aut realiter & identicè.

*Dices 2.* Natura assumpta ad subsistentiam absolutam non esset incommunicabilis, cum subsistentia absoluta sit communicabilis: ergo non esset verè subsistens, nec propriè assumpta. Resp. negando antecedens. Tum quia subsistentia si communicabilis sit, hoc provenit ex infinitate naturæ divinæ; sed natura creata est finita & finitè sustentaretur per subsistentiam absolutam Dei: ergo esset incommunicabilis. Tum quia natura est incommunicabilis, dum est in ultima actualitate, sive illud quo ultimò actuatur, sit communicabile, sive non, sive divinum, sive humanum; sed per illam sub-

*[The page contains extremely faint, illegible text, likely bleed-through from the reverse side.]*



cet Gonet. cum D. Thoma; atqui ut natura terminetur à pluribus personis, oportet, quòd sit infinita in ratione terminabilis, sicut persona in ratione terminantis: ergo quemadmodum persona creata nequit alienam terminare naturam, ex defectu infinitatis, ita pariter natura creata ex defectu ejusdem infinitatis, à pluribus personis suppositari non potest. Prob. minor in qua est tota difficultas. 1. Tale est passivum quale est activum, & e converso sub conceptu activi & passivi: ergo si suppositum creatum nequeat terminare duas naturas, quia non est infinitum in ratione terminantis aut terminativi, nec una natura à duobus suppositis terminari, cum suppositum activè terminet, & natura passivè terminetur. 2. Ideò una persona divina potest assumere plures naturas, quia, inquit Gonet. vis assumptiva conveniens personæ divinæ non comprehenditur ab una natura creata, id est, quia virtus personæ in ratione terminantis, est tanta quanta esse potest virtus naturarum in ratione terminabilium, aliàs eas assumere minimè posset; unde si virtus terminabilis excederet virtutem terminativam personæ divinæ, non posset eas assumere, nec e contra: ergo talis esse debet virtus naturæ terminandæ, qualis est virtus personæ terminantis; subindeque sicut persona creata nequit terminare alienam naturam, quia non est infinita sicut persona divina; ita una natura creata nequit terminari ab alia persona, seu à pluribus, quia non est infinita sicut natura divina. 3. Tandem, absurda quæ sequuntur ex persona creata respectu plurium naturarum, sequuntur etiam ex natura creata respectu plurium personarum divinarum; & rationes quibus salvat Gonetus unam naturam terminari posse per plures personas divinas, salvant etiam unam personam creatam posse terminare plures naturas, ut consideranti patebit: ergo. &c.

Con-



Confirm. Ex Gonet. disput. seq. art. 4. natura creata, subsistens in propria persona, propria personalitate retenta, non potest etiam de potentia absoluta uniri personæ divinæ, & per illius subsistentiam subsistere: ergo ubi affecta est personalitate Verbi, non potest amplius assumi à Patre nec à Spiritu sancto. Prob. consequ. 1. Natura per personalitatem Verbi completur & personatur, sicut per propriam: ergo si stante propria personalitate, natura sit inunibilis alteri supposito, quia est completa, sic etiam stante una personalitate divina est inunibilis alteri, cum sit etiam completa. 2. Ex Gonet. una res nequit existere duplici existentia: ergo nec subsistere duplici subsistentia. 3. Quod est incommunicabile, non potest assumi; sed natura creata assumpta à Verbo, est incommunicabilis, sicuti si haberet personalitatem propriam, cum de ratione personæ sit reddere naturam incommunicabilem: ergo sicut natura propria personalitate subsistens, nequit assumi à Verbo; ita nec persona assumpta à Verbo, assumi potest à Patre.

Prob. 2. Ex Doctore, unum & idem non potest à pluribus adæquatè dependere, ut dicunt omnes Physici; at si natura creata tribus personis divinis uniretur, à pluribus totaliter & adæquatè penderet, cum subsisteret, posita unione, cum qualibet persona; & subsisteret posita unione cum persona Patris, & non posita unione cum persona Filii: ergo una & eadem natura non potest hypostaticè uniri tribus divinis personis.

Resp. Gonet. quòd licet non possit unum & idem à duobus adæquatè dependere dependentia causali, quæ est dependentia stricta; potest tamen dependentia non causali seu terminativa, quæ dependentia stricta non est, unum & idem à duobus dependere adæquatè adæquatione intensiva, non tamen adæquatione

extensiva : unum enim album una relatione similitudinis adæquatè intensivè ab albo terminatur, non tamen adæquatè extensivè; potest enim ex vi ejusdem relationis ad plura alba terminari, & de facto terminatur ad omnia cum quibus in graduali intentione similitudinem habet : Pater etiam in creatis, ex vi ejusdem relationis qua ad unum Filium refertur & ad illum adæquatè intensivè terminatur, refertur ad novum Filium si adveniat, ac proinde à Filio non terminatur adæquatè adæquatione extensiva; natura autem creata unita alieno supposito, non dependet ab illo dependentia stricta & causali, sed dependentia non causali & terminativa, ut extremum terminabile à termino terminante; ac proinde quamvis unita uni ex personis divinis, ab illa adæquatè intensivè terminetur, non tamen adæquatè extensivè, & idcirco uni ex personis divinis unita, potest uniri cum aliis.

Contra: Complementum rei & sustentatio essentialis ejusdem sunt à causa productiva; nam ideo B. Virgo est mater Dei, quia terminus generationis ejus est subsistentia & existentia Verbi, humanitatem productam sustentantis & completis in ratione suppositi: ergo dependentia nature ad suppositum, est dependentia causalis; subindeque una natura creata nequit uniri tribus divinis personis, nec à tribus dependere. 2. Sicut effectus productus à causa efficiente totali suum esse recipit; ita natura singularis recipit suam sustentationem & terminationem totalem à suo termino totali: ergo est dependentia stricta & causalis, & quemadmodum acceptio esse totalis ab una causa totali, excludit aliam ejusdem ordinis; ita acceptio ultimi complementi, incommunicabilitatis, sustentationis & essentialis terminationis, excludit quamcumque aliam subsistentiam totalem. 3. Natura per unam subsistentiam totalem

lem est adæquatè completa adæquatione extensiva: ergo non posset per aliam totalem compleri. Prob. antecedens: Natura habens propriam substantiam est extensivè cõpleta; aliàs Verbum potuisset assumere naturam personatam, quod Gonetus judicat impossibile: ergo natura assumpta à Verbo est etiam extensivè completa, & nequit ab alia persona divina assumi. Præterea, quando dependentia essentialis & per se est totaliter terminata intensivè, nequit per aliam terminari, licèt non sit totaliter extensivè terminata; ut patet in effectu, qui divisim potest esse à duabus causis totalibus, ut v.g. calor qui ab igne & à sole produci potest, qui postquam habet esse ab una causa, non potest simul habere ab alia, licèt dependentia ejus sit intensivè tantum terminata: ergo licèt dependentia naturæ creatæ non sit extensivè terminata per unam substantiam divinam, ut vult Gonet. (quod tamen apud nos falsum est, ut patet in relationibus creatis quæ multiplicantur multiplicatis terminis totalibus) non potest terminari per aliam, quemadmodum calor productus ab igne, non potest produci à sole, ad quem tendit calor produendus; licèt non sit à causa totali adæquatione extensiva.

Dico 2. Unam personam divinam posse simul plures naturas assumere. Ita omnes: Tum quia vis assumptiva personæ divinæ non exhauritur per assumptionem naturæ, cum sit infinita, sicque una assumpta, aliam & aliam assumere potest: Tum quia licèt una natura per unam substantiam fiat incommunicabilis alteri, aut insistentibilis ab alia; tamen substantia divina non sit impotens sustentandi aliam: nam licèt unum & idem numero accidens à duobus subjectis totalibus, nec effectus à duabus causis totalibus dependere possint; tamen unum subjectum plura accidentia, & una causa plures effectus habere possunt: ergo.

Obj. Gonetus: Si simultanea terminatio ejusdem naturæ à tribus personis divinis repugnet, deberet repugnantia se tenere vel ex parte personarum terminantium, vel ex parte naturæ terminabilis; sed ex neutro capite; ergo &c. Major patet. Minor etiam quantum ad 2. partem, est certa; nam divinæ personæ non se excludunt à convenientia in eadem natura, cum omnes simul terminent naturam divinam: ergo ex parte illarum non repugnat simultanea terminatio ejusdem naturæ creatæ. Pro 2. verò parte, prob. natura creata est terminabilis à persona divina ratione potentiae obedientialis; sed ex parte hujus potentiae, nulla repugnantia oritur, si ex parte termini nulla includatur: ergo &c.

Confirm. Tres personalitates divinæ simul terminant naturam divinam: ergo possunt simul terminare naturam creatam. Patet consequentia 1. Nam quod personalitas divina possit extendi secundario ad terminandam naturam creatam, illi convenit, quia primario terminat naturam divinam, in qua omnis natura creata eminenter continetur: ergo si omnes simul in natura divina primò terminanda conveniunt, possunt etiam simul in natura creata secundario terminanda adunari. 2. Prob. à paritate rationis: Si enim natura divina tribus subsistentiis subsistit, in hoc, quod est unam & eandem naturam tribus subsistentiis subsistere, nulla involuitur implicantia, ac proinde non repugnabit naturam creatam tribus subsistentiis divinis terminari.

Resp. negando minorem: repugnat enim ex parte utriusque. Ad prob. primæ partis, dico, quod in natura divina personalitates non præstant effectum formalem, qui est reddere naturam subsistentem, completam & incommunicabilem, cum sit omnino communicabilis, ac completa & subsistens independentè à personalitatibus; unde cum solum termi-

nent

nent fecunditatem & communicationem naturæ, sequitur, quod natura divina potest simul in ipsis subsistere. *Deinde*, sunt de conceptu reali naturæ divinæ; at respectu naturæ creatæ aliter se haberent, cum ipsam complerent & redderent incommunicabilem: sicque quemadmodum due causæ totales repugnant inter se respectu ejusdem effectus, sic etiam tres divinæ personalitates respectu ejusdem naturæ. *Præterea*, sunt extra conceptum realem naturæ creatæ: ergo non possunt ei simul advenire nisi per modum unius, quod implicat in hoc casu. Ad prob. 2. partis, dico, quod potentia obedientialis naturæ non est ad Patrem, Filium & Spiritum sanctum conjunctim, sed divisim & successivè; non enim habet potentiæ similitudinem, sed simultatis potentiam; sicut v. g. materia est in potentia ad omnes formas, tamen per Thomistas non habet omnes formas, nec eas habere potest: ergo stante personalitate Filii, non potest personari personalitate Patris, sicut stante una forma, materia non potest per aliam actuari. Hæc ratio valet etiam ad confirmationem.

*Instare* posset Gonet. Ergo cum ex Scoto una materia possit divinitus habere plures formas, unum accidens plura subiecta, & unum corpus esse in pluribus locis: una natura potest etiam esse in tribus divinis personis. *Nego* paritatem, quia materia non completur per formam in ratione materiæ, nec fit informabilis; accidens per primum subiectum in quo est, non fit incommunicabile ut quo, & consequenter potest divinitus communicari alteri; locus est terminus accidentalis & extrinsecus corporis, ideoque potest divinitus esse in duobus locis: at natura creata completur intrinsecè per suppositum & per ipsum subsistit, fitque simpliciter incommunicabilis: ergo stante una personalitate est incommunicabilis alteri & inassumptibi-

creata, nec de natura humana Christi potest verificari. Insuper, si Verbum assumpsisset naturam Angelicam, hæc natura retinisset propriam existentiam, ut tenent plures ex adversariis, qui docent existentiam in substantiis spiritalibus non distingui realiter ab essentia; sed in tali casu, existentia Angelica non perficeret Verbum divinum, nec sequerentur absurda quæ Thomistæ sequi prætendunt ex nostra sententia; ergo idem dicendum est de existentia humanitatis quam in Christo admittimus, putà ipsam non perficere Verbum divinum.

### Q U Æ S T I O III.

*An Deus, ut communis tribus personis, ratione substantiæ absolutæ possit alienam naturam assumere?*

**D**ico Deum, ut communem tribus personis, ratione substantiæ absolutæ posse alienam naturam assumere, illique immediate uniri, substantiis relativis, eam solum secundariò terminantibus. Ita Doctor in 3. dist. 1. q. 2. §. ad questionem. lit. D. Prob. Substantia absoluta divinæ naturæ continet eminenter substantiam creatam, sicut substantia personalis eam continet: ergo potest terminare dependentiam naturæ ad substantiam, cum sit omninò independens sicut substantia Verbi, & natura creata dicat potentiam obedientialem ad substantiam absolutam, sicut ad substantiam Verbi. Deinde, substantia absoluta Dei, est ratio qua Deus subsistit, & est ratio infinita, sicut substantia relativa qua persona in ratione personæ subsistit: ergo natura creata subsistere potest per sub-

subsistentiam absolutam, sicut subsistit per subsistentiam Verbi.

*Dices 1.* Hæc unio esset in unitate naturæ, vel in unitate suppositi? Non primum; quia ex natura creata & ex natura divina resultaret una natura, quod est falsum. Nec secundum; quia subsistentia communis non est suppositum, nec persona; aliàs in Deo essent quatuor personæ, quod est hæreticum; ergo subsistentia absoluta non potest assumere naturam, Resp. Unionem non fieri in unitate naturæ, nec personæ, sed in unitate subsistentis; unde ex unione naturæ divinæ & humanæ in subsistentia absoluta non fieret una natura, nec una persona, sed unum subsistens, *Instabis*; Implicat dari hominem, quin sit persona; ergo ex unione humanitatis cum subsistentia absoluta resultaret aliqua persona, vel hæc unio est impossibilis. Resp. negando consequentiam, quia in natura creata, subsistentia, hypostasis & suppositivitas non differunt formaliter, sed solum materialiter, seu ex parte naturarum in quibus reperiuntur, ut advertit Delgadillo cap. 1. diff. 7. n. 9. ergo licet subsistentia absoluta in se, nec in natura non sit persona, tamen in natura humana quæ per subsistentiam personatur, esset persona de materiali, aut realiter & identicè.

*Dices 2.* Natura assumpta ad subsistentiam absolutam non esset incommunicabilis, cum subsistentia absoluta sit communicabilis: ergo non esset verè subsistens, nec propriè assumpta. Resp. negando antecedens. Tum quia subsistentia si communicabilis sit, hoc provenit ex infinitate naturæ divinæ; sed natura creata est finita & finitè sustentaretur per subsistentiam absolutam Dei: ergo esset incommunicabilis. Tum quia natura est incommunicabilis, dum est in ultima actualitate, sive illud quo ultimò actuatur, sit communicabile, sive non, sive divinum, sive humanum; sed per illam sub-

sistentiam Dei poneretur in ultima actualitate : ergo esset incommunicabilis.

*Instabis* : ergo esset etiam incommunicabilis in natura humana assumpta, quia subsistentia absoluta esset etiam in natura divina infinita, & consequenter esset incommunicabilis in natura assumpta. *Nego* instantiam : quia subsistentia absoluta compleret naturam humanam juxta propriam exigentiam, seu finito modo, & divinam etiam juxta propriam exigentiam, seu infinito modo ; sicque natura humana esset completa & subsistens modo sibi conveniente, puta incommunicabiliter & limitatè, & divina communicabiliter.

*Dices* 3. Natura humana assumpta non potest terminari nisi ad aliquid supplens defectum rei quæ deficit illi, utpotè personæ ; sed subsistentia absoluta deitatis non potest supplere defectum personæ, cum ipsa non sit persona, ut est de fide : ergo natura humana assumi non potest à subsistentia absoluta. *Nego* minorem : nam effectus personalitatis est reddere naturam humanam subsistentem incommunicabiliter : sed totum id faceret subsistentia absoluta, ut jam dictum est suprâ : ergo ipsa subsistentia absoluta potest assumere naturam humanam, eamque reddere incommunicabilem alteri supposito. Quod verum esse, iterum evinco alia ratione ; nam talis subsistentia reddit naturam divinam incommunicabilem alteri supposito à se realiter distincto, ut dictum est in tractatu de Trinitate : ergo redderet etiam naturam assumptam incommunicabilem alteri supposito realiter distincto.



## Q U Æ S T I O I V.

*An plures personæ divinæ possint terminare immediatè eandem numero humanitatem, & plures humanitates ab eadem persona assumi?*

**D**ICO 1. Plures personas divinas non posse assumere eandem numero naturam, neque eam propriis subsistentiis relativis terminare. Ita Doctor in 3. dist. 1. q. 3. Et est D. Anselm. lib. 2. cur Deus homo, cap. 9. ubi ait, *Plures personæ nequeunt unum eundemque hominem assumere in unitate personæ, quare in una personæ tantum hoc fieri necesse est*; sed ex D. Anselmo hæc impotentia non se tenet ex parte personarum quarum virtus terminandi est infinita, sed ex parte humanitatis quæ ad tres personas simul terminari non potest; nec loquitur juxta præsentem providentiam, quia lib. de Incarn. cap. 4. ait, *Filio incarnato non est necesse alias quoque personas incarnari, sed impossibile, quod non debet intelligi respectu alterius naturæ humanæ: certum enim est, quod Pater potest assumere aliam naturam, Filio incarnato: ergo debet intelligi de natura quæ est in Filio, subindeque ex D. Anselm. Pater & Filius nequeunt assumere eandem numero naturam.*

Prob. ex Goneto, ut quæst. seq. dicemus: Persona creata non potest de potentia Dei absoluta alienam terminare naturam: ergo nec una persona divina naturam à Verbo assumptam; subindeque una natura nequit à tribus divinis personis assumi. Prob. conseq. Idcirco enim persona creata non potest terminare alienam naturam, quia non est infinita, ut do-

cet Gonet. cum D. Thoma; atqui ut natura terminetur à pluribus personis, oportet, quòd sit infinita in ratione terminabilis, sicut persona in ratione terminantis: ergo quemadmodum persona creata nequit alienam terminare naturam, ex defectu infinitatis, ita pariter natura creata ex defectu ejusdem infinitatis, à pluribus personis suppositari non potest. Prob. minor in qua est tota difficultas. 1. Tale est passivum quale est activum, & e converso sub conceptu activi & passivi: ergo si suppositum creatum nequeat terminare duas naturas, quia non est infinitum in ratione terminantis aut terminativi, nec una natura à duobus suppositis terminari, cum suppositum activè terminet, & natura passivè terminetur. 2. Ideò una persona divina potest assumere plures naturas, quia, inquit Gonet. vis assumptiva conveniens personæ divinæ non comprehenditur ab una natura creata, id est, quia virtus personæ in ratione terminantis, est tanta quanta esse potest virtus naturarum in ratione terminabilium, aliàs eas assumere minime posset; unde si virtus terminabilis excederet virtutem terminativam personæ divinæ, non posset eas assumere, nec e contra: ergo talis esse debet virtus naturæ terminandæ, qualis est virtus personæ terminantis; subindeque sicut persona creata nequit terminare alienam naturam, quia non est infinita sicut persona divina; ita una natura creata nequit terminari ab alia persona, seu à pluribus, quia non est infinita sicut natura divina. 3. Tandem, absurda quæ sequuntur ex persona creata respectu plurium naturarum, sequuntur etiam ex natura creata respectu plurium personarum divinarum; & rationes quibus salvat Gonetus unam naturam terminari posse per plures personas divinas, salvant etiam unam personam creatam posse terminare plures naturas, ut consideranti patebit: **ergo &c.**

Confirm. Ex Gonet. disput. seq. art. 4. natura creata, subsistens in propria persona, propria personalitate retenta, non potest etiam de potentia absoluta uniri personæ divinæ, & per illius subsistentiam subsistere: ergo ubi affecta est personalitate Verbi, non potest amplius assumi à Patre nec à Spiritu sancto. Prob. consequ. 1. Natura per personalitatem Verbi completur & personatur, sicut per propriam: ergo si stante propria personalitate, natura sit inunibilis alteri supposito, quia est completa, sic etiam stante una personalitate divina est inunibilis alteri, cum sit etiam completa. 2. Ex Gonet. una res nequit existere duplici existentia: ergo nec subsistere duplici subsistentia. 3. Quod est incommunicabile, non potest assumi; sed natura creata assumpta à Verbo, est incommunicabilis, sicuti si haberet personalitatem propriam, cum de ratione personæ sit reddere naturam incommunicabilem: ergo sicut natura propria personalitate subsistens, nequit assumi à Verbo; ita nec persona assumpta à Verbo, assumi potest à Patre.

Prob. 2. Ex Doctore, unum & idem non potest à pluribus adæquatè dependere, ut dicunt omnes Physici; at si natura creata tribus personis divinis uniretur, à pluribus totaliter & adæquatè penderet, cum subsisteret, posita unione, cum qualibet persona; & subsisteret posita unione cum persona Patris, & non posita unione cum persona Filii: ergo una & eadem natura non potest hypostaticè uniri tribus divinis personis.

Resp. Gonet. quòd licet non possit unum & idem à duobus adæquatè dependere dependentia causali, quæ est dependentia stricta; potest tamen dependentia non causali seu terminativa, quæ dependentia stricta non est, unum & idem à duobus dependere adæquatè adæquatione intensiva, non tamen adæquatione

extensiva : unum enim album una relatione similitudinis adæquatè intensivè ab albo terminatur, non tamen adæquatè extensivè; potest enim ex vi ejusdem relationis ad plura alba terminari, & de facto terminatur ad omnia cum quibus in graduali intentione similitudinem habet : Pater etiam in creatis, ex vi ejusdem relationis qua ad unum Filium refertur & ad illum adæquatè intensivè terminatur, refertur ad novum Filium si adveniat, ac proinde à Filio non terminatur adæquatè adæquatione extensiva; natura autem creata unita alieno supposito, non dependet ab illo dependentia stricta & causali, sed dependentia non causali & terminativa, ut extremum terminabile à termino terminante; ac proinde quamvis unita uni ex personis divinis, ab illa adæquatè intensivè terminetur, non tamen adæquatè extensivè, & idcirco uni ex personis divinis unita, potest uniri cum aliis.

Contra: Complementum rei & sustentatio essentialis ejusdem sunt à causa productiva; nam idè B. Virgo est mater Dei, quia terminus generationis ejus est subsistentia & existentia Verbi, humanitatem productam sustentans & completis in ratione suppositi: ergo dependentia nature ad suppositum, est dependentia causalis; subindeque una natura creata nequit uniri tribus divinis personis, nec à tribus dependere. 2. Sicut effectus productus à causa efficiente totali suum esse recipit; ita natura singularis recipit suam sustentationem & terminationem totalem à suo termino totali: ergo est dependentia stricta & causalis, & quemadmodum acceptio esse totalis ab una causa totali, explodit aliam ejusdem ordinis; ita acceptio ultimi complementi, incommunicabilitatis, sustentationis & essentialis terminationis, excludit quamcumque aliam subsistentiam totalem. 3. Natura per unam subsistentiam totalem

lem est adæquatè completa adæquatione extensiva: ergo non posset per aliam totalem compleri. Prob. antecedens: Natura habens propriam substantiam est extensivè còpleta; aliàs Verbum potuisset assumere naturam personatam, quod Gonetus judicat impossibile: ergo natura assumpta à Verbo est etiam extensivè completa, & nequit ab alia persona divina assumi. *Præterea*, quando dependentia essentialis & per se est totaliter terminata intensivè, nequit per aliam terminari, licèt non sit totaliter extensivè terminata; ut patet in effectu, qui divisim potest esse à duabus causis totalibus, ut v.g. calor qui ab igne & à sole produci potest, qui postquam habet esse ab una causa, non potest simul habere ab alia, licèt dependentia ejus sit intensivè tantum terminata: ergo licèt dependentia naturæ creatæ non sit extensivè terminata per unam substantiam divinam, ut vult Gonet. (quod tamen apud nos falsum est, ut patet in relationibus creatis quæ multiplicantur multiplicatis terminis totalibus) non potest terminari per aliam; quemadmodum calor productus ab igne, non potest produci à sole, ad quem tendit calor producendus; licèt non sit à causa totali adæquatione extensiva.

Dico 2. Unam personam divinam posse simul plures naturas assumere. Ita omnes: Tum quia vis assumptiva personæ divinæ non exhauritur per assumptionem naturæ, cum sit infinita, sicque una assumpta, aliam & aliam assumere potest: Tum quia licèt una natura per unam substantiam fiat incommunicabilis alteri, aut insistentibilis ab alia; tamen substantia divina non sit impotens sustentandi aliam: nam licèt unum & idem numero accidens à duobus subjectis totalibus, nec effectus à duabus causis totalibus dependere possint; tamen unum subjectum plura accidentia, & una causa plures effectus habere possunt: ergo.

Obj. Gonet. Si simultanea terminatio ejusdem naturæ à tribus personis divinis repugnaret, deberet repugnantia se tenere vel ex parte personarum terminantium, vel ex parte naturæ terminabilis; sed ex neutro capite; ergo &c. Major patet. Minor etiam quantum ad 2. partem, est certa; nam divinæ personæ non se excludunt à convenientia in eadem natura, cum omnes simul terminent naturam divinam: ergo ex parte illarum non repugnat simultanea terminatio ejusdem naturæ creatæ. Pro 1. verò parte, prob. natura creata est terminabilis à persona divina ratione potentiae obedientialis; sed ex parte hujus potentiae, nulla repugnantia oritur, si ex parte termini nulla includatur: ergo &c.

Confirm. Tres personalitates divinæ simul terminant naturam divinam: ergo possunt simul terminare naturam creatam. Patet consequentia 1. Nam quod personalitas divina possit extendi secundario ad terminandam naturam creatam, illi convenit, quia primario terminat naturam divinam, in qua omnis natura creata eminenter continetur: ergo si omnes simul in natura divina primò terminanda conveniunt, possunt etiam simul in natura creata secundario terminanda adunari. 2. Prob. à paritate rationis: Si enim natura divina tribus subsistentiis subsistit, in hoc, quod est unam & eandem naturam tribus subsistentiis subsistere, nulla involuitur implicantia, ac proinde non repugnat naturam creatam tribus subsistentiis divinis terminari.

Resp. negando minorem: repugnat enim ex parte utriusque. Ad prob. primæ partis, dico, quod in natura divina personalitates non præstant effectum formalem, qui est reddere naturam subsistentem, completam & incommunicabilem, cum sit omnino communicabilis, ac completa & subsistens independentè à personalitatibus; unde cum solam termi-

nent

nent fecunditatem & communicationem naturæ, sequitur, quod natura divina potest simul in ipsis subsistere. *Deinde*, sunt de conceptu reali naturæ divinæ; at respectu naturæ creatæ aliter se haberent, cum ipsam complerent & redderent incommunicabilem: sicque quemadmodum duæ causæ totales repugnant inter se respectu ejusdem effectus, sic etiam tres divinæ personalitates respectu ejusdem naturæ. *Præterea*, sunt extra conceptum realem naturæ creatæ: ergo non possunt ei simul advenire nisi per modum unius, quod implicat in hoc casu. Ad prob. 2. partis, dico, quod potentia obedientialis naturæ non est ad Patrem, Filium & Spiritum sanctum conjunctim, sed divisim & successivè; non enim habet potentiam simultatem, sed simultatis potentiam; sicut v. g. materia est in potentia ad omnes formas, tamen per Thomistas non habet omnes formas, nec eas habere potest: ergo stante personalitate Filii, non potest personari personalitate Patris, sicut stante una forma, materia non potest per aliam actuari. Hæc ratio valet etiam ad confirmationem.

*Instare* posset Gonet. Ergo cum ex Scoto una materia possit divinitus habere plures formas, unum accidens plura subiecta, & unum corpus esse in pluribus locis: una natura potest etiam esse in tribus divinis personis. *Nego* paritatem, quia materia non completur per formam in ratione materiæ, nec fit informabilis; accidens per primum subiectum in quo est, non fit incommunicabile ut quo, & consequenter potest divinitus communicari alteri; locus est terminus accidentalis & extrinsecus corporis, ideoque potest divinitus esse in duobus locis: at natura creata completur intrinsecè per suppositum & per ipsum subsistit, fitque simpliciter incommunicabilis: ergo stante una personalitate est incommunicabilis alteri & inassumptibi-

lis, & ultimata ac intrinsecè completa; ideoque pluribus subsistentiis totalibus subsistere nequit.

Plurium formarum effectus formales non sunt incompatibiles, sicut effectus formales plurium personalitatum: nam effectus personalitatis est reddere naturam incommunicabilem ut *quod* & ut *quo*; unde supposita una personalitate in natura, ipsa natura remanet incommunicabilis alteri seu inassumptibilis ab alio: nequit igitur recipere aliam personalitatem, cum ratione personalitatis dicat incompatibilitatem & repugnantiam, id est, incommunicabilitatem alteri supposito, quam non dicit materia habens unam formam, subjectum habens unum accidens, nec corpus existens in uno loco, quia forma nihil confert materiæ, per quod repugnet ipsi recipere aliam formam de potentia absoluta; nam expulsio, aut incompatibilitas formarum non provenit ex materia, nec est effectus primarius & formalis formarum, sed solum secundarius, ut docent philosophi nostri, quem Deus potest impedire: at reddere naturam incommunicabilem, est effectus formalis personalitatis, quem Deus impedire non potest, quia effectus formalis formæ, nihil aliud est quam ipsa forma unita subjecto: ergo licet duæ formæ possint divinitus esse in eadem materia, non sequitur plures personas posse esse in una natura.

*Dices*: Tres personæ divinæ respectu naturæ assumptæ possunt habere rationem unius termini totalis & adæquati: seu possunt per modum unius assumere naturam humanam; sicut quando tres personæ divinæ producunt eundem effectum, non sunt tres causæ, sed una; nec effectus habet tres causas, sed unam tantum: ergo tres divinæ personalitates possunt absque ulla repugnantia esse in una eademque natura humana, sicut



cut plures formæ in eadem materia. Nego antecedens, quia una personalitas nequit concipi ut terminus partialis, nec tres ut unus terminus totalis; quia quælibet persona divina habet ex se unde possit ita terminare dependentiam naturæ creatæ, ut ipsa natura creata maneat incommuni-  
cabilis alteri, seu interminabilis ab alio sup-  
posito, cum quælibet habeat propriam subsi-  
stentiam relativam; ac quando produciunt, vir-  
tus est una in tribus, sicque tres personæ non  
sunt tres causæ, sed una: aliàs essent tres omni-  
potentes, quod est contra Symbolum Athanasii:  
ergo non valet argumentum, aut paritas de ter-  
minatione & productione, quidquid dicat Con-  
tenson. in Theol. lib. 9. dissert. 3. cap. 2. specul. 1.

## Q U Æ S T I O V.

*An in casu quo una persona divina plures  
humanitates assumeret, vel econtra, es-  
sent tunc unus homo, vel plures?*

**D**Ico 1. quòd in casu quo una persona divina  
duas humanitates assumeret, diceretur  
unus homo, non duo. Hæc difficultas est gram-  
maticalis, ut ait Scotus in 1. dist. 12. unde à si-  
gnificatione vocum dependet: nam si *Ly homo*  
sumatur masculinè, & prout significat naturam  
& suppositum, certum est, quòd non esset plu-  
res homines, sed unus. At si sumatur in abstra-  
cto, certum est, quòd esset plures homines, id  
est una persona habens plures humanitates.  
Concludo igitur cum Cavello, Fabro, Mastroio,  
Delgadillo, Boyvino, & aliis Scotistis, quòd si  
Verbum assumpsisset plures humanitates, non  
esset dicendus plures homines, sed unus; quia  
ad

lis, & ultimata ac intrinsecè completa; ideoque pluribus subsistentiis totalibus subsistere nequit.

Plurium formarum effectus formales non sunt incompatibiles, sicut effectus formales plurium personalitatum: nam effectus personalitatis est reddere naturam incommunicabilem ut *quod* & ut *quo*; unde supposita una personalitate in natura, ipsa natura remanet incommunicabilis alteri seu inassumptibilis ab alio: nequit igitur recipere aliam personalitatem, cum ratione personalitatis dicat incompatibilitatem & repugnantiam, id est, incommunicabilitatem alteri supposito, quam non dicit materia habens unam formam, subjectum habens unum accidens, nec corpus existens in uno loco, quia forma nihil confert materiæ, per quod repugnet ipsi recipere aliam formam de potentia absoluta; nam expulsio, aut incompatibilitas formarum non provenit ex materia, nec est effectus primarius & formalis formarum, sed solum secundarius, ut docent philosophi nostri, quem Deus potest impedire: at reddere naturam incommunicabilem, est effectus formalis personalitatis, quem Deus impedire non potest, quia effectus formalis formæ, nihil aliud est quam ipsa forma unita subjecto: ergo licet duæ formæ possint divinitus esse in eadem materia, non sequitur plures personas posse esse in una natura.

*Dices:* Tres personæ divinæ respectu naturæ assumptæ possunt habere rationem unius termini totalis & adæquati: seu possunt per modum unius assumere naturam humanam; sicut quando tres personæ divinæ produciunt eundem effectum, non sunt tres causæ, sed una; nec effectus habet tres causas, sed unam tantum: ergo tres divinæ personalitates possunt absque ulla repugnantia esse in una eademque natura humana, sicut

cut plures formæ in eadem materia. Nego antecedens, quia una personalitas nequit concipi ut terminus partialis, nec tres ut unus terminus totalis; quia quælibet persona divina habet ex se unde possit ita terminare dependentiam naturæ creatæ, ut ipsa natura creata maneat incommunicabilis alteri, seu interminabilis ab alio supposito, cum quælibet habeat propriam substantiam relativam; ac quando produunt, virtus est una in tribus, sicque tres personæ non sunt tres causæ, sed una: aliàs essent tres omnipotentes, quod est contra Symbolum Athanasii: ergo non valet argumentum, aut paritas de terminatione & productione, quidquid dicat Con-  
 tenson. in Theol. lib. 9. disert. 3. cap. 2. specul. 1.

## Q U Æ S T I O V.

*An in casu quo una persona divina plures humanitates assumeret, vel econtra, essent tunc unus homo, vel plures?*

**D**ico 1. quòd in casu quo una persona divina duas humanitates assumeret, diceretur unus homo, non duo. Hæc difficultas est grammaticalis, ut ait Scotus in 1. dist. 12. unde à significatione vocum dependet: nam si *Ly homo* sumatur masculinè, & prout significat naturam & suppositum, certum est, quòd non esset plures homines, sed unus. At si sumatur in abstracto, certum est, quòd esset plures homines, id est una persona habens plures humanitates. Concludo igitur cum Cavello, Fabro, Mastrio, Delgadillo, Boyvino, & aliis Scotistis, quòd si Verbum assumpsisset plures humanitates, non esset dicendus plures homines, sed unus; quia  
 ad

ad multiplicationem concretorum requiritur etiam pluralitas suppositorum.

Prob. Ex Doctore, si duæ formæ essent in eadem numero materia, non essent absolute duo composita, sed unum ratione unitatis materiæ; & si una forma esset in duabus materiis, non essent duo composita substantialia, sed unum, ratione unitatis formæ; ergo si Verbum assumeret plures naturas, quæ tres personæ divinæ unam & eandem naturam, non essent absolute plures homines, sed unus homo. 2. Ex Doctore in Christo sunt duæ filiationes reales; quarum una est æterna terminata ad Patrem, & altera temporalis terminata ad matrem; tamen Christus est unus Filius: non ratione naturæ, cum in ipso sint duæ naturæ, sed ratione personæ: ergo si una persona assumeret plures naturas, semper esset unus homo. In natura divina sunt tres personæ, tamen sunt unus Deus ratione unitatis naturæ. Christus est unus, licet duas naturas habeat, ratione unius subsistentiæ & suppositi: ergo si assumeret plures naturas, esset unus homo ratione unitatis suppositi; quia concretum tam significat suppositum, quàm naturam. Tandem, Verbum assumens humanitatem se habet ut sustentans & terminans; sed qui duas res sustentat vel terminat, non dicitur duo sustentantes, sed unus: ergo Verbum esset absolute & simpliciter unus homo, sicut ex Scoto unus homo habens plures filios, non est plures patres, sed unus; licet tot paternitates habeat, quot filios habet.

Dices 1. Pluralitas concretorum non inferitur ex pluralitate suppositorum, sed ex pluralitate formarum: nam ideo Deus est unus, quia in ipso est unica natura; licet tribus suppositis gaudeat: ergo si Verbum assumeret plures humanitates, esset plures homines, licet unicum suppositum haberet. Resp. neg. consequentiam; quia pluralitas concretorum inferitur ex plurali-

## DE INCARNATIONE. 154

ralitate suppositorum & formarum simul; hinc est, quòd cum nulla sit pluralitas concretorum sine pluralitate suppositorum & formarum simul, sequitur, quòd Verbum non esset plures homines, sed unus homo.

*Dices 2.* Si Verbum assumeret duas naturas diversæ speciei, v. g. naturam humanam, & Angelicam, esset homo & Angelus, vel si assumpsisset naturam humanam & naturam leonis, non esset unum animal, sed duo; quia unum & idem animal ad duas species pertinere minimè potest: ergo si assumeret plures humanitates, non esset unus homo, sed plures. Resp. quòd Verbum esset verè homo & verè Angelus, sed nego, quòd homo & Angelus essent duo arithmetice, & in concreto, sicut v. g. ut dixi suprà; Christus est verè Filius Dei Patris & verè Filius Virginis, tamen non est numericè nec in concreto duo Filii, sed unus: Iac est album & dulce, tamen album & dulce in lacte non sunt duo concreta. Ad. 2. dico similiter, quòd Verbum esset homo & leo, tamen nego hominem & leonem esse duo animalia numericè, sed tantum unum animal substantivè in concreto. Ad prob. dico quòd idem animal completè sumptum, seu quoad subsistentiam & formam, non potest pertinere ad duas species oppositas, concedo: Idem animal sumptum solum quoad suppositum, quod est & denominatur animal, nō potest pertinere ad diversas species, ratione diversarum formarum, nego: Nam Christus sumptus quoad suppositum, excluditur à prædicamento, tamen ratione naturæ humanæ in ipso ponitur: Est Deus & homo, tamen non est duo, sed unus: ergo in casu supposito, esset unum animal simpliciter & in concreto, & duo ratione naturarum aut in abstracto.

Ratio hujus rei est, quia, ut jam dixi in responsione ad primum argumentum, pluralitas concretorum non est petenda ex sola pluralitate

te

ram. Prob. Deus de potentia absoluta potest privare naturam Petri propria subsistentia, & præsertim in sententia D. Thomæ, qui personalitatem creatam in positivo constituit, eamque intimè conjungere personæ unius Angeli v. g. Michaelis: nam ex multis Patribus, ut referunt Becanus cap. de persona assumente quæst. 5. Frassen. tract. de Incarnat. disp. 1. art. 2. sect. 2. q. 4. & alii, Malachias, Aggæus, Joannes Baptista & Melchisedech fuerunt Angeli incarnati hypostaticè: ergo persona creata potest divinitus sustentare & terminare alienam naturam. Antecedens patet, conseq. prob. 1. ex Doctore: Duo corpora humana possunt eadem anima informari: ergo duæ naturæ eodem supposito sustentari & personari. 2. Virtus obedientialis terminativa naturæ quam suppositum creatum habet, non exhauritur extensivè per unam naturam secundum suam exigentiam naturalem terminabilem: ergo potentia obedientialis suppositi excedit exigentiam naturalem naturæ, & consequenter non implicat, quòd unum suppositum creatum sustentet & terminet duas naturas. 3. Omne agens consideratum secundum potentiam obedientialem, & prout subijcitur virtuti divinæ extraordinariò & absolutè coagenti & concurrenti, plus potest quàm secundum potentiam naturalem, & prout subijcitur divinæ virtuti ordinariò concurrenti, si nulla inveniatur ratio impossibilitatis aut contradictionis; sed in hoc casu nulla invenitur ratio impossibilitatis: ergo suppositum creatum, Deo absolutè & extraordinariò concurrente, potest plus terminare & sustentare, quàm naturaliter: sed naturaliter terminat unam naturam: ergo de potentia absoluta potest terminare duas naturas.

*Dice:* 1. Impossibile est, quòd negativum divinitus terminet positivum & reale: sed suppositum creatum ex Scotitis consistit in negativo; ergo

ergo non potest terminare dependentiam naturæ alienæ, quæ realis est & positiva. Resp. 1. argumentum probare contra Gonetum, quia apud ipsum suppositum consistit in positivo: ergo potest terminare alienam naturam. Resp. 2. distinguendo majorem: Impossibile est, quod negativum terminet positivum, seu quod sit terminus *qui*, aut extremum, concedo; seu quod sit terminus *quo*, aut ratio formalis *qua* unum extremum terminat aliud, nego majorem: Nam relationes diversitatis fundantur proximè in carentia unitatis, quæ est quid negativum, licet relationes sint reales; unde concessa minori, nego consequentiam; quia natura singularis suppositata, esset terminus *qui*, seu extremum illius dependentiæ naturæ assumptæ; & suppositum, licet sit negatio, esset ratio qua natura singularis esset terminus *qui* & extremum unionis hypostaticæ & dependentiæ, quemadmodum carentia unitatis est ratio qua unum extremum terminat relationem diversitatis.

*Dices 2.* Impossibile est, quod modus unius naturæ conveniat alteri; aliàs sequeretur, quod unum accidens inhærere posset inhærentia alterius: ergo impossibile est, quod una natura subsistat subsistentia alterius, cum subsistentia sit modus naturæ. Resp. 1. negando antecedens: Natura enim humana Christi subsistit subsistentia aliena, utpotè divina. Resp. 2. distinguendo antecedens: Impossibile est, quod modus accidentalis conveniat alteri, concedo; Modus substantialis: nego antecedens & consequentiam, quia subsistentia est modus substantialis. Ratio disparitatis est, quia modus accidentalis modificat intrinsecè inhærendo, & dependet à subjecto tanquam à causa materiali; unde cum à duobus totaliter nihil dependere queat, sequitur, quod inhærentia unius accidentalis, alteri convenire non potest: At subsistentia est modus substantialis, qui à natura non dependet,

det, imò potiùs natura ab illa dependet. in esse subsistentiæ; unde cùm non implicet duo ab uno & eodem dependere, sequitur, quòd unum suppositum duas naturas terminare potest, propriam intrinsecè, & alienam extrinsecè, ut patet in Verbo divino.

Obj. Gonetus: subsistentia terminans plures naturas, debet esse infinita; sed implicat subsistentiam creatam esse infinitam: ergo & plures terminare naturas. Minor patet, major verò in qua est difficultas, prob. 1. Subsistentia terminans plures naturas, supplet vices subsistentiarum quæ sunt propriæ illis naturis, tales enim naturas reddit incommunicabiles, sicut reddidissent subsistentiæ propriæ; sed non potest supplere vices alium subsistentiarum, nisi sit infinita: ergo &c. Prob. minor: Subsistentia terminans plures naturas, non potest supplere vices subsistentiarum quæ sunt propriæ illis naturis, nisi contineat illas secundùm proprias & distinctas earum rationes, eminenter formaliter, id est seclusis imperfectionibus; sed non potest hoc modo illas continere, nisi sit infinita: ergo &c. Minor prob. Non potest eas continere secundùm proprias earum rationes, nisi eas contineat, prout conveniunt in ratione aliqua una & communi, quæ alia esse non potest quàm ratio entis; differentiæ enim propriæ non conveniunt in aliquo superiori, nisi transcendentaliter in ipsis imbibito; sed continere in ratione entis, est continere modo illimitato & infinito: ratio enim entis, cùm sit universalissima & transcendens, ad omnia se extendit, & est quodammodo infinita & illimitata: ergo subsistentia terminans plures naturas, non potest continere eminenter formaliter subsistentias illis naturis proprias, nisi sit infinita.

Confirm. Subsistentia in perfectione adæquat cum natura quam connaturaliter terminat: ergo sicut nulla natura creata, quantumcum-

quo



que perfecta, potest habere nisi unam speciem & essentiam, ita nec potest eminenter continere speciem aliarum naturarum; sed hoc est proprium Dei, qui cum sit causa plena & perfecta omnium rerum, eminenter illas continet; ita neque illa substantia creata potest speciem & perfectionem aliarum substantiarum eminenter continere; sed hoc competit soli personalitati divinæ, ratione identitatis quam habet cum natura divina, & substantia absoluta quam transcendentaliter includit.

Prob. 2. major principalis, ratione Cajetani: Persona potens de se subsistere in duabus naturis, potest subsistere in infinitis si essent; sed persona potens subsistere in infinitis naturis, est in subsistendo infinita: ergo persona potens de se in duabus naturis subsistere, est infinita in subsistendo. Majorem probat Cajetanus; nam ubi pluralitas differentiam non facit, nec illam infinitas faceret, si infinitas possibilis esset, ut ait Arist. 4. Phys. text. 76. ex quo infert, quod si duo corpora possent esse simul in eodem loco, etiam possent infinita corpora esse simul, si essent possibilia: ergo si pluralitas naturarum non obstat, ut persona ex vi unius substantiæ subsistat in illis, nec infinitas naturarum obsteret, si possibilis esset, ut in infinitis naturis subsisteret, & consequenter persona potens subsistere in duabus naturis, est etiam potens de se subsistere in infinitis. Minor potest sic facile suaderi: Substantia gaudens vi terminativa & sustentativa infinita, est infinita in ratione subsistētis; cum in nullo alio substantia consistat, quam in vi terminativa & sustentativa nature: sed substantia personæ potentis de se subsistere in naturis infinitis, gauderet vi terminativa & sustentativa infinita, sicut virtus effectiva potens quantum est de se in effectus syncategorematicè infinitos exire, est virtutis effectivè infinitæ: ergo persona potens de se subsistere in infinitis naturis, est in subsistendo infinita.

Prob.

Prob. 3. major principalis : Quod personalitas non potest connaturaliter & de potentia ordinaria præstare, non potest etiam facere de potentia absoluta; at nulla personalitas quæ non sit infinita, potest connaturaliter & de potentia ordinaria terminare alienam naturam, ergo nec de absoluta. Minor est evidens: Nam quælibet personalitas connaturaliter est determinata ad terminandam propriam naturam, ad quam consequitur. Major autem prob. ex principio generali in Philosoph. tradito, quo dicitur hanc esse differentiam inter causam materiale & formalem, maxime substantialem, qualis est substantia, & causam efficientem, quod hæc potest elevari ad producendum effectum supernaturalem, vel principaliter, si contineatur intra objectum ejus specificativum, & sit tantum extra proportionatum; vel instrumentaliter, si sit extra objectum specificativum, cum tamen non possit illum producere naturaliter & secundum propriam virtutem; causa autem materialis & formalis, maxime substantialis, non potest sic elevari; unde propterea in illis non habet locum distinctio potentie ordinariæ & extraordinariæ, seu naturalis & obediæntialis. Et ratio est, quia ut causa formalis substantialis, v.g. substantia, terminaret naturam quam non potest connaturaliter terminare, deberet necessario recipere aliquam virtutem qua augetur & elevaretur virtus terminativa naturalis; hoc autem est impossibile, quia illa virtus elevans non potest esse virtus accidentalis (hæc enim est incapax elevandi ad substantialiter terminandum naturam) nec etiam substantialis, quia virtus substantialis reddens personalitatem naturalem capacem terminandi alienam naturam, esset vera substantia, utpote supernaturalis participatio substantiæ divinæ, cui soli naturale est posse terminare alienam naturam, &

sic non una tantum, sed duplex esset subsistentia in eadem persona creata, quod implicat; & destrueretur hypothesis hujus questionis, qua quaeritur, an unica subsistentia creata plures naturas terminare possit?

Confirm. Si in terminatione subsistentiae haberet locum distinctio potentiae ordinariae & extraordinariae, naturalis & obediencialis, seu causae principalis & instrumentalis, vel subsistentia terminando alienam naturam de potentia Dei absoluta, hoc praestaret ut causa principalis, vel ut instrumentalis à Deo elevata? Non hoc secundum; quia sic foret necessarium, quod Deus ipse ut causa principalis concurreret ad hanc eandem terminationem; hypostaticè informando ut causa principalis illam eandem naturam; cum effectus & causalitas causae instrumentalis conveniant etiam principali. Neque etiam primum; quia ut causa principalis non potest subsistentia elevari extra suum specificativum; sic autem est quod specificativum subsistentiae Angelicae v. g. est natura Angelica: ergo non poterit subsistentia Angeli elevari ad terminandum in genere causae principalis naturam humanam.

Resp. negando majorem: Tum quia ex Doctore, personalitas Verbi divini formaliter sumpta, & sub conceptu personalitatis, non est formaliter infinita, ut dictum est in tract. de Trinit. disp. 3. q. 4. tamen terminat naturam humanam; & potest terminare ac sustentare omnes: Tum quia unum subjectum terminare potest dependentiam plurium accidentium, quin sit infinitum, ut patet in lacte, in quo sunt dulcedo, albedo &c. quin sit infinitum: & in objecto quod plures visiones terminat, licet sit finitum. Ad 1. prob. nego minorem. Ad cujus prob. nego minorem: Nam una subsistentia continet virtualiter perfectionem alterius, quantum requiritur ad complendam naturam, ac reddendam ipsam aptam, ut operationes suas exercent,

ac si substantia propria afficeretur: nam ex Gonet, ut patet q. 4. una paternitas finita continet in ratione termini perfectiones aliarum paternitatum; cum per Thomistas una sufficiat, ut pater ad plures filios referatur, pluresque filiationes terminet. Ad prob. dico, quod substantia continet virtualiter alias substantias, prout conveniunt in ratione specifica, quæ non est ratio entis, sed ratio substantiæ seu termini; quod non est continere modo illimitato & infinito, cum ratio substantiæ seu termini non sit universalissima, nec ad omnia se extendat, & consequenter nec sit infinita; v. g. una paternitas continet virtutem terminativam omnium filiationum in Doctrina Gonet, quia si unus homo esset Pater omnium hominum, unicam paternitatem haberet in sententia Thomistarum; unum subjectum sustentat accidentia, quæ alia subjecta sustentare possunt, tamen non continet alia subjecta in ratione entis universalissimi, sed tantum in ratione subjecti & termini; ita similiter una substantia terminare potest alias naturas, & supplere vices propriarum substantiarum, quin eas contineat in ratione entis universalissimi, sed tantum in ratione substantiæ & termini naturæ, quæ quidem ratio minimè infinita est. Unde confirmatio non valet; non enim requiritur, quod substantia contineat speciem & perfectiones essentielles substantiarum, ut earum vices suppleat, sed sufficit, quod eas contineat in ratione termini, seu incommunicabilitatis: nam personalitas divina, Angelica & humana, licet specificè distinguantur, tamen in ratione termini prorsus conveniunt: ergo non implicat, quod una suppleat vices alterius in ratione termini, quin eam contineat; quemadmodum figura quadrata terminat quantitatem sicut rotunda, quin quadrata contineat rotundam in ratione entis, aut figuræ.

Ad 2. prob. nego minorem : quia illa illimitatio quæ peteretur ex terminatione naturarum , esset extrinseca : ergo persona non esset infinita in subsistendo ; nam si objectum visibile terminaret infinitas visiones , non esset infinitum ; ita nec una persona , si infinitas naturas terminaret. Ad prob. ejus distinguo majorem : Subsistentia gaudens vi terminativa & sustentativa infinita intensivè , est infinita in ratione subsistentiæ , concedo majorem : Sustentativa infinita extensivè , nego majorem : Distinguo pariter minorem ; Subsistentia personæ potentis de se subsistere in naturis infinitis , gauderet vi terminativa & sustentativa infinita , extensivè , concedo ; Intensivè , nego minorem & consequentiam & paritatem de virtute effectiva & terminativa : nam ex Gonetio suprà quæst. 4. natura non dependet à personalitate dependentia stricta & causali , sed terminativa , quæ non est stricta ; unde ( inquit ) licet unum & idem à pluribus adæquatè depèdere non possit , tamen una natura à duobus suppositis dependere potest : ergo licet virtus effectiva quæ effectus infinitos causat , sit infinita , non valet tamen inferre ex doctrina Gonetii , personalitatem terminantem infinitas naturas , esse infinitam. *Præterea* , ex Thomistis relatio terminatur ad relativum , & consequenter una relatione similitudinis , unum album terminat relationes similitudinis omnium alborum , quin tamen infinita vi terminativa gaudeat : ergo una subsistentia potest divinitus uniri duabus naturis , imò & infinitis , si essent , quin infinita sit. *Tandem* , ut subsistentia sit infinita in ratione subsistentiæ , oportet , quòd ex vi intensiva & naturali , infinitam exigat naturam sustentandam : nam subsistentia absoluta Dei est infinita , quia ex vi propria sustentat naturam infinitam ; non verò quia sustentare potest omnes naturas creatas : ergo licet subsistentia creata su-


sustentaret infinitas numero naturas, non gauderet intensivè vi terminativa infinita, sed tantum extensivè, sicque non esset infinita in ratione subsistentiæ.

Ad ultimam prob. majoris principalis, nego majorem: Plura enim fieri non possunt de potentia ordinaria, quæ tamen de potentia absoluta fiunt: alioquin accidentia sine subjecto existere non possent, nec unum corpus esse in pluribus locis, quod est à fide alienum. Ad prob. dico, Philosophum esse intelligendum de effectibus per verum influxum producendis; verum enim est, quod nulla causa materialis vel formalis producere potest effectum à se distinctum, & extra se existentem, sicut causa efficiens producit, & in hoc distinguebat causam efficientem à formali; non autem de effectibus formalibus, qui nihil aliud sunt quam ipsæmet causæ formales communicatæ subjecto; unde sicut causa efficiens potest producere effectus intra objectum ejus totale contentos, ita pariter causa formalis potest de potentia absoluta communicari subjectis intra objectum ejus totale contentis, & in hoc convenit cum causa efficiente: ergo quemadmodum causa efficiens de potentia absoluta producit effectus quos non potest producere naturaliter; ita causa formalis potest communicari subjectis quibus communicari non potest naturaliter. Ad rationem, dico quod subsistentia nullam virtutem reciperet, qua augeretur; nec opus esset, ut virtus illa terminativa augeretur, sed terminaret vi propria à divina voluntate efficienter applicata: nam si Deus vellet unire unam & eandem animam duobus corporibus, non augeret vim animæ, sed applicaret animam duobus corporibus. Punctum quod ex natura sua ordinatur ad terminandam unicam lineam, terminat omnes illas quæ à circumferentia ducuntur ad ipsum, quin augeatur. Deus ponit unum corpus in duobus locis,

is, & corpus nihil intrinsecè recipit nec auge-  
tur, sed tantùm fit præsens duobus locis; ita  
pariter subsistentiæ creata, dum alienam naturam  
terminaret, nihil intrinsecè reciperet, nec in-  
tensivè augetur, sed uniretur duabus naturis  
virtute divina.

Ad confirm. dico, quòd subsistentia terminan-  
do naturam alienam, præstaret hoc ut causa  
principalis, sicut dum terminat propriam. Ad  
prob. distinguo antecedens: Subsistentia non po-  
test elevari extra suum specificativum in ratione  
subsistentiæ, & secundùm suam naturam, conce-  
do: In ratione termini & supplementi, nego an-  
tecedens & consequentiam: Nam subsistentia  
Angelica quæ terminaret naturam humanam,  
esset essentialiter Angelica, & humana termina-  
tivè seu secundùm munus, aut suppletivè tan-  
tùm, ut v. g. persona Verbi, quæ in Christo est  
divina specificativè, & humana terminativè, ex-  
trinsecè & secundùm munus, cùm suppleat vices  
personalitatis humanæ: ergo subsistentia Ange-  
li potest elevari ad terminandum in genere cau-  
sæ principalis naturam humanam, quin ipsa sit  
humana specificè, quia substantia non sequitur  
speciem naturæ alienæ quam terminat, sed tan-  
tùm vices suppositi proprii cuius locum tenet.

Dices: Incarnatio Verbi est opus singularissi-  
mum, quia sola persona divina potest terminare  
naturam alienam: ergo omninò impossibile est  
quòd persona creata eam terminet. Nego as-  
sumptum, seu Incarnationem esse tale opus,  
propter rationem assignatam: est enim opus  
singulare, quia divinis uniuntur humana, & ho-  
mo fit Deus, ut monet D. Ambrosius lib. 1. de  
Virgin. dicens, *Verbum caro factum est, ut caro  
fieret Deus*: quia est opus reparationis nostræ,  
mirabilius opere creationis mundi, & propter  
alias rationes.



## DISPUTATIO VIII.

*De natura assumptibili, &  
assumpta.*

**V**Isis extremis & motivis unionis hypostaticæ, modò examinanda est aliorum extremorum possibilitas, seu an alia creatura præter naturam humanam sit assumptibilis.

## Q U Æ S T I O I.

*An quælibet natura substantialis  
completa, sit assumptibilis a  
divina persona?*

**D**Ico 1. Quòd natura Angelica assumptibilis est à persona divina. Tum quia personalitas Angelica est realiter distincta à natura, sicut personalitas humana: ergo est etiam assumptibilis hypostaticè à Verbo divino. Tum quia personalitas divina continet virtutem personalitatis Angelicæ, sicut continet virtutem personalitatis humanæ: ergo. Tum quia tam est in potentia obedientiali natura Angelica, quàm humana: ergo tam potuit assumi illa, quàm ista; *Numquam enim, ait Paulus ad Hebr. 2. Angelos apprehendit, sed semen Abraha.*

*Dices. 1. Personalitas in Angelo est indistincta à natura, juxta illud Philos. 7. Metaph. cap. 9. In his quæ sunt per se, idem est, quod quid est, & id cuius est: ergo in Angelo qui est per se, id est,*



substantia separata à materia, idem est natura & persona. Resp. negando antecedens, ad cuius prob. dico, Philosophum per *Ly idem est, quod quid est, & id cuius est*, non esse intelligendum de identitate unitatis aut indistinctionis inter naturam Angelicam & suppositum, sed de identitate prædicamenti, quia natura Angelica & suppositum ejusdem, sunt in eodem prædicamento; ad differentiam eorum quæ non sunt per se, quia subjectum in quo sunt, est substantia quæ spectat ad prædicamentum substantiæ & accidens spectat ad aliud; ergo Philosophus non identificat suppositum cum natura.

*Dices 2.* Natura Angelica est incorruptibilis: ergo est inassumptibilis. Resp. negando consequentiam. Tum quia ut assumatur, non requiritur corruptio suppositi proprii, sed sufficit, quòd in primo instanti personalitatis impediatur pullulatio ejusdem. Tum quia Deus potest annihilare personalitatem Angeli; licet enim incorruptibilis sit, tamen non est inan-nihilabilis; alioquin Angelus non esset creatura, quod est falsum.

*Dico 2.* Quòd natura irrationalis completa potest de potentia Dei absoluta uniri hypostaticè Deo, & ab ipso assumi in unitate suppositi. Tum quia suppositum distinguitur à natura irrationali, ut patet: ergo tam assumptibilis est natura irrationalis, quàm humana. Tum quia hæc conclusio est certa apud SS. Patres, Gregor. scilicet, Aug. Tertul. & Theologos, *Dices 1.* Ex D. Damasc. 3. de fide cap. 18. esse est propter operari; sed natura irrationalis nequit videre Deum, nec ipso frui: ergo nequit hypostaticè uniri personæ divinæ. Resp. quòd esse est propter operari secundum capacitatem naturæ, non verò absolute; unde licet natura irrationalis nequeat videre Deum, quoniam est incapax visionis intellectualis, est tamen à Verbo assumptibilis; quia capax est aliarum operationum materialium.

lium quas Christus exercuit. *Dices 2.* Deus diceretur canis, leo &c. quod est indecens: ergo repugnat talis unio. *Resp.* concedendo antecedens; dicitur enim flagellatus, mortuus &c. diceretur etiam per communicationem idiomatum, leo &c. nec hoc esset indecens positivè, scilicet imperfectum, quia illæ denominationes sunt extrinsecæ & per communicationem idiomatum, sed esset indecens tantum negativè & comparativè, seu minùs decens esset assumere naturam irrationalem, quàm rationalem. *Dices 3.* Natura irrationalis nequit sanctificari: ergo nec hypostaticè uniri Verbo. *Resp.* distinguendo antecedens: Nequit sanctificari sanctitate accidentali, quæ fit per gratiam, concedo; Sanctitate substantiali, seu suppositibili & in ordine ad cultum, qua corpus Christi in triduo erat sanctum, nego antecedens & consequentiam; quia natura irrationalis sanctificari potest suppositibiliter, & in ordine ad cultum, id est, potest suppositari & sustentari supposito sancto & colendo.

*Respondeo* iterum concedendo antecedens & negando consequentiam, quia suppositare non est formaliter sanctificare, ut est manifestum: ergo licet suppositum divinum sanctificet substantialiter, non sequitur omne suppositatum, aut suppositabile ab ipso, esse sanctificatum; ad hoc enim requiritur capacitas subjecti, cum aliud sit capax suppositari, & aliud capax sanctificari. Unde natura irrationalis esset suppositata per suppositum verbi, quia est capax suppositari, & non esset sanctificata, quia non est capax sanctificari: quia suppositum divinum, dum communicatur alteri, præbet illi solum effectus illos quorum est capax, & consequenter verbum divinum potuit assumere naturam leonis, v. g. reddendo eam subsistentem, licet non redidisset illam sanctam nec personatam.

## QUÆSTIO II.

*An etiam substantia incompleta & partialis, sit assumptibilis à divina persona?*

**D**Ico 1. Non implicare materiam primam assumi ad divinam subsistentiam sine forma substantiali. Ità Scotistæ. Nam quod habet propriam subsistentiam, subsistentia Verbi subsistere potest. Tum quia omnis subsistentia realiter distinguitur à natura. Tum quia subsistentia divina continet virtutem omnis subsistentiæ creatæ: sed materia prima ex se independentem à forma physica, habet subsistentiam & existentiam, ut docent Physici nostri: ergo subsistere potest subsistentia divina.

Objicit Gonet. Implicat materiam primam existere sine forma: sed quod implicat existere, implicat etiam subsistere: ergo implicat materiam primam subsistere sine forma substantiali, & consequenter implicat, quòd sine illa assumatur ad divinam subsistentiam. Minor cum utraque consequentia patet: Major autem probari solet à Thomistis in Physica ex eo, quòd materia prima est pura potentia, ideoque essentialiter improporcionata, ut participet actum ultimum, qualis est existentia, nisi mediante forma.

Resp. negando majorem; quia materia prima, ut docent Scotistæ in Physica, non est pura potentia metaphysica & objectiva, sed tantum physica & subjectiva, & habet existentiam propriam & à natura materiæ indistinctam: ergo. Deinde, dato & non concesso, quòd non habeat existentiam propriam, est tamen capax subsistendi subsistentia & existentia totius: ergo Verbum divinum potest illi subrogare suam subsistentiam.

stentiam loco subsistentiæ totius, & formæ, qua ex Gonet materia subsistit & existit, & consequenter Verbum potest assumere materiam primam.

Dico 2. Animam rationalem à corpore separatam, esse unibilem Deo, & ab ipso assumptibilem: hæc conclusio est communis, quia in triduo anima Christi erat à corpore separata, & unita Verbo divino: quod enim semel assumpsit, nunquam dimisit: ergo anima rationalis à corpore separata, est unibilis Deo, & ab ipso assumptibilis. *Præterea*, anima rationalis existit & subsistit extra corpus: ergo potest assumi.

Dico 3. Formas corporeas & materiales posse supernaturaliter conservari, & existere separatas à materia; subindeque assumi à Deo. Tum quia materia prima potest assumi sine forma, ut probat prima conclusio: ergo à fortiori forma sine materia. Tum quia formæ corporeæ conservari possunt divinitus, sine materia, ex qua educuntur, sicut accidentia in Eucharistiæ Sacramento conservantur sine subjecto: ergo assumi possunt à Verbo, & subsistentia ipsius subsistere.

Dico ultimd, partes integrales, puta manus, caput, brachium, quamdiu sunt inter se & toti composito unitæ, posse assumi, quin assumatur compositum: quia partes in composito habent propriam subsistentiam, saltem partialem; ut docent nostri Philosophi in Metaphysica: ergo assumi possunt à Verbo, quin totum assumatur, cum omne, quod propriam subsistentiam habet, per subsistentiam divinam terminari & subsistere possit.

Obj. Gonet. Hujusmodi partes subsistunt & existunt per subsistentiam & existentiam totius, quia ut demonstrant Thomistæ in Philosophiâ, non dantur subsistentiæ & existentiæ partiales; unde ut subsistentia & existentia divina sup-

pleant vices subsistentiæ propriæ & connaturalis illarum partium, debent etiam supplere vices subsistentiæ & existentiæ totius compositi, subindeque illud assumere.

**Confirm.** Repugnat naturam aliquam propria subsistentia terminatam, subsistere per divinam; at si pars integralis actu aliis partibus unita posset assumi ad divinam subsistentiam, toto composito non assumpto, posset simul subsistere propria & divina: ergo sic unita inassumptibilis est, non assumpto toto, & non assumptis aliis partibus ipsi conjunctis. Minor prob. Pars existens in toto, non potest non subsistere subsistentia totius, ut constat ex dictis: ergo si manens in toto (qualiter manet, dum est aliis partibus unita) posset assumi ad divinam subsistentiam, simul subsisteret subsistentia totius & subsistentia divina.

**Resp.** negando antecedens, cum ut ex dictis constat, dentur subsistentiæ partiales. Ad confirm. concessa majori, nego minorem. Ad cuius prob. nego antecedens: quia in illo signo naturæ quo subsistentia totius est communicanda partibus, Deus potest impedire illam, & per subsistentiam divinam terminare dependentiā partium, & eas assumere, & loco subsistentiæ totius subrogare divinam, sicque partes subsisterent in toto, & non subsisterent subsistentia totius, sed subsistentia divina quæ suppleret vices.

**Dices:** Subsistentia divina non potest supplere vices subsistentiæ partialis, cum de ratione partis sit esse quid incompletum & imperfectum, & divina subsistentia sit completa & perfectissima: ergo non potest assumere partes compositi, nisi assumat etiam compositum. Nego antecedens, quia supplere vices subsistentiæ partialis non est esse parziale, nec imperfectum; cum subsistentia possit vices alterius gerere, quin ipsa exhauriatur in subsistendo, ut patet de subsistentia verbi divini, quæ potest alterius naturæ de-

pen-

pendentiam terminare, licet modò terminet dependentiam naturę assumptę. Idem patet etiam ex ipso verbo divino, quod erat unum partibus hominis, scilicet animę & corpori in triduo, & non erat unum composito absque ulla partialitate & parte substantię divinę.

### Q U Æ S T I O III.

*An accidentia immediatè à Deo assumptibilia sint.*

**N**Ot est 1. quæstionem agere de assumptione immediatè; certum enim est, quod Verbum divinum assumpsit accidentia mediante natura substantiali, quę ad conservationem naturę necessario requiruntur. 2. Personam divinam habere rationem personę, suppositi, substantię & termini sustentantis; unde potest personare naturam, quę personabilis est; supponere, quę suppositibilis est; & sustentare naturam, quę petit terminum extrinsecum, ut sustentetur. 3. Accidens, ut notat Doctor in 3. dist. 1. quæst. 1. §. de primo. versu dicere duplicem respectum ad subiectum; primus est terminati & sustentati, ad terminans & sustentans. Secundus verò est inharrentis, ad id cui inhareret. His suppositis.

Dico accidens esse immediatè assumptibile ad personalitatem seu substantiam divinam. Ita Scotistę. Prob. 1. Omne dependens terminari potest ad independens independentia suę dependentię opposita. Tum quia independentia est formalis ratio terminandi dependens. Tum quia per independentiam, dependens subsistit; sed Verbum divinum est independens

in ratione sustentantis, quæ est independentia opposita dependentiæ accidentis; nam accidens dependet ab alio tanquam à sustentante extrinseco: ergo dependentia accidentis potest terminari ad Verbum divinum, & ejusdem substantia subsistere. 2. Verbum divinum habet vim infinitam independentem in ratione termini sustentantis, ideòque terminare potest omne terminabile & dependens, seclusis imperfectionibus: sed accidens est terminabile, id est terminari potest ad Verbum sine imperfectione. Tum quia actualis terminatio accidentis à suo subjecto, non est de intrinseco illius conceptu, ut patet in speciebus Eucharisticis, quæ non terminantur actu per subjectum. Tum quia accidens est in potentia obedientiali in ordine ad Deum, sicut substantia. Tum quia imperfectio quam accidens importat, non provenit ex sustentatione & terminatione in subjecto, sed ex inhærentia; at in persona Verbi non esset in subjecto inhærentia, ut patet, sed tantum in termino extrinseco sustentante: ergo accidens est assumptibile ad substantiam Verbi divini.

Obj. 1. Gonetus: Quod non est per se capax substantiæ propriæ, nequit immediate assumi ad subsistendum substantia divina: sed accidens non est per se capax substantiæ propriæ: ergo non potest immediate assumi ad subsistendum substantia divina. Major patet; nam assumptio creaturæ ad subsistendum substantia divina, fit ad hoc ut loco substantiæ propriæ, substantia divina substituatur in illa. Minor verò in qua est difficultas, prob. 1. Substantia substantialis, seu modus essendi per se, ita est proprius substantiæ, sicut modus essendi per inhærentiam in alio, proprius est accidentis: sed modus inhærentiæ ita est accidenti proprius, ut repugnet communicari substantiæ: ergo & modus per se existendi, ita appropriatur substantiæ,

ut

ut implicet competere accidenti. 2. Eadem minor suadetur: Subsistentia est ultimum complementum substantiæ in genere substantiæ, atque actus veluti secundus aptitudinis ipsius substantiæ ad essendum per se, sicut neque econtra substantia est capax ultimi complementi accidentis in genere accidentis: ergo accidens non est de se capax subsistentiæ propriæ.

Confirm. Nam assumi ad subsistendum divina subsistentia, est fieri ultimò completum in genere substantiæ per subsistentiam divinam: sed nequit accidens esse ultimò completum in genere substantiæ: ergo nec assumi ad subsistendum subsistentia divina. Major est certa, cum enim subsistentia nihil aliud sit quàm ultimum complementum in genere substantiæ, assumi ad subsistendum subsistentia divina, est fieri ultimò completum in ratione substantiæ per divinam subsistentiam. Minor verò prob. Aliquid esse completum in genere substantiæ, necessariò supponit illud, quod sic dicitur completum, esse substantiam, sicut aliquid esse ultimò completum in genere entis vel accidentis, essentialiter supponit id, quod dicitur ita compleri, esse ens vel accidens; sed implicat accidens esse substantiam: ergo & esse ultimò completum in ratione substantiæ.

Resp. distinguendo majorem: Quod non est per se capax subsistentiæ propriæ, nequit immediate assumi ad subsistendum subsistentia divina, in ratione subsistentis vel suppositati, concedo majorem; in ratione sustentati, & terminati, nego majorem. Distinguo similiter minorem: Accidens non est per se capax subsistentiæ propriæ, in ratione subsistentis aut suppositati, concedo; in ratione sustentati & terminati, nego minorem & consequentiam: quia dum dicimus accidens esse assumptibile ad subsistentiam divinam, non intēdimus suadere acci-  
dens



dens personari, subsistere, aut suppositari posse per subsistentiam divinam, sed tantum sustentari & terminari, sicut sustentatur & terminatur per substantiam, seclusa inhærentia, quod non implicat; unde assumptio creaturæ ad subsistendum subsistentia divina, non fit ad hoc ut loco subsistentiæ propriæ, subsistentia divina substituatur in illa, nisi creatura sit capax personalitatis, suppositi, aut subsistentiæ; idcirco cum accidens non sit aptum ad subsistendum, sed tantum sustentari & terminari exigat, persona Verbi sustentaret & terminaret illud; cum, ut dixi in notabili, habeat rationem termini sustentantis, sicuti subsistentiæ, suppositi, & personæ. Ad prob. minoris, concedo totum argumentum, quia accidens non subsisteret subsistentia Verbi, sicut natura humana subsistit, nec esset ultimum complementum ejus intrinsecum, cum ut optimè notat Gonet. modus essendi per se nequeat competere accidenti, sicut modus inhærentiæ nequit convenire substantiæ; sed sustentaretur à Verbo, sicut per substantiam sustentatur, seclusa inhærentia, quæ non est essentia accidentis, nec ejus unica & primaria ratio. Patet etiam confirmationem non militare contra nos, cum subsistentia divina non compleret accidens, quatenus subsistentia est & modus substantialis completivus substantiæ, sed quatenus est terminativa aut sustentativa dependentium.

Quæres 1. An natura creata subsistens in propria persona, & propria personalitate retenta, possit assumi ad subsistentiam divinam? Resp. negativè: quia dependentia quam natura dicit ad personam, totaliter satiatur per propriam personalitatem. Tum quia ultimatè & adæquatè completur. Tum quia fit incommunicabilis ut *quod*. & ut *quo*. Tum quia unum & idem à duobus totaliter dependere nequit: ergo propria personalitate retenta, natura nequit assumi à Verbo in unitate personæ.

Quæ-

Quæres 2. An hæc propositio (*Deus assumpsit hominem*) in rigore & proprietate sermonis sit vera? Resp. negativè: quia inde sequeretur, quòd Verbum assumpsisset non solùm naturam humanam, sed etiã personam, quam homo in rigore & proprietate sermonis includit: sed hoc est contra fidem: ergo non assumpsit hominem in rigore sermonis. Nec valet dicere in Conc. Tolet. 1. haberi, *Credimus Filium Dei ex utero Virginis assumpsisse hominem*, quia Patres Concilii sumebant hominem in abstracto, seu pro humanitate.

Eadem responsione solvuntur aliæ authoritates, quibus sacra Scriptura, Concilia & Patres indigitant hominem esse unum extremum unionis hypostaticę assumptum à Verbo divino, quales sunt illæ Joan. 1. *Verbum caro factum est*; ubi expositores vertunt, *Homo factum est*. Conc. Nicæn. *Es homo factus est*, & Hymn. *Te Deum laudamus*, ubi dicitur *Tu ad liberandum suscepturus hominem, non horruisti Virginis uterum*, quia accipiunt totum pro parte, & concretum pro abstracto. Nam filius Dei assumpsit humanitatem, ut esset homo, non autem hominem subsistentem, seu includentem naturam & suppositum: certum enim est, quòd hæc propositio; *Petrus est humanitas*, est falsa; & ista, *Petrus est homo*, est vera. Ratio est, quia in prima, humanitas non pro habente naturam, sed solùm pro natura supponit; & in secunda, supponit pro habente naturam: ergo assumere hominem, propriè & rigorosè est assumere naturam suppositatam, aut habentem suppositum.

## Q U Æ S T I O IV.

*An humanitas Christi, ut actu conjuncta Verbo divino, ejusque personalitate terminata, appetitu innato, subsistentiam propriam & sibi connaturalem appetat?*

**A**Dvertendum est, appetitum innatum, qui est propensio seu inclinatio ab auctore naturæ indita, qua unaquæque res naturaliter & absque cognitione in suum bonum connaturale est propensa, dupliciter sumi posse, scilicet in actu primo & in actu secundo. In primo sensu, nihil aliud est quàm ipsa rei natura secundum se velut naturaliter inclinata ad proprium bonum. In secundo sensu, nihil aliud est quàm operatio, aut quasi operatio naturæ tendentis in bonum sibi connaturale, v. g. ut advertit Gonet. gravitas in lapide est appetitus innatus seu naturalis in actu primo ad centrum; gravitare autem est appetitus naturalis in actu secundo.

Dico igitur humanitatem Christi actu unitam Verbo habere inclinationem seu appetitum innatum per modum actus secundi, ad propriam personalitatem. Ita Scotus quem sequuntur Vasquez & alii. Prob. 1. Appetitus naturalis alicujus rei etiam in secundo sensu consideratus, subsistit, donec gaudeat bono, ob quod ab auctore naturæ inditus est: sed appetitus humanitatis Christi ad propriam personalitatem, est inditus ab auctore naturæ ob suppositum aut personalitatem creatam: ergo donec gaudeat propria personalitate creata, habet appetitum innatum ad illam: sed humanitas Christi actu unita Verbo non gaudet propria personalitate, aliàs in Christo essent duæ personæ, quod est falsum: ergo

ergo habet actualem inclinationem ad propriam personalitatem . 2. Appetitus naturalis humanitatis Christi ad propriam personalitatem, est actualis & proxima potentia ad ipsam, aut capacitatem habendi propriam personalitatem : sed humanitas Christi unita Verbo habet naturalem capacitatem & potentiam proximam habendi propriam personalitatem . Tum quia personalitas Verbi est ipsi aliena. Tum quia si à Verbo dimitteretur, statim resultaret propria & connaturalis subsistentia: ergo humanitas Christi ut unita Verbo, manet cum actuali inclinatione ad propriam personalitatem .

Resp. Gonet. appetitum innatum esse capacitatem aut potentiam habendi perfectionem, qua natura actu caret tam in se, quàm in alio, quod suppleat perfectiori modo defectum illius; unde (inquit) cum humanitas Christi unita Verbo, non sit in carentia propriæ personalitatis, tam in se quàm in alio supplente defectum illius, quia habet personalitatem Verbi quæ est perfectior, sequitur, quòd non habet capacitatem nec potentiam in actu secundo, ad propriam personalitatem .

Contra : In natura humana datur duplex potentia, obedientialis scilicet & innata : certum enim est, quòd inclinatio quam natura nuda habet ad propriam personalitatem, non est illa quam habet ad personalitatem Verbi: ergo licet habeat personalitatem Verbi satiantem & complementem potentiam obedientialem, semper remanet cum actuali inclinatione ad perfectionem naturalem, potentiam aut capacitatem innatam satiantem & complementem, quia personalitas divina supplens defectum personalitatis propriæ, non satiat inclinationem naturalem, nec tollit exigentiam ad propriam personalitatem, sed tantum indigentiam & necessitatem . *Præterea*, appetitus innatus naturæ nõ appetit actu res perfectiores ut tales, aliàs natura humana natural-

aturaliter appeteret personari personalitate Verbi, sed appetit res sibi naturaliter debitas ut tales : ergo licet unita Verbo, habeat perfectiorem personalitatem, semper remanet cum inclinatione naturali ad personalitatem sibi debitam : nam si lapis nitente divina virtute detineretur sursum & ibi requiesceret, semper centrum naturale actu appeteret.

Obj. 1. Gonet. Potentia perfecta & completa per actum & formam perfectiorem, & eminenter formaliter continentem perfectionem alterius actus vel formæ imperfectioris, non habet naturalem appetitum ad illum actum vel formam minus perfectam; sed humanitas Christi assumpta à Verbo, completur & perficitur per subsistentiam increatam & infinitam Verbi divini, eminenter formaliter continentem totam perfectionem propriæ personalitatis : ergo humanitas Christi, ut completa illa divina personalitate, non amplius appetit subsistentiam propriam & connaturalem. Minor est evidens. Major prob. Tum quia potentia non inclinatur ad aliquem actum & formam, nisi ut ab illa perficiatur, compleatur & actuetur : ergo si potentia completa per actum vel formam nobiliorem, & eminenter formaliter continentem perfectionem alterius, majorem ab illo recipiat perfectionem & actualitatem, quam reciperet ab actu vel forma imperfectiori, non habet rationalem inclinationem ad illum actum vel formam imperfectiorem. Tum etiam quia si potentia completa per actum perfectiorem & nobiliorem appeteret naturaliter imperfectiorem, ille appetitus naturalis fertur in malum ut sic, quia minus bonum & minus perfectum habet rationem mali respectu melioris & perfectioris.

Addo (inquit) quod quælibet inclinatio est satiata & perfecta, quando attingit aliquid continens eminenter formaliter suum terminum ;

ergo

ergo tunc non habet naturalem appetitum ad actum vel formam inferiorem. Consequentia patet, antecedens verò variis exemplis declaratur: In primis enim videmus appetitum naturalem hominis perfectè satiari per beatitudinem supernaturalem, nec desiderare naturalem, quando supernaturalem possidet, quia scilicet beatitudo supernaturalis eminentissimo modo continet totam perfectionem beatitudinis naturalis. Secundò, unusquisque appetit naturaliter acquirere scientias omnium rerum, si tamen alicui concederetur rerum omnium scientia infusa & beatifica, non haberet ampliùs appetitum scientiæ acquisitæ. Tertiò, si esset aliqua forma quæ containeret omnes perfectiones omnium formarum corruptibilium, tunc materia informata tali forma plenè satiaretur, nec alias appeteret; & si esset aliquid continens quidquid est in centro respectu lapidis, lapis in illo existens quiesceret sicut in centro, nec deorsum gravitaret: ergo quælibet inclinatio est satiata & perfecta, quando attingit aliquid continens eminenter formaliter suum terminum.

Resp. distinguendo majorem: Potentia perfecta & completa per actum & formam perfectiorem, & eminenter formaliter continentem perfectionem alterius actus vel formæ imperfectioris, non habet naturalem appetitum ad illum actum vel formam minùs perfectam, dum potentia tendit naturaliter ad illam formam perfectiorem sicut ad minùs perfectam, & illa forma perfectior vice versa ordinatur ad potentiam, sicut forma minùs perfecta, concedo majorem: secùs autem, nego, & concessa minori, nego consequentiam: quia humanitas Christi non tendit secundum potentiam merè naturalem ad personalitatem Verbi, sed secundum potentiam obedientialem: ergo quamvis sit perfectior, & perfectiones personalitatis propriæ contineat, nihilominùs humanitas proprio  
& con-

& connaturali bono privata manet. Ad 1. prob. majoris, nego consequentiam, quia potentia inclinatur ad formam pondere naturali, unde dum actuatur & perficitur per formam ad quam inclinatur, & cui unitur per potentiam obedientialem & à Deo supernaturaliter agente elevatam, ut contingit humanitati Christi, potentia semper remanet naturali pondere ad connaturale complementum & ad debitam formam inclinata. Ad 2. prob. nego sequelam, cum falsum sit, ut patet in tract. de actibus humanis, minus bonum & minus perfectum habere rationem mali.

Ad additum pariter dico, quòd quælibet inclinatio est satiata & perfecta, quando attingit aliquid continens eminenter formaliter suum terminum; quando attingit illud secundum naturale pondus, non verò dum attingit illud ex vi agentis aut ponderis alterius ordinis: quia inclinatio naturalis remanet ad proprium finem conversa, cum ab ipso averti nequeat nisi per adeptionem ejusdem. *Ad primum exemplum*, dico, quòd Deus est finis naturalis hominis, & finis supernaturalis, & sic per beatitudinem supernaturalem appetitus naturalis hominis perfectè satiatur, nec desiderat alium finem naturalem, quia Deus est uterque finis; at licet personalitas Verbi divini contineat eminenter personalitatem propriam seu creatam, tamen non est propria, nec creata: ergo humanitas Christi unita Verbo, semper remanet averfa à proprio bono entitativè sumpto; idcirco semper appetit illud in actu secundo. *Ad secundum*, dico, quòd non valet, quia homo naturaliter appetit scire & cognoscere, sed non appetit modum sciendi nec habendi scientias, & consequenter dum scit satiatur, sive sciat per laborem, sive per infusionem, sive per unum habitum scientiæ, sive per plures: At humanitas Christi, necdum appetit naturaliter personari, sed etiam  
per

per tale suppositum, ad quod habet naturalem convenientiam & proportionem : ergo dum est actu unita Verbo, licet sit personata & subsistat, nihilominus retinet appetitum naturalem ad tale suppositum quo est privata, & ad quod naturaliter determinatè & specialiter tendit.

*Ad tertium*, dico, quòd non valet, quia materia informata forma continente perfectiones omnium formarum corruptibilium, adhuc alias appeteret; quoniam appetit omnes formas in ordine ad compositum, & consequenter cum informata tali forma etiam faceret compositum sicuti faceret cum aliis, semper appeteret alias licet esset actuata, & perfectius compositum simul cum tali forma efficeret. Idem dico de lapide, si esset extra centrum, qui semper gravitaret actu & tenderet ad proprium centrum : ergo quamvis humanitas Christi unita personalitati divinæ, subsistat & personetur perfectè, cum non subsistat nec personetur juxta inclinationem à natura inditam, semper appetit sic & connaturali modo personari.

Obj. 2. Si enim humanitas Christi naturaliter appeteret propriam subsistentiam, etiam appeteret naturaliter separationem sui à Verbo, quandoquidem eam habere non posset, nisi dimitteretur à Verbo, cum personalitas increata & creata simul eandem naturam terminare nequeant. Sicut si lapis naturaliter appetit locum deorsum, necessariò etiam & naturaliter appetit recedere à loco sursum, eò quòd simul in centro & in loco sursum existere nequeat. Item humanitas Christi pateretur violentiam in Verbo, quia privaretur illo quod naturaliter appetit; appetitus autem naturalis frustratus, violentiam patitur.

Resp. negando antecedens; quia humanitas Christi non appetit propriam personalitatem appetitu elicto & efficaci, qualis requiritur ut appetendo propriam personalitatem, appetat sepa-



separationem à Verbo : nam materia appetitum innato appetit formas quas non habet, tamen non appetit destructionem formæ quam habet, quia, ut dicunt Philosophi, appetit appetitum innato & desiderii : Idem dico igitur de humanitate Christi. Nec patitur violentiam, quia violentia aut appetitus frustratus provenit à forma opposita, vel à carentia simpliciter formæ; sed humanitas Christi non informatur forma opposita, nec remanet informis simpliciter : ergo nullam violentiam patitur, licet naturaliter desideret propriam personalitatem.

Accidens Eucharisticum, seu separatum à subjecto, existit perfectiori modo, quam si inhaereret subjecto; tamen appetit inhaerentiam quando separatum est, licet nullam patiatur violentiam : intellectus etiam in patria, qui videt Deum in se, appetit adhuc cognoscere illum connaturali modo, scilicet ex effectibus, nullam tamen patitur in se violentiam; quia forma quam habet, modo perfectiori complet & satiat, sed non exhaurit inclinationem seu modum connaturalem; ac proinde humanitas Christi retinet appetitum innatum ad subsistentiam connaturalem, licet subsistat modo perfectiori : aliud quippè est perfectius, & aliud connaturalius, & licet illud expellat istud in actualitate aut exercitio, ita ut illo posito, sæpè non ponatur istud; nunquam tamen expellit illud quantum ad inclinationem & appetitum subjecti : qua de causa res perfectiores & ordinis altioris, dum adveniunt, connaturali non adveniente, dicuntur vices gerentes aut supplentes, ut agnoscatur, naturales esse proprias, debitas & appetitas à subjecto, quia gerere vices alterius, est gerere vices alterius debiti & necessarij, necessitate rei exigentis aliquo titulo præsentiam illius, cujus vices geruntur. Idcirco humanitas Christi in qua persona Verbi gerit vices personalitatis humanæ,

næ, habet appetitum ad ipsam substantiam humanam, quæ debetur illi, estque illi connaturalis. Natura secundum appetitum innatum præfert supernaturalibus naturalia, cum quibus habet naturalem proportionem; & maiorem convenientiam ab intrinseco & naturaliter.

## Q U Æ S T I O V.

*An Verbum divinum ad suam substantiam, sanguinem, aliosque humores corporis Christi assumpserit?*

**D**ico, quòd sanguis corporis Christi hypostatice Verbo divino unitus est, sive ad ejus substantiam assumptus. Prob. 1. Verbum assumpsit immediate perfectum & integrum corpus humanum: ergo assumpsit immediate sanguinem. Antecedens patet, consequentia prob. Sanguis pertinet ad integritatem & perfectam consistentiam corporis: ergo fuit immediate assumptus. Prob. antecedens 1. Remoto sanguine, corpus humanum non est essentialiter substantialiter perfectum: ergo pertinet ad perfectionem & integritatem corporis. 2. Anima exercet in corpore plures operationes vitales mediante sanguine, ut patet in motibus iræ, timoris, gaudii: irascimur enim dum sanguis fervet, timemus dum contrahitur, & gaudemus dum diffunditur: ergo pertinet ad integritatem & perfectionem essentialem corporis. 3. In die judicii corpora resurgent cum sanguine, ut docent omnes Theologi: ergo est de integritate corporis; nam si esset purum alimentum corporis, non verò de constitutione naturæ humanæ, nec de integritate corporis, non resurgeret, quia corpora gloriosa non indigent alimento.

Confirm. Redemptio hominum tribuitur sanguini Christi: ergo spectat ad integritatem corporis, & est immediatè unitus Verbo. Antecedens patet, 1. Joan. 1, *Sanguis Iesu Christi Filii ejus emundat nos ab omni peccato*, Et ad Ephes. 1. *In quo (scilicet in Christo) habemus redemptionem per sanguinem ejus*, Nec valet dicere, quòd redemptio tribuitur sanguini, quia à persona Christi effusus est, & unitus Verbo mediatè: Non valet, inquam, quia sequeretur, quòd pretium salutis nostræ conveniret lacrymis, cum à persona Christi proveniant, & Verbo mediatè uniantur. Consequentia verò prob. quoad 1. partem: Verbum assumpsit corpus mortale & passibile, ut per mortem crucis homines redimeret: ergo sanguis quem Christus pro salute nostra obtulit, est pars hujusmodi hostiæ, & ad integritatem corporis assumpti spectat, Prob. quoad 2. partem, Clemens VI. in extravag. *Unigenitus* sancit unam guttam sanguinis Christi propter unionem ad Verbum esse sufficientem pro redemptione totius generis humani: ergo est immediatè unitus Verbo,

Prob. 2. Verbum divinum ponitur sub speciebus panis ex vi verborum, *Hoc est &c.* Ratio est, quia Verbum est immediatè unitum corpori; sed idem Verbum ponitur sub speciebus vini ex vi verborum, *Hic est enim calix sanguinis &c.* ergo Verbum debet esse immediatè unitum sanguini sicut corpori; aliàs poneretur sub speciebus vini per concomitantiam, seu ratione corporis cui esset unitum, sicut sanguis per concomitantiam ponitur sub speciebus panis, seu ratione corporis cui unitur; & corpus sub speciebus vini ratione sanguinis cui unitur, quod est falsum: ergo sanguis unitur Verbo immediatè sicut corpus.

Dices 1. Sub speciebus panis ponitur ex vi verborum idem corpus integrum quod Verbum assumpsit; sed ex vi verborum sub specie-

ciebus panis non ponitur sanguis, sicut ponuntur corpus, manus &c. ergo sanguis non est pars corporis Christi à Verbo immediate assumpti. Resp. distinguendo majorem; Sub speciebus panis ponitur ex vi verborum idem corpus integrum, quantum ad ea quæ spectant ad primariam integritatem & constitutionem corporis, concedo; quantum ad ea quæ spectant ad integritatem operationis, & constitutionem secundariam, nego majorem, & concessa minori, nego consequentiam; quia sanguis, licet non sit pars integralis corporis in primaria constitutione sicut caput, manus & aliæ partes solidæ, tamen est pars integralis integritate operationis. Tum quia est pars humanitatis. Tum quia requiritur, ut corpus vita perficiatur. Tum quia est id quo mediante anima exercet operationes vitales: ergo est pars corporis assumpti, licet non ponatur sub speciebus panis ex vi verborum, sicut caput. Ratio hujus discriminis est. 1. Quia Verbum divinum assumpsit corpus humanum, ut esset homo sicuti cæteri homines (absque peccato) ideòque assumendo corpus, assumpsit sanguinem; at in Eucharistia instituit sacrificium & Sacramentum, in memoriam Passionis & crucis, in qua sanguis fuit à corpore separatus; ideòque dum corpus ponitur ex vi verborum *Hoc est &c.* sub speciebus panis, non ponitur sanguis nisi per concomitantiam. 2. Quia illa verba consecrationis significant corpus Christi per modum cibi; & verba consecrationis, *Hic est enim calix &c.* significant sanguinem per modum potus: ergo.

*Dices* 2. Si Verbum divinum assumpsisset immediate sanguinem, sequeretur 1. quòd assumpsisset duas naturas. 2. quòd Verbum per communicationem idiomatum posset dici sanguis; sed utrumque est falsum. Resp. negando utramque sequelam majoris. 1. Quia san-

guis & corpus non sunt duæ naturæ in humanitate, absolutè & simpliciter loquendo, cum corpus & sanguis ordinentur ad integram & completam humanitatem constituendam: nam ex adversariis, Verbum assumpsit corpus & animam rationalem; tamen non assumpsit duas naturas, quia corpus & anima ordinantur ad hominem; ita similiter non assumpsit duas naturas, licèt assumpserit corpus & sanguinem, quia ordinantur ad integram constitutionem naturæ humanæ. 2. Quia communicatio denominationis non desumitur à partibus, aliàs Verbum diceretur anima, corpus, manus, pes &c. quod tamen non licet ex communi usu Doctorum: ergo Verbum non debet dici sanguis sicut homo, nec sicut caro; quia homo aut caro est natura integra, & sanguis est pars humanitatis aut naturæ.

*Dices:* Verbum non assumpsit, quod semel dimisit, juxta illud vulgare D. Damas. effatum, *Quod semel assumpsit, nunquam dimisit*: sed aliquando dimisit sanguinem, ut patet ex Bulla Pii II. ad Abbatem S. Mariæ Xantonensis Diœcesis, ubi summus Pontifex dicit, veritati fidei non repugnare, asserere Redemptorem nostrum de sanguine effuso in cruce, ob ipsius Passionis memoriam, partem aliquam in terris reliquisse: ergo non assumpsit sanguinem. Resp. concessa minori, ut patet in spina sacelli Regii Parisiensis, in ferro lanceæ Romæ asservato, in sacra sindone Taurinensi, in ampulla vitrea S. Mariæ Magd. apud S. Maximinum in Gallo Provincia; majorem esse falsam. Ad illud D. Damas. dico intelligendum esse de partibus integris, adæquatè sumptis, seu de toto sanguine; & solidis, non de partibus fluidis & quæ non sunt absolutè necessariæ ad integritatem physicam & primariam corporis humani, quales sunt aliquæ guttæ sanguinis, quæ servantur in terris, quas non reassumpsit resurgendo, quia ad integritatem corporis minime sunt necessariæ. Idem dico de præputio, quod

quod si apud nos adhuc remaneat, non est hypostaticè unitum Verbo divino, ut existimant plures Doctores.

Ex dictis inferes 1. Verbum assumpsisse immediatè pituitam, choleram, melancholiam & phlegmam, spiritus vitales & animales. Tum quia sunt de integritate hominis, & ad veritatem corporis humani pertinent sicut sanguis. Tum quia commiscantur cum vero & proprio sanguine. 2. Verbum hypostaticè assumpsisse immediatè dentes, ungues & capillos, ut tenent Mastrius, Delgadillo & alii. Tum quia Scôtus in 3. dist. 6. q. 1. loquitur de his partibus, sicut loquitur de carne ipsa. Tum quia spectant ad integritatem & perfectionem naturæ assumptæ, qua ratione in sententia omnium Theologorum homines resurrecturi sunt cum capillis & unguibus. Tum quia non solum serviunt ad ornatum, sed etiam habent specialia munera in corpore, & ad debitam aliarum partium conservationem requiruntur. 3. Inferes Verbum non assumpsisse hypostaticè lacrymas, sudorem, salivam & alias superfluitates & excrementa humani corporis; quia sunt excrementa quæ ad integritatem aut perfectionem ejus non pertinent.

Nec pertinent, seu nec conferunt ad finem incarnationis, nempe hominum salutem; & consequenter non est ratio, ob quam partes illæ excrementitiæ fuerint assumptæ immediatè à Verbo divino: nam Filius Dei assumpsit id, quod assumpsit, immediatè, ut esset verus homo, & factus est homo, ut homines redimeret, & consequenter assumpsit immediatè id quod pertinet ad integritatem humani corporis, & confert directè vel indirectè ad finem incarnationis, nempe ad hominum salutem.



## DISPUTATIO IX.

*De ordine assumptionis.*

**E**Xaminatis unionis hypostaticæ extremis, nimirum persona assumente & natura assumpta, modo examinandus est assumptionis ordo.

## QUÆSTIO I.

*An prius fuerint assumptæ partes humanitatis, quàm tota humanitas, & anima Christi prius fuerit unita Verbo, quàm corpus?*

**D**ifficultas non est de prioritate temporis, sed de prioritate naturæ secundum ordinem executionis: certum enim est 1. quòd in eodem instanti temporis assumpsit corpus & animam. 2. quòd ordine intentionis prius assumpsit naturam, quàm partes. Unde

Dico 1. Quòd ordine executionis prius natura fuit assumpta à Verbo humanitas, quàm partes. Prob. 1. Verbum primò & immediatè unitur humanitati: ergo prius natura assumpsit humanitatem, quàm partes. Consequentia patet; nam ordo assumptionis idem est ac ordo unionis hypostaticæ; & assumptio humanitatis à Verbo, nihil aliud est, quàm unio humanitatis cum Verbo. Antecedens verò prob. 1. Verbum incarnatione primò & immediatè est homo,

mo, & econverso. Tum quia prædicatio, *Deus est h mo*, est immediata & primaria. Tum quia colligitur ex Symb. Athanas. *Sicut anima & caro unus est homo, ita Deus & homo unus est Christus*: Unde sicut anima unitur immediate & primario carni, & caro animæ; ita divinitas unitur in persona Verbi primo & immediate humanitati & humanitas divinitati: ergo Verbum primo & immediate unitur humanitati, & consequenter prius natura assumpsit humanitatem, quam partes. Prob. 2. principale antecedens: Verbum divinum unitur primo & immediate illi, quod primo terminabile erat; assumpsit enim naturam humanam juxta dispositiones & exigentiam ejusdem naturæ: sed humanitas est prius terminabilis, quam partes: ergo Verbum prius natura unitur humanitati, seu prius assumpsit humanitatem.

Prob. minor 1. Verbum divinum terminavit naturam in ratione personæ: ergo prius terminavit, quod erat personandum & complendum; sed humanitas erat personanda & complenda; animæ erat completa in ratione animæ, & corpus in ratione corporis; præterea, corpus completur per animam, ideoque humanitas sola erat personanda & complenda, ut resisteret homo completus: ergo prius natura terminavit & assumpsit humanitatem, quam partes. 2. Partes dependent dependentia totius, & præcipue apud Thomistas qui subsistentias partiales non dari contendunt; idcirco subsistunt subsistentia totius: ergo Verbum, quod gerit vires subsistentiæ totius, prius natura terminat dependentiam humanitatis. 3. Verbi personalitas non sustentat nec personat partes, ut sustenter & personet humanitatem; in triduo enim sustentabat partes, & non sustentabat totum, nec erat homo; sed econtra sustentat & personat humanitatem, ut sustenter & personet partes, & ut sit homo: ergo subsistentia pri-



inò debetur humanitati, & consequenter humanitas priùs natura fuit assumpta, quàm partes. 4. In illo instanti naturæ, in quo Verbum assumpsit naturam humanam, subsistentia deficiebat primò humanitati. Tum quia eam exigebat ratione sui, partes verò ratione humanitatis. Tum quia subsistentia quam Deus impedivit, erat subsistentia humanitatis: ergo subsistentia Verbi fuit priùs natura communicata humanitati.

Dico 2. Verbum divinum priùs natura assumpsisse animam quàm corpus. Hæc conclusio est communis: Verbum enim priùs natura unitur animæ, quàm corpori, quia D. August. Damas. Nazian. dicunt Verbum assumpsisse corpus media anima, seu per animam: ergo priùs assumpsit animam quàm corpus. *Deinde*, anima est medium quo assumptionis corporis, ut patet apud Theólogos nostros: ergo est priùs natura assumpta.

Obj. 1. Gonetius: Eodem modo communicata fuit subsistentia divina (mediate qua facta fuit assumptio) toti humanitati & ejus partibus, quo eis convenit subsistentia humana eis conaturalis; sed subsistentia humana in ordine executionis priùs natura convenit animæ rationali, deinde corpori cui unitur per informationem, & denique toti humanitati ex utroque resultanti: ergo ordine executionis priùs natura fuerunt assumptæ partes humanitatis, quàm tota humanitas. Major patet; nullum enim est fundamentum invertendi in assumptione humanitatis ad Verbum, modum & ordinem naturalem, cum non sint multiplicanda miracula sine necessitate, & gratia non minùs abhorreat à superfluo, quàm natura. Minor verò prob. ex D. Thom. 1. p. q. 76. art. 1. ad 5. & de spiritualibus creaturis art. 3. ad 3. cujus verba brevitate gratia omitto. Ratio etiam id suadet, nam anima rationalis fit per creationem: ergo  
per

per illam accipit esse subsistentiæ, & non per generationem; sed per hoc quòd unitur corpori, non amittit illud esse, aliàs frustra produceretur à Deo per creationem: ergo priùs natura subsistit, quàm uniatur corpori, subindeque priùs natura illi convenit subsistentia, quàm toti humanitati.

Resp. concessa minori, negando majorem: Magnum siquidem est fundamentum subvertendi in assumptione humanitatis ad Verbum, modum & ordinem naturalem quem in communicatione subsistentiæ natura servat. 1. Quia in generatione partes necessariò præcedunt totum ut *quod*, seu sunt causa productiva totius, ideoque priùs natura subsistunt; cùm si non subsisterent, nunquam totum resultaret nec subsisteret; at in assumptione, partes non sunt medium *quod*, nec causa per quam totum est assumptibile, aliàs Verbum non potuisset de potentia absoluta priùs natura assumere totum quàm partes, quod est improbable; nam in eodem signo in quo Verbum assumpsit partes, totum erat assumptibile: ergo est fundamentum subvertendi modum. 2. Subsistentia naturalis resultat ex re cujus est; subindeque cùm partes præcedant totum, priùs subsistunt: at subsistentia divina provenit ab extrinseco: ergo non servat ordinem subsistentiæ naturalis, sed ordinem sibi convenientem; unde cùm Verbo primò conveniat humanitas, priùs natura assumpsit humanitatem, quàm partes. 3. Actio assumptiva humanitatis debet incipere ubi desinit actio causativa ejusdè. Tum quia partes includuntur in humanitate assumenda, ideoque assumens non potest assumere partes inclusas, nisi consequenter ad humanitatem partes includentem: nam qui sumit ignem v. g. priùs accipit calorem, quàm ignem, & priùs ignem seu compositum, quàm materiam & formam: qui destruit, priùs destruit totum, quàm partes.

Tum quia actio causativa agit, ut res sit & existat, ideoque incipit per ea quæ rem ab intrinseco & essentialiter constituunt; at actio assumptiva non agit, ut res sit, cum ipsam supponat; sed ut subsistat: ergo non incipit, ubi incipit actio causativa, sed ubi desinit, cum actio extrinseca qualis est assumptiva, ad interiora perveniat per exteriora: ergo subsistentia divina non fuit communicata humanitati eodem modo quo communicata fuisset subsistentia connaturalis.

Obj. 2. Per animam rationalem constituitur humanitas in esse humanitatis, & consequenter in esse assumptibilis: ergo est medium quo humanitas fuit assumpta à Verbo, quàm tota humanitas. Similiter corpus est causa materialis constituens humanitatem: ergo est etiam medium quo tota humanitas unitur Verbo divino. Prob. consequentia: quod enim constituit humanitatem in ratione totius, reddit eam in suo genere aptam, ut completè subsistat: ergo etiam ut aliena subsistentia personam constituyente terminari possit.

Resp. argumentum non militare contra nos, quia non probat Verbum priùs natura assumptisse partes ut *quod* quàm totum, ut contendit conclusio nostra; sed probat partes esse medium *quo* assumptionis totius humanitatis, quod certissimum est apud omnes: nam anima est causa, cur humanitas sit assumptibilis, sed non est causa priùs assumpta à Verbo, nec in ipso priùs subsistit, licèt reddat humanitatem aptam, ut completè subsistat.

Obj. 3. Ordo intentionis & ordo executionis in essentialiter subordinatis (qualiter sunt partes & totum) opposito modo se habent, ita ut, quod est primum in intentione, sit ultimum in executione, & e contra: ergo cum in intentione priùs sit assumpta humanitas, quàm ejus partes, in executione priùs assumptæ sunt ipsæ partes, quàm tota humanitas. Resp. argumentum esse

verum in ordine causalitatis, & falsum in ordine assumptionis, ut patet ex responsione ad primum argumentum.

*Dices* contra secundam conclusionem: Verbum non assumpsit corpus mediante anima: ergo non assumpsit prius naturam animam, quam corpus. Consequentia patet, quia posterius assumitur mediante priori; ideòque si corpus non fuerit assumptum mediante anima, sequitur ipsum Verbum non assumpsisse prius naturam animam, quam corpus. Probatur igitur antecedens: Si Verbum divinum assumpsisset corpus mediante anima, sequeretur, quòd hoc ipso, quòd per mortem separata fuisset anima à corpore, dissoluta fuisset unio ipsius corporis cum Verbo; deficiente enim medio quo unum unitur alteri, deficit etiam unio cum eodem, sicque deficiente unione animæ cum corpore, deficeret unio Verbi cum corpore cui unitur mediante anima unita corpori; sed hoc est falsum: quod enim fuit à Verbo semel assumptum, nunquam fuit dimissum; ergo, &c.

Respondeo negando antecedens: nam anima est causa, cur corpus est assùptibile à Verbo divino ex vi præsentis decreti: & nego sequelâ. Tum quia ut ex separatione unius ab alio, sequatur separatio alterius, seu ex separatione animæ à corpore, sequatur separatio Verbi ab eodem corpore, requiritur, quòd corpus fuerit assumptum mediante ipsa anima ut medium quod prius assumptum, non autem ut mediũ quo, in quo sensu anima est medium assumendi corpus. Tum quia licet anima sit causa assumendi corpus, tamen nõ est causa qua mediante conservatur unio Verbi cum corpore: multa enim ab alio dependent in fieri, à quo tamen non dependent in conservari, ut monet D. Thomas: ergo licet Verbum fuerit unitum corpori mediante anima ipsi unita, potuit tamen idem corpus remanere unitum Verbo in triduo, quamvis ab anima separatum.

## Q U Æ S T I O II.

*An gratia habitualis habuerit rationem  
medii, seu dispositionis physica aut mo-  
ralis, ad unionem hypostaticam?*

**D**Ico, quòd gratia habitualis non est me-  
dium disponens humanitatem ad unionem  
hypostaticam. Prob. 1. Omne medium dispo-  
nens, est prius in subiecto, quàm forma seu  
res ad quam disponit; sed gratia habitualis non  
fuit prius in anima Christi, quàm subsistentia  
Verbi; imò nec debuit, nec potuit esse: ergo  
non est medium physicum, nec morale, nec  
congruum ad unionem hypostaticam. Major  
patet. Minor verò prob. 1. Christi anima eo  
naturæ ordine habuit subsistere in Verbo, ait  
Gonet. hic n. 20. ex D. Thoma, quo de se de-  
buisse subsistere propria subsistentia, si ab il-  
lo assumpta non esset; at si assumpta non  
fuisse ad subsistentiam Verbi divini, prius na-  
tura habuisse subsistere sua subsistentia, quàm  
recipere gratiam sanctificantem: ergo anima  
Christi prius natura habuit subsistentiam Ver-  
bi, quàm gratiam sanctificantem. 2. Gratia  
habitualis est principium operandi, cùm, ut di-  
xi in proprio loco, sit indistincta à charitate:  
ergo non potest esse nisi in subiecto, quod sit  
operationis capax. Subsumo: sed nullum sub-  
iectum potest esse capax operationis, quin subsi-  
stat; ut est evidens: ergo humanitas Christi  
prius fuit subsistens subsistentia Verbi qua subsi-  
stit, quàm informata gratia habituali. 3. In  
quolibet subiecto essentialiter & intrinsecè con-  
stituendo, essentialia & substantialia præcedunt  
accidentalia & extranea: ergo subsistentia quæ  
est de constitutivo & complemento substantiali  
huma-


humanitatis, præcedit gratiam quæ accidentaliter perficit. 4. Si gratia habitualis esset prius in humanitate Christi, quam subsistentia Verbi, in illo priori Christus esset Filius adoptivus Dei, cum gratia sit forma adoptionis; sed hoc est falsum: ergo.

*Dices 1.* Subsistentia divina est supernaturalis: ergo nequit communicari humanitati quæ naturalis est, quin prius sit disposita & elevata per gratiam habitualementem, quæ est qualitas supernaturalis. Resp. negando consequentiam; quia quod elevatur ad formam supernaturalem terminativam in ratione sustentantis, & constitutivam in ratione ultimi complementi, non debet prius esse dispositum & elevatum per aliquam dispositionem superadditam, sicut dum elevatur ad formam quæ constituit in ratione operantis: ergo humanitas terminari potest & uniri subsistentiæ supernaturali, quin per gratiam habitualementem disponatur; sed sufficit, quod sit communicabilis & terminabilis.

*Dices 2.* Verbum & humanitas maximè distant: ergo non possunt uniri sine aliquo disponente. Resp. negando consequentiam, quia Verbum & humanitas non uniuntur tanquam actus & potentia, sed tanquam terminans & terminabile, ad quod nulla requiritur dispositio distincta, sicut ad unionem actus à potentia maximè distantis, cum ipsa potentia.

Vel nego consequentiam, quia ut ea quæ maximè distant, uniantur, non egent aliquo disponente ea, sed solum aliquo approximante ea, cum maximè distantium unio, primò & per se exigit approximationem eorundem. Tandem nego consequentiam de gratia habituali; dato enim, quod humanitas aliquam exigit dispositionem, non sequitur tamen ipsam esse gratiam sanctificantem, quia non tollit, nec tollere potest distantiam infinitam quæ est inter humanitatem & divinitatem, subin-

deque gratia non potest esse dispositio illa quam exigit argumentum : ergo nullo modo est dispositio, seu nec physica, nec moralis ad unionem hypostaticam, ut suadet illud Joan. 1. *Vidimus gloriam ejus quasi unigeniti à Patre, plenum gratia & veritatis*, quibus verbis sanctus Joannes significat, quòd Christus habuerit plenitudinem gratiæ, quia erat unigenitus Dei filius, seu gratiam fuisse collatam Christo priùs natura subsistenti, ut inquit Scotus in 3. dist. 2. quæst. 2. §. *quantum ad articulum*. Ergo gratia habitualis existens in anima Christi non fuit dispositio ad unionem hypostaticam.



## DISPUTATIO X.

*De gratia Christi.*

**D**E omnibus divinis charismatibus, eximisque Christi dotibus in hac disputatione agendum est, & primò de gratia. Unde sit.

---

 QUÆSTIO I.

*An humanitas Christi sanctificetur formaliter per aliquod donum substantiale, à gratia habituali distinctum?*

**D**Ico, quòd humanitas Christi Domini est grata, & sancta formaliter per gratiam habitualement. Ita Scotus in 3. dist. 10. in fine. Prob.  
 Divi-

Divinitas prout à personalitate distincta virtualiter, non sanctificat formaliter humanitatem Christi: ergo sanctificatur per gratiam habitua-lem. Consequentia est evidens: Nam ex Gonetò hic art. sequenti (quem omittam, quoniam in hac quæstione solvetur) humanitas Christi non sanctificatur à modo unionis, seu per unionem quam aliqui Thomistæ inter humanitatem & Verbum constituunt, nec per personalitatem Verbi, sed per divinitatem, inquit: Unde si antecedens sit falsum, consequentia est evidens. Prob. igitur antecedens. 1. Divinitas est immensa & infinita sicut sancta; sed non reddit humanitatem Christi formaliter immensam nec infinitam: ergo nec formaliter sanctam, cum non sit major ratio. 2. Ut divinitas præstet formaliter humanitati sanctitatis effectum, requiritur, quòd ei ut forma physica uniatur, vel per solam terminationem, ut fatetur Gonet. n. 56. sed divinitas non potest per modum formæ physicæ humanitati uniri; cum physica informatio dicat imperfectionem naturæ divinæ repugnantem, ut fatetur etiam Gonet. Nec per terminationē unitur humanitati, ut existimat & respondet Gonet. Nam ut divinitas per terminationem sanctificet formaliter humanitatem, oportet, quòd eam terminet immediatè & formaliter, aliàs sanctificaret mediatè & identicè, non verò formaliter & ratione unionis cum divinitate, sicut est infinita & ubique ratione termini, non autem ratione alicujus in se existentis: ergo divinitas non sanctificat formaliter humanitatem Christi. 3. Esse formaliter sanctum est esse sanctum intrinsecè: sed divinitas licet terminet humanitatem, est extrinseca respectu ejusdem: ergo non sanctificat formaliter & intrinsecè ipsam; subindeque sanctificatur per aliquid intrinsecè sanctificans, & formaliter in ipsa existens; aliàs anima justì esset sanctior anima Christi, cum esset sancta intrinsecè, & anima Christi extrinsecè:



ex quo sequitur humanitatem Christi per divinitatem esse sanctam personaliter tantum, quia humanitas ex vi unionis hypostaticę præcisè aliquam eximiam acquirit sanctitatem ob intimam & physicam conjunctionem cum Verbi personalitate, quam non haberet purus homo quantumcumque gratia habituali perfusus, non verò formaliter & in ordine ad vitam æternam.

Prob. 2. Effectus formalis & primarius alicujus formæ non potest præstari ab alio quàm ab ipsa forma, cum nihil aliud sit quàm ipsamet forma ut communicata subjecto: sed esse formaliter sanctum est effectus formalis & primarius gratiæ habitualis, ut docent omnes Theologi, juxta Trident. sess. 6. cap. 7. ergo anima Christi non est formaliter sancta per divinitatem, sed per gratiam habitualement.

Resp. Gonet. concessa majori, distinguendo minorem: Esse formaliter sanctum sanctitate accidentali, est effectus formalis gratiæ habitualis, concedit minorem; esse formaliter sanctum sanctitate substantiali, negat minorem & consequentiam: Nam per unionem hypostaticam (inquit) anima Christi non habet, quòd sit formaliter sancta sanctitate accidentali, sed substantiali atque personali.

Contra: Anima Christi non potest formaliter sanctificari sanctitate increata, substantiali, & sanctitate creata accidentali, seu substantialiter formaliter, & accidentaliter formaliter: ergo. Prob. antecedens: quia tota capacitas humanitatis in ordine ad sanctificari, expleri potest per gratiam unionis, substantialiter sanctificantem: ergo tota expletur, nec aliam recipere potest; cum virtus sanctificandi quæ est in Verbo, communicetur humanitati, quantum communicari potest; ideoque si per sanctitatem increatam sanctificetur formaliter & in ordine ad vitam æternam, nequit iterum sanctificari formaliter in ordine ad vitam æternam accidentali sanctitate.

tate. *Deinde*, ex Thomistis, humanitas est infinitè sancta per sanctitatem increatam: ergo nequit per gratiam seu sanctitatem accidentalem sanctificari. Tum quia infinito nihil potest addi. Tum quia sanctificari per sanctitatem increatam, & sanctificari per sanctitatem accidentalem & creatam, sunt in eodem sanctitatis ordine respectu humanitatis; sicut compleri per substantiam increatam, & compleri per substantiam creatam: ergo quemadmodum humanitas per substantiam increatam formaliter completa, nequit compleri per creatam; ita pariter humanitas formaliter & actu sanctificata per sanctitatem increatam, nequit sanctificari per sanctitatem creatam: sed certum est apud omnes Theologos, quòd sanctificatur per gratiam habitualement: ergo non sanctificatur actu & formaliter per gratiam unionis; sed tantum personaliter, quia sanctitas increata substantialiter, formaliter & actu sanctificans, continet sanctitatem creatam seu gratiam habitualement, & sanctificat nobiliori modo: ergo si humanitas Christi sanctificetur formaliter & actu in ordine ad beatitudinem per sanctitatem superiorè seu increatam, superflua est sanctitas creata & inferior.

Prob. 3. Christus quatenus est homo & prædestinatus, convenit univocè cum aliis prædestinatis & sanctis. Tum quia est eorum caput & exemplar, juxta illud ad Rom. *Quos præscivit, & prædestinavit conformes fieri imaginis Filii sui*. Tum quia est beatus formaliter visione beatifica creata, sicut alii sancti & prædestinati: sed alii sancti & prædestinati sanctificantur formaliter & actu per gratiam habitualement, & beatificantur per actum visionis beatificæ & actum fruitionis: ergo Christus est sanctus formaliter per gratiam habitualement, per quam alii sancti sunt, sicuti est beatus formaliter per id per quod alii sunt beati, seu per actus visionis & fruitionis.

Obj.

Obj. 1. Gonetius: Conc. Francfor. (omittit Authoritates D. Thomæ) epist. ad Episc. Hispaniæ ait, *Christus natura unctus, non per gratiam, quia in illo plenè fuit divinitas*. Et Cyril. lib. 4. in Joan. cap. 29. *Christum unctum esse, non sicut alios sanctos & reges, sed quia Verbum caro*. Item Nazian. orat. 36. inquit, *Christus dicitur propter divinitatem, ea enim unctio est humanitatis, non operatione, ut in Christis ceteris, ungens, sed totius ungentis præsentia, cujus hic effectus est, ut id quod ungit, homo nuncupetur, & quod ungitur, Deus fiat*. Et ibidem subdit Christum esse, *Divinitate delibutum, hac enim humanitatis unctio est*. Similiter Damasc. lib. 1. de imaginibus. Demum Germanus Patriar. Constantinop. dicit Christum esse unctum tamquam Regem & Sacerdotem, unctiōe incarnationis; ex quibus locis sic licet arguere: Apud Patres Ecclesiæ idem est esse unctum ac sanctum formaliter, unde Justus, *Christi* vocantur, juxta illud Psalm. 104. *Nolite tangere Christos meos*: sed Christus in quantum homo, est substantialiter unctus à divinitate, quæ, ut ait Nazian. *Humanitatis unctio est*: ergo Christus in quantum homo, est substantialiter sanctus per aliquod donum à gratia habituali distinctum.

Resp. Concilium per *Ly natura* non intelligere naturam esse formalem sanctitatem Christi, sed Christum esse sanctum ab instanti conceptionis, sicut homines dicuntur natura filii iræ, id est, ab instanti conceptionis, non verò per naturam tamquam per formam; & per *Ly non per gratiam*, intelligere Christum non esse sanctum gratis, nec per merum favorem sicut alii sancti, quoniam sanctitas aut gratia sanctificans, Christo erat debita, saltem ex congruentia, ut advertit Boyvinus, quia in illo plena fuit divinitas, quæ cum nequeat sanctificare formaliter, gratiam sanctificantem exigebat in Christo: ergo ex Concilio, Christi humanitas non est for-

## DE INCARNATIONE. 311

maliter sancta per quid distinctum à gratia habituali. Ad SS. Patres dico, quòd non loquebantur de forma qua Christus est sanctus & unctus, sed de modo & gradu, ac si dixissent Christum non esse sanctum sanctitate positiva, quæ sancti operatione transeunt à statu peccati ad statum gratiæ; nec sanctitate mutabili, neque unctum unctione sensibili, veluti Sacerdotes & Reges, sed unctione internæ & invisibilis; ideoque SS. Patres non dicunt humanitatem Christi non esse formaliter sanctam per formam seu gratiam habitualement, qua nos sancti sumus, sed tantum non esse sanctam eodem modo, nec eodem gradu, cum sit sancta per gratiam habitualement à primo instanti conceptionis, ex congruentia &c. *Ad argumentum*, dico esse unctum, dupliciter sumi posse, 1. in ordine ad cultum, 2. in ordine ad vitam æternam, quæ est sanctitas perfecta & consummata: In primo sensu, vasa sacra uncta sunt, B. Virgo uncta fuit etiam, crux &c. In secundo sensu, uncti sunt Filii Dei, seu sancti & iusti dumtaxat. Unde esse unctum in primo sensu, non est esse formaliter sanctum sanctitate, de qua Patres loquuntur: nam si Verbum assumpsisset naturam leonis, illa natura esset uncta, tamen non esset sancta formaliter, sicut Patres sunt sancti. Distinguo igitur minorem: Christus in quantum homo, est substantialiter unctus à divinitate, in ordine ad cultum patriæ, concedo; & sic intelligendus est Nazian. dicens, *Divinitas humanitatis unctio est*: Est unctus in ordine ad vitam æternam, nego minorem & consequentiam; quia esse unctum in hoc ultimo sensu dumtaxat, idem est apud Patres, ac esse formaliter sanctum, & ordinatum ad vitam æternam, cujus semen est gratia.

Obj. 2. Ex vi gratiæ unionis sanctificatur formaliter humanitas Christi; sed gratia unionis est aliquid substantiale, à gratia habituali distinctum: ergo humanitas Christi sanctifica-  
tur

tur formaliter ab aliquo substantiali, distincto à gratia habituali. Minor patet. Major prob. Homo per gratiam habitualement habet, quòd sit formaliter sanctus, quia per illam trahitur ad esse divinum, seu ad participationem naturæ divinæ quæ est ipsa sanctitas per essentiam, & Filius Dei constituitur, & quia gratia habitualis habet repugnantiam cum peccato; at hæc tria multò perfectiùs conveniunt gratiæ unionis: ergo per illam humanitas Christi sanctificatur formaliter. Major patet. Minor verò suadetur quantum ad singulas partes: In primis enim per gratiam unionis, humanitas Christi multò perfectiori modo trahitur ad esse divinum, quàm per gratiam habitualement; nam per illam trahitur ad esse divinum in se, per istam verò trahitur ad esse divinum solùm per participationem. *Deinde*, Christus ut homo, per gratiam unionis fit nobiliori modo Dei Filius, quàm iusti per gratiam habitualement; cum per gratiam unionis Christus sit Filius Dei naturalis, & iusti per gratiam habitualement, Filii solùm adoptivi constituentur. Item unio hypostatica majorem habet impossibilitatem cum peccato, quàm gratia habitualis: ergo &c.

Confirm. Donum in radice continens omnia alia dona ad ordinem gratiæ spectantia, reddit subjectum amicabiliter dilectum à Deo, in quo consistit esse sanctum formaliter; sed gratia unionis est donum humanitati factum, continens omnia alia dona ad ordinem gratiæ spectantia, nimirum gratiam habitualement, virtutes, dona, gloriam &c. cum ex vi illius hæc omnia humanitati Christi sint debita: ergo gratia unionis constituit ratione sui humanitatem Christi sanctam & Deo gratam formaliter.

Resp. negando majorem. Ad cuius prob. concessa majori, distinguo minorem: Hæc tria multò perfectiùs in ordine actus primi & radica-

dicaliter conveniunt gratiæ unionis, quàm gratiæ habitualis, concedo; In ordine actus secundi & formaliter, nego minorem & consequentiam; quia ut gratia unionis formaliter sanctificet, oportet, quòd trahat animam ad esse divinum, constituat hominem Filium Dei adoptivum, & habeat repugnantiam cum peccato in ordine actus secundi; at gratia unionis trahit hominem ad Deum per communicationem idiomatum ob intimam conjunctionem naturæ creatæ cum divina in supposito Verbi; non verò formaliter, ut gratia habitualis: nec constituit hominem Filium Dei naturalem, sed tantum proprium & non extraneum; aliàs Christus in quantum homo reduplicativè, esset formaliter Filius naturalis Dei, quod Gonet. non concedit. Nec opponitur physicè & immediatè cum peccato. Tum quia ex Gonet non est formalis sanctitas. Tum quia est relatio: ergo non convenit gratiæ unionis sanctificare formaliter, licèt effectus gratiæ habitualis ipsi competant nobiliori modo; cùm non sint in eodem ordine, nec in ordine sanctitatis formalis, sed. tantum in ordine sanctitatis personalis, quæ fit per communicationem idiomatum, & per conjunctionem sancti cum non sancto; non verò in ordine sanctitatis formalis quæ fit per formam inhærentem, denominantem, & formaliter intrinsecè constituentem, de qua loquimur, & de qua humanitas Christi est sancta.

Ad confirm. distinguo majorem: Donum in radice continens alia dona ad ordinem gratiæ spectantia, reddit subjectum amicabiliter dilectum à Deo, si sit in subjecto per modum formæ, ipsumque constituat intrinsecè dilectum, concedo; Secùs, nego majorem: Nam ideò sanctitas increata sanctificat Deum, quia inest ipsi intrinsecè per modum formæ seu attributi; & gratia habitualis sanctificat animam, quia inest ipsi intrinsecè per modum formæ

mæ efficientis & perficientis. Unde concessa minori, nego consequentiam; quia gratia unionis non est in Christo per modum formæ: divinitas enim dicitur de humanitate identicè & per communicationem idiomatum: ergo nequit eam sanctificare formaliter, licèt contineat gratiam habitualement & alia dona, cùm non insit humanitati per modum formæ, ut ad sanctificationem formalem requiritur; sed tantùm identicè, terminativè, extrinsecè, & per communicationem idiomatum, quemadmodum infinitas eam infinitizat, supernaturalitas supernaturalizat &c.

Ex dictis *inferes* 1. animam Christi recepisse gratiam in primo instanti conceptionis, ut colligitur ex illo Luc. 1. *Quod ex te nascetur sanctum, vocabitur Filius Dei.* *Inferes* 2. Gratiam habitualement non sequi in Christo ad gratiam unionis tamquam veram passionem illius, per simplicem quandam dimanationem & resultantiam; quia unio hypostatica non est principium formale gratiæ habitualis, cùm habeat esse per creationem. *Inferes* 3. Christum in primo instanti conceptionis ad gratiam habitualement consequendam, per actum liberum se disposuisse. Tum quia humanitas Christi prius natura fuit suppositata, quàm gratia habituali illustrata, ut dictum est suprâ. Tum quia, ut ait Gonet. Angeli acceperunt gratiam habitualement per propriam dispositionem, & ad eam se præparaverunt per actum charitatis quem in primo instanti creationis elicuerunt: ergo idem (inquit) cum proportionem de Christo dicere licebit. *Inferes* tandem gratiam habitualement Christi esse ejusdem speciei cum nostra. Tum quia caput & membra debent informari forma ejusdem rationis: ergo cùm nos simus membra Christi, habemus cum ipso eandem specificè gratiam. Tum quia Christus est nobis similis in omnibus absque peccato: ergo gratia qua est sanctus, est ejusdem speciei cum nostra.

Tum

Tum denique quia gratia habitualis est participatio divinæ naturæ, cujus consortes nos efficit, ut dictum est in proprio loco: ergo debet esse una specificè in Christo, qui est Sanctus Sanctorum & caput prædestinatorum, & in nobis qui sumus ejus membra, cum quibus habet conformitatem in ratione sanctificantis. Antecedens est certum, consequentia etiam patet: nam natura divina est omnino una, ac proinde ipsius participatio, videlicet gratia habitualis, debet etiam esse una in omnibus Justis, qui in sacris paginis vocantur Dii.

*Instabis:* Ergo Christus non est justus formaliter per gratiam habitualement, nec sanctus, sed per divinitatem, quia est Deus per essentiam, non verò per participationem ut Justi: Neque instantiam: quia Christus est Deus per essentiam ratione substantiæ, & naturæ divinæ sibi communicatæ, & similiter per participationem ratione gratiæ habitualis: nec implicat hoc, cum sit Deus & homo simul. Unde anima Christi non potest esse sancta formaliter per substantiam & naturam divinam sibi communicatam, quia sanctificari formaliter, est sanctificari per formam intrinsecè inexistentem; sed per gratiam habitualement, quæ est forma intrinsecè existens in anima Christi: Fateor tamen, quod ipsa anima Christi est personalitè sancta per substantiam Verbi, seu quia subsistit in supposito divino, quod cum sit formaliter, intrinsecè & essentialiter sanctum, sanctificat humanitatem personaliter & fundamentaliter, non autem formaliter. Tum quia, ut jam dixi, non est forma respectu humanitatis. Tum quia humanitas non petit sanctificari formaliter per substantiam increatam, nec per aliquid increatum.



## Q U Æ S T I O II.

*Ad quid in Christo gratia habitualis necessaria fuerit?*

**D**ico 1. quòd gratia habitualis fuit etiam necessaria in anima Christi, ut connaturaliter actus supernaturales eliceret. Tum quia gratia habitualis, cum à charitate habituali omninò indistincta sit, est principium operandi supernaturaliter: ergo ut voluntas Christi eliciat connaturali modo actus supernaturales, indiget gratia quæ est principium operandi supernaturaliter. Tum quia anima Christi cum sit expectativè naturalis, non est inclinata ad actus supernaturales: ergo ut ad illos inclinetur, illosque connaturaliter eliciat, indiget principio supernaturali, nempe gratia.

*Dices 1.* Gratia actualis sufficit, ut anima elevetur connaturaliter ad actus supernaturales, ut patet in actu contritionis à peccatore elicto: ergo anima Christi non indigebat gratia habituali. *Resp.* negando antecedens: Verum etenim est, quòd gratia actualis sufficit, ut actus supernaturalis fiat; sed non sufficit, ut fiat connaturaliter. Ratio hujus rei est, quia nullum principium inclinatur connaturaliter ad suum effectum, nisi præter actualem motionem, inclinetur per aliquam formam in se permanentem, vel residentem: ergo voluntas Christi, ut actus supernaturales eliceret connaturaliter, indigebat gratia habituali.

*Dico 2.* Quòd gratia habitualis necessaria fuit in Christo ad merendum connaturali modo præmium supernaturale; de potentia tamen absoluta, sine illa præmium supernaturale promereri potuit. *Prob. 1. pars:* Præmium supernaturale non potest dari nisi propter actus super-  
natu-

naturales, cùm præmium & meritum æqualitatem proportionis servant; atqui actus supernaturalis, qui solus meritorius & dignus est præmio supernaturali, non potest connaturali modo produci sine gratia habituali, ut probat conclusio præcedens: ergo gratia habitualis necessaria fuit in Christo ad merendum connaturali modo præmium supernaturale. Prob. 2. pars: Tum quia de potentia absoluta Dei, potest dari meritum de condigno absque gratia habituali: Tum quia ut dictum est in 1. tom. intellectus creatus potest divinitus videre Deum sine lumine gloriæ: Tum quia Deus potest supplere omnem efficientiam causæ secundæ; sed gratia est causa efficiens respectu actus supernaturalis producti: ergo &c.

*Dices* 2. Nullus actus humanæ voluntatis Christi potest esse supernaturali præmio dignus, quin sit supernaturaliter vitalis; sed non potest esse sic vitalis sine gratia habituali, quæ est principium vitalitatis supernaturalis: ergo. Resp. nego minorem de potentia absoluta: Nam cùm voluntas sit potentia vitalis, potest per aliquod auxilium supernaturale extrinsecum adjuvari & elevari ad productionem actuum supernaturalium, ut patet in peccatore fideli, qui mediante divino auxilio elicit actus supernaturales, cùm gratia habitualis sit principium intrinsecum & radicale.

*Dices* iterum: Visio beatifica non potest esse etiam de potentia absoluta sine lumine gloriæ: ergo nec actus charitatis sine habitu, seu gratia habituali, quæ, ut in proprio loco dictum est, non distinguitur realiter à charitate. Nego antecedens, ut patet ex dictis in tractatu de visione Dei, & consequentiam. Vel concessio antecedente, nego consequentiam & paritatem: quia visio beatifica est essentialiter permanens & æterna, ideoque indiget habitu aliquo infuso, quo intellectus determinetur

ad eliciendum visionis actum: at charitatis actus non est essentialiter permanens: ergo non exigit essentialiter habitum, ita ut non possit elici de potentia absoluta sine gratia habituali. Hinc est quod gratia habitualis fuit necessaria animæ Christi Domini, nedum ut esset formaliter sancta, ut probat quæstio præcedens; sed etiam ut connaturaliter eliceret actus supernaturales, & ut connaturali modo mereretur præmium supernaturale apud Deum Patrem.

---

### Q U Æ S T I O III.

*An omnes virtutes fuerint in Christo?*

**D**ICO 1. Fuisse in anima Christi Domini omnes virtutes supernaturales & per se infusas, exceptis illis quæ cum statu beatifico repugnant: unde ex moralibus virtutibus, pœnitentia fuit in Christo: & ex Theologicis non fuit fides, nec spes. Prob. 1. pars. Tum quia omnis perfectio naturalis, aut moralis quæ est in beatis, non debuit deesse Christo; sed virtutes morales quæ non repugnant statui beatifico, sunt in beatis: ergo. Tum quia ad gratiam habitualement consequuntur omnes virtutes; *Apud eum, ait Christus de iusto, veniemus, & apud eum mansionem faciemus*; sed gratia habitualis fuit perfectissima in Christo: ergo & virtutes supernaturales & infusæ.

Prob. 2. pars: Pœnitentiæ virtus consistit in actu voluntatis, quo quis vult vindicare peccatum contra Deum commissum, ad compensandam injuriam Deo illatam; cum pœnitere idem sit ac pœnam tenere de peccato commissio:

so : quòd autem peccatum sit commissum ab eo, vel ab alio, non [pertinet ad rationem essentialē] pœnitentiæ, ut ait Scotus. Ratio est, quia pœnitentia est actus iustitiæ vindicativæ, quæ est ad se & ad alterum; non enim implicat, quòd pœnam teneam de malo, quod Petrus commisit, nec quòd peccatum ab ipso contra Deum commissum vindicem: ergo cùm ad pœnitentiam non requiratur necessariò contritio, aut dolor proprii peccati, vel propriæ vitæ, ut existimat Gonet. sed sufficiat, quòd sit alterius, virtus pœnitentiæ est Christo concedenda.

Prob. 3. pars. Tum quia fides ordinatur ad visionem beatificam, cujus vices gerit, juxta illud Pauli 1. ad Cor. 13. *Videmus nunc per speculum in enigmate, tunc autem facie ad faciem*: ergo adveniente visione fides cessat: ergo in Christo in quo fuit visio beatifica, non fuit fides, ut suadet Apost. dicens, *Cùm venerit, quod perfectum est; evacuabitur, quod ex parte est*. Idem dico de spe. Vide suprà in tract. de virtutibus.

Dico 2. Etiam virtutes naturales & per se acquisibiles fuisse in Christo. Tum quia in intellectu humano Christi datur scientia acquisita & naturalis, præter scientiam infusam & beatam: ergo in voluntate præter virtutes infusas & supernaturales, dantur naturales & acquisibiles, ut modo connaturali & proportionato perficiatur. Tum quia virtutes naturales & acquisibiles tendunt ad perfectionem intellectus & voluntatis: ergo. Tum quia Christus elicuit actus naturales erga materias virtutum naturalium: ergo &c.

Dices: Virtutes infusæ ponuntur in potentiis animæ, ut facultatem præstent benè operandi in ordine ad supernaturalia; sed Christi anima hanc facultatem perfectissimè habuit ex unione ad Verbum: ergo virtutes tum infusæ & supernaturales, tum naturales & ac-

quisibiles in Christo sunt superflue. Resp. negando minorem : quia Verbum divinum non unitur potentiis animæ Christi in ratione principii operativi , alioquin videret & amaret intellectu divino & voluntate divina , sicut subsistit subsistentia divina : ergo non habet ex unione facultatem operandi in ordine ad supernaturalia , cum operatio sit actus principii operativi.

Ex dictis inferitur fuisse in Christo magnificentiam & liberalitatem , justitiam vindicativam , eutrapeliam & philotimiam , non verò virtutem piæ affectionis ad credendum . Prob. 1. Liberalitas & magnificentia versantur erga divitias , non solum illas distribuendo , prout quomodo & quando oportet , sed etiam illas penitus contemnendo , ut advertit Gonet. quod Christus fecit , ut in sacra Scriptura patet : ergo habuit liberalitatem & magnificentiam. 2. Illæ virtutes non consistunt in actuali exercitio , sed in qualitate permanente , quæ sit productiva actus liberalitatis & magnificentiæ ; unde pauperes possunt esse liberales : ergo Christus , licet fuerit pauper & obediens , nihilominus fuit liberalis & magnificus .

Patet etiam de justitia vindicativa , ut constet ex illo Joan. 8. in quo legitur Christum dixisse Judæis , *Ego demonium non habeo* ; & in alio loco , ubi legitur Christum ejecisse de templo ementes & vendentes . Patet etiam de eutrapelia , licet circa jocos & ludos versetur , quia Christus jocosum & ludorum exercitium contempsit : ergo eutropeliam habuit , quia hæc virtus non consistit , nec versatur circa jocos & ludos exercendos tantum , sed etiam circa ludos ut contemnendos . Patet etiam de philotimia : nam hæc virtus inclinat appetitum ad parvos honores acceptandos , ut ait Gonet. ex D. Thoma ; sed Christus acceptavit parvos honores de facto , cum turbæ clamaverunt , *He-*

*sanna*

*sanna Filio David, benedictus qui venit in nomine Domini*: ergo proprius actus philotimiæ non repugnabat Christo, sed ipsum aliquando exercuit. Tandem, patet ultima pars; quia pia voluntatis affectio ad credendum, est medium ad fidei actum & motus habitus fidei; sed in Christo nullus est habitus fidei, nullusque actus: ergo nec medium ad actum fidei, seu nec pia affectio ad credendum.

*Quæres*, an Christus virtutes morales per se acquisibiles, propriis actibus comparaverit, vel illas per infusionem acceperit? *Resp.* Omnes virtutes morales per se acquisibiles; Christo fuisse à primo instanti suæ conceptionis infusas. Tum quia Christus in primo instanti conceptionis suæ habuit omnes animæ potentias optimè dispositas in ordine ad finem tam naturalem, quàm supernaturalem: ergo habuit in eodem instanti virtutes naturales, sicut supernaturales; seu acquisibiles, sicut infusas; cum per virtutes naturales & acquisibiles potentie disponantur in ordine naturali, sicut per infusas in ordine supernaturali. Tum quia perfectius est & dignius Christo, habuisse à primo instanti conceptionis virtutes per se acquisibiles, quàm illas decursu temporis suis actibus comparasse, quia comparatio virtutis supponit subiectum in carentia ejusdem; & carentia virtutis, quædam imperfectio est, cum supponat subiectum saltem non perfectum simpliciter: ergo dicendum est Christum habuisse illas virtutes per infusionem, cum Christo concedendum sit id quod est dignius & perfectius.

*Dices*: Si Christus habuisset per infusionem virtutes morales per se acquisibiles, sequeretur quòd voluntas Christi non habuisset vim naturalem acquisitivam virtutum; vel quòd si habuisset, fuisset frustranea: sed utrumque est falsum: ergo habuit virtutes morales per acquisitionem. *Nego* minorem quoad utramque

artem ; nam ut potentia aut virtus aliqua non sit propriè frustranea, sufficit, quòd illustret subiectum, & quòd ipsum subiectum habeat actum ad quem ordinatur, sive sit à virtute existente in subiecto, sive ab alio perfectiori agente, qui infundendo actum, non reddit virtutem inutilem, sed solum suspendit ejus influxum ne producat actum, quem ipse vult infundere.

---

## Q U Æ S T I O I V.

*An in Christo fuerint dona Spiritus sancti, & gratia gratis data?*

**D**ICO 1. In anima Christi Domini fuisse omnia Spiritus sancti dona, quæ sunt Intellectus, Scientia, Consilium, Fortitudo, Pietas, Timor & Sapientia : sed hæc septem dona fuerunt in Christo : *Requiescet super eum*, dicitur Isa. 11. de Christo, *Spiritus Domini ; Spiritus sapientiæ & intellectus ; Spiritus consilii & fortitudinis ; Spiritus scientiæ & pietatis ; & replebit eum timore Domini* : ergo &c. Tum quia dona Spiritus sancti remanent in beatis saltem quoad habitum, & dicunt perfectionem sine imperfectione : ergo fuerunt in Christo. Tum quia anima Christi perfectè movebatur à Spiritu sancto, ut constat ex illo Luc. 4. vers. 1. *Iesus autem plenus Spiritu sancto regressus est à Iordane, & agebatur à spiritu in desertum diebus quadraginta, & tentabatur à diabolo* : ergo dona Spiritus sancti fuerunt in Christo. Tandem, intellectus humanus Christi, dum à Spiritu sancto movetur. 1. Elevatur ad firmiter judicandum de rebus divinis propter rationes supernaturales. 2. Ad penetranda prima principia.

pia. 3. Ad deducendas conclusiones ex primis principiis. 4. Ad judicandum quid hic & nunc agendum sit. 5. Ad Deum heroicè colendum, & proximum sublevandum. 6. Ad difficilia per agenda. 7. Denique inclinatur intellectum, ut se submittat divinę potestati: ergo Christus habuit sapientiam, intellectum, scientiam, consilium, fortitudinem, pietatem & timorem filialem seu reverentialem, non verò servilem, quia timor servilis spectat ad peccatum cavendum propter poenam luendam; Christus autem qui peccare non poterat, nullum timorem servilem habuit, sed habuit timorem filialem & reverentialem, quia affectu reverentię & cultus à Spiritu sancto excitato ferebatur in Deum.

Dico 2. quòd in Christo fuerunt excellentissimè omnes gratiæ gratis datæ: nam ex Eph. 4. habetur, *Unicuique data est gratia secundum mensuram donationis Christi*: Et Joan. 20. *De plenitudine ejus omnes accepimus*: ergo in Christo in quo fuit plenitudo gratiæ, & ad instar aut mensuram cujus Deus dedit nobis gratias, fuerunt omnes gratiæ gratis datæ & gratum facientes. Præterea, D. August. ait, *sicut in capite sunt omnes sensus, ita in Christo omnes gratiæ*. Luc. 4. dicitur de Christo, *Mirabantur in verbis gratiæ, quæ procedebant ex ore ipsius*. Denique, Christus habuit 1. fiduciam impetrandi ac patrandi miracula, ut probat illud Joan. 11. *Ego autem sciebam, quia semper me audis*. 2. Sapientiam, ut patet ex dictis. 3. Gratiā sanctorum & gratiam virtutum: dixit enim paralytico, *Tolle grabatum tuum & ambula*. 4. Interpretationem sermonum, ut constat ex Matth. 5. 12. & 22. Luc. 4. ubi legitur Christum Scripturarum sensum aperuisse. 5. Donum linguarum, discretionem spirituum: cognoscebat enim secreta cordium: donum Prophetiæ, &c.

Dices contra primam conclusionem; Ex do-



nis Spiritus sancti superius enumeratis, quædam sunt quæ includunt imperfectionem; nam consilium importat dubitationem, quia ibi tantum adhibetur consilium, ubi est hæsitatio de eo, quod faciendum est, ac proinde importat imperfectionem. Scientia etiam datur, ut conclusiones deducantur ex principiis, & dependenter ab ipsis: ergo ista duo dona non sunt in Christo. Nego antecedens & ejus probationem, quia consilium præcisè & formaliter sumptum nullam hæsitationem importat in consultante, imò adhibetur, ne eveniat hæsitatio de eo, quod faciendum est. Nego etiam aliam probationem quæ test de scientia; quia non est imperfectio in intellectu humano deducere conclusiones ex principiis, cum natura rei hoc exigat, seu conclusio exigat deduci ex principiis, & intellectus creatus teneatur servare ordinem naturæ.



## DISPUTATIO XI.

*De perfectione gratiæ Christi.*

**V**His gratiæ Christi, veritate, existentia & effectibus, in præsentī disputatione examinandæ sunt proprietates ejus; ideò sit

QUÆ

## Q U Æ S T I O I.

*An gratia Christi habitualis  
infinita sit ?*

**S**upponendum est gratiam Christi tripliciter considerari posse. 1. Ut est accidens seu qualitas physica, & penes ordinem quem dicit ad subjectum in quo recipitur. 2. In esse gratiæ, & penes ordinem ad effectus ad quos se extendit. 3. In esse moris, & secundum valorem & moralem æstimationem quam habet. Difficultas non est in primo sensu, quia omne ens creatum est finitum. Tum quia infinitas entitativa est proprietas entis Dei. Tum quia omnia quæ Deus creavit, sunt finita, ut patet ex illo Sap. 11. *Deus omnia fecit in numero, pondere & mensura*; sed gratia est ens creatum: ergo in ratione entis non est infinita. Unde difficultas est, an sit infinita in ratione gratiæ, & in esse moris considerata, seu secundum quandam dignitatem moralem quam habet à supposito Verbi divini cui conjungitur?

Dico igitur, quod gratia Christi in ratione gratiæ non est infinita, nec in ratione moris considerata. Prob. Si gratia habitualis Christi esset infinita in ratione gratiæ, sequeretur, quod aliqua creatura esset infinite perfecta; sed hoc est falsum: ergo gratia habitualis Christi non est infinita in ratione gratiæ. Minor patet, quia solus Deus est infinite perfectus ut quod & ut quo, cum infinitas formalis & perfectio infinita, soli Deo competant. Major prob. Gratia habitualis (quæ creatura est) dicit in ordine ad operationem, perfectionem simpliciter: ergo si infinita sit in ratione gratiæ, perfectio simpliciter simplex quam dicit, infinita est; idcirco datur in creatura perfectio

simpliciter simplex, quæ est formaliter infinita : sed hoc est falsum ; aliàs gratia habitualis esset formaliter in Deo , in quo formaliter sunt omnes perfectiones simpliciter simplices . 2. Quælibet qualitas habet terminum suæ magnitudinis ; ergo gratia habitualis , quæ in ratione gratiæ & perfectionis est qualitas , habet etiam in ratione gratiæ & perfectionis terminum suæ magnitudinis , & consequenter finita est . 3. Sanctitas increata longè præstantior est omni sanctitate creata , seu gratia habituali ; sed sanctitas increata est infinita ; ergo gratia habitualis Christi in ratione gratiæ & sanctitatis accidentalis , nequit esse infinita , nec infiniti valoris ; aliàs sanctitas increata , non esset in omni sensu nec absolutè præstantior gratia Christi ; cum infinitum excedi nequeat in sensu in quo infinitum est .

*Denique*, conclusio probata manet supra disp. 3. quæst. 3. in qua dictum est , sanctificationem Christi non esse valoris simpliciter infiniti . Tum quia gratia habitualis est principium quo operationum : ergo si gratia esset infinita , opera essent infinitè meritoria : sed hoc non est ; ergo nec gratia est infinita . Tum quia opera licèt sint à persona infinita , tamen sunt finita : ergo licèt gratia valorem suum à Verbo accipiat , est etiam finita . Tum quia Gonetus hic n. 12. probat infinitatem gratiæ habitualis Christi , ex infinitate valoris operationum ejus : ergo si opera Christi sint valoris simpliciter finiti , ut patet suprà , gratia habitualis Christi est etiam finita in ratione moris , seu secundum dignitatem moralem quam habet à supposito Verbi divini cui conjungitur . Tum quia ex Gonetis gratia Christi est infinita secundum valorem & dignitatem quam habet ex persona Verbi , quia ( inquit ) se extendit , aut extendere potest ad effectus infinitos : sed non potest se magis extendere quàm satisfactio Christi-

Christi : ergo si satisfactio ratione extensiv-  
nis & pretii non sit infinita , nec gratia infi-  
nita est .

Obj. 1. Gonetus ex D. Thoma hinc art. 11.  
ex quibus verbis istud argumentum conficit :  
Gratia sub ratione gratiæ pensatur per ordi-  
nem ad effectus ad quos se extendit , vel ex-  
tendere potest ; sed gratia Christi , quantum est  
de se , potest se extendere ad infinitos effectus ,  
nempe ad infinitorum hominum redemptionem  
& sanctificationem , eò quòd in illo gra-  
tia reperiatur tamquam in capite : ergo gratia  
Christi , in ratione gratiæ considerata , infinita  
dici potest ,

Confirm. exemplo quod D. Thom. adducit :  
quia enim lux est in sole , tamquam in universali  
principio quod potest illuminare infinitos ho-  
mines , saltem successivè , & habere omnes effe-  
ctus lucis , in ratione lucis infinita dicitur : ergo  
similiter cum gratia sit in Christo tamquam in  
capite & in universali principio , & possit se  
extendere ad infinitos effectus , & sanctificare  
infinitos homines , si darentur , debet dici infi-  
nita in ratione gratiæ .

Confirm. ampliùs : Gratia data fuit humani-  
tati Christi sine mensura , juxta illud Joan. 3.  
*Non ad mensuram dat Deus spiritum filio : &*  
*aliis ad mensuram datur gratia , juxta illud Paul.*  
*ad Ephes. 4. Unicuique nostrum datur gratia se-*  
*cundum mensuram donationis Christi :* ergo gra-  
tia Christi habitualis , sub aliqua ratione , sine  
mensura intelligitur : sed quod est sine mensura ,  
infinitum est ; nam omne finitum mensuram ha-  
bet : ergo gratia Christi habitualis , sub aliqua  
ratione infinita est . Unde cum sub ratione entis  
vel qualitatis , non sit infinita , saltem in ratione  
gratiæ , infinita dici debet .

Resp. argumentum non probare gratiam esse  
infinitam , sed tantum altioris ordinis ad offen-  
sam reparandam : nam homo v. g. est perfe-

Etior viventibus materialibus, quorum numerus est infinitus: ergo homo in esse viventis est infinitus, mala consequentia: Ita à pari ut gratia Christi se extendat ad infinitorum hominum redemptionem, non requiritur, quòd sit infinita, sed sufficit, quòd sit altioris ordinis. Idem dico ad 1. confirm. quia non probat solem esse infinitum in ratione lucis; sed tantum altioris ordinis ad homines illuminandos, ut illuminandos, & ad omnes effectus lucis: nam, caput influit in membra, & in infinita, si infinita essent numero: ergo caput est infinitum: non valet, sed est altius membris dumtaxat: ergo gratia habitualis Christi non est infinita, sed altioris ordinis tantum ad homines redimendos, qui licet sint numero infiniti, gratia tamen potest esse ipsis major & extensior, modò in ordine altiori existat, quin sit infinita.

Ad 2. confirm. dico, quòd *Lynon ad mensuram*, non denotat infinitatem, nec idem est, ac sine mensura; sed tantum abundantiam, & Christum esse fontem omnium gratiarum, ut suadet illud Joan. 1. *De plenitudine ejus nos omne accepimus*, quemadmodum dicimus mare aut cælum esse immensum. Unde neganda est consequentia; cum gratia Christi non sit absolute & intrinsece sine mensura; sed solum comparative ad gratias hominum, & dicatur sine mensura, sicut fons dicitur sine mensura, comparative ad rivulos. Omitto argumentum desumptum ex infinitate satisfactionis Christi, cum ex dictis constet de opposito.

## QUÆSTIO II.

*An in Christo sit gratiæ plenitudo, subindeque gratia tam intensæ, ut omnem gratiam Angelorum & hominum collectivè sumptam excedat?*

**S**Uo alio titulo agitari solet apud Scotistas præsens difficultas, nimirum an gratia Christi sit summa ex actualibus & possibilibus. Pro cuius rei notitia advertendum est 1. Aliquid posse dici summum dupliciter, positivè scilicet vel negativè. Summum positivè, est illud quod non habet majus, nec æquale: Et summum negativè, est illud, quod non habet majus; sed habet æquale. Unde difficultas est, an gratia Christi quæ summa est, sit summa positivè ex actualibus, id est, an excedat omnes gratias in hominibus & Angelis existentes, imò & possibiles? quod dupliciter etiam sumi potest. 1. Respectu potentia Dei ordinariæ. 2. Respectu potentia extraordinariæ.

Dico 1. quòd Gratia Christi est summa positivè ex actualibus & possibilibus respectu potentia Dei ordinariæ, subindeque plenitudo gratia est in Christo tam intensiva, quàm extensiva, secundum potentiam Dei ordinariam. Prob. 1. Christus est fons totius gratia sanctificantis. Tum quia in ipso Deus posuit omnes sapientia & scientia thesauros. Tum quia de plenitudine ejus omnes accepimus. Tum quia unicuique nostrum datur gratia secundum mensuram donationis Christi. Tum quia est caput omnium prædestinatorum. Tum quia in ipso habitat plenitudo divinitatis corporaliter, ut ait Paulus: ergo gratia Christi est positivè summa ex actualibus & possibilibus, id est, gratia Christi est major gratia hominum & Angelorū  
quem

quemadmodum aqua fontis excedit aquam rivulorum, & vita plenius residet in capite & in corde, quàm in membris, cùm Christus ratione gratiæ sit caput hominum & Angelorum. Antecedens patet. Prob. consequ. Deus Christum Angelorum & hominum caput instituens, statuit non conferre gratiam maiorem, nec æqualem gratiæ Christi. Tum quia intentio instituendi Christum, caput, includit intentionem dandi gratias capitis, quæ ex se sunt majores gratiis membrorum. Tum quia si Deus secundùm ordinariam providentiam statuisset conferre gratiam maiorem, vel æqualem, aliquis Angelus vel homo eam habuisset: ergo gratia Christi est positivè summa ex possibilibus secundùm ordinariam Dei potentiam; id est, Deus de potentia ordinaria non potest dare gratiam maiorem.

Prob. 2: Christus est magis gratus Deo, quàm omnes Angeli & homines. Tum quia colligitur ex illo Matth. 17. *Hic est Filius meus dilectus, in quo mihi benè complacui.* Et ex illo Joan. 1. *Pater diligit Filium, & omnia dedit ei in manu ejus.* Tum quia anima Christi propinquiis conjungitur Deo, quàm Angeli & homines, ratione unionis hypostaticæ. Tum quia Deus diligit Angelos & homines propter Christum: ergo gratiæ Christi plenitudo excedit omnes gratias Angelorum & hominum, subindeque est positivè summa ex possibilibus respectu potentie ordinariæ Dei. Prob. consequentia: Gratia habitualis est id quo homo est formaliter gratus Deo: ergo ille qui est magis gratus, maiorem gratiam habet; subsumo: sed Christus est magis gratus Deo quàm omnes Angeli & homines: ergo gratia Christi est major. *Præterea*, gratia habitualis est id quo Christus est formaliter sanctus; ut dixi suprâ: sed Christus est positivè sanctior Angelis & hominibus, ut est manifestum: ergo ejus gratia est positivè summa, & major

major gratiis tam creatis, quàm de potentia ordinaria creandis.

Confirm. In unoquoque genere datur unum quod est regula & mensura cæterorum, ut dicunt Philosophi: ergo in genere gratiæ & in ordine sanctorum, datur unus sanctus qui est regula & mensura aliorum, seu qui est sanctior & in linea gratiæ cæteris præstantior; subsumo: sed ille sanctus nequit esse alius quàm Christus: ergo gratia Christi est major, & excedit omnem gratiam Angelorum omnium & hominum simul sumptorum, & consequenter est positivè summa ex possibilibus.

Dices 1. Plures sancti in Scriptura dicuntur pleni gratia, ut B. Virgo, D. Stephanus & Apostoli: ergo gratia Christi non est positivè summa, sed tantùm negativè: nam anima Virginis potest continere tantam gratiam, quantam continere potest anima Christi: ergo si sit gratia plena sicut Christus, gratia Christi nequit esse major gratia Mariæ. Resp. 1. negando consequentiam: quia *Ly Plenum* in sacra Scriptura frequètiùs sumitur pro quadam magnitudine & abundantia, ut patet ex illo Matth. 23, ubi dicitur de sepulchris, *Plena sunt ossibus mortuorum*; tamen sepulchra non erant omninò plena ossibus. Resp. 2. negando etiam consequentiam, quia plenitudo gratiæ in sanctis est tantùm subjectiva, seu ex parte subjecti; quia B. Virgo, D. Stephanus & Apostoli habuerunt totam gratiam quam recipere potuerunt secundùm statum & officium; unde habent plenitudinem gratiæ, quatenus sunt membra Christi; idcirco sunt membra Christi plena gratia. At Christus habet plenitudinem formalem, seu se tenentem ex parte gratiæ, id est, habuit totam gratiam quæ de potentia ordinaria haberi aut dari potest, & subjectivam, seu quatenus est caput in ordine gratiæ, ideoque non est membrum plenum gratia, sed caput: ergo gratia Christi est major & posi-



positivè summa, cùm gratia capitis ipsi soli competere possit de lege ordinaria, & gratia capitis sit major gratia membrorum, & aqua fontis sit major aqua rivulorum, quamvis rivuli sint aqua pleni sicut fons.

*Instabis:* Ergo gratia B. Virginis non est major gratia D. Stephani, qui est membrum Christi gratia plenum, sicut B. Virgo; sed hoc est contra SS. Patres: ergo vana est solutio. Resp. negando instantiam, quia B. Virgo est membrum dignius & principalius: ergo majorem gratiam habet.

*Dices 2.* Deus non creavit naturam summam cùm de potentia ordinaria naturam perfectiorem creare possit: ergo nec gratiam positivè; subindeque gratia Christi non est positivè summa ex possibilibus respectu potentiae ordinariae Dei. Resp. negando consequentiam. Tum quia congruum erat conferre humanitati subsistenti in supposito divino & infinito, gratiam summam; & nulla necessitate congruum fuit creare naturam summam. Tum quia gratia est participatio divinae naturae: ergo congruum fuit creare gratiam summè participantem. Tum quia natura manifestat omnipotentiam & sapientiam Dei dumtaxat; gratia verò manifestat omnipotentiam, sapientiam & misericordiam: ergo debet esse summa, licet natura non sit talis.

Tum quia unio hypostatica est opus summum positivè, cùm humana jungat divinis; ideoque licet Deus non creaverit naturam summam, nihilominus debuit creare gratiam summam propter incarnationem, quæ est verè opus summum, opus mirabile & opus Dei, quia Deus nulla necessitate congrua fuit compulsus ad summam naturam condendam, fuit autem compulsus ad summam gratiam, intuitu scilicet Christi, in quo natura humana subsistit supposito divino, quæ quidem natura ex congruitate debet sanctificari formaliter per gra-

gratiam summam, & habere plenitudinem gratiæ, ut exaltetur super omnes homines, nedum in natura, seu in ordine subsistentium, in quo est singularis ratione suppositi; sed etiam in ordine gratiæ, in quo nequit super ceteros homines extolli, nisi per gratiam summam.

---

### Q U Æ S T I O III.

*An gratia habitualis Christi, de potentia Dei absoluta augeri possit?*

**I**N præcedenti quæstione liquidò constat gratiam habituales Christi esse positivè summam ex possibilibus respectu potentiæ ordinariæ Dei; subindeque non posse eadem potentia augeri. In præsentiverò examinandum est, an augeri possit de potentia absoluta, id est, an sit etiam positivè summa ex possibilibus respectu omnipotentia absolute Dei? Gonetius existimat Scotum negativam partem docuisse, ac major Scotistarum pars aliter sentit de Doctore subtili; unde

Dico 1. Quòd gratia habitualis Christi non est positivè summa ex possibilibus respectu omnipotentia absolute Dei, subindeque potest esse major intensivè de potentia absoluta. Prob. Si non posset dari gratia intensivè major gratia Christi, hoc proveniret vel ex parte Dei, qui non posset de potètia absoluta creare majorem, vel ex parte subjecti, nempe animæ Christi, quæ non posset eam recipere, vel ex parte gratiæ, quæ in Christo haberet ultimum gradum quem transgredi non posset: sed ex nullo capite hoc provenit: ergo. Prob. minor 1. Deus est

est agens supernaturale infinitæ virtutis: ergo potest augere gratiam Christi, quæ est intensivè finita, & potest producere aliam intensiorem. 2. Anima seu subjectum recipit gratiam per potentiam obedientialem passivam: ergo potest divinitus elevari ad recipiendam majorem gratiam. *Deinde*, licet anima non posset recipere gratiam majorem, tamen hoc non obstat, quoniam potentia creandi gratiam, per subjecti capacitatem minimè limitatur. 3. Gratia Christi est qualitas intensivè finita; ergo augeri potest. Tum quia potest concipi major absque ulla contradictione, & consequenter potest à Deo creari illa major quæ concipitur. Tum quia si sit finita, Deus potest velle majorem; subindeque gratia Christi non est positivè summa ex possibilibus respectu omnipotentia Dei extraordinaria, cum sic possit habere nedum gratiam æqualem, sed etiam majorem.

*Dices* 1. Gratia habitualis fuit data & debita Christo, ratione unionis hypostaticæ: ergo fuit summa ex possibilibus respectu omnipotentia absolutæ. Antecedens patet: Consequentia verò prob. Unio hypostatica exigebat gratiam congruam; sed unio hypostatica est summa ex possibilibus respectu omnipotentia absolutæ: ergo Deus dedit Christo gratiam summam ex possibilibus respectu omnipotentia absolutæ. Resp. negando consequentiam, ad cujus prob. dico 1. quod unio hypostatica, licet sit summa ex possibilibus respectu potentia absolutæ, non exigebat tamen gratiam summam respectu omnipotentia absolutæ, sed tantum respectu potentia ordinariæ, quia non exigebat gratiam condignam, nec in eodem gradu intensam: nam unio est id, propter quod Deus dedit gratiam Christo: ergo oportet, quod illa unio sit major, & consequenter, quod gratia non sit summa ex possibilibus respectu omnipotentia absolutæ, sicut unio. Dico 2. Minorem esse  
fal-

falsam, quia Deus poterat creare de potentia absoluta unionem perfectiorem, quia talis unio est finita, cum uniat Deum humanitati finito modo: ergo intendi potest, & esse major de potentia absoluta Dei.

*Dices 2.* Si gratia Christi potuisset augeri, aucta fuisset per opera Christi, quæ meritoria erant augmenti gratiæ; sed non fuit aucta: ergo &c. Resp. distinguendo antecedens: Si gratia Christi potuisset augeri de potentia ordinaria, aucta fuisset per opera meritoria Christi, concedo; Si potuisset augeri de potentia absoluta, nego majorem; & concessa minori, nego consequentiam: quia Christi meritum erat circa præmium de potentia ordinaria largiendum dumtaxat; idcirco meruit præmium, quod Deus dare poterat de potentia ordinaria; non verò illud, quod dare poterat de potentia absoluta.

*Dices 3.* Gratia quam Christus habet, est finita, ut jam dictum est, etiam si sit positivè summa: ergo potest augeri. Probatur consequentia: Finitum est illud cui aliquid potest addi, infinitum verò est illud cui nihil potest addi: ergo si gratia Christi sit finita, potest de potentia ordinaria, seu ea qua contulit, ipsam augere Deus, id est, et aliquid gratiæ gradum addere. *Respondeo* negando consequentiam; ad cujus probationem, nego consequentiam: quia quod habet summum gradum suæ perfectionis, quantumvis sit finitum, non potest reddi majus; non quia hoc posito fieret infinitum, si ulterior gradus adderetur, sed propter impossibilitatem: nam si gratiæ summæ adderetur novus gratiæ gradus, non esset ampliùs summa: ergo non potest augeri. Sic infert Frassenius ex Doctore.

*Respondeo* secundò, argumentum esse verum respectu omnipotentiae Dei extraordinariae, quæ potest addere gratiæ Christi aliquem

quem gradum, ut patet ex probationibus conclusionis: nam si sit finita habendo quidquid Deus dare potest de potentia ordinaria, & secundum præsens decretum quo decrevit conferre Christo gratiam maiorem omnibus de potentia ordinaria conferendis; potest alio decreto possibili, ipsa gratia ita augeri, ut sit major omnibus de absoluta Dei potentia conferendis, nec per hoc erit infinita.



## DISPUTATIO XII.

*De gratia Christi capitali.*

**C**ONSIDERATIS & quantum pro modulo nostro licuit sufficienter examinatis omnibus quæ ad gratiam habituales spectant, jam supersunt declaranda ea quæ de gratia capitali dicuntur.

### QUÆSTIO I.

*An Christus sit actu caput hominum viatorum, in statu peccati vel infidelitatis existentium?*

**S**UPPONO tamquam certum, Christum esse caput Ecclesiæ. Tum quia constat ex pluribus sacrae Scripturae locis, R. om. 12. Sicut enim in uno corpore multa membra habemus, omnia autem membra non eundem actum habent; ita multi sumus unum corpus in Christo. Hebr. 3. Ipsum seu Christum dedit caput super omnem Ecclesiam.

*siam*. Et cap. 5. ait, *Vir est caput mulieris, sicut Christus Ecclesiæ*. Juxta illud ad Coloss. 1. *Christus est caput corporis sui, quod est Ecclesiæ*. Tum quia Christus habet respectu Ecclesiæ omnes conditiones & functiones quas caput naturale habet respectu membrorum, putà ordinem, perfectionem & influxum: ergo est caput Ecclesiæ. Hoc supposito, examinandum est, an sit etiam actu caput peccatorum & infidelium? Dixi *actu caput*, quia certum est, quòd est caput in potentia; unde

Dico 1. Christum esse actu caput fidelium etiam in mortali existentium. Prob. Nam Christus est caput Ecclesiæ, ut dictum est suprà: ergo est caput illorum omnium qui Ecclesiam componunt, seu qui sunt de corpore Ecclesiæ; sed fideles sunt de corpore Ecclesiæ, etiam illi qui in peccato mortali existunt. Tum quia Ecclesiæ est collectio fidelium. Tum quia per fidem homo unitur Ecclesiæ. Tum quia ex meritis Christi, peccatores recipiunt dona Spiritus sancti, auxilia supernaturalia &c. ergo sunt membra Ecclesiæ, & Christus est eorum caput.

Dices 1. Membra Christi non possunt esse sibi invicem contraria; sed justis & peccatores inter se contrariantur: ergo peccatores in mortali existentes, nequeunt esse membra Christi. 2. Fideles sine charitate seu gratia, sunt membra mortua: ergo non sunt verè & propriè membra Christi. Resp. ad 1. negando majorem; nam ut sint membra corporis mystici, sufficit, quòd in aliquo convenient, licet in aliis dissideant; unde cum fideles peccatores convenient cum justis in fide, spe & in donis supernaturalibus, quæ caput influit; sunt membra Christi, licet non habeant gratiam sicut justis. Ad 2. nego consequentiam: sufficit enim quòd uniantur capiti per fidem, ut sint membra verè & propriè.

Dico 2. Christum non esse actu caput hæreticorum.

reticorum, licet baptizati sint; sed tantum potentia. Prob. Hæretici & infideles sunt extra Ecclesiam: ergo non sunt actu membra Christi nec Ecclesiæ. 2. Christus influit in omnia membra; sed non influit actu in hæreticos, nec infideles, quoniam non est cum ipsis conjunctus: ergo non sunt membra Christi actu, sed tantum potentia. Tum quia infideles quamdiu vivunt, possunt recipere influxum vitæ spiritualis à Christo. Tum quia habent liberum arbitrium, quod à Deo è malo in bonum flecti potest. Tum quia Christus pro infidelibus & hæreticis mortuus est; ideòque quamvis Christus non sit eorum caput actu, est tamen potentia; quia possunt converti & esse membra Ecclesiæ, & consequenter membra Christi.

*Dices:* Deus propter merita Christi dat actu infidelibus inspirationes: ergo sunt membra Christi, sicut fideles & justi. Resp. negando consequentiam, quia non dat infidelibus inspirationes propter merita Christi quatenus est caput, sed quatenus est author meriti; nec dat ipsis quatenus sunt membra Christi actu, sed quatenus possunt esse; cum det ipsis inspirationes & gratiam excitantem, ut sint & fiant membra Christi.

Ex dictis colligitur 1. Christum esse caput non solum fidelium qui post ejus adventum vixerunt, sed etiam antiquorum Patrum qui fuerunt in lege naturæ, vel in lege scripta. Tum quia receperunt dona supernaturalia ex vi meritorum Christi venturi. Tum quia erant sancti. 2. Christum esse caput beatorum. Tum quia sunt membra Ecclesiæ triumphantis, cujus Christus est actuale caput; licet non habeant fidem, quoniam fides est forma membrorum Ecclesiæ militantis. Tum quia adepti sunt beatitudinem mediante gratia Christi. 3. Christum esse caput hominum non solum secundum animas, sed etiam quantum ad corpora. Tum quia in resur-

surrectione influet in corpora nostra gloriam accidentalem. Tum quia constat ex Apost. 1. ad Cor. 6. *Nescitis, quoniam corpora vestra, membra sunt Christi?* Tandem, colligitur Christum non esse caput damnatorum. Tum quia damnati sunt extra Ecclesiam. Tum quia sunt omnis gratiæ & gloriæ incapaces.

*Quæres, an Christus ut homo, non solum hominum, sed etiam Angelorum caput dici possit?* Resp. affirmativè. Tum quia ex Apost. ad Coloss. 2. constat, *Est caput omnis principatus & potestatis.* Tum quia Ecclesia triumphans comprehendit Angelos & homines beatos; sed Christus est caput Ecclesiæ triumphantis: ergo est caput Angelorum. Tum quia D. August. in Psal. 36. concione 3. ait, *Christus caput est, cujus membra sunt omnes qui ab initio fuerunt iusti, conjunctis etiam legionibus Angelorum & exercitibus.* Tum quia Christus secundum humanitatem est Angelis superior dignitate, est illis præstantior & perfectior, & in eos influit gratiam & gloriam. Tum denique quia imperio suo movet Angelos ad salutem hominum procurandam, eosque ad nostram custodiam deputat: ergo est caput Angelorum.

*Dices* 1. Christus non redemit Angelos: ergo non est caput eorum. 2. Nulla est conformitas inter humanitatem Christi & Angelos: ergo non est caput eorum, cum inter caput & membrum debeat esse proportio. 3. Non est sponsus Angelorum: ergo non est eorum caput. Resp. ad 1. Christum redemisse Angelos per præservationem, quod sufficit, ut sit eorum caput. Ad 2. nego antecedens, quia humanitas Christi & Angeli habent eandem specie charitatem & gratiam sanctificantem, atque beatitudinem: ergo habent conformitatem. Ad 3. nego antecedens, quia Angeli habent charitatem, quæ est vinculum perfectionis, & conjunctionis Angeli cum Christo, cum quo per chari-



tatem sunt duo in uno spiritu, sicut in matrimonio Sacramento, sponsus & sponsa sunt duo in carne una.

*Dices* iterum: De natura capitis est, esse altius membris, & in ordine superiori; sed Christus ut homo, est ordinis inferioris ad Angelos: ergo nequit esse eorum caput. *Respondet*, hoc esse verum in physicis, vel in moralibus, dum caput est ex natura rei: falsum verò in moralibus, dum caput sit aut est ex divina atque suprema ordinatione, quæ potest instituere quemcumque voluerit. Unde cum Christus sit caput ex gratia speciali distincta ab unione & gratia habituali, sequitur, quòd potest esse caput Angelorum, etiamsi ut homo sit ordinis inferioris ad Angelos. Vel respondeo, Christum ut hominem Angelis præeminere, & esse in ordine supernaturali ratione personalitatis, sicque esse caput totius Ecclesiæ, seu hominum viatorum & Angelorum, cum sit altior ipsis Angelis propter maiorem ad Deum propinquitatem:

## Q U Æ S T I O II.

*An Christus ut homo sit ita caput Angelorum, quòd ipsis gratiam & gloriam, etiam essentialem, meruerit?*

**S**ensus difficultatis est, an Christus promeruerit Angelis gratiam sanctificantem & gloriam essentialem? Plures Scotistæ quos citat & sequitur Maffrius, existimantes Christum nulla habuisse merita nisi à carne passibili & passione dependentia, tenent partem negativam. Alii verò aliter sentiunt, nedum de gloria accidentali seu de illuminationibus, ministe-

nisteriis &c. sed etiam de gloria essentiali ; unde

Dico, quòd Christus ut homo ita est caput Angelorum, ut ipsis gratiam & gloriam essentialem meruerit. Hæc conclusio est plurimum Scotistarum, quos citat & sequitur Delgadillo, & est conformior principiis Scoti. Prob. Christus fuit prævisus ut absolutè futurus, antequàm Deus haberet decretum conferendi gratiam & gloriam Angelis, ut docet Scotus, & ut patet suprâ disp. 4. de motivo incarnationis : ergo ex hoc principio Scoti cogimur fateri Christum meruisse gratiam & gloriam Angelis, ac primis parentibus in statu innocentiae. Prob. consequentia 1. Principalis ratio quæ Thomistæ probant oppositum, est quia Deus prædestinavit Christum post prævisionem peccati: nam (inquiunt) Christus fuit prævisus post præscientiam peccati, sicque gratia fuit collata Angelis ante prævisionem Christi, cùm gratia collata fuerit ante prævisionem peccati : ergo cùm ex principiis Scoti liquidò constet Christum fuisse prævisum ante prævisionem peccati, constat etiam ex Doctore gratiam fuisse collatam Angelis post prævisionem Christi. 2. In illo priori signo in quo ex Scoto Christus fuit prævisus, fuerunt etiam prævisi ejus actus dilectionis & amoris liberè eliciendi : ergo Deus poterat propter illos actus liberè eliciendos, velle conferre gratiam Angelis & primis parentibus; sed si hoc fieri poterat, factum fuisse dicendum est. Tum quia extollit excellentiam Christi, cùm reddat Angelos Christo obligatos. Tum quia gloriosius est Angelis habere vitam æternam per merita Christi, quàm omninò gratis & sine meritis: ergo Christus meruit gloriam essentialem Angelis.

Prob. 2. ex SS. Patribus. Hiero. super epist. ad Ephes. 2. ait, *Christum pacem attulisse cælestibus & terrenis, quia in suo sanguine cælestia &*

*terrestria copulavit ; atque ita factum esse , ut crux Christi non solum terræ , sed etiam cælo ; non solum hominibus , sed etiam Angelis profuerit .*  
 D. Gregor. homil. 14. in cap. 40. Ezech. ait, *Unigenitus Patris qui sursum est firmitas Angelorum , inferius factus est hominum redemptio .*  
 D. Bern. serm. 22. in Cant. ait, *Qui erexit hominem lapsum , dedit stanti Angelo , ne laberetur &c.*  
 D. Gregor. in cap. 2. libri primi Regum, *Nullus (inquit) hominum neque Angelorum est sanctus nisi per Christum : ergo ex SS. Patribus , Christus est causa meritoria sanctitatis & gloriæ essentialis Angelorum .*

Resp. Gonet. SS. Patres , & præsertim D. Bernardum loqui de Christo non ut homine , sed ut Deo , ut constat ex verbis antecedentibus, *Quoniam (inquit) quierat Angelis sanctificatio , redemptio factus est nobis :* supponunt enim verba illa , Christum , antequàm fieret nobis redemptio , atque adeò priusquàm fieret homo , factum fuisse sanctificationem Angelorum : cùm ergo dicit Bern. *Qui erexit hominem lapsum , dedit stanti Angelo , ne laberetur ,* solum vult , quòd per Christum in quantum Deum , steterunt Angeli boni , sicut per eundem Christum in quantum Deum & hominem , redemptus est homo lapsus : eodem modo exponi debent alii Patres .

Contra 1. Si sancti Patres locuti fuissent de Christo ut Deo , non dixissent *Christus erexit , sed Deus erexit .* Tum quia nullum opus ad extra attribuitur specialiter Filio . Tum quia nullum opus attribuitur Deo ratione humanitatis , nec sub nomine Christi . Tum quia si hæc expositio valeret , quidquid Patres dicunt de Christo , posset de Christo ut Deo intelligi . 2. Verba illa, *Quoniam quierat Angelis sanctificatio , redemptio factus est nobis ,* non denotant Christum ut Deum esse sanctificationem nostram , sed Christum futurum & prævisum fuif-

fuisse sanctificationem Angelorum & redemptionem nostram. 3. SS. Patres loquebantur de causa meritoria; nam sanctificatio Angelorum & redemptio hominum respiciunt Christum sub eodem genere causæ: sed Deus nequit esse causa meritoria, ut patet: ergo loquebantur de Christo ut homine.

Prob. 3. Omne quod est tale per participationem, revocari debet ad illud quod est tale per se, ut patet in corpore luminoso, quod ad solem revocatur, & sic de cæteris; sed Angeli sunt sancti per participationem & per adoptionem, adoptati enim sunt ad æternam hæreditatem tamquam extranei: ergo ad Christum revocantur, ut ab illo & per illum, gratiam sanctificationis & adoptionis obtineant; & consequenter non sunt adoptati ad gloriam Filii naturalis independentem à Christo, qui est Filius, naturalis gloriæ.

Confirm. Omnes Angeli dum erant in via peccare poterant. Tum quia erant liberi. Tum quia aliqui peccaverunt; sed illi qui non peccaverunt, pervenerunt ad gloriam per meritum Christi futuri. Tum quia constat ex Joan. 14. *Nemo venit ad Patrem, nisi per me*: hæc enim vox *Nemo*, excludit tam Angelos, quam homines, ut patet in istis Scripturæ locis, *Nemo bonus nisi solus Deus. Nemo novit Filium nisi Pater. Neminem viderunt nisi solum Iesum*. Tum quia meruisset gloriam puris propriis meritis, vel alienis? propriis nequaquam; quia Gonet. sup. ponit meritum puræ creaturæ, illam gloriam ex æquo & iusto promereri non posse. Si meritis alienis; non nisi Christi, cum aliud non detur meritum quod Angelis possit esse proficuum: ergo boni Angeli steterunt in gratia & pervenerunt ad beatitudinem ex vi meritorum Christi futuri.

Prob. denique: Christus qui de facto gratiam, & gloriam essentialem sibi meruit, ut fatetur

Gonet. infrà disp. de merito Christi, habuit gratiam & gloriam modo nobiliori, & est sanctior Angelis & prædestinatis, nedùm quoad intentionem & sanctitatis gradus, sed etiam quantum ad modum & circumstantias: ergo Angeli habuerunt gratiam & gloriam essentialem dependenter à meritis Christi. Antecedens patet: Consequentia verò prob. 1. Si Angeli habuissent gratiam & gloriam immediatè à divina voluntate, independenter à meritis alienis, habuissent eam modo quo Christus eam habuit; sicque gratia Angelorum esset independentes à meritis Christi, & à solo Deo dependeret sicut gratia ipsiusmet Christi: ergo Christus non habuisset gratiam modo nobiliori quàm Angeli. 2. Christus est sanctior hominibus. 1. Quia gratiam intensiorem habet. 2. Quia habet illam à solo Deo absque meritis, & homines habent illam à Deo, dependenter à meritis Christi: ergo si Christus sit sanctior Angelis omnimodò, oportet, quòd gratia Angelorum à Christo dependeat. 3. Gratia Angelorum magis dependet quàm gratia Christi; sed si non dependeat à meritis Christi, non magis dependet, cùm gratia Christi dependeat à Deo sicut gratia Angelorum: ergo gratia Angelorum dependet à meritis Christi, & gratia Christi à solo Deo. Tandem, gratia Christi dicitur omninò singularis: ergo Angeli non habuerunt gratiam titulo gratuitæ donationis sicut Christus, sed titulo meritorum, non priorum; sed Christi.

Obj. 1. Gonet. triplici Scripturæ testimonio. *Primum* habetur Luc. 2. ubi Angelus alloquens pastores post Christi nativitatem gratulabūdos, dicebat, *Evangelizo vobis gaudium magnum, quia natus est vobis hodie Salvator*: his enim verbis satis indicat, Christum solis hominibus natum esse, alioquin tanti beneficii meminisset; nec solis pastoribus, cæterisque hominibus, sed  
etiam

etiam Angelis natum esse Salvatorem prædicasset. Unde Bernardus & Guericus Abbas dicunt (at brevitatis gratia verba non adduco) Christum Salvatorem solis hominibus natum esse. *Secundum* testimonium habetur Matth. 18. & Luc. 15. ubi Christus parabolam inducit pastoris, qui 99. oves in deserto reliquerat, ut centesimam quæ perierat, salvam faceret: communis enim Patrum interpretatio in hunc locum est, per 99. oves in deserto relictas, significari novem Angelorum choros, quos Christus verus & bonus pastor, in cælo quodammodò deseruit, dum è sinu Patris in uterum B. Virginis descendit, ut ovem centesimam, quæ hominem designat, à patria aberrantem & peccato perditum quæreret, & sanguine proprio salvum faceret. Ita hanc parabolam explicant DD. Ambr. Gregor. & venerab. Beda, in illud 15. Luc. *Quis ex vobis homo qui habet centum oves, &c. Tertius* locus sumitur ex 2. cap. ad Hebr. ubi Apost. loquens de excellentia Christi supra Angelos, sic habet: *Qui enim sanctificat, & qui sanctificantur ex uno omnes; propter quam causam non confunditur eos vocare fratres, dicens, Nunciabo nomen tuum fratribus meis; & iterum Ecce ego & pueri mei quos dedit mihi Deus, quia ergo pueri communicaverunt carni & sanguini, & ipse similiter participavit eisdem: ex quibus verbis sic formatur argumentum; Omnes qui sanctificantur à Christo, atque adeò quibus ipse meruit gratiam sanctificantem, quæ est gratia essentialis, vocantur pueri & fratres Christi; sed Angeli non possunt pueri & fratres Christi appellari: ergo. Major est propositio Apostoli, minor verò prob. Illi dicuntur ab Apostolo pueri & fratres Christi, qui communicaverunt carni & sanguini; sed Angeli non communicaverunt carni & sanguini, utpote spiritus puri: ergo vocari nequeunt pueri & fratres Christi.*

Resp. ad 1. Angelum non dixisse, *Quia natus est nobis*, sed potius *vobis hodie Salvator*.

1. Quia non loquebatur de Salvatore præservativo; sed de reparativo & sublevativo, unde cum Angeli non sint redempti, nec sublevati per merita Christi, sed tantum præservati, non dixit *nobis*, sed *vobis*. 2. Ut pastores inferre possent nuncium non esse hominem peccatorem; sed Angelum, cui fidem adhibere poterant; sicque etiam intelligendi sunt SS. Patres. *Ad secundum*, dico parabolam esse intelligendam de assumptione naturæ humanæ, non verò de salute; unde verum est, quòd Christus bonus & verus pastor deseruit in cælo novem choros Angelorum, ut hominem sibi uniret, juxta Patres super illud Apost. *Nusquam Angelos apprehendit, sed semen Abrahamæ*, non autem ut solis hominibus gratiam & gloriam procuraret: Deus enim proposuit in Christo restaurare omnia, sive quæ in cælis, sive quæ in terris sunt, ut ait Apost.

*Ad tertium*, dico Apostolum loqui de sanctificante & sanctificatis per meritum Passionis, propter quam causam Christus frater noster & caro nostra est, tum quia mortuus est ut fidejussor noster, & factus est pro nobis debitor, non verò de sanctificante & sanctificatis simpliciter & quomodocumque: ergo Apostolus non loquitur de Christo in carne passibili: nec de Angelis qui sanctificati fuerunt ex meritis Christi prævisi ut glorificatoris. Unde ad argumentum distinguo majorem: Omnes qui sanctificantur à Christo moriente, aut parturiente in cruce, vocantur pueri & fratres Christi, concedo; à Christo glorificatore, & anteceder ad præscientiam peccati prævisi, vocantur pueri & fratres Christi, nego majorem; & concessa minori, nego consequentiam: quia Deus dedit gratiam & gloriam essentialem Angelis & Adamo in statu innocentiae ex vi meritorum Christi.

sti glorificatoris, qui venisset Adamo non peccante.

Obj. 2. D. Thomas (inquit) negat iudicio Christi ut hominis, Angelos subijci quantum ad præmium essentiale, & damnationem æternam; quæ doctrina verificari non potest, si Christus Angelis meruit præmium essentiale: si enim antiqui Patres, licet ante incarnationem justificati, eo ipso tamen, quod ex meritis Christi iustitiam suam habuerunt, sub iudicio Christi humano in fine mundi futuro; quare ad Christum ut hominem non pertinebit iudicare Angelos in extremo iudicio de merito essentiali & præmio illi correspondente, si tale præmium ex meritis & gratia Christi consecuti sunt?

Resp. negando consequentiam, quia licet Angeli non subijciantur iudicio Christi, ut vult D. Thom. hoc non obstat: nam iudicio Christi subijciuntur homines, quia puniendi aut præmio donandi sunt propter merita aut demerita, ut patet ex Matth. 25. *Venite benedicti Patris mei. Et ratio est, Esurivi enim & dedistis mihi manducare.* Postea dicet his qui à sinistris erunt, *Discedite à me maledicti; esurivi enim & non dedistis mihi potum.* Non autem quia gratiam & gloriam essentialem ex meritis Christi receperunt: sed Angeli habuerunt gratiam in instanti creationis, & statim fuerunt in termino in quo non meruerunt nec demeruerunt: ergo non sunt iudicandi. 2. SS. Patres iudicabuntur, quia obtinebunt gloriam corporis: ergo Angeli qui corporis expertes sunt, non debent iudicio Christi subijci, sicut SS. Patres, licet gratiam & gloriam ex meritis Christi prævisi habuerint, sicut ipsi SS. Patres.

Obj. 3. Decretum de conferenda gratia & gloria ex meritis Christi, dependet ex prævisione peccati Adami, saltem in genere causæ materialis & occasionalis; sed decretum de con-



ferenda gratia & gloria essentiali Angelis, non dependet ex prævisione peccati Adami: ergo decretum illud non innititur præscentiæ meritum Christi, nec ab illa dependet, subindeque gratia & gloria essentialis Angelis collata, non est ex meritis Christi; sed ex mera & gratuita liberalitate Dei. Major prob. Christus & ejus incarnatio decreta fuerunt dependenter à prævisione peccati Adami, ita ut illo non peccante Filius Dei non venisset: ergo, &c. Minor prob. 1. Cùm Adamus ex suggestionem mali Angeli jam damnati lapsus fuerit, Deus priusquàm statueret permittere peccatum primi parentis nostri, ac proinde priusquàm illud præscentiret, debuit habere voluntatem permittendi lapsum primi Angeli; subindeque & voluntatem efficacem conservandi bonos Angelos in gratia, eosque consequenter remunerandi gloria essentiali; aliàs reprobatio malorum Angelorum esset prior prædestinatione bonorum, quod tamen omnes negant: ergo similiter, imò à fortiori, priusquàm Deus decerneret permittere peccatum Adami, illudque præscentiret, voluit conferre Angelis gratiam & gloriam essentialem. 2. Prob. eadem minor principalis: Gratia quæ est dependens ex prævisione peccati, est gratia sanans & redimens, ut de se patet; sed gratia collata Angelis non est hujusmodi, ut enim dicitur Matth. 9. *Non est opus valentibus medico, sed his qui male habent*: ergo, &c.

Resp. concessa minori cum probationibus, negando majorem cum probatione: In duplici enim statu consideranda sunt merita Christi; alia sunt Christi glorificatoris, qualia sunt v. g. actus dilectionis & charitatis, quos elicuisset etiam si Adam non peccasset, cùm venisset ut glorificator; alia verò sunt Christi Redemptoris, qualia sunt effusio sanguinis, similesque actus ad mortem ordinati. Ista merita de-

dependent ex prævifione peccati Adami, cùm Christus non veniffet ut Redemptor, fi Adam non peccaffet; at illa, feu Christi glorificatoris non dependent ex prævifione peccati Adami, cùm Christus fic confideratus, fuerit prævifus & prædeftinatus ante prævifionem peccati Adami, ut dictum eft fuprà: ergo decretum de conferenda gratia & gloria ex meritis Christi, poteft antecedere prævifionem peccati Adami.

Obj. 4. Omne meritum Christi pro his quos sanctificavit, ita fuit Passione & morte fua consummatum, ut nemo per Christum sanctificatus fit, nifi pro eo Christus paffus & mortuus fit; unde quicumque excluditur à sanguine & morte Christi, etiam ab ejus merito & sanctificatione excluditur: fed Angeli à sanguine & morte Christi excluduntur: ergo, &c. Minor eft certa, & paffim docetur à SS. Patribus. August. enim in Enchiridio cap. 61. fic ait, *Proprio Filio fua non pepercit, fed pro omnibus tradidit illum: non enim pro Angelis mortuus eft Christus.* (Idem sentiunt & expreffè dicunt D. Bern. Gregor. quorum verba brevitatis gratia omitto.) Major autem prob. ex illo Hebr. 10. *Una oblatione consumavit in fempiternum sanctificatos:* Quibus verbis apertè declarat, quòd quicumque sanctificati funt, illa una oblatione qua Christus in ara crucis feipsum in sanctificationem pro peccatis obtulit, gratiam & sanctificationem obtinuerunt; fubindeque, quòd omne Christi meritum pro his quos sanctificavit, Passione & morte fua consummatum fuit. Ratio etiam id fuadet, nam convenientiffimum eft, ut omne Christi meritum pro his quos sanctificavit, in perfectiffimo ejus opere completum & consummatum fit; fed Christi Passio & mors fuit opus Christi perfectiffimum, & præftantiffimum, quia in ea completum eft totum pondus charitatis ipfius, juxta illud Apoft. ad

Rom. 5. *Commendat autem charitatem suam Deus in nobis, quia cum peccatores essemus, Christus pro nobis mortuus est.* Quæ verba exponens D. Thom. subdit, *In hoc quod dicit, commendat, immensitatem quandam divinæ charitatis assignat: ergo, &c.*

Confirm. In his quæ Christus pro seipso meruit, consummavit meritum suum per Passionem & mortem, juxta illud Luc. 24. *Nonne sic oportuit pati Christum, & ita intrare in gloriam suam?* Et ad Philip. 2. *Factus obediens usque ad mortem, mortem autem crucis, propter quod & Deus exaltavit illum:* ergo à fortiori omne Christi meritum pro his quos sanctificavit, Passione & morte sua consummatum est.

Resp. ad argumentum concessa minori de morte sublevativa & reparativa, non autem de morte præservativa, negando majorem. Tum quia meritum Christi potuit à Deo acceprari, licet esset morte & Passione consummandum, quia hoc pendet à divina dispositione, quæ potuit acceptare merita solum ut prævisa, & intuitu ipsorum sanctificare Angelos, ut de facto in doctrina Scoti sanctificavit Deiparam, antecederet ad prævisionem eorundem meritorum ut in morte & Passione consummandorum. Tum quia meritum Christi non dicitur consummatum Passione & morte, causaliter, ita ut mors sit causa totius meriti; sed terminativè, quia mors aut Passio est ultima actio meritoria Christi: ergo Christus meruit antecederet ad Passionem & mortem, putà per actus dilectionis & charitatis erga Deum & proximū. Ad prob. dico Apost. loqui de sanctificatis positivè, seu de illis qui de statu peccati ad statum gratiæ transierunt, quos una oblatione Christus sanctificavit; non verò de sanctificatis privativè, seu de illis qui à statu puræ naturæ ad statum gratiæ transire potuerunt, qua sanctificatione Angeli fuerunt sanctificati; licet enim nunquam

exti-

extiterint sine gratia, tamen eorum naturalia ad gratiam præsupponuntur. *Ad rationem*, dico quòd est vera de sanctificatis positivè, seu de redemptis, non verò de sanctificatis privativè aut præservatis, quales sunt Angeli, quos Deus intuitu meritorum Christi ante præscientiam peccati, prævisi, præservavit à peccato & sanctificavit, quia illi, scilicet redempti, Deo sic ordinate redimendi erant morte Christi, ut colligitur ex illo Isa. 53. *Si posuerit pro peccato animam suam, &c.* isti verò non erant redimendi; sed tantum à peccato præservandi: ergo convenientius fuit eos sanctificare & præservare ante mortem, cum tunc peccare potuerint, quam post mortem Christi.

Ad confirm. nego paritatem: quia cum Christus non sibi meruerit nisi gloriam sui corporis, sui que nominis exaltationem, ut fatetur Gonet. in his quæ pro seipso meruit, consummavit meritum suum per Passionem & mortem, quia corpus erat glorificandum & nomen exaltandum post mortem, ut probant verba suprà citata, *Nonne oportuit Christum pati, id est mori, & ita intrare in gloriam suam?* at Angeli erant sanctificandi ante mortem & Passionem Christi: ergo Christus ipsis meruit gratiam ante mortem per actus charitatis & dilectionis erga Deum & proximum, ante præscientiam peccati Adami prævisos.

Obj. ultimò: Nullus justificatus per merita Christi, est glorificatus ante merita Christi per Passionem consummata; sed Angeli sunt glorificati ante merita Christi per Passionem consummata: ergo per merita Christi iustificati non sunt. Minor est certa de fide, & patet ex illo Matth. 18. *Angeli eorum semper vident faciem Patris mei.* Major verò prob. exemplo Patrum antiquorum qui incarnationem præcellerunt: ideò enim illi non sunt glorificati ante Passionem Christi, quia eorum gratia, erat gratia de-

rivata à Christo, & ideò non debebat priùs consummari in membris, quàm in capite à quo derivabatur.

\* Resp. negando majorem, ad cujus prob. nego paritatē. Tum quia Patres habebant aliquod peccatum, putà originale, per Passionem expiandum; at ex parte Angelorum nullum erat peccatum expiandum: ergo non erat ratio differendi gloriam Angelorum usque ad Passionem, sicut gloriam hominum. Tum quia gloria hominum dependebat à satisfactione Christi, & pretio in ara crucis exhibendo in debitum reconciliationis; at gloria Angelorum dependebat à meritis Christi, præcisè ut sunt merita ejus. Unde cùm reconciliatio aut satisfactio exhiberi non potuerit, nisi in cruce, & mèrita Christi prævisa, fuerint digna aut meritoria gloriæ Angelorum, non fuit ratio differendi gloriam Angelorum, sicut gloriam hominum. Tum quia Deus erat offensus à peccatis hominum, ideoque erat per mortem Christi satisfaciendus; at non erat offensus ab Angelis ad gloriam prædestinatis: ergo non debuit eodem modo se gerere erga utrosque.

Tum quia Christus debuit ascendere in cœlum ut triumphator principis hujus mundi, atque adeò ascendens in altum solam captivam ducere captivitatem, ob quam liberandam venerat in mundum; sed Angeli boni non erant in captivitate sicut antiqui patres: ergo Angeli non debebant expectare consummationem meritorum Christi per mortem & passionem, & simul cum Christo in cœlum ascendere, sicut ascenderunt Sancti Patres qui erant in captivitate, quam Christus ascendens in altum, duxit captivam: ergo ex dictis restat Christum meruisse Angelis gratiam.

Hoc verum esse sic evinco: nam Apocalip. cap. 12. vers. 11. legitur de prælio facto in cœlo, *Et ipsi, id est Angeli, vicerunt eum, id est,*  
dia-

*diabolum, ut ex præcedentibus & subsequenti-  
bus verbis constat, propter sanguinem agni &  
propter verbum testimonii sui, & non dilexerunt  
animas suas usque ad mortem, quibus suade-  
tur Angelos sanctos non peccasse cum malis,  
propter sanguinem Christi seu ipsius gratiam,  
intuitu Christi futuri eis concessam à Deo. Un-  
dè Christus in sacra Scriptura dicitur Sol, quia  
sicut Sol in medio planetarum collocatus, su-  
periores & inferiores irradiat, nec est qui se  
abscondat à calore ejus; ita Christus à Deo  
Patre prævisus, Angelos & homines irradiavit  
nec est qui se abscondat à calore, seu meritis &  
dilectione ejus.*

---

### Q U Æ S T I O III.

*Per quam gratiam Christus in ratio-  
ne capitis Ecclesie con-  
stituitur?*

**D**ico, quòd gratia capitis in Christo consistit  
in dignitate aut potestate quam Deus illi  
contulit in Angelos & homines. Ita omnes Sco-  
tistæ. Prob. Christus nequit esse caput homi-  
num & Angelorum, quin sit electus & insti-  
tutus à Deo. Tum quia Deus solus est Domi-  
nus & Rex supremus Angelorum & hominum:  
ergo nulla creatura in ipsos Angelos & homi-  
nes influere potest, quin sit ad hunc finem  
electa & instituta à Deo. Tum quia dignitas  
capitis nihil physicum importat; sed dumtaxat  
aliquid morale, seu deputationem à supre-  
mo Domino factam, qua supremus Dominus sub-  
jicit suos subditos alteri tamquam capiti, ut pa-  
ter in judice cui Rex confert authoritatem judi-  
candi: ergo Christus est formaliter caput Ec-  
cle-

clesiæ per potestatem quam Deus illi contulit in Angelos & homines. Prob. consequentia : Electio est actus divinæ voluntatis, quo Deus contulit Christo authoritatem in Angelos & homines, ut patet ex illo Eccl. 45. *Ipsū elegit ab omni vivente, offerre sacrificium Deo, incensum & bonum odorem, in memoriā placere pro populo suo, & dedit illi in præceptis suis potestatem, in testamentis judiciorum, docere Jacob testimonia, & in lege sua lucem dare Israel.* Ex quibus verbis colligitur Christum habere potestatem in Israel, id est, in Ecclesiā, quia fuit à Deo specialiter electus ex omni carne. Deinde, Christus est caput Ecclesiæ, quia ipsi subjiciuntur omnia Ecclesiæ membra; sed ratio formalis subjiciens omnia Christo, est potestas quam Deus ipsi contulit in Angelos & homines: ergo hæc dignitas constituit Christum, caput Ecclesiæ.

C bj. Gonetus: Forma dans Christo ut homini radicale posse ad influxum in membra Ecclesiæ, gratia capitalis est: sed gratia habitualis hoc præstat: ergo. Major patet: Gratia enim capitalis ea dicitur quæ est influxiva in alios, cum de ratione capitis sit in membra influere. Minor verò suadetur: Christus influit in membra Ecclesiæ, per meritum & satisfactionem; sed gratia habitualis dat Christo ut homini posse radicaliter mereri: ergo dat illi posse radicaliter influere in membra Ecclesiæ.

Confirm. Ad rationem capitis tres solum conditiones requiruntur, nimirum prioritas, eminentia & influxus; sed gratia Christi habitualis tres illas conditiones habet: Ergo. Minor prob. In primis enim gratia habitualis Christi est prior gratia cæterorum hominum; tum quia magis accedit ad Deum; tum etiam quia est finis & exemplar gratiæ gratis datæ aliis hominibus, sicut prædestinatio Christi est finis & exemplar nostræ prædestinationis: Est etiam  
emi-

eminentior gratia hominum & Angelorum, cum sit multò perfectior & abundantior, & Christus gratiæ plenitudinem habeat. *Denique*, Christus per eam influit in Ecclesiæ membra; ergo conditiones ad rationem capitis requisitas habet.

Resp. distinguo antecedens: Forma dans Christo ut homini radicale posse ad influxum in membra Ecclesiæ, gratia capitalis est, fundamentaliter, radicaliter & congruenter, concedo; Formaliter & actu, nego. Distinguo similiter minorem: Gratia habitualis Christi hoc præstat fundamentaliter, concedo; Formaliter & actu, nego minorem & consequentiam de gratia capitali formali: Nam gratia habitualis & gratia unionis, sunt rationes fundaméntales propter quas Deus instituit Christum caput Ecclesiæ, aut ob quas Deus illi contulit potestatem in Angelos & homines: sicut enim Rex confert judici authoritatem judicandi, quia eximia negotiorum notitia, morumque probitate pollet; quin tamen notitia & morum probitas ipsum constituent judicem, nisi fundamentaliter aut congruenter, non verò formaliter, cum sit & constituatur talis per dignitatem & authoritatem Regis, illi in subditos Regis concessam; ita pariter Deus contulit Christo authoritatem in Angelos & homines, quia erat homo Deus & summè sanctificatus: ergo hæc dignitas constituit formaliter Christum caput Ecclesiæ, non autem gratia habitualis, quæ non est influxiva in alios physicè & ex natura sua; sed moraliter & ex divina ordinatione instituyente Christum caput omnium hominum. Unde cum Christus, licet in membra Ecclesiæ influat per meritum & satisfactionem, non influat ex vi meriti & gratiæ; sed ex vi divinæ electionis aut potestatis specialiter illi concessæ; sequitur, quòd gratia habitualis non est id, quòd constituit Christum formaliter caput, sed tan-

tùm



tum fundamentaliter. Ad confirm. dico, quod gratia Christi habitualis non habet conditiones ad rationem capitis requisitas, nimirum prioritatem, eminentiam & influxum, ex natura sua & physicè; sed ex divina ordinatione qua Deus instituit Christum caput Ecclesiæ: ergo gratia habitualis non est forma quæ actu & formaliter constituit Christum caput Ecclesiæ; sed tantum fundamentaliter. Idem dico de gratia unionis.

Confirmatur: Gratia habitualis non sanctificat formaliter ex natura rei, nec physicè, sed solum ex divina ordinatione statuente qualitatem gratiæ talem præstare effectum, ut in proprio loco diximus cum omnibus Scotistis, qui unanimi consensu docent gratiam habitualement non constituere nos Filios Dei adoptivos, nec membra Christi physicè; sed moraliter: ergo eadem gratia nequit ex se instituere Christum caput Ecclesiæ; subindeque Christus est caput hominum & Angelorum formaliter & actu per quamdā dignitatem aut potestatem, quam Deus ei contulit in Angelos & homines, & per quam subjecit omnia sub pedibus ejus.



## DISPUTATIO XIII.

### *De scientia beata anime Christi.*

**B**revitatis gratia omitto disputationem de scientia Christi in communi, quia quæris dumtaxat, an intellectus humanus Christi intellexerit per intellectionem increatam & divinam, & an sic intelligere potuerit? unde sit

## Q U Æ S T I O . I.

*An Christus, dum esset viator & in terris degens, scientiam beatam habuerit, illamque à primo conceptionis instanti receperit?*

**S**uppono 1. tamquam de fide certum, in Christo fuisse scientiam seu intellectionem creatam, quia in Christo sunt duo intellectus, sicut duæ voluntates & duæ naturæ. 2. Intellectum humanum Christi non potuisse etiam de potentia absoluta per increatam Dei intellectionem intelligere. Tum quia constat ex D. Aug. lib. 5. contra Julianum. Tum quia intellectus creatus qui naturalis est, nequit habere operationem substantiæ supernaturalis, cum operari sequatur esse.

Dico 1. Christum adhuc viatorem & in terris degentem, vidisse divinam essentiam, subindeque habuisse scientiam beatam. Tum quia patet ex illo Joan. 17. *Pater quos dedisti mihi, volo ut ubi ego sum, & illi sint mecum, ut videant claritatem meam quam dedisti mihi*, & ex aliis similibus. Tum quia Christus fuit causa meritoria sanctitatis hominum: ergo fuit perfectior in via aliis hominibus, & consequenter beatus. Tum quia cum Christus esset Deus & homo, congruum erat, ut humanitas videret intuitivè Deum cui erat hypostaticè unita.

Dico 2. Christum scientiam beatam, seu visionem beatificam à primo instanti conceptionis habuisse. Tum quia hoc spectat ad majorem dignitatem & excellentiam Christi. Tum quia habebat gratiam sanctificantem, quæ requiritur ad consummationem, seu ad gratiam consummatam, quæ est beatitudo. Tum  
quia

quia colligitur ex Ps. 64. *Beatus quem elegisti & assumpsisti*: sed humanitas fuit assumpta ab instanti conceptionis: ergo & in eodem instanti fuit beata.

Dices 1. Joan. 17. habetur, *Clarifica me Pater claritate quam habui, priusquam mundus esset apud te*. Et Luc. 23. *Nonne oportuit Christum pati, & ita intrare in gloriam suam*? Ergo Christus ante Passionem non videbat intuitivè Deū, nec erat beatus; aliàs non dixisset *Clarifica me &c.* Resp. negando consequentiam, quia hæc & similia Scripturæ verba, intelligenda sunt de claritate, gloria & exaltatione nominis & corporis Christi, quam Christus non habuit nisi in morte & Passione, ut suadet illud Pauli, *Propter quod & Deus exaltavit illum, & donavit illi nomen, quod est super omne nomen*.

Dices 2. Christus in terris degens habuit tristitiam: ergo non fuit beatus, quia tristitia est prorsus incompatibilis cum beatitudine. Resp. negando consequentiam, quia Christus reapse tristis fuit in via; sed secundum partem inferiorem, & hoc ex divina dispensatione, non verò secundum partem superiorem, secundum quam semper habuit summum gaudium ac æternam fœlicitatem.

Hic obiter observa pro majori responsionis intelligentia, duplicem esse animæ portionem: superiorem videlicet & inferiorem, ut monent communiter omnes Doctores, quin tamen portio superior & portio inferior intellectus (item portio superior & inferior voluntatis) sint duæ potentia distinctæ: sic docet Scotus in 2. dist. 24. quæst. unica. Ubi etiam docet, quod portio superior & inferior distinguuntur penes diversa objecta; nam dum facultates animæ, nimirum intellectus, voluntas & memoria occupantur aut versantur circa æterna & spiritualia, tunc anima agit secundum portionem superiorem: quando autem eadem facultates ani-

mæ

mæ versantur circa temporalia & humana, tunc anima agit secundum portionem inferiorem. Ratio hujus divisionis est, quia ut inquit D. Augustinus apud Doctorem loco citato §. est igitur, portio superior intendit regulis æternis & superioribus contemplandis, inferior autem intendit temporalibus agendis secundum regulas æternas.

Unde Christus secundum portionem inferiorem, scilicet quatenus facultates animæ ipsius occupabantur circa temporalia & humana, erat tristis; & quatenus eadem facultates versabantur circa æternam, spiritualia & divina, habebat summum gaudium, hoc est, secundum portionem superiorem: nec implicat, quod tristitia & gaudium, & præsertim ex divina dispensatione, sint simul in eodem subjecto circa diversa objecta; cum de facto fuerint in Christo, qui delectabatur de morte ut utili ad redemptionem hominum, & tristabatur de illa prout dissona naturæ.

## Q U Æ S T I O II.

*An anima Christi per scientiam beatam omnes creaturas possibles in essentia divina cognoscat?*

**D**ico, quod anima Christi per scientiam beatam cognoscit in divina essentia omnes creaturas possibles. Prob. 1. ex Goneto tom. 1. tract. de visione: Beati vident aliquas creaturas possibles; ergo Christus videt omnes. Prob. consequentia: Quia Christi scientia est major scientiæ seu cognitione beatorum; imò est positivè summa ex possibilibus respectu omnipotentia Dei, sicut gratia; sed non potest esse

esse positivè summa ex possibilibus, quin attingat omne id, quod per scientiam potest attingi, puta actualia, futura &abilia; & elevet intellectum humanum Christi ad cognitionem omnium cognoscibilium, quemadmodum gratia habitualis elevat animam ad omne meritum: ergo &c.

Confirm. Beatus qui videt aliquas creaturas posibles, videt illas, quia essentia divina quæ est objectum voluntarium, eas ipsi repræsentat secundum ejus merita, vel secundum speciale beneplacitum Dei? Si primum: ergo Christus videt omnes, quia dato, quod beatus videat aliquas propter merita, cum merita Christi sint ex Gonetointrinsecè infinita, meretur videre omnia possibilea. Si secundum; etiam videt omnes creaturas posibles, quia beneplacitum Dei erga Christum est positivè summum ex possibilibus: ergo si creaturæ posibles, cognoscibiles sint ab intellectu creato, Christus eas cognoscit.

Prob. 2. Quilibet beatus videt omnia quæ ad proprium statum beatificum pertinent, ut fateatur Gonet tom. 1. sed ad statum beatificum animæ Christi spectat cognitio omnium possibileum: ergo &c. Prob. minor 1. Christus est finis & Dominus universorum, caput & Judex omnium hominum. 2. Deus omnia subjecit sub pedibus ejus, ut ait Scriptura. 3. Anima Christi cognoscit aliquam creaturam possibilem, aliàs nihil eorum quæ Deus cognoscit scientia simplicis intelligentiæ, cognosceret; quod est falsum: ergo omnes creaturæ posibles pertinent ad proprium statum beatificum Christi, ideòque videntur omnes ab ipso.

Prob. 3. Non est ponendus terminus in cognitione Christi erga creaturas posibles, ita ut cognoscat aliquas, & alias ignoret: ergo dato, quod cognoscat aliquas, cognoscit omnes. Prob. antecedens 1. *In ipso*, id est, in Christo

sto sunt omnes thesauri scientiæ & sapientiæ, Dei; ut ait Apost. ad Coloss. 2. quod non potest intelligi nisi ex parte objectorum: ergo. 2. Joan. 3. dicitur Deum non dedisse Christo spiritum, id est cognitionem, ad mensuram; si enim Christus non cognosceret omnia possibilia; sed tantum aliqua, spiritus esset illi datus ad mensuram: ergo &c. 3. Satisfactio Christi est sufficiens pro peccatis hominum possibilem: ergo cognitio Christi attingit possibilia. Prob. consequentia: Christus cognoscit perfectè & distinctè virtutem suæ Passionis: ergo cognoscit homines posibles pro quibus est sufficiens.

Obj. Gonetus: Cognitio omnium possibilem in divina essentia cognita, est divinæ essentiæ comprehensio: sed implicat intellectum creatum, & consequenter intellectum animæ Christi, Dei essentiam comprehendere: ergo & omnia possibilia in eo cognoscere. Minor patet, major autem in qua est difficultas, sic ostenditur: Eo modo unum in alio cognoscitur, quo in illo continetur; sed creaturæ continentur in Deo ut effectus in causa: ergo in illo cognoscuntur sicut effectus in causa; sed cognitio omnium effectuum in aliqua causa ex vi cognitionis illius, est causæ comprehensio: ergo cognitio omnium possibilem in divina essentia cognita, est divinæ essentiæ comprehensio. Minorem subsumptam probat S. Doctor: Quantò perfectior cognoscitur causa, tantò plures effectus cognoscuntur in illa: ergo non possunt effectus alicujus causæ cognosci ex vi cognitionis causæ, nisi in causa, cognita omni perfectione possibili; sed cognitio causæ perfectæ omni perfectione possibili, est illius comprehensio: ergo cognitio omnium effectuum in aliqua causa, est ipsius comprehensio.

Resp. negando majorem, ut expressè patet tom. I. tract. de visione, disp. 5. quæst. 4. Ad prob.


prob. concessio fillogismo, nego subsumptum; quia ut cognitio causæ sit comprehensio ejusdem, præter effectus in ipsa causa contentos, oportet quòd attingat omnes gradus perfectionum ejus intensivè, & absolutè consideratos, quos tamen anima Christi non videt, licèt omnia possibilia videat. Ad prob. nego consequentiam; quia cognitio effectuum, est cognitio causæ, sed non est comprehensio ejusdem; alioquin beati qui Deum & creaturas existentes vident, comprehenderent Deum: ergo licèt quantò perfectiùs cognoscitur causa, tantò plures in illa cognoscantur effectus, tamen non comprehenditur, cum cognitio non sit comprehensio, quamvis comprehensio sit cognitio. Vide in 1. loco suprà citato.

*Quæres*, an scientia beata Christi ad omnia præsentia, præterita & futura se extendat? Resp. affirmativè. Tum quia cognoscit possibilia, seu ea quæ Deus attingit per scientiam simplicis intelligentiæ, ut probat quæstio præcedens: ergo cognoscit etiam ea quæ attingit per scientiam visionis, seu præterita, præsentia & futura, cum non sit major ratio. Tum quia hoc spectat ad excellentiam Christi. Tum quia beati vident in Verbo totum universum, prout includit suas partes principales, & ea quæ pertinent ad proprium statum, ut dictum est in primo tomo: ergo etiam Christus videt hæc omnia quæ Deus videt per scientiam visionis.

*Dices*; Hæc propositio Arnaldi de Villanova Medici, *Quàm citò anima Christi fuit unisa divinitati, statim ipsa anima scivit omnia quæ Deus scit*, fuit damnata in Directorio Inquisitorum 2. p. quæst. 11. ergo &c. Resp. negando consequentiam, quia propositio fuit damnata propter fundamenta Arnaldi; ille enim Doctor existimabat nullam aliam cognitionem fuisse in Christo, præter increa-  
tam

tam Verbi, quod errorem Monothelitarum redolebat.

Dato enim & non concesso, quòd in Christo nulla sit cognitio nisi cognitio increata Verbi, inde sequitur Christum non habere aliam volitionem, nisi volitionem increatam Verbi, ut est manifestum: quippè sancti Patres Monothelitarum hæresim impugnant ex eo, quòd in Christo sit duplex natura, & duplex cognitio, ac proinde duplex etiam debet esse volitio in Christo: ergo fundamentum Arnaldi de Villanova Medici, nempe nullam aliam cognitionem fuisse in Christo præter increatam Verbi, redolet errorem Monothelitarum; cum ex ipso sequatur unam dumtaxat esse in Christo voluntatem; quod damnatum fuit in plurimis Conciliis contra Monothelitas.



## DISPUTATIO XIV.

*De scientia infusa anime Christi.*

Cum præter scientiam beatam qua Christus cuncta videt, detur scientia infusa, illa considerata, modò examinanda est ista; unde sit



## QUÆSTIO I.

*An omnia objecta naturalia, ab anima Christi per scientiam infusam supernaturalem, distinctè & in particulari cognita fuerint?*

**S**uppono 1. tamquam certum, id quod Gonetus resolvit in prima quæst. hujus disput. quam omitto, nempe præter scientiam beatam, fuisse in anima Christi Domini scientiam per se infusam, quæ nimirum per species à Deo infusas cognovit res in genere proprio. Tum quia non pugnat cum scientia beata, cum de facto ambæ sint in beatis. Tum quia in Christo sunt omnes thesauri scientiæ & sapientiæ Dei. Tum quia est perfectio. Tum quia Christus cognoscit res creatas in proprio genere per species immediatè infusas à Deo, ut probat illud Joan. 7. *Quomodo hæc litteras scit, cum non didiceris?* ergo datur in Christo scientia per se infusa. Nec valet dicere scientiam per se infusam esse superfluum, ubi est scientia beata, quæ cum sit perfectior, omnia attingit; non valet (inquam) quia licet scientia beata sit perfectior, non habet tamen modum cognoscendi scientiæ infusæ, nec perficit intellectum in genere in quo ipse intellectus per scientiam beatam attingit omnia in Verbo, & per infusam extra Verbum & in proprio genere: ergo non est superflua.

Suppono 2. Scotum non negare Christum per scientiam inditam, res naturales distinctè & in particulari, seu secundum rationes individuales & numericas cognovisse, ut existimat Gonet. sed tantum Christum cognovisse eas in particulari & secundum rationes individuales per species

cies universales, ut patet in tract. de Angelis; unde cum Gonetus hic hanc quæstionem agit: tam in 2. tom. tract. de Angelis, disp. 9. qu. 3. nempe, an res singulares cognoscantur per species universales? minimè tractet, Doctorem nostrum non impugnatur.

Dico igitur 1. Christum per scientiam infusam cognovisse omnia objecta naturalia, tam secundum rationes communes & genericas aut específicas, quàm secundum propriam & distinctam cujusque individui rationem, in sensu explicato, seu per species universales cognovisse objecta secundum rationes communes; & per species particulares, secundum propriam & distinctam cujusque individui rationem. Prob. Christus habuit omnes perfectiones, ad quas intellectus humanus est in potentia obedientiali. Tum quia Christus habuit omnes perfectiones creaturis possibiles. Tum quia habuit in voluntate gratiam positivè summam; sed intellectus humanus animæ Christi est in potentia obedientiali ad speciem infusam respectu omnium intelligibilium: ergo habet species infusas omnium objectorum naturalium. Prob. minor: Species infusæ intelligibilium sunt in Angelis: ergo intellectus Christi qui omni perfectione potitur, est in potentia obedientiali respectu omnium intelligibilium, subindequæ cognoscit ea, tam quoad rationem communem, quàm quoad rationem individualement, cum hæc cognitio ducat ad perfectionem animæ Christi.

Dico 2. Christum per scientiam infusam cognoscere quidditative omnia dona supernaturalia quæ de facto sunt. Tum quia species entium supernaturalium potest infundi, & perficere subiectum absque ulla contradictione aut repugnantia, cum ut constat, tendat ad perfectionem intellectus: ergo est in Christo. Tum quia per scientiam infusam cognoscit entia naturalia in

proprio genere & extra Verbum : ergo cognoscit supernaturalia, cum non sit potior ratio, ut notat Petrus Fulienſis in idea Theologiæ ſpeculativæ.

*Dices 1.* Unus & idem intellectus nequit ſimul elicere duas operationes circa unum & idem objectum: ergo cum intellectus Chriſti per ſcientiam beatam cognoſcat objecta naturalia tam ſecundum rationem communem, quam ſecundum rationem individuaſem, non cognoscit ea per ſpecies infuſas, ſive communes, ſive individuales. *Reſp.* diſtinguendo antecedens: Unus & idem intellectus nequit elicere duas cognitiones aut operationes adæquatas circa unum & idem objectum, concedo; inadæquatas, quarum una ſubordinetur alteri; nego antecedens & conſequentiam: quia cognitio per medium infuſum, qua intellectus Chriſti cognoscit v. g. Petrum, eſt adæquata, dum idem Petrus cognoscitur per ſcientiam beatam, cui ſubordinatur. *Inſtabis;* Sciētia beata debet excludere ſcientiam infuſam, quia majus lumen excludit minus. *Nego* inſtantiam, quia ſcientia beata & ſcientia infuſa non ſunt in eodem ordine, cum una ſit cognitio objecti in Verbo, & alia extra Verbum & in proprio genere.

*Dices 2.* Si Chriſtus habuiſſet ſpecies omnium rerum, de facto ſimul omnia cognoviſſet: ſed hoc eſt falſum: ergo. *Reſp.* negando ſequelam majoris, quia intellectus humanus cognoscit ſecundum ſuam virtutem naturalem; unde cum in Chriſto, intellectus ſit virtutis finitæ, non poteſt ſe convertere ad percipiēda quæcumque objecta ſimul; ſed modò unum, modò aliud, licet habeat ſpecies omnium, ut patet in Angelis.

*Dices 3.* Dona ſupernaturalia, putà lumen gloriæ, viſio beatifica, &c. excedunt quodlibet aliud lumen creatum, & ſunt ſuperioris ordinis ad illud: ergo non poſſunt cognosci ab intellectu

Et Christus per scientiam infusam, quæ est lumen creatum. Resp. negando consequentiam: Non enim implicat, quod res altioris ordinis, per lumen inferioris ordinis apprehendantur & cognoscantur, ut constat de Deo, qui per lumen gloriæ intuitivè cognoscitur.

*Dices* 4. Si Christus per scientiam infusam potuisset cognoscere ea quæ excedunt lumen creatum, videlicet lumen gloriæ, visionem beatificam, &c. cognovisset per eandem scientiam visionem elicitam tam à se, quam ab aliis beatis: sed hoc est falsum, quia per eandem scientiam cognovisset intuitivè objectum visionis beatificæ, putà Deum ut authorem gloriæ, quod est improbable: ergo per scientiam infusam non cognovit omnia dona supernaturalia quæ de facto sunt.

Respondeo negando minorem & probationem ejus, nimirum inde sequi Christum per scientiam infusam cognoscentem visionem beatificam ab aliis beatis elicitam, cognoscere etiam Deum ut authorem gloriæ; quia qui videt medium quo percipitur objectum, non percipit objectum illud intuitivè, ut diximus in primo tomo de specie impressa Dei, quam ibi possibilem defendimus. Ratio est, quia medium quo non est ratio repræsentativa, sed solùm ratio repræsentandi; visio non est ratio repræsentativa Dei, sed ratio videndi, aut id quo videmus, non autem id quod videmus: ergo potest cognosci, quia Deus cognoscatur intuitivè.

## Q U Æ S T I O II.

*An anima Christi per scientiam infusam supernaturalem, cogitationes cordium occultas, & futura contingentia cognoverit?*

**D**ico, quòd anima Christi per scientiam infusam supernaturalem, occultas cordium cogitationes, & futura cōtingentia cognovit. Prob. 1. pars. Tum quia constat ex sacra Scriptura Matth. 9. *Cum vidisset Iesus cogitationes eorum, dixit, Ut quid cogitatis mala in cordibus vestris?* Et cap. 12. *Iesus autem sciens cogitationes eorum.* Item Joan. 21. cum Christus interrogasset Petrum his verbis, *Simon Ioannis amas me?* respondit Petrus & dixit ei, *Domine tu nosti omnia, tu scis quia amo te.* Tum quia est iudex omnium actionum, verborum & cogitationum nostrarum, juxta illud Joan. 1. *Pater non iudicat quemquam, sed omne iudicium dedit Filio:* ergo cognoscit cognitiones nostras.

*Dices 1.* Christus cognoscebat cogitationes cordium per scientiam beatam: ergo non cognoscebat eas per scientiam infusam. Resp. negando consequentiam, quia cognoscere per scientiam beatam & per scientiam infusam, sunt duo modi cognoscendi diversi, quorum unus non officit alteri, & ambo tendunt ad perfectionem, ut ex dictis patet: ergo uterque est Christo concedendus.

*Dices 2.* Angeli non cognoscunt cogitationes cordis humani, ut dictum est in 2. tomo: ergo Christus ut homo nequit eas cognoscere. Resp. negando consequentiam, quia Christus est caput Angelorum & hominum, & iudex omnium actionum nostrarum: ergo congruum est quòd cognoscat corda nostra. *Instabis:* Soli Deo

com-

competit cognitio cogitationum & affectuum cordis, ut patet ex illo Jerem. 17. *Pravum est cor hominis & inscrutabile, & quis cognosceret illud? Ego Dominus scrutans corda.* Resp. Cognitionem cogitationum convenire soli Deo ex propria perfectione intrinseca & naturali, Christo autem ex privilegio speciali: Deus enim voluit conferre Christo propter ministerium ad quod destinabatur, cognitionem cogitationum cordis humani, quam denegavit Angelis & hominibus.

Prob. 2. pars. Tum quia patet in sacra Scriptura Matth. 26. *Antequam gallus cantet, ter me negabis.* Et Luc. 10. *Vae tibi Corosain, & tibi Bethsaida, quia si in Tyro & Sydone factae fuissent virtutes quae factae sunt in vobis, olim in cilicio & cinere poenitentiam egissent.* Et Joan. 14. n. 29. *Et nunc dixi vobis priusquam fiat, ut cum factum fuerit credatis.* Tum quia futurum contingens est ens cognoscibile. Tum quia cognitio futurorum contingentium pertinet ad perfectionem prudentiae; vir enim prudens debet praevidere futura, idcirco Christus qui fuit vir prudens, cognovit futura. Tum quia cognitio futurorum spectabat ad statum & ministerium Christi, qui erat Propheta magnus: ergo cognoscebat futura.

Dices; Scotus in 3. dist. 14. §. ad questionem, litt. C. in fine ait, *Et si dicatur, quod potuit hanc habere per species infusas, hoc est falsum: ibi enim Doctor quaerit, an Christus noverit omnia in genere proprio, & concludit negativè de futuris contingentibus: ergo nostra conclusio adversatur Doctori.* Resp. cum Frassenio & aliis recentioribus, Doctorem ibi loqui de cognitione intuitiva futurorum contingentium, quae non potest haberi per speciem, ut patet ex verbis praecedentibus, quae sunt haec, *Ideò cum multa objecta non fuerint, nec esse potuerint praesentia illi intellectui secundum existentiam actualem illo-*

*rum, non potuit habere notitiam intuitivam: non verò de cognitione abstractiva, de qua agimus, quæ per speciem haberi potest, ut probat Doctor.*

*Quæres 1.* Quomodo anima Christi per scientiam supernaturalem infusam, futura contingentia cognoscat, & an cognoscat creaturas possibles? *Resp.* ad 1. quòd cognoscit futura immediate in seipsis per speciem repræsentativam illorum. Tum quia non cognoscit ea in causa, quia est indifferens ex se ad producendos vel non producendos effectus contingentes; nec in decreto divinæ voluntatis determinantis futuritionem; quia per scientiam beatam cognoscit futura contingentia in essentia divina; idcirco cum objecta debeant aliter cognosci per scientiam infusam quàm per beatam, non cognoscuntur in essentia divina per scientiam infusam: ergo cognoscit ea immediate in seipsis. Tum quia ens ut futurum, est intelligibile in seipso: ergo Christus cognoscit illud immediate in seipso; cum per proprias species cognoscat omnia ea quæ per proprias species sunt in seipsis repræsentabilia.

*Resp.* ad 2. quòd per scientiam infusam cognoscit extra Verbum omnes creaturas possibles. Tum quia habere potuit species infusas possibilem. Tum quia in ipso sunt omnes thesauri sapientiæ & scientiæ Dei. Tum quia ex cognitione possibilem non sequitur comprehensio Dei, ut dictum est suprà contra Gonetum: ergo Christus per scientiam infusam cognovit omnes creaturas possibles.

Argumenta quæ solitò ab adversariis proponuntur contra hanc responsionem, soluta manent in quæstione secunda præcedentis disputationis, ubi resolutum manet Christum per scientiam beatam videre omnes creaturas possibles; ideoque non sunt hic iterùm proponenda.

## Q U Æ S T I O III.

*An Christi anima per scientiam infusam, evidenter cognoverit mysterium Trinitatis, quoad an est?*

**D**ico, animam Christi per scientiam inditam cognoscere mysterium Trinitatis quoad an est? idque evidenter, evidentia non in attestante, sed per speciem infusam, in qua quidditative visionem suam beatam extra Verbum contemplatur. Prob. Tum quia Christus per scientiam infusam cognoscit quidditative entia supernaturalia creata, quæ dicunt habitudinem transcendentalem ad Deum ut unum & trinum: ergo cognoscit Deum ut trinum. Tum quia Angeli, ut docet Scotus in 2. dist. 9. qu. 2. in sua creatione habuerunt cognitionem mysterii Trinitatis: ergo talis cognitio est concedenda Christo ut viatori: nam ut viator sæpè locutus est de mysterio Trinitatis, ut Judæos instrueret; & ut viator Deum ut trinum adoravit, quod sine ejus cognitione præstare non potuit, & consequenter cognovit mysterium Trinitatis per scientiam infusam, quoniam scientia beata, per quam anima Christi cognoscit Trinitatem, non competebat ipsi ut viatori; sed ut comprehensori: ergo in Christo in quo sunt omnes perfectiones, fuit species infusa in qua cognoscebat mysterium Trinitatis & alia mysteria. Contra hanc conclusionem nullum proponi potest argumentum, quod non pugnet possibilitatem speciei impressæ Dei: Unde non sunt hic iterum proponenda argumenta, cum soluta maneant in 1. tom.

*Quæres I.* An scientia infusa animæ Christi fuerit discursiva, & perfectior scientia Angelorum? Resp. affirmative. Ratio primi est, quia anima Christi per scientiam infusam potuit ha-



bere cognitionem unius rei ortam ex cognitione alterius, quia ex cognitione causæ potuit cognoscere effectum, nempe hominem esse risibilem quia est rationalis: potuit etiam scientia infusa uti discurrendo, ut docet Gonet. ergo fuit discursiva reverà non quoad acquisitionem, ut optimè notat Gonetus, sed quoad usum. Ratio secundi est. Tum quia conducit ad maiorem excellentiam Christi. Tum quia gratia Christi est major gratia Angelorum. Tum quia Christus est magister omnium. Tum quia Christus est Angelorum caput & rex. Tum quia Christus est unigenitus Dei Filius: ergo scientia infusa Christi est major scientia infusa Angelorum.

*Quæres 2.* An Christus per scientiam infusam potuerit intelligere sine conversione ad phantasmata? Resp. quòd potuit pro voluntatis suæ arbitrio, ut ait Mastrius, quia poterat uti scientia infusa per recursum ad phantasmata, & independentè ab ipsis: habebat enim duplicem modum intelligendi, scilicet comprehensorum & viatorum; idcirco poterat intelligere modo quo beati intelligunt independentè à sensibus, & modo quo viatores intelligunt dependentè à phantasmatibus.

*Quæres 3.* An scientia infusa Christi fuerit actualis, vel habitualis? *Respondeo*, quòd erat habitualis permanens in intellectu per modum qualitatis concurrentis cum intellectu Christi ad cognitionem actualem. Id inferri potest ex responsione ad præcedens dubium; nam Christus pro libito utebatur scientia infusa: ergo talis scientia erat habitualis, quæ est illa per quam sciens est tantùm in actu primo, & utitur tali scientia pro voluntatis suæ arbitrio, alioquin intellectus Christi non potuisset suspendere actum, seu cessare ab actu cognitionis per scientiam infusam, quod est falsum; quia in Christo modus intelligendi ex-  
tra

DE INCARNATIONE. 273  
tra visionem beatificam, est operari modo humano, seu voluntario & libero.



## DISPUTATIO XV.

*De scientia Christi acquisita.*

**V**Isis omnibus quæ de scientia beata & de scientia infusa dicuntur, modò examinanda sunt ea quæ ad scientiam acquisitam spectant.

---

### QUÆSTIO I.

*An præter scientiam beatam & infusam, constituenda sit in anima Christi Domini scientia per se acquisibilis?*

**S**uppono tamquam certum, scientiam per se acquisibilem esse illam quæ tamen de facto à Deo aliquando infundatur, per se tamen & connaturaliter petit nostris actibus acquiri; ad differentiam scientiæ per se infusæ, quæ actibus nostris acquiri non potest, cùm essentialiter petat à Deo infundi. Unde difficultas inter Scotistas & Thomistas non est, an Christus habuerit scientiam per se acquisibilem? liquidò enim constat ex dictis Christum habuisse scientias per accidens infusas, quæ nihil aliud sunt quàm scientiæ per se acquisibiles: sed est, an habuerit illas propriis actibus, labore & industria, ut viatores acquirunt illas, an verò per infusio-

M s nem?

nem? quæ difficultas in quæst. sequenti resolven-  
da est, modò

Dico breviter, quòd constituenda est in ani-  
ma Christi scientia ex genere suo acquisita. Ita  
omnes. Prob. Tum quia constat ex sacra Scrip-  
tura ad Hebr. 5. *Didicit ex his quæ passus est, obedientiam.* Isa. 8. *Antequàm sciat puer vocare patrem & matrem, &c.* Luc. 2. *Puer Iesus proficiebat ætate & sapientia apud Deum & apud homines.* Tum quia hæc scientia conducit ad excellentiam Christi. Tum quia voluntas ejus præter virtutes per se infusas, habuit virtutes per se acquisibiles: ergo intellectus præter scientias per se infusas, habuit scientias per se acquisibiles. Tum quia intellectus humanus Christi Domini, est in potentia ad intelligendum modo humano: ergo per scientias per se acquisibiles.

*Dices:* Scientia acquisibilis aut acquisita non remanet in patria cum visione beata, ut dictum est in 1. tom. ergo nequit esse in Christo in quo est scientia beata. Resp. negando consequentiam, quia dum in 1. tom. dicimus Theologiam seu scientiam acquisitam, non remanere entitativè in patria cum scientia beata, loquimur de scientia acquisita fundata in fide, qualis est Theologia aut scientia mysteriorum, quæ cum necessariò à fide dependeat, sublata fide tollitur scientia; at scientia acquisita de qua hìc loquimur, est independens à fide, cum in Christo nulla fides reperiatur: idcirco optimè remanere potest in patria, simul cum visione beatifica.

Respondeo iterum concessio antecedente, negando consequentiam alia ratione; nimirum quia Christus erat viator & comprehensor: ergo licèt scientia acquisita non remaneat in patria cum comprehensoribus, potest nihilominus remanere in Christo, quia est, viator: nam, si in patria non perseveret, hoc est, quia beati

beati non sunt viatores; subindeque scientia acquisita potuit esse in Christo cum scientia beata, sicut in ipso status viatorum est cum statu comprehensorum.

*Dices 2.* Scientia acquisita est valdè imperfecta. Tum quia paulatim & successivè gigni petit. Tum quia attingit res spirituales imperfectè, seu ad modum rerum materialium: ergo non potuit esse in Christo cui repugnat imperfectio. Nego antecedens, ad cujus probationes dico successionem in acquisitione scientiæ humanæ non importare imperfectionem simpliciter simplicem, quia hoc congruit homini, cui melius est scientiam acquirere, quàm non acquirere: ergo potuit esse in Christo, qui erat homo viator.

---

## Q U Æ S T I O II.

*An Christus scientias per se acquisibiles, propriis actibus sibi comparaverit, vel eas à Deo per infusionem receperit?*

**D**ico, quòd Christus scientiam per se acquisibilem propriis actibus non sibi comparavit, sed eam solùm à Deo per infusionem recepit. Prob. 1. Datur in Christo scientia ex genere suo acquisita, ut docet Gonet. quæst. præced. ergo est in ipso per infusionem & independentem à phantasmatibus, non verò comparata actibus propriis per abstractionem specierum à phantasmatibus. Prob. consequ. 1. ex D. August. 15. de Trinit. quem refert Mastrius tom. 3. disput. 4. n. 56. Necessitas nostra intelligendi dependentem à phantasmatibus, est in nobis propter peccatum Adæ; in ejus enim pœnam datus est hic infirmus intelligendi modus: ideoque existimat

M 6 hunc

hunc statum potius esse pœnalem, quàm naturalem; sed Christus caruit peccato originali: ergo à lege acquirendi scientiam dependenter à phantasmatibus solutus fuit, & consequenter habuit omnem scientiam per infusionem. 2. Beati habent ex vi beatitudinis per infusionem, omnem scientiam naturalem quam in via acquirere non potuerunt; Deus enim infundit ipsis omnem scientiam, ut impleat omne naturale desiderium, quod homo habet, ut communiter dicunt Thomistæ; sed Christus ab instanti conceptionis fuit beatus: ergo ex vi beatitudinis in instanti conceptionis in quo fuit beatus, habuit per infusionem omnem scientiam per se acquisibilem, quam tunc acquirere non poterat. 3. Christus in utero Virginis, perfectum habuit rationis usum; idcirco Jerem. 31. appellatur vir adhuc in utero Virginis, *Mulier circumdabit virum*. Unde D. Bern. hom. 2. super *Misus est*, ait: *Non minor fuit sapientia Iesus conceptus, quàm natus, parvus, quàm magnus*: ergo Christus Dominus habuit in utero Virginis & independenter ab abstractione specierum & in instanti conceptionis, sapientiam aut scientiam quam habuit in cruce; sed Christus ut magnus & in cruce, habuit omnem scientiam per se acquisibilem: ergo habuit etiam illam in utero matris, quod fieri non potuit nisi per infusionem.

Prob. 2. Christum nulla decuit ignorantia aut privatio scientiæ naturaliter debitæ, etiam pro brevissimo tempore. Tum quia in ipso erant omnes sapientiæ & scientiæ thesauri. Tum quia Christus fuit semper plenus scientiæ, juxta illud Joan. 1. *Vidimus gloriam ejus quasi unigeniti à Patre, plenum gratiæ & veritatis*: Quod non debet intelligi de sola scientia infusa, ut putat Gonet. quia fuit plenus scientia beata, quæ non est in linea scientiæ infusæ; ideoque hoc intelligi debet de alia scientia præter infusam. Deinde,

*inde*, scientia per se acquisibilis & experimentalis erat utilis Christo, quatenus erat caput Ecclesiæ & fidejussor noster; at si ab initio conceptionis non habuisset scientias omnes naturales per infusionem à Deo, sed eas paulatim propriis actibus sibi comparasset, habuisset per aliquod tempus imperfectionem ignorantia in ipsa naturali scientia, & privationem illius: ergo Christus ab initio conceptionis recepit à Deo per infusionem scientiam per se acquisibilem.

Resp. Gonet. negando minorem. Tum quia (inquit) Christus ab initio conceptionis per scientiam per se infusam omnia objecta naturalia cognovit. Tum etiam quia carentia scientiæ per se acquisibilis pro aliquo tempore, in Christo non erat ignorantia privativa, sed negativa; quia pro eo tempore non erat ei debita illa scientia, supposita assumptione naturæ in statu infantili; sicut nec erat imperfectio, quod in ætate infantili careret loquela, quia permittebat agere naturæ, quod cujusque status proprium est.

Contra: Christus ab initio conceptionis per scientiam beatam cognovit omnia objecta, nihilominus recepit scientiam per se infusam: ergo recepit scientiam per se acquisibilem, non obstante per se infusa. *Deinde*, carentia scientiæ per se acquisibilis pro omni tempore erat ignorantia privativa: nam pro omni tempore etiam in statu infantili, illa scientia erat debita Christo. Tum quia intellectus ejus erat aptus natus ad habendam scientiam per se acquisibilem. Tum quia non minus erat debita ipsi scientia acquisibilis, quam virtus moralis per se acquisita; sed si non recepisset virtutes morales acquisitas, fuisset in privatione perfectionis: ergo. Idem dico de scientia. Tum quia in cōceptione, Christus fuit perfectior & dignior in genere cognitionis per specierum  
ab.

abstractionem acquisitæ, quàm puer qui modò nascitur, ut est evidens? ergo vel habuit scientiam acquisitam, vel si non habuerit illam, non fuit in negatione sicut puer, sed in privatione, quia negatio est pejor privatione, cum omnis negatio sit maligna. *Tandem*, propter unionem hypostaticam plus debebatur in ordine naturali intellectui humano Christi, quàm intellectui purè humano: ergo dato quòd scientia acquisita non sit debita homini in statu infantili, est debita Christo; & consequenter si ab initio conceptionis non habuisset scientias omnes naturales per infusionem à Deo, habuisset per aliquod tempus imperfectionem ignorantie privativè, licèt carentia loquelæ in statu infantili non fuerit imperfectio. Ratio discriminis est, quia loquela consistit in actibus potentie corporis; unde quia potentie corporis non erant apte ad usum in statu infantili, Christus non erat in ignorantia privativa; at intellectus erat aptus ad cognitionem objectorum per speciem acquisibilem: non enim minor fuit sapientia Iesus conceptus, quàm natus, nec parvus, quàm magnus, ait D. Bernar. *Deinde*, erat aptus ad cognoscendum Deum per scientiam beatam: ergo &c.

Prob. 3. Christus ut homo non est Filius Dei adoptivus, nec extraneus, ut docet Gonet. infra: ergo habet immediatè à Deo Patre omne bonum intellectuale quo gaudet, & quod nos qui extranei sumus, per laborem, industriam & studium nobis comparamus; sed comparamus nobis scientiam naturalem per se acquisibilem: ergo Christus habuit illam à Deo Patre tamquam hæreditatem per infusionem, ut ratione scientie præ cæteris excelleret, & esset in primo instanti reali conceptionis sapientior in omni genere scientie & modo sciendi, omnibus hominibus; sed non fuisset sapientior Virgine Maria, B. Iosepho & aliis in genere scientie per se acquisibilis, ut patet, si non recepisset ab initio  
con-

conceptionis scientiam illam per infusionem : ergo eam recepit, cū pro omni tempore fuerit sapientior in omni scientia. Tandem, infusio scientiæ per se acquisibilis cedit in excellentiam Christi, ut patet ex dictis: ergo est ipsi concedenda.

Obj. 1. Si Christus scientiam per se acquisibilem, propriis actibus non acquisivit, sed eam solum per infusionem à Deo accepit, sequitur intellectum agentem Christi fuisse omninò otiosum & frustraneum; sed hoc non est dicendum: ergo nec illud. Sequela prob. Proprium officium intellectus agentis, est facere species intelligibiles actu, abstrahendo eas à phantasmatibus, ut docent Philosophi in lib. de anima: ergo si intellectus agens animæ Christi species aliquas non abstraxit à phantasmatibus, sed omnes Christus à Deo per infusionem accepit, erit omninò otiosus & frustraneus: frustrà enim est id quod non habet propriam operationem, ut dicitur 2. de cælo text. 17. cū unum quodque sit propter suam operationem. Hæc ratio (inquit) nedūm probat fuisse in anima Christi species propriis actibus comparatas, sed etiam ipsum habitum scientiæ.

Resp. negando sequelam. Tum quia ex tunc & pro tunc agibilitas perficiebat ipsum intellectum, cū officium intellectus agentis sit etiam perficere naturam. Tum quia intellectus agens fuit in Adamo, quamvis habuerit per infusionem species acquisibiles, nec tamen dicitur in eo otiosus & frustraneus. Tum quia potentia pro quocumque statu non dicitur otiosa & frustranea, quæ ex se habet vim producendi suum actum, nisi illum ab alia causa jam productum haberet; v. g. Theologia acquisita, ex Gonetoremanet in beatis cum visione beatifica cui subordinatur, & in qua eminenter continetur; tamen non est otiosa, nec frustranea, quia redderet  
intel-




intellectum beati scientem, nisi per visionem beatificam sciens esset: Facultates nutritiva & augmentativa erunt in corporibus gloriosis, in quibus tamen nullam operationem exercebunt, nihilominus non erunt otiosæ nec frustraneæ, quia habebunt productum perfectum actum: ergo intellectus agens in Christo non est otiosus nec frustraneus, quamvis nullam speciem intelligibilem faciat, cum habeat virtutem faciendi eam, eamque faceret, nisi Deus ipsi illam indidisset. Tum denique quia ut advertit Frassen, intellectus agens deservire poterat ad excipiendas & formandas species deservientes ad experimentalem cognitionem, in qua Christus poterat proficere.

Obj. 2. Christo non solum sunt tribuendæ omnes scientiæ, sed etiam quælibet illarum secundum proprium & connaturalem modum habendi illam; sic enim non solum est perfectus per diversas scientias atque perfectiones, verum etiam & diversis modis: Sicut ergo Christus habuit scientiam beatam secundum proprium modum illius, scilicet permanenter, & non tantum transeunter, ut aliqui in via habuerunt; & sicut habuit scientiam per se infusam secundum modum proprium illius, scilicet per infusionem: Ita scientiam humanam seu natura sua acquisibilem habere debuit modo humano, scilicet per acquisitionem, non verò eam solum per infusionem à Deo recipere. *Addit*, quòd cum Christus ad paupertatem nostram ultrò ac volens se dimiserit, omnia quoque nobis connaturalia, quæ statum ejus non dedecerent, admisit; sed connaturalis homini acquirendæ scientiæ naturalis modus est per actus proprios, & per abstractionem specierum à phantasmatibus eam sibi comparare: ergo Christus hoc etiam modo scientias per se acquisibiles sibi comparavit, atque verè in eis profecit, quod voluisse S. Lucam, cum dixit Christum profecisse sapientia & ætate, docet S. Am-

Ambros. lib. de Incarnationis Dominicæ Sacramento, cap. 7. D. Thom. S. August. lib. 3. contra Maximinum cap. 23. Beda, quorum verba sileo brevitatis gratia.

Resp. 1. quòd si argumentum valeret, probaret utique virtutes morales per se acquisibiles, Christo non fuisse à primo instanti conceptionis infusas, quia Christo non solùm sunt tribuendæ omnes virtutes, sed etiam quælibet illarum secundùm proprium & connaturalem modum habendi illam; sed hoc est contra Gonetum suprâ disput. 12. art. 4. §. 2. ergo &c. Resp. 2. negando antecedens, dum potest eam habere modo perfectiori, quàm modus proprius & naturalis, ut in hoc casu contingit; perfectius enim est habere scientias ab instanti conceptionis per infusionem, quàm illas labore & industria acquirere; cùm perfectius sit nunquã caruisse aliqua scientia sibi conveniente, quàm aliquandiu illam non habuisse: ergo omnes scientiæ Christo tribuendæ sunt ab initio conceptionis, & secundùm modum extraordinarium. Tum quia sic digniores sunt. Tum quia Christus dicitur homo novus. *Ad additum*, dico, quòd Christus habuit virtutem paupertatis per infusionem, sicut habuit alias virtutes Evangelicas & morales. Ad Authoritates SS. Patrum, dico, quòd intelligendæ sunt de profectu secundùm manifestationem exteriorrem & sensibilem illius scientiæ, non verò de profectu interno: *Iesus enim proficiebat sapientia & ætate apud homines*, idem est, ac *manifestabat sapientiam & ætatem hominibus*, ut exponunt omnes Doctores nostræ sententiæ.



## DISPUTATIO XVI.

*De potentia animæ Christi.*

**C**ircà potentiam seu virtutem Christi quoad actiones supernaturales, varia fuerunt hæreticorum deliria, de quibus fusè tractat Gonetius.

## QUÆSTIO UNICA.

*An humanitas Christi, seu Christus ut homo, instrumentaliter physicè, vel solum moraliter ad productionem gratiæ & miraculorum, aliorumque effectuum supernaturalium concurrat?*

**S**uppono tamquam certum, Christum non esse causam principalem gratiæ, miraculorum & aliorum effectuum supernaturalium. Tum quia, ut dictum est suprâ in tract. de gratia, Deus est causa principalis gratiæ. Tum quia Christus Joan. 7. ait, *A me ipso non possum facere quidquam*. Sed tantum causam instrumentalem, ut dicunt omnes Theologi contra hæreticos; unde difficultas solum est, an sit causa instrumentalis physica, vel moralis? Pro cuius intelligentia advertendum est instrumentum physicum esse illud, quod physico & reali influxu operatur effectum, motum tamen à causa principali, ut est v. g. serra respectu scissionis, ca-

lamus

latus respectu litteræ, gladius, malleus &c. Morale verò est illud, quod operatur effectum, excitando aliud, ut illum physicè operetur, ut oratio respectu mortis v.g. meritum respectu præmii &c.

Dico, quòd humanitas Christi, sive Christus ut homo non fuit nec est causa instrumentalis physica gratiæ, miraculorum, aliorumque effectum supernaturalium, quæ immediatè per seipsum operatus est; sed tantum moralis. Prob. 1. de gratia: Christus ex D. Thom. q. 8. art. 1. ad 1. non potest esse instrumentum creationis, sive rei creatæ; sed gratia est creata à Deo, ut dictum est in proprio loco: ergo Christus ut homo nequit esse causa physica instrumentalis gratiæ, & consequenter est tantum causa moralis & meritoria. 2. Christus in triduo non erat homo, ut fatetur Gonet cum aliis Theologis; tunc tamen erat causa instrumentalis gratiæ & miraculorum; à mortuis siquidem resurgere, est summa gratia & maximum miraculum; sed non fuit instrumentum physicum, quia instrumentum physicum, ut causet, debet existere, propter quam rationem ex Gonet Christus ut homo non fuit causa physica gratiæ ante creationem incarnationis antiquis Patribus collatæ; sed humanitas Christi, sive Christus ut homo non existerat in triduo; aliàs non fuisset verè mortuus, quod est falsum: ergo tunc non erat causa instrumentalis physica, sed moralis. Nec valet dicere, quod dicit Gonet. de Passione Christi, nempe existere in sua virtute, sive in aliquo effectum, nimirum in cicatricibus gloriosis vulnerum humanitatis Christi; non valet (inquam) quia humanitas in triduo, seu homo vulneratus, non erat, ut est manifestum; aliàs mors non destruxisset totum humanum: ergo humanitas in triduo non remansit in virtute seu in cicatricibus, sicuti modò remanet ejus Passio in eisdem cicatricibus. Deinde,

de, apud Thomistas non remanet forma corporeitatis: ergo nec vulnera quæ sunt in corpore. Hæc conclusio fusiùs probabitur in tomo sequenti, disp. 3. Idcirco brevitatis gratia omittebdæ sunt aliæ rationes, quibus ibi probanda esset hæc conclusio.

Obj. 1. Gonet. ex Scriptura; dicitur enim Joan. 20. quod Christus insufflavìt Apostolis, & dixit eis, *Accipite Spiritum sanctum*; sed conferre Spiritum sanctum, atque adeò gratiam insufflando, est eam physicè causare: ergo &c. Idem dicendum de miraculis: Scriptura enim testatur Christum plura miracula operatù esse per contactum suæ mundissimæ carnis, ut cùm sanavit cæcum à nativitate, liniendo ipsius oculos, & surdum digitos mittendo in aures ejus; item Lazarum resuscitavit, dicendo & clamando, *Lazare veni foras*, ut innueret Verbum divinum tribuere suæ voci virtutem instrumentalem ad illum resuscitandum, juxta illud Psal. 67. *Dabis voci suæ vocem virtutis*. Denique Luc. 6. de Christo dicitur, quod *virtus de illo exibat & sanabat omnes*: Et ipsemet Christus Luc. 8. postquam mulierem sanguinis fluxu laborantem curasset, dixit, *Novi virtutem de me exisse*, quod non potest explicari de virtute morali, quæ cùm merum ens rationis sit, non potest dici nisi valdè improprie & metaphoricè, exire de corpore.

Resp. ad 1. Christum dixisse Apostolis, *Accipite Spiritum sanctum*, non quatenùs erat homo, sed Verbum & Deus. Ratio convincens est, quia Spiritus sanctus non potest dari nisi ab illo à quo procedit. Ad. 2. & 3. dico contactum carnis Christi fuisse causam moralem miraculorum, nimirum quia Deus decrevit hæc signa & miracula facere ad tactum humanitatis Christi, & suscitare mortuos ad vocem & orationem ejus, ut insnuant verba quæ antecedunt, utpote *Lazare veni foras*, quæ sunt ista, *Iesus autem elevatis sursum oculis, dixit, Pater gra-*

*gratias ago tibi, quoniam audisti me*: hæc enim verba indicant resurrectionem Lazari esse effectum meritorum & deprecationis Christi, non verò virtutis physicæ & connaturalis humanitati; sicque intelligi debet illud Psal. 67. *Dabit voci suæ vocem virtutis*; cum vox Christi, ex voluntate divina sic ordinante, habeat vocem virtutis Dei, sicut vox Josue habuit virtutem detinendi Solem. Ad ultimum, dico quòd nomine *virtutis*, non intelligitur aliqua physica causalitas aut influxus physicus, sed ipsummet miraculum à Deo immediatè causatum, Christo invocante & orante, ut patet ex illo Matth. 6. *Si in Tyro & Sydone factæ fuissent virtutes*; hoc est miracula, quæ factæ sunt in te &c. ergo id quod exhibat de corpore Christi, non erat virtus physica productiva miraculorum, sed miracula quæ ex ipso exhibant, sicut ex causa morali.

Obj. 2. ex Conc. Ephes. 1. can. 11. ubi definitur carnem Christi esse vivificatricem propter unionem ad Verbum, quod vitam habet divinam; sed caro Christi nequit esse vivificatrix secundum moralem causalitatem, sive secundum rationem meriti, utpote cum tota ratio meriti ad animam pertineat: ergo solum potest dici vivificatrix ratione virtutis instrumentalis physicæ, ex unionem ad Verbum illi collatæ. Unde notat Cyril. lib. 4. in Joan. cap. 14. quòd Christus in exsuscitandis mortuis non solum verbo atque imperio ut Deus utebatur, verum etiam carnem suam quasi cooperatricem nonnumquam adhibebat, ut constat Luc. 7. cum Filium unicum viduæ Naim resuscitavit: narrat enim Evangelista, quòd Christus ut illum ad vitam revocaret, *Accessit & tetigit loculum*, ut nimirum ostenderet (inquit Cyrillus) carnem quoque suam, quoniam Verbo conjuncta erat, vivificam esse. Euthymius etiam in cap. 7. Luc. miraculosam illius adolescen-

tis

is resurrectionem, & virtutem illam vivificam carnis Christi perpendens, ait, *Quemadmodum ferrum, quod in igne aliquo tempore permansit, habet ignis operationes; ita quoque sancta ipsius Christi caro, divinitatis unita, quæ divinitatis sunt operatur; quod exemplum veram & physicam causalitatem humanitatis Christi in opera miraculosa ab eo elicita, apertè significat.*

Resp. Concilium non definire carnem Christi habere virtutem instrumentalem physicam vivificandi; sed esse carnem Verbi vivificantis, non verò puri hominis: nam Concilium illud fuit celebratum contra Nestorium, ut notat Beccanus, negantem carnem Christi esse hypostaticè unitam divinitati, ut patet ex verbis Concilii apud ipsum Beccanum videndis: ergo non valet inferre ex Concilio aliquam virtutem physicam ad patrandum miracula, fuisse communicatam Christo. Unde ad D. Cyril. dico, quòd caro Christi erat cooperatrix influxum morali, ut v. g. Sacramenta quæ tangunt, licèt sint causæ morales. Ad Euthymium, dico quòd loquebatur de communicatione divinitatis cum humanitate, & suadere intendebat hominem in mysterio incarnationis esse Deum, & Deum hominem; per illapsam divinitatem cum humanitate, & per communicationem idioma-tum, quemadmodum ferrum fit ignis; ideoque dicebat carnem supposito divino subsistentem, seu Deum hominem operari quæ divinitatis sunt, non autem Christum ut hominem, seu humanitatem; aliàs Christus ut homo creare potuisset, & alia quæ soli Deo conveniunt fecisset, quod est falsum: ergo exemplum, veram & physicam causalitatem humanitatis Christi in opera miraculosa ab eo elicita, non significat.

Obj. 3. Humanitas Christi non solùm dum spie existeret in terris, sed etiam modò dum existit in cœlis, est instrumentum & orga-  
num

num divinitatis in ordine ad causandam gratiam & patranda miracula, & effectus supernaturales producendos; sed non instrumentum morale: ergo physicum. Major est expressè Concilii Ephes. 1. can. 9. & 11. Lateran. sub Martino 1. Consul. 3. & 5. necnon passim SS. Patrum. Minor verò prob. Si humanitas Christi esset instrumentum morale gratiæ & miraculorum, deberet posse assignari aliquid supra ipsam quod esset causa moralis principalis horum effectuum; at nihil hujusmodi est assignabile: Deus enim qui solus superior existit humanitati Christi, non potest esse causa moralis sive meritoria, etiam principalis: ergo humanitas Christi non potest dici instrumentum morale ad causandam gratiam & patranda miracula, aliosque effectus supernaturales producendos.

Resp. negando minorem, ad cujus prob. nego majorem: quia ipsemet Christus est causa moralis principalis, seu meritoria gratiæ ac miraculorum, & instrumentum morale quo utitur Deus, qui est causa physica principalis; nec hoc implicat: nam Christus est causa meritoria & moralis principalis miraculorum & effectuum supernaturalium à sanctis productorum, & ipsi sancti sunt instrumenta moralia: ergo Christus potest esse instrumentum morale ac movens Deum ad infusionem gratiæ, & causa moralis principalis quæ meruit productionem gratiæ & miraculorum.

Obj. 4. Si humanitas Christi nunc existens in cœlis, non physicè, sed moraliter tantum, gratiam, miracula, aliosque effectus supernaturales causaret, non deberet dici instrumentum deitatis, sed solùm Filii, in ordine ad illos effectus; atqui vocatur à multis ex Patribus, instrumentum sive organum divinitatis, nimirum à D. Ambros. serm. 90. & 91. Damas. lib. 3. de fide cap. 5. & aliis; imò Scriptura  
eam



eam appellat brachium & manum Dei : ergo &c. Sequela majoris prob. Solus Filius , non verò Pater , subindeque nec divinitas , concurrat moraliter ad gratiam & miracula , orando videlicet & merendo ; non enim potest dici , quòd Pater aut Spiritus sanctus aliquid nobis meruerint : ergo si humanitas Christi non physicè , sed moraliter tantum ad illos effectus concurrat , non erit instrumentum divinitatis , sed solum Filii in ordine ad illos.


Resp. negando majorem : Deus enim ut Deus est & omnipotens , est causa physica principalis productiva gratiæ , & aliorum effectuum supernaturalium ; ideòque humanitas Christi , quæ est instrumentum morale hujusmodi productionis , est instrumentum Dei ; non verò Filii dumtaxat . Ad prob. dico , quòd probat solum Filium incarnatum , esse instrumentum in ordine ad illos effectus , quod concedimus : nam Filius incarnatus , aut Christus ut homo , qui est verè Filius Dei , concurrat moraliter ad gratiam & miracula , quæ sunt opera Dei , orando & merendo : ergo Deus est causa physica principalis gratiæ & miraculorum ; & Christus est ejus instrumentum , orando videlicet & merendo illam gratiam & miracula , subindeque humanitas Christi non debet dici instrumentum Filii , sed Dei ; cum Filius ut homo mereatur apud Deum , & Deus largiatur gratiam .

Obj. 5. Conveniens & congruum est concedere humanitati Christi omnem dignitatem & prærogativam , quæ muneri Redemptoris , & capitis Ecclesiæ non obest , & aliunde contradictionem non implicat ; sed virtus instrumentalis physica ad causandam gratiam & patrandam miracula non obest , sed potius congruit muneri Redemptoris & capitis Ecclesiæ , & nullam involvit repugnantiam ; ergo humanitati Christi denegari non debet . Major patet : Minor suadetur ex eo quòd non major videatur

tur.

tur esse repugnantia, quòd humanitati Christi communicetur vis instrumentalis supernaturalis ad causandam gratiam & patranda miricula, quàm quòd ignis inferni & Purgatorii virtutem instrumentalem ad torquendos & alligandos demones, & affligendas, ac purgandas animas à Deo recipiat. *Deinde*, major est dignitas in Redemptore redimere, causando simul physicè & moraliter gratiam, quàm solùm moraliter; & ratio capitis Ecclesiæ perfectiori modo convenit Christo, si non solùm moralem, sed etiam physicum influxum in membra habeat.

*Resp. negando minorem*: Cùm enim miracula fiant per applicationem divinæ omnipotentiae ad operandum hic & nunc illud, quod vires agentium naturalium efficere non possunt, & gratia exigit ex natura sua creari, implicat, quòd humanitas Christi, aut aliqua creatura possit esse causa instrumentalis gratiæ & miraculorum, quia nulla creatura potest physicè instrumentaliter applicare divinam omnipotentiam, nec creare. Et consequenter dignitas Redemptoris & capitis non exigit influxum physicum ad productionem gratiæ, cùm nequeat competere creaturis. Ad 1. prob. minoris, dico quòd ignis inferni, ut dictum est in 2. tomo, non alligat physicè, nec physicè influit. Ad 2. prob. dico quòd cùm ille influxus physicus sit impossibilis creaturæ, & soli Deo conveniat, non est major dignitas in Christo, quia nulla res ex carentia perfectionis omnino impossibilis, remanet imperfectior, nec dicitur perfectibilis aut dignificanda per perfectionem quæ ipsi repugnat; aliàs infinitas, immensitas & æternitas, essent formaliter concedendæ humanitati Christi, quoniam esset major dignitas; quod tamen non concedunt Theologi.



## DISPUTATIO XVII.

*De impeccabilitate & merito  
Christi.*

**I**N hac disputatione duo examinanda sunt.  
1. An Christus sit impeccabilis? 2. An im-  
peccabilitas compatibilis sit cum libertate ad  
meritum requisita?

## Q U Æ S T I O I.

*An Christus de potentia absoluta  
peccare potuerit?*

**S**uppono tamquam de fide, Christum Domi-  
num fuisse omninò impeccabilem, ut colli-  
gitur ex variis Scripturæ locis: Unde difficul-  
tas est in assignanda hujus impeccabilitatis ra-  
dice. Gonetus existimat unionem hypostati-  
cam esse causam formalem impeccabilitatis  
Christi, subindeque concludit humanitatem  
Christi Verbo unitam, peccare non potuisse,  
etiam de potentia absoluta, peccato cum unio-  
ne composito.

Dico igitur, Christi humanitatem esse impec-  
cabilem formaliter ex vi specialis manutenentiæ  
Dei, non verò ex vi unionis hypostaticæ, quæ  
est tantum causa fundamentalis & radicalis.  
Ita Scotus in 3. dist. 12. quæst. unica, quem se-  
quuntur omnes Scotistæ. Prob. 1. Christum  
esse impeccabilem, idem est, ac Christum ca-  
rere

rere potentia proxima & expedita ad peccan-  
 dum; cum ex Goneto potentia remota com-  
 petat Christo, quia (inquit) est proprietas na-  
 turæ; sed Christus non caret formaliter poten-  
 tia proxima & expedita ad peccandum, ex vi  
 unionis hypostaticæ, sed ex vi specialis & in-  
 violabilis manutenentiæ Dei: ergo non est for-  
 maliter impeccabilis ex vi unionis. Major pa-  
 tet: Minor prob. 1. Carere formaliter poten-  
 tia expedita ad peccandum, idem est ac carere  
 concursu & mediis ad eliciendum actum pecca-  
 minosum; nam dum potentia remota habet om-  
 ne requisitum, fit proximè disposita & expedi-  
 ta; sed potentia remota humanitatis Christi non  
 caret omni auxilio ad agendum requisito, ex  
 vi unionis formaliter. Ratio est, quia concursus  
 ad peccandum & ad non peccandum, non prove-  
 nit formaliter ex unione, sed ex divina volun-  
 tate; idcirco carentia ejusdem à divina volun-  
 tate provenire debet: illius enim est privare,  
 cujus est dare: ergo humanitas non caret poten-  
 tia expedita ad peccandum, vel potentia remo-  
 ta peccandi in Christo non est impedita formaliter  
 ex vi unionis; sed ex vi specialis manutenen-  
 tiæ, aut decreti divinæ voluntatis, qua Deus  
 decrevit semper concurrere cum Christo ad ac-  
 tum dilectionis. Prob. 2. eadem minor: Unio  
 hypostatica non est ex se formaliter impediti-  
 va potentiarum, cum ex Goneto actiones sint  
 suppositorum elicitive, & humanitas ex vi unio-  
 nis hypostaticæ sit supposita: ergo impoten-  
 tia ut impedimentum ad eliciendum actum  
 peccaminosum, non potest formaliter prove-  
 nire ex unione, sed ex alio, quod unio hypo-  
 statica exigit: nam suppositum divinum susten-  
 tat & personat humanitatem, gerendo vices sup-  
 positi proprii, & licet plura præstet quàm ipsum  
 suppositum proprium non præstaret; tamen  
 præstat quidquid præstaret suppositum pro-  
 prium; sed suppositum proprium non impedi-

1. Liberum arbitrium includit indifferentiam, non solum quoad exercitium, sed etiam quoad specificationem: ergo Christus fuit indifferens, & potuit subire & non subire mortem. 2. Non est peccatum nisi voluntarium & liberum, id est, nisi proveniat à principio libero & voluntario: ergo liberum arbitrium est potentia ad peccandum. 3. Liberum arbitrium est potentia proxima ad non peccandum: ergo etiam ad peccandum: ergo cum unio non tollat liberum arbitrium proximum, Christus non est impeccabilis ex vi unionis, sed ex alio capite, quod à voluntate divina dependebat.

Resp. Gonet. negando minorem: Nam (inquit) de ratione liberi arbitrii non est potentia peccandi, ut patet in Deo, in quo est perfectissimè liberum arbitrium, & simul impotentia peccandi; unde ad libertatem non requiritur indifferentia quoad specificationem, quæ vocatur contrarietatis, ad bonum scilicet & ad malum contrarium; sed sufficit indifferentia circa bonum, quæ dicitur libertas contradictionis, quia absolutè potest efficere aut non efficere actum bonum, hic & nunc, sub istis circumstantiis, quod in Christo reperitur.

Contra 1. Voluntas divina est infinitè recta & ex se indefectibilis, idcirco licet sit libera non includit potentiam peccandi: at humana est finita, subdita & ex se defectibilis: ergo non valet paritas. 2. Potentia peccandi non est de ratione liberi arbitrii præcisè sumpti, sed liberi arbitrii ut subiectionis, & quatenus respicit legem, quod non potest dici de libero arbitrio Dei, sicut de libero arbitrio Christi. 3. Liberum arbitrium in Deo, idem est ac actus necessarius voluntatis divinæ, ut docet Gonet. tom. 1. at in Christo est distinctum & entitativè liberum: ergo non valet paritas. 4. Tandem, libertas contradictionis, quæ ex Gonetio est in Christo, sufficit, ut liberum arbitrium includat po-

tentiam ad peccandum: ergo non obstante unionē, datur in Christo potentia proxima peccandi, & consequenter ex alio capite provenit ejus impeccabilitas. Prob. antecedens: Omissio voluntaria actus boni præcepti, est mala & peccaminosa, ut docet Gonet. sed cum sola libertate contradictionis, potest dari omissio voluntaria actus boni præcepti: non enim implicat, quod si Petrus v. g. esset liber sola libertate contradictionis, non posset non adorare Deum, non invocare, nec diligere sanctos, quin eliceret actus contrarios; sed tunc peccaret, quia non adorare, non amare Deum & sanctos est peccatum ab odio Dei distinctum; aliàs qui non amat Deum, nec ipsum adorat, odit positivè, quod est falsum; alioquin teneretur homo continuò adorare Deum directè, & formaliter actu invocare & diligere sanctos, quia teneretur nunquam odio habere Deum, &c. Ergo si in Christo sit libertas contradictionis proxima, ut fatetur Gonet. datur in ipso potentia peccandi, & consequenter ejus impeccabilitas non provenit ex vi unionis, nec ex vi visionis, ut volunt aliqui Scotistæ, contra quos militant etiam rationes quæ pugnant contra Gonetum; sed ex speciali manutentione Dei.

Quæres, an in Christo fuerit, vel potuerit esse fomes peccati, seu inclinatio potentiae per modum actus primi orta ex peccato, & in peccatum inclinans? Resp. negativè. Tum quia in Christo nullum est peccatum, nullaque inclinatio ad peccatum. Tum quia fomes est motus vitiosus inordinatus, pugnans cum recta ratione. Tum quia fomes est peccati originalis effectus: ergo non fuit nec potuit esse in Christo.

Obj. 1. Gonet. Verbo divino (omitto Auctoritates SS. Patrum, quia non probant Christum esse impeccabilem ex vi unionis formaliter, sed tantum fundamentaliter & radicaliter, quod non disputamus) ex vi unionis humanitatis ad ip-

sum, incumbit obligatio gubernandi humanitatem, eamque in officio continendi, ac proinde si humanitas assumpta peccaret, ejus peccatum Verbo in seipso attribueretur; sed implicat Verbum in seipso peccare: ergo etiam implicat humanitatem assumptam peccare peccato cum unione composito. Minor patet: Major autem in qua est difficultas, sic ostenditur: Quoties duo uniuntur in aliqua natura vel persona, inferius naturaliter subordinatur superiori, & consequenter superior tenetur inferiorem regere & gubernare; sed ex vi unionis humanitatis ad Verbum, natura humana & divina conveniunt in una Christi persona: ergo, &c.

Confirm. 1. Quia corpus est inferius animæ, & per unionem conveniunt in una & eadem natura, ex tali unionem induit anima obligationem corpus regendi; sed humanitas est inferior divinitati, & ex vi unionis hypostaticæ convenit cum deitate in eadem Christi persona: ergo ex vi unionis incumbit divinitati specialis obligatio gubernandi humanitatem. Unde Synodus generalis actione 8. postquam asseruit animam Christi, nullum in se naturalem modum excitare, nisi ad nutum Verbi sibi hypostaticè uniti, sic verbis Nysseni concludit; *Quemadmodum corpus nostrum regitur & ornatur atque ordinatur ab intellectu & rationali anima nostra: ita in homine Christo, tota humana ejus conspersio, ab ejusdem Verbi divinitate semper & in omnibus mota, Deo mobilis fuit.*

Confirm. 2. Cum in una & eadem natura convenient superior & inferior potentia, incumbit tali naturæ obligatio regendi potentiam inferiorem per potentiam superiorem, ut constat in natura humana, quæ naturali obligatione tenetur per voluntatem regere & gubernare appetitum inferiorem: ergo pariter cum duæ naturæ conveniunt in una & eadem persona,

con-

confurgit in illa obligatio regendi inferiorem per superiorem naturam, & consequenter Verbo, in quo ex vi unionis humanitatis ad ipsum conveniunt natura divina & humana, incumbit specialis obligatio regendi & gubernandi naturam humanam per divinam; subindeque peccatum humanitatis unitæ attribueretur Verbo, non solum ratione voluntatis humanæ, sed etiam voluntatis divinæ.

Confirm. 3. Longè arctior est conjunctio Verbi cum sua humanitate, quàm mariti cum uxore, patris cum filio, domini cum servo, cum hæ non sint uniones physicæ; qualis est Verbi conjunctio cum humanitate: ergo multò magis est Verbi divini dirigere in omnibus suis operationibus, & à tanto malo, quantum est malum culpæ, avertere efficaciter humanitatem assumptam, quàm viri sit dirigere uxorem, & à peccato avertere pro facultate, &c. Omitto aliquas auctoritates quibus probat hanc confirmationem.

Resp. concessa 1. parte majoris, negando minorem, nempe quòd si humanitas assumpta peccaret, ejus peccatum Verbo in seipso tribueretur, ex eo, quòd Verbum teneatur regere humanitatem: nam tenetur regere nos & gubernare ne peccemus, non per legem obligantem, sed ex sua bonitate, & quatenus est Pater & provisor; tamen licèt sit Pater & Dominus noster & sponfus iustorum, & det nobis auxilia ad vitanda peccata, peccata nostra non attribuantur Deo: ergo nec peccata humanitatis attribuerentur Verbo, licèt humanitas sit sub ejus dominio & gubernio, imò & ipsi conjuncta. Resp. 2. argumentum concludere, dum superius cui inferius unitur, est principium tam *quod* quàm *quo*, inferioris, & dat ipsi totam virtutem, id est, dum inferius agit virtute superioris, ut patet in corpore, quod in agendo dependet à suo superiori seu anima; non autem dum inferius est



liberum, & habet sua principia distincta à potentiis & virtute superioris; falsum enim est quòd peccata uxoris attribuantur marito, & peccata filii attribuantur patri: plures enim uxores sunt in inferno, quarum mariti sunt in cœlo; & plures filii fuerunt patibulo suspensi, quorum patres vivunt; unde cùm humanitas Christi non agat, nec vivat, nec operetur principiis, nec virtute, quibus Verbum vivit & operatur, nec velit volitione increata qua vult ipsum Verbum, argumentum nec confirmationes concludunt contra nos.

Obj. 2. Si posset humanitas assumpta peccare, peccato cum unione hypostatica composito, posset suppositum Verbi ut subsistens in humanitate peccare. Consequens est falsum: ergo. Sequela prob. Actiones sunt suppositorum vel subsistentium, ut commune axioma docet: sed suppositum humanitatis assumptæ, est suppositum Verbi quatenus in illa subsistens: ergo si posset humanitas assumpta peccare peccato cum unione ad Verbum composito, posset Verbum ut subsistens in humanitate peccare.

Resp. 1. negando sequelam: Ad prob. gratis concessio antecedente, nego consequentiam; quia peccatum formaliter sumptum, & quatenus est deformitas ad legem, non est verè actio, nec habet causam efficientem; sed est defectus & habet causam deficientem, ut docet Gonetus in tract. de peccatis.

Resp. 2. negando sequelam. Ad prob. dictiones esse suppositorum de materiali, ut multoties dictum est, non verò de formali: ergo si humanitas peccaret, Verbum non peccaret in ipsa formaliter, sicut non est in ipsa formaliter mortuum, nec crucifixum, nec obediens, &c. sed tantum denominativè & per communicationem idiomatum.

Gonet. negat paritatem. Ratio discriminis est, quia mors sicut & quodlibet aliud malum pœ-

næ, à Dei iusticia est introductum propter gloriam ipsius Dei: malum verò culpæ, seu peccatum committitur per recessum ab arte divinæ sapientiæ, & ab ordine divinæ bonitatis; & ideo licet nulla sit indecentia, quòd Verbum in natura assumpta, seu ut subsistens in humanitate per communicationem idiomatum passum, crucifixum & mortuum denominetur, est tamen moralis indecentia, quòd Verbum etiam ut in natura humana subsistens, denominativè, seu per communicationem idiomatum, peccare dicatur.

Confirm. Prædicata naturæ, quæ per se primò conveniunt supposito, si habeant repugnantiam cum hypostasi seu persona Verbi, non possunt de illa etiam per communicationem idiomatum prædicari; hac enim ratione docet S. Thomas, has propositiones esse falsas, *Christus est creatus vel creatura, Christus incepit esse*, & similes; sed peccare est prædicatum habens repugnantiam cum persona Verbi: ergo.

Secundò. Juxta hujus solutionis doctrinam, humanitate Petri peccante, suppositum Petri solum peccat denominativè; nam actiones dicuntur suppositorum, non elicitive, sed tantum denominativè; & tamen humanitate Petri peccante, suppositum ejus dicitur simpliciter & absolute peccans & peccato infectum; ergo idem dicendum esset de Verbo. Tertiò. Hæc propositio, *Verbum ut in humanitate subsistens, pro nobis meruit & satisfecit*, est vera in proprietate sermonis & in rigore; non minus quam illa, *Christus nos redemit & satisfecit pro nobis*; & tamen juxta doctrinam solutionis, Christus, seu Verbum ut subsistens in humanitate, solum denominativè satisfecit & meruit; cum actiones non sint suppositorum elicitive, sed tantum denominativè: ergo quòd humanitate assumpta peccante, Verbum ut in illa subsistens, denominativè tantum peccaret, non tollit, quòd hæc

propositio, Christus seu Verbum ut subsistens in humanitate, peccat, sit vera in rigore & proprietate sermonis. Omitto ultimam instantiam, qua probat actiones esse suppositorum activè, quia soluta manet in 1. tom. disp. de processione Spiritus sancti.

Contra: Nam ut ait Frassen, tam permissio peccati potest cedere in gloriam Dei, quàm quodlibet malum pœnæ: Deus enim ordinare potest peccatum tam ad commendationem suæ justitiæ, illud vindicando & puniendo, quàm ad manifestationem suæ misericordiæ, illud relaxando & gratis remittendo. Deinde, peccata subjiciuntur divini providentiæ, ut docet Gonet. tom. 1. Ergo cum peccatum cedat in gloriam Dei sicut mors, & Verbo non magis repugnet peccatum, quàm mors, non magis implicat, quòd peccet in humanitate, quàm quòd in ipsa moriatur. Tandem, ex sacra Scriptura Filius Dei pro nobis factus est peccator & fidejussor: ergo denominatio peccatoris, cum sit extrinseca, potest dici de Verbo per communicationem idiomatum. Ad confirm. nego majorem: Nam obedientia & inferioritas, sunt prædicata quæ per se primò conveniunt supposito, & habent repugnantiam cum hypostasi, seu persona Verbi, ut patet; tamen de illa per communicationem idiomatum prædicantur: valet etiam dicere, *Christus est creatura & incepit esse*, non simpliciter, sed quatenus est homo, sicut dicitur æqualis & minor respectu Patris, æqualis secundum divinitatem, & minor secundum humanitatem: ergo licet peccare sit prædicatum repugnans cum persona Verbi, potest tamen per communicationem idiomatum & denominativè, ipsi convenire sicut mors &c. quæ non habent minorem repugnantiam cum illa.

Ad secundum, nego paritatem. Ratio est, quia suppositum Petri desumit suam specificationem & suum esse ab humanitate peccante;  
idcirco

dicendum dum humanitas peccat, dicitur simpliciter peccans: at suppositum Verbi habet naturam propriam à qua specificatur: ergo non deberet dici simpliciter peccans, si natura humana quæ est extranea, peccaret. *Ad tertium*, dico propositionem esse veram per communicationem idiomatum & ratione humanitatis; Christus enim satisfecit pro nobis ut homo, non autem ut Deus; aliàs satisfactio esset infiniti valoris intrinsecè & simpliciter, quod Scotus negat; satisfecisset sibi, quod Gonetius improbat; & Deus ut Deus mortuus fuisset, quod fides damnat: ergo humanitate assumpta peccante, Verbum non peccaret in rigore sermonis, sed tantum per communicationem idiomatum, sicut moritur; id est, quia sustentaret naturam peccantem; sicut moritur, quia sustentat & personat naturam morientem. Omitto primam rationem quam Gonetius adducit in §. 5. quia supponit gratiam sanctificantem physicè & essentialiter repugnare cum peccato, & consequenter unionem hypostaticam repugnare etiam cum ipso, quod falsum esse patet suprà in tract. de gratia.

Obj. 4. Ex eo præcisè aliqua natura impeccabilis redditur, quòd conjungitur immobiliter ipsi regulæ rectæ operationis; sicut econtra ea ratione est peccabilis, quia potest deviare à recta regula operationis: sed humanitas Christi ex unionem ad Verbum præcisè, conjuncta est immobiliter primæ regulæ rectæ operationis, nimirum divinæ sanctitati & sapientiæ: ergo &c. Omitto confirmationem qua probat Christum non esse impeccabilem ex vi visionis beatificæ, quia non militat contra nos.

Resp. negando majorem: quia humanitas Christi conjungitur Deo ex vi unionis, sicut terminabile aut sustentabile conjungitur terminativo & sustentanti, quæ conjunctio non est cum prima regula rectæ operationis. Ra-

ret voluntatem: ergo nec divinum eam impedit; subindeque ex alio capite provenire debet impeccabilitas Christi.

Prob. 3. minor principalis, nempe unionem non impedire potentiam remotam peccandi. Unio ex se, aut persona Verbi non determinat voluntatem ad obediendum; idcirco non impedit eam ad oppositum; nec ad actum suspensum, ut est evidens: ergo non est impedita ad peccandum ex vi unionis. Prob. antecedens

1. Persona Verbi non est ex se activa ad extra, quia omnes operationes ad extra sunt indivisæ toti Trinitati: ergo non potest determinare voluntatem Christi, quæ est ad extra, ad obediendum, nec eam impedire, si obedire nollit.
2. Personalitas Verbi non habet rationem principii efficientis, nec physicè mutat voluntatem humanam Christi: ergo non determinat voluntatem Christi ad obediendum, seu ad non peccandum.
3. Si personalitas Verbi divini (non dico, si unio, quia ex Gonet non est modus superadditus humanitati) determinaret voluntatem ad obediendum aut ad actum dilectionis, ita eam determinaret, ut etiam si Deus absolute nollit, posset diligere & obedire, cum stante formali causa, effectus de potentia absoluta impediri non possit; sed hoc est falsum, quia stante unione voluntas Christi exigit auxilium, seu concursum à Deo dandum, quo posito voluntas est debite & proximè expedita, & quo sublato voluntas remanet impedita: ergo voluntas humana Christi non determinatur ad obediendum præcepto de morte subeunda, per unionem, nec per ipsam impeditur formaliter; sed per concursum ad utrumlibet paratum, quem Deus propter unionem, cum Verbo, speciali providentia & singulari mantenentia denegat Christo, ut voluntas sit impedita ad peccandum, & semper expedita ad obediendum.

Prob.

Prob. 2. conclusio: Si Christus esset impeccabilis ex vi unionis hypostaticæ, necessario sequeretur aliqua incompatibilitas inter ipsam & peccatum, ut est evidens; sed nulla datur incompatibilitas inter unionem & peccatum: ergo unio non reddit formaliter Christum impeccabilem. Prob. minor 1. Unio hypostatica subiectatur in humanitate; sic Poncius, Mastrius & alii; & peccatum subiectatur in voluntate: ergo non sunt duæ formæ in homine incompatibiles, cum diversa subiecta habeant. 2. Unio hypostatica est in linea physica, & peccatum in linea morali: ergo non opponuntur physicè, & consequenter impeccabilitas Christi non provenit ex unione. 3. Unio non est formalis sanctitatis qua sanctificatur Christus, sed tantum personalis & radicalis, ut dictum est suprâ; ergo non potest esse incompatibilis cum peccato formaliter, cum sola sanctitas peccato opponatur, *Deinde*, quando etiam verum esset, peccatum ipsum incompatibilitatem habere cum unione, ut vult Gonet. hoc tamen de potentia proxima ad peccandum dici non deberet, quia potentia proxima ad peccandum non est culpabilis. Tum quia iustus in quo reperitur, esset reus. Tum quia stat cum gratia sanctificante: ergo licet privatio peccati proveniat ex unione, ratione incompatibilitatis cum peccato: ex ipsa tamen non provenit privatio potentiae proximæ ad peccandum, quia nullam cum ipsa incompatibilitatem habet, & consequenter Christus non est formaliter in impotentia proxima peccandi, ex & natura unionis hypostaticæ, sed ex alio cause extrinseco.

Prob. 3. Christus Dominus stante unione habuit liberum arbitrium, sicut cæteri homines, quod est potentia finita, subdita & defectibilis: sed liberum arbitrium includit potentiam peccandi: ergo impeccabilitas Christi non provenit formaliter ex unione hypostatica. Prob. minor

1. Liberum arbitrium includit indifferentiam, non solum quoad exercitium, sed etiam quoad specificationem: ergo Christus fuit indifferens, & potuit subire & non subire mortem. 2. Non est peccatum nisi voluntarium & liberum, id est, nisi proveniat à principio libero & voluntario: ergo liberum arbitrium est potentia ad peccandum. 3. Liberum arbitrium est potentia proxima ad non peccandum: ergo etiam ad peccandum: ergo cum unio non tollat liberum arbitrium proximum, Christus non est impeccabilis ex vi unionis, sed ex alio capite, quod à voluntate divina dependebat.

Resp. Gonet. negando minorem: Nam (inquit) de ratione liberi arbitrii non est potentia peccandi, ut patet in Deo, in quo est perfectissimè liberum arbitrium, & simul impotentia peccandi; unde ad libertatem non requiritur indifferentia quoad specificationem, quæ vocatur contrarietatis, ad bonum scilicet & ad malum contrarium; sed sufficit indifferentia circa bonum, quæ dicitur libertas contradictionis, quia absolutè potest efficere aut non efficere actum bonum, hic & nunc, sub istis circumstantiis, quod in Christo reperitur.

Contra 1. Voluntas divina est infinitè recta & ex se indefectibilis, idcirco licet sit libera non includit potentiam peccandi: at humana est finita, subdita & ex se defectibilis: ergo non valet paritas. 2. Potentia peccandi non est de ratione liberi arbitrii præcisè sumpti, sed liberi arbitrii ut subiectionis, & quatenus respicit legem, quod non potest dici de libero arbitrio Dei, sicut de libero arbitrio Christi. 3. Liberum arbitrium in Deo, idem est ac actus necessarius voluntatis divinæ, ut docet Gonet. tom. 1. at in Christo est distinctum & entitativè liberum: ergo non valet paritas. 4. Tandem, libertas contradictionis, quæ ex Gonet. est in Christo, sufficit, ut liberum arbitrium includat po-

ten-

entiam ad peccandum: ergo non obstante unione, datur in Christo potentia proxima peccandi, & consequenter ex alio capite provenit ejus impeccabilitas. Prob. antecedens: Omissio voluntaria actus boni præcepti, est mala & peccaminosa, ut docet Gonet. sed cum sola libertate contradictionis, potest dari omissio voluntaria actus boni præcepti: non enim implicat, quod Petrus v. g. esset liber sola libertate contradictionis, non posset non adorare Deum, non invocare, nec diligere sanctos, quin eliceret actus contrarios; sed tunc peccaret, quia non adorare, non amare Deum & sanctos est peccatum ab odio Dei distinctum; aliàs qui non amat Deum, nec ipsum adorat, odit positivè, quod est salum; alioquin teneretur homo continuò adorare Deum directè, & formaliter actu invocare & diligere sanctos; quia tenetur nunquam odio habere Deum, &c. Ergo si in Christo sit libertas contradictionis proxima, ut fatetur Gonet, datur in ipso potentia peccandi, & consequenter ejus impeccabilitas non provenit ex vi unionis, nec ex vi visionis, ut volunt aliqui Scotistæ, contra quos militant etiam rationes quæ pugnant contra Gonetum; sed ex speciali munificentia Dei.

Quæres, an in Christo fuerit, vel potuerit esse fomes peccati, seu inclinatio potentiae per odum actus primi orta ex peccato, & in peccatum inclinans? Resp. negativè. Tum quia in Christo nullum est peccatum, nullaque inclinatio ad peccatum. Tum quia fomes est motus visus inordinatus, pugnans cum recta ratione. Tum quia fomes est peccati originalis effectus: ergo non fuit nec potuit esse in Christo.

Obj. 1. Gonet. Verbo divino (omitto Auctoritates SS. Patrum, quia non probant Christum esse impeccabilem ex vi unionis formaliter, sed tantum fundamentaliter & radicaliter, quod non putamus) ex vi unionis humanitatis ad ip-



sum, incumbit obligatio gubernandi humanitatem, eamque in officio continendi, ac proinde si humanitas assumpta peccaret, ejus peccatum Verbo in seipso attribueretur; sed implicat Verbum in seipso peccare: ergo etiam implicat humanitatem assumptam peccare peccato cum unione composito. Minor patet: Major autem in qua est difficultas, sic ostenditur: Quoties duo uniuntur in aliqua natura vel persona, inferius naturaliter subordinatur superiori, & consequenter superior tenetur inferiorem regere & gubernare; sed ex vi unionis humanitatis ad Verbum, natura humana & divina conveniunt in una Christi persona: ergo, &c.

Confirm. 1. Quia corpus est inferius animæ, & per unionem conveniunt in una & eadem natura, ex tali unione induit anima obligationem corpus regendi; sed humanitas est inferior divinitati, & ex vi unionis hypostaticæ convenit cum deitate in eadem Christi persona: ergo ex vi unionis incumbit divinitati specialis obligatio gubernandi humanitatem. Unde Synodus generalis actione 8. postquam asseruit animam Christi, nullum in se naturalem modum excitare, nisi ad nutum Verbi sibi hypostaticè uniti, sic verbis Nysseni concludit; *Quemadmodum corpus nostrum regitur & ornatur atque ordinatur ab intellectuali & rationali anima nostra: ita in homine Christo, tota humana ejus conspersio, ab ejusdem Verbi divinitate semper & in omnibus mota, Deo mobilis fuit.*

Confirm. 2. Cum in una & eadem natura convenient superior & inferior potentia, incumbit tali naturæ obligatio regendi potentiam inferiorem per potentiam superiorem, ut constat in natura humana, quæ naturali obligatione tenetur per voluntatem regere & gubernare appetitum inferiorem: ergo pariter cum duæ naturæ conveniunt in una & eadem persona,

con-

consurgit in illa obligatio regendi inferiorem per superiorem naturam, & consequenter Verbo, in quo ex vi unionis humanitatis ad ipsum conveniunt natura divina & humana, incumbit specialis obligatio regendi & gubernandi naturam humanam per divinam; subindeque peccatum humanitatis unitæ attribueretur Verbo, non solum ratione voluntatis humanæ, sed etiam voluntatis divinæ.

Confirm. 3. Longè arctior est conjunctio Verbi cum sua humanitate, quam mariti cum uxore, patris cum filio, domini cum servo, cum hæ non sint uniones physicæ; qualis est Verbi conjunctio cum humanitate: ergo multò magis est Verbi divini dirigere in omnibus suis operationibus, & à tanto malo, quantum est malum culpæ, avertere efficaciter humanitatem assumptam, quam viri sit dirigere uxorem, & à peccato avertere pro facultate, &c. Omitto aliquas auctoritates quibus probat hanc confirmationem.

Resp. concessa 1. parte majoris, negando minorem, nempe quòd si humanitas assumpta peccaret, ejus peccatum Verbo in seipso tribueretur, ex eo, quòd Verbum teneatur regere humanitatem: nam tenetur regere nos & gubernare ne peccemus, non per legem obligantem, sed ex sua bonitate, & quatenus est Pater & provisor; tamen licèt sit Pater & Dominus noster & sponso justorum, & det nobis auxilia ad vitanda peccata, peccata nostra non attribuerentur Deo: ergo nec peccata humanitatis attribuerentur Verbo, licèt humanitas sit sub ejus dominio & gubernio, imò & ipsi conjuncta. Resp. 2. argumentum concludere, dum superius cui inferius unitur, est principium tam *quod* quam *quo* inferioris, & dat ipsi totam virtutem, id est, dum inferius agit virtute superioris, ut patet in corpore, quod in agendo dependet à suo superiori seu anima; non autem dum inferius est

liberum, & habet sua principia distincta à potentiis & virtute superioris; falsum enim est quòd peccata uxoris attribuantur marito, & peccata filii attribuantur patri: plures enim uxores sunt in inferno, quarum mariti sunt in cœlo; & plures filii fuerunt patibulo suspensi, quorum patres vivunt; unde cùm humanitas Christi non agat, nec vivat, nec operetur principiis, nec virtute, quibus Verbum vivit & operatur, nec velit volitione increata qua vult ipsum Verbum, argumentum nec confirmationes concludunt contra nos.

Obj. 2. Si posset humanitas assumpta peccare, peccato cum unione hypostatica composito, posset suppositum Verbi ut subsistens in humanitate peccare. Consequens est falsum: ergo. Sequela prob. Actiones sunt suppositorum vel subsistentium, ut commune axioma docet: sed suppositum humanitatis assumptæ, est suppositum Verbi quatenus in illa subsistens: ergo si posset humanitas assumpta peccare peccato cum unione ad Verbum composito, posset Verbum ut subsistens in humanitate peccare.

Resp. 1. negando sequelam: Ad prob. gratis concesso antecedente, nego consequentiam; quia peccatum formaliter sumptum, & quatenus est deformitas ad legem, non est verè actio, nec habet causam efficientem; sed est defectus & habet causam deficientem, ut docet Gonetus in tract. de peccatis.

Resp. 2. negando sequelam. Ad prob. dico actiones esse suppositorum de materiali, ut multoties dictum est, non verò de formali: ergo si humanitas peccaret, Verbum non peccaret in ipsa formaliter, sicut non est in ipsa formaliter mortuum, nec crucifixum, nec obediens, &c. sed tantum denominativè & per communicationem idiomatum.

Gonet. negat paritatem. Ratio discriminis est, quia mors sicut & quodlibet aliud malum pœ-

næ, à Dei iustitia est introductum propter gloriam ipsius Dei: malum verò culpæ, seu peccatum committitur per recessum ab arte divinæ sapientiæ, & ab ordine divinæ bonitatis; & ideo licet nulla sit indecentia, quòd Verbum in natura assumpta, seu ut subsistens in humanitate per communicationem idiomatum passum, crucifixum & mortuum denominetur, est tamen moralis indecentia, quòd Verbum etiam ut in natura humana subsistens, denominativè, seu per communicationem idiomatum, peccare dicatur.

Confirm. Prædicata naturæ, quæ per se primò conveniunt supposito, si habeant repugnantiam cum hypostasi seu persona Verbi, non possunt de illa etiam per communicationem idiomatum prædicari; hac enim ratione docet S. Thomas, has propositiones esse falsas, *Christus est creatus vel creatura, Christus incepit esse*, & similes; sed peccare est prædicatum habens repugnantiam cum persona Verbi: ergo.

Secundò. Juxta hujus solutionis doctrinam, humanitate Petri peccante, suppositum Petri solum peccat denominativè; nam actiones dicuntur suppositorum, non elicitive, sed tantum denominativè; & tamen humanitate Petri peccante, suppositum ejus dicitur simpliciter & absolute peccans & peccato infectum; ergo idem dicendum esset de Verbo. Tertiò. Hæc propositio, *Verbum ut in humanitate subsistens, pro nobis meruit & satisfecit*, est vera in proprietate sermonis & in rigore; non minus quàm illa, *Christus nos redemit & satisfecit pro nobis*; & tamen juxta doctrinam solutionis, Christus, seu Verbum ut subsistens in humanitate, solum denominativè satisfecit & meruit; cum actiones non sint suppositorum elicitive, sed tantum denominativè: ergo quòd humanitate assumpta peccante, Verbum ut in illa subsistens, denominativè tantum peccaret, non tollit, quòd hæc

propositio, Christus seu Verbum ut subsistens in humanitate, peccat, sit vera in rigore & proprietate sermonis. Omitto ultimam instantiam, qua probat actiones esse suppositorum activè, quia soluta manet in 1. tom. disp. de processione Spiritus sancti.

Contra: Nam ut ait Frassen, tam permissio peccati potest cedere in gloriam Dei, quàm quodlibet malum pœnæ: Deus enim ordinare potest peccatum tam ad commendationem suæ justitiæ, illud vindicando & puniendo, quàm ad manifestationem suæ misericordiæ, illud relaxando & gratis remittendo. Deinde, peccata subjiciuntur divinæ providentiæ, ut docet Gonet. tom. 1. Ergo cùm peccatum cedat in gloriam Dei sicut mors, & Verbo non magis repugnet peccatum, quàm mors, non magis implicat, quòd peccet in humanitate, quàm quòd in ipsa moriatur. Tandem, ex sacra Scriptura Filius Dei pro nobis factus est peccator & fidejussor: ergo denominatio peccatoris, cùm sit extrinseca, potest dici de Verbo per communicationem idiomatum. Ad confirm. nego majorem: Nam obedientia & inferioritas, sunt prædicata quæ per se primò conveniunt supposito, & habent repugnantiam cum hypostasi, seu persona Verbi, ut patet; tamen de illa per communicationem idiomatum prædicantur: valet etiam dicere, *Christus est creatura & incepit esse*, non simpliciter, sed quatenus est homo, sicut dicitur æqualis & minor respectu Patris, æqualis secundum divinitatem, & minor secundum humanitatem: ergo licet peccare sit prædicatum repugnans cum persona Verbi, potest tamen per communicationem idiomatum & denominativè, ipsi convenire sicut mors &c. quæ non habent minorem repugnantiam cum illa.

Ad secundum, nego paritatem. Ratio est, quia suppositum Petri desumit suam specificationem & suum esse ab humanitate peccante; idcir-

deircò dum humanitas peccat, dicitur simpliciter peccans; at suppositum Verbi habet naturam propriam à qua specificatur: ergo non deberet dici simpliciter peccans, si natura humana quæ est extranea, peccaret. *Ad tertium*, dico propositionem esse veram per communicationem idiomatum & ratione humanitatis; Christus enim satisfecit pro nobis ut homo, non autem ut Deus; aliàs satisfactio esset infiniti valoris intrinsecè & simpliciter, quod Scotus negat; satisfecisset sibi, quod Gonetius improbat; & Deus ut Deus mortuus fuisset, quod fides damnat: ergo humanitate assumpta peccante, Verbum non peccaret in rigore sermonis, sed tantùm per communicationem idiomatum, sicut moritur; id est, quia sustentaret naturam peccantem; sicut moritur, quia sustentat & personat naturam morientem. Omitto primam rationem quam Gonetius adducit in §. 5. quia supponit gratiam sanctificantem physicè & essentialiter repugnare cum peccato, & consequenter unionem hypostaticam repugnare etiam cum ipso, quod falsum esse patet suprà in tract. de gratia.

Obj. 4. Ex eo præcisè aliqua natura impeccabilis redditur, quòd conjungitur immobiliter ipsi regulæ rectæ operationis; sicut e contra eà ratione est peccabilis, quia potest deviare à recta regulæ operationis: sed humanitas Christi ex unionem ad Verbum præcisè, conjuncta est immobiliter primæ regulæ rectæ operationis, nimirum divinæ sanctitati & sapientiæ: ergo &c. Omitto confirmationem qua probat Christum non esse impeccabilem ex vi visionis beatificæ, quia non militat contra nos.

Resp. negando majorem: quia humanitas Christi conjungitur Deo ex vi unionis, sicut terminabile aut sustentabile conjungitur terminativo & sustentanti, quæ conjunctio non est cum prima regulæ rectæ operationis. Ra-

tio est, quia hæc conjunctio fit in voluntate cum voluntate divina, quæ est prima regulæ rectæ operationis; unde cum unio hypostatica non conjungat physicè humanam voluntatem Christi cum voluntate divina, tum quia voluntas humana Christi ex se non esset libera, tum quia esset tam conjuncta voluntati Patris & Spiritus sancti, quàm Filii, quod est falsum, sequitur, quod non conjungit eam regulæ rectæ rationis: ergo est conjuncta immobiliter primæ regulæ rectæ operationis, per aliquid aliud ab unione distinctum, quod est manutenentia Dei. Omitto brevitatis gratia tertiam rationem in 5. §. positam, quia supponit humanitatem Christi esse formaliter sanctam per unionem hypostaticam, quod supra impugnatum est. Omitto etiam argumentum, quo in 6. §. probat humanitatem Christi non potuisse peccare peccato destruyente unionem hypostaticam, quia fundatur in argumentis jam propositis, & habet eandem virtutem; ideoque eadem responsione solvi potest.

---

## Q U Æ S T I O II.

*An Christus meruerit adimplendo præceptum Patris de subeunda morte pro salute generis humani?*

**S**uppono 1. Christum verè & propriè meruisse à primo conceptionis instanti, usque ad instans mortis, cum habuerit actum voluntatis liberum, scientiam, gratiam & alias condiciones ad merendum requisitas; non autem in instanti mortis, nec post mortem, quia ad meritum requiritur status viæ: ergo post mortem non meruit, sed tantùm in vita per actum  
cha-

charitatis quæ diligebat Deum, sicut meruit per actum obedientiæ &c.

Suppono 2. tanquam certum contra Loricam, præceptum strictum de morte subeunda pro salute generis humani, Christo fuisse impositum à Patre, & ab ipsomet Christo observatum, ut suadet illud, quod Veritas ait, *Vt cognoscat mundus quia diligo Patrem, & sicut mandatum dedit mihi sic facio*. Unde difficultas est, an adimplendo præceptum illud meruerit? Ratio dubitandi est, quia ut quis mereatur adimplendo præceptum, necesse est, quod possit non adimplere illud; meruit enim, *qui potuit facere mala & non fecit, transgredi & non est transgressus*, quod de Christo dici non potest, cum ratione impeccabilitatis, non obedire non potuerit, cum peccasset, si mori noluisset: concilianda est igitur libertas in Christo cum impeccabilitate. Gonetus existimat modum verè conciliandi in Christo libertatem cum impeccabilitate, in eo consistere, quod licet non potuerit Christus velle non mori in sensu composito, hoc est, velle conjungere negationem mortis cum præcepto obligante ad mortem, benè tamen in sensu diviso, id est, velle negationem mortis ut abstractam à præcepto, contra quem modum.

Dico, quod modus verè conciliandi in Christo circa præceptum mortis à Patre impositum, libertatè à necessitate cuius omnimoda ipsius impeccabilitate, in eo consistit, quod licet non potuerit Christus velle non mori, moraliter, hoc est, ex vi impedimenti aut manutenentiæ Dei, benè tamen physicè: ita colligitur ex Doctore & ex dictis quæst. 1. Prob. Impotentia moralis faciendi aliquid, non tollit, quin liberè possit quis facere illud; plura enim liberè facimus, quæ tamen moraliter non possumus non facere, ut patet in B. Virginè, Apostolis & aliis Sanctis in gratia confirmatis, qui dum erant viatores post  
accep-



acceptum Spiritum sanctum, non poterant non diligere Christum, nec mandata ejus despiciere, tamen liberè ipsum diligebant, ejusque mandata servabant; qui habent gratiam efficacem ad aliquid faciendum, sunt moraliter determinati ad illud, tamen liberè illud faciunt. *Deinde*, voluntas potest liberè se determinare ad illud ad quod ab extrinseco & moraliter cogitur ac determinatur, cum non obstante impotentia morali aut vi agentis extrinsecè determinantis, remaneat physicè & ab intrinseco indifferens; sed cum impeccabilitate Christi ex speciali mantenentia Dei proveniente, qua Christus est impeccabilis, optimè stat potentia physica ad non observandum præceptum de morte subeunda, ut docent omnes Scotistæ cum Doctore. Tum quia ut dixi supra quæst. præcedenti, Christus non est impeccabilis ratione unionis hypostaticæ formaliter, sed ex vi mantenentiz Dei. Tum quia in Christo datur liberum arbitrium sicut in aliis hominibus, quantum ad physicum & radicale: ergo verus modus conciliandi libertatem cum impeccabilitate in Christo, consistit in eo quòd licèt non potuerit velle non mori, moraliter, benè tamen physicè potuit, quod sufficit ad merendum; subindeque impeccabilitas Christi, cum, ut ex dictis patet, non tollat potentiam physicam, sed tantum moralem, concordat cum libertate.

**Confirm.** Velle adimplere præceptum est opus meritorium, licèt ratione impedimenti ab extrinseco provenientes, præceptum adimpleri non possit; ut v. g. Catholicus qui tenetur adimplere præceptum de missa audienda, meretur & adimplet illud, dum ita impeditur, ut non possit eam audire, modò quantum est ex se velit & possit eam audire, in quo casu impotentia moralis non tollit meritum, nec incompatibilis est cum libertate, quia habet potentiam physicam, qua potest velle non audire missam & qua

& qua vult eam audire: ergo in Christo impeccabilitas concordat cum libertate, & mors est meritoria, licet Christus ratione visionis beatificæ aut manutenentiæ Dei, non potuerit velle non mori, quia in eo erat potentia physica nolendi mortem inevitabilem, qua voluit mori, ut colligitur Matth. 26. vers. 42. ubi legitur Christum dixisse Patri, *Pater mi si non potest hic calix transire nisi bibam illum, fiat voluntas tua*; subindeque Christus non obstante impeccabilitate explicata, liberè mortuus est & meruit, quia quantum ad potentiam physicam non moriendi quam habebat, & quæ erat impedita, voluit mori: oblatum enim est, quia ipse voluit.

Prob. 2. ex illo Joan. 10. ubi legitur Christum dixisse, *Ego pono animam meam ut iterum sumam eam; nemo tollit eam à me, sed ego pono eam à meipso, & potestatem habeo ponendi eam, & potestatem habeo iterum sumendi eam; hoc mandatum accepi à Patre meo*: ex quibus verbis inferitur, Christum verè potuisse velle mori, seu ponere animam, & potuisse velle non mori & non ponere animam, quod non debet intelligi de potentia prorsus completa, nempe physicè & moraliter propter impeccabilitatem, sed debet intelligi de potentia physica tantum: ergo hæc potentia physica ad obediendum vel ad non obediendum, servat rationem meriti, non obstante impotentia proxima & morali ad non obediendum, aut necessitate ad obediendum.

Prob. 3. destruendo modum Gonetii: Velle non mori in sensu diviso, id est, velle negationem mortis ut abstractam à præcepto, non sufficit ad merendum in observantia præcepti: ergo hic modus non conciliat in Christo circa præceptum mortis, libertatem à necessitate cum omnimoda impeccabilitate. Prob. antecedens: Christum posse velle non mori in sensu diviso, id est, velle negationem mortis ut abstractam à præ-

à præcepto, non est posse mereri: ergo si Christus tantum in hoc sensu potuerit non mori, nihil meruit, dum mortuus est. Consequentia patet, cum actus sine posse, minimè dari queat. Prob. antecedens: Mors ut abstracta à præcepto non est meritoria. Tum quia mors sic considerata non habet rationem obedientiæ, nec sacrificii à Deo acceptandi. Tum quia mori esset meritum peccatoribus & impiis, quod est falsum. Tum quia mors ut abstracta à præcepto est finis naturalis, ad quem tendit omne vivens corpus; idcirco volendo hujusmodi finem seu mortem quæ naturalis est, non meretur nec demeretur. Tum quia ad meritum requiritur pactum aut promissio, ideòque mors ut abstracta à præcepto, quo Deus vult sibi mortem Christi in satisfactionem peccatorum, non est præmianda, subindeque nec meritoria: ergo posse non mori in sensu diviso, id est, velle negationem mortis ut abstractam à præcepto, non est posse mereri.

Obj. Gonetus. Juxta hunc modum dicendi, stat Christum verè potuisse velle mori, etiam supposito præcepto ipsum ad mortem obligante, & tamen non potuisse velle transgredi tale præceptum: ergo modus ille verè conciliat circà præceptum mortis Christo impositum, libertatem à necessitate cum omnimoda impeccabilitate. Consequentia patet: Prob. antecedens: Christum, stante præcepto quo obligabatur ad mortem, potuisse nihilominus velle negationem mortis ut abstrahentem à tali præcepto, sive ut secundum se præcisè sumptam, est ipsū verè potuisse velle non mori; sicut voluntatem actualiter amante, atque adeò stante actu amoris, posse velle negationem amoris, ut abstrahentē ab amore, est verè ipsam posse non amare. Præterea, eundē Christū non potuisse velle negationem mortis, ut conjungendam cum præcepto obligante ad moriendū, sed solum ut abstra-

hen-

hente ab illo, est ipsum non potuisse transgredi illud præceptum; sed juxta modum dicendi (inquit) assignatum, illa duo salvantur: ergo & Christum potuisse, etiam supposito præcepto de morte subeunda; velle non mori, & tamen non potuisse velle transgredi præceptum.

Confirm. De præcepto Dei mortem Christo imperantis, eodem ferè modo philosophandum est, ac de ipsius decreto, quo talem mortem ab æterno cum omnibus ejus circumstantiis prædefinivit: præsertim cum præceptum moriendi Christo impositum, à tali decreto promanaverit & fuerit ejus executio: sicut ergo in sententia Thomistarum divinum decretum ita causas liberas ad agendum determinat, ut nedum substantiam, sed etiam modum operum attingat, ita ut causæ liberæ faciant, quod Deus vult fieri, & eo modo quo Deus fieri vult, id est liberè, & ita agant unum, ut possint agere oppositum, ut fusi in tract. de voluntate Dei declaravimus: ita similiter præceptum moriendi Christo impositum, ipsum ad substantiam & modum operis moraliter determinavit, ut nempe moreretur eo modo quo Pater voluit, scilicet liberè, sive cum potentia non moriendi; & sicut etiam in eodem tract. docuimus, ex efficaci divinæ voluntatis decreto non sequi necessariò, sed tantum infallibiliter ipsam operationem, & hanc solum infallibilitatem esse requisitam ad efficaciam illius; ita pariter nunc dicimus, quòd ut præceptum moriendi Christo impositum esset efficax, satis erat, quòd infallibiliter mortem Christi inferret, licet non necessariò. Unde tale præceptum infallibiliter mortem inferendo, reddidit Christum impeccabilem, & non inferendo necessariò, reliquit eum liberum libertate indifferentiæ. Omitto verba Joan 10. suprà in secunda probatione posita.

Resp. negando antecedens, quia licet Christus stante præcepto potuerit velle mori, tamen  
stan-

stante præcepto de morte subeunda, nullo modo potuit velle non mori & non obedire, supposita impeccabilitate physica & intrinseca à Gonetio concessa; at ut meritoria sit mors Christi, oportet, quòd Christus potuerit aliquo modo stante præcepto, velle non mori seu non obedire, ut patet ex dictis suprâ: ergo modus Gonetii non conciliat circa præceptum, libertatem à necessitate cum omnimoda impeccabilitate. Ad prob. nego suppositum & paritatem: nam licet Christus potuerit velle negationem mortis ut abstrahentem à tali præcepto, sive ut secundum se præcisè sumptam; hoc tamen non est ipsum verè potuisse velle non mori, prout non mori idem est, ac non obedire, ut est in controversia; quia hoc ipso quòd ex Gonetio erat ab intrinseco impeccabilis, non retinebat potentiam antecedentem ad non obediendum, licet eam retinuerit circa actus non præceptos, inter quos est mors secundum se præcisè considerata, secluso præcepto. Ad exemplum de voluntate amante, dico quòd licet stante actu amoris, voluntas possit velle negationem amoris ut abstrahentem ab amore, non est verè ipsam posse non amare, quia ut voluntas possit verè non amare, oportet quòd in sensu composito & stante actu amoris, possit ab intrinseco non amare objectum illud quod amat. Ratio est, quia libertas indifferentiæ quam actus meritorius exigit, requirit quòd voluntas, positis omnibus ad agendum requisitis tam ex parte potentiæ, quàm ex parte objecti, ita eliciat actum, ut possit absolutè & secundum propriam virtutem non elicere illum, quamvis ratione alicujus motivi, extrinsecè nequeat illum non elicere; quod non servat Gonetii modus conciliandi in Christo libertatem cum omnimoda impeccabilitate, cum nullo modo admittat in Christo potentiam non obediendi, aut non moriendi positis omnibus requisitis ad morien-

moriendum aut obediendum, inter quæ est præceptum de ipsa morte subeunda.

Ad confirm. nego paritatem, five decretum sit antecedens, five sit concomitans. Ratio disparitatis est, quia decretum Dei, ejusque executiva motio, libertatem humanam introrsus ingreditur, sicque se accommodat modo voluntatis, hujusmodi decretum aut motionem exigentis; quia decretum Dei est causa totius futuritionis, & ab ipso dependet voluntas: At verò præceptum Dei mortem Christo imperans, non inclinat interiùs voluntatem, sed eam extrinsecè dirigit, nec attemperat se modo illius, imò modo suo attemperat voluntatem, cum obediens accommodet se, atque subjiciat voluntati imperantis aut imperio: ergo non valet paritas.

*Dices;* Christus non potuit non adimplere præceptum de morte subeunda pro salute generis humani à Patre ipsi impositum: ergo libère tale præceptum non implevit, subindeque nec in ejus adimplerione meruit. Resp. distinguendo antecedens: Christus non potuit non obedire Patri secundum potentiam physicam & essentialem voluntatis, nego; Secundum potentiam moralem & proximè, concedo, & nego consequentiam; quia hæc libertas sufficit ad meritum, ut patet supra. Omitto quæstionem, in qua Gonetius quærit, *An operationes Christi Domini fuerint valoris meritorii simpliciter infiniti*; de qua constat in disput. de satisfactione Christi.

Quæres, an Christus sibi meruerit gratiam habitualement & gloriam essentialem animæ, vel saltem mereri potuerit, tametsi illas à primo instanti suæ conceptionis habuerit? Resp. negativè quoad 1. partem, & affirmativè quoad 2. Prob. Nullus actus in Christo præcessit gratiam habitualement nec beatitudinem, cum à primo instanti conceptionis fuerit beatus: ergo &c. Prob. 2. pars: Anima Christi potuit divinitus elicere aliquem actum, priorem natura  
saltem

saltem actu beatifico, & per talem actum mereri actum beatificæ visionis, cum habuisset omnes conditiones ad merendum de condigno gloriam essentialem: ergo de potentia absoluta Christus potuit mereri gloriam essentialem.

## Q U Æ S T I O III.

*An Christus gloriam sui corporis, sui que nominis exaltationem sibi meruerit?*

**D**ico breviter, quod Christus gloriam sui corporis, sui que nominis exaltationem sibi promeruit. Tum quia colligitur ex illo Apost. ad Philip. 2. *Humiliavit semetipsum factus obediens usque ad mortem, mortem autem crucis, propter quod & Deus exaltavit illum & donavit illi nomen quod est super omne nomen.* Tum ex Psal. 109. *De torrente in via bibit; id est in spatio vitæ suæ mortalis & transeuntis bibit aquam turbidam huius torrentis, Propterea exaltabit capus.* Tum ex illo Luc. 24. *Nonne oportuit Christum pati, & ita intrare in gloriam suam?* Tum quia opera Christi habebant omnes conditiones ad meritum requisitas in ordine ad gloriam corporis, sui que nominis exaltationem, ut constat ex Apoc. *Dignus est agnus qui occisus est, accipere virtutem & divinitatem, sapientiam, fortitudinem, honorem, gloriam & benedictionem:* ergo meruit gloriam sui corporis, honorem & exaltationem sui nominis. venit enim primò & principaliter propter nostram salutem, secundariò verò & minùs principaliter propter gloriam nominis sui, ait quidam Doctor.

*Dices:* Non sibi meruit gloriam essentialem animæ: ergo nec gloriam accidentalem corporis.

ris. Resp. negando consequentiam, quia habuit gloriam essentialem animæ ab initio conceptionis, & per modum proprietatis. *Dices*: Gloria corporis erat debita Christo ratione unionis hypostaticæ: ergo non meruit illam. Resp. negando conseq. Quia licet sit debita Christo, cum Christus non habuerit illam à principio conceptionis, ratione subtractionis concursus divini requisiti, ut gloria animæ transfret ad corpus, ut ait Gonet. potuit illam mereri; Filius enim regis, præclaris gestis imperio dignis, potest mereri regnum aliàs sibi hæreditario jure debitum.

Ex dictis *inferes* 1. contra Gonetum, Christum meruisse gloriam sui corporis verè & propriè, non autem directè, sed tantùm indirectè, id est, merendo ablationem impedimenti quo gloria animæ detinebatur & prohibebatur, ne redundaret in corpus: Quia gloria animæ Christi redundare debebat in corpus, & de facto redundasset, nisi speciali providentia fuisset suspensa, ut ait Delgadillo: ergo intentio Christi tendebat ad subtractionem concursus divini, qua detinebatur gloria: ergo meruit gloriam, quia priùs meruit amotionem illius subtractionis, & consequenter indirectè.


*Inferes* 2. Christum obtinuisse suis meritis judiciariam potestatem, regiam ac sacerdotalem dignitatem, & supremum rerum dominium; quia est possibile, & ducit ad excellentiam Christi. Meruit etiam dignitatem capitis; hæc pars est contra Gonetum, quia existimat dignitatem capitis competere Christo ratione gratiæ habitualis, ut supra docuit; at eum ex dictis constet dignitatem capitis competere Christo ex speciali institutione & electione Dei, inferendum est contra ipsum, Christum eam obtinuisse suis meritis.

*Quæres*, an Christus omnes effectus prædestinationis nobis meruerit? Resp. affirmativè. Tum quia



quia Christus meruit nobis omne illud, quod in nos influit; sed influit in nos gratiam, auxilia supernaturalia, cum sit actu caput omnium fidelium: ergo. Tum quia sanguis ejus emundat nos ab omni peccato. Tum quia Deus benedixit nos in omni benedictione spirituali in cœlestibus in Christo.

*Dices:* Virtutes theologicæ, auxilia supernaturalia, &c. sunt effectus prædestinationis; sed Christus non meruit nobis fidem, nec spem, nec auxilia supernaturalia; quia venit, ut mereretur, quod Adam peccando, sibi & nobis amiserat: ergo non meruit nobis fidem, nec spem, quæ in Adamo remanserunt. *Nego* minorem, ad cujus probationem dico, quod Adam habuit fidem, spem, &c. ex meritis Christi prævisi ut glorificatoris, sicut Angeli, ut dictum est suprâ disp. 12. quæst. 2. contra Thomistas. Vel dico, quod Adam peccando amisit nobis fidem & dona supernaturalia, quæ in nos transfudisset, si non peccasset.



## DISPUTATIO XVIII.

*De servitute, oratione & Sacerdotio Christi.*

**I**N hac disputatione examinanda sunt omnia quæ Christo Domino conveniunt per comparisonem ad Patrem æternum.

## QUÆSTIO UNICA.

*An Christus ut homo sit verè servus Dei  
An oraverit? An sit Sacerdos? & an  
potestatem regiam, non solum spiritua-  
lem, sed etiam temporalem habue-  
rit?*


**A**Dvertendum est, quòd servitus est quadru-  
plex. Prima est *naturalis*, quæ omni crea-  
turæ convenit respectu Dei, ut probat illud Sap.  
16. *Tibi factori suo creatura deserviens*. Secun-  
da est *legalis*, quæ à lege & non à natura est in-  
troducenda. Tertia est *peccaminosa*, qua homo  
subjicitur peccato, aut diabolo, ut probat illud  
Joan. 10. *Qui facit peccatum, servus est peccati*.  
Quarta est *pœnalis*, qua homo obedit Deo, me-  
tu pœnæ subeundæ, ut probat illud Rom. 2. *Non  
accepistis spiritum servitutis iterum in timore*.

Dico 1. quòd Christus ut homo est verè &  
propriè servus Dei, tantùm servitute naturali.  
Tum quia Christus ut homo est sub potestate  
Dei, & omnes suas actiones, suosque labores  
in ejus obsequium tenetur impendere, titulo  
creationis & conservationis. Tum quia Deus,  
est Dominus omnium creaturarum: ergo Chri-  
stus est servus Dei, non servitute legali, quia  
servitus legalis excludit amicitiam, jus ad hæ-  
reditatem Domini, & communicationem cum  
Domino in bonis & honore; nec servitute  
peccaminosa, quia peccatum non fecit; nec ser-  
vitute pœnali, quia obediebat Deo propter  
Deum ipsum: ergo servitute naturali tantùm.

Dico 2. quòd Christus in hac vita mortali  
verè oravit, & nunc orat in cælo. Tum quia  
Christus ut homo, erat subditus & servus Dei:  
ergo ipsi convenit orare Deum, ut probat illud  
Luc. 6. *Exiit in montem orare, & erat pernoctans*

quia Christus meruit nobis omne illud, quod in nos influit; sed influit in nos gratiam, auxilia supernaturalia, cum sit actu caput omnium fidelium: ergo. Tum quia sanguis ejus emundat nos ab omni peccato. Tum quia Deus benedixit nos in omni benedictione spirituali in cœlestibus in Christo.

*Dices:* Virtutes theologicæ, auxilia supernaturalia, &c. sunt effectus prædestinationis; sed Christus non meruit nobis fidem, nec spem, nec auxilia supernaturalia; quia venit, ut mereretur, quod Adam peccando, sibi & nobis amiserat: ergo non meruit nobis fidem, nec spem, quæ in Adamo remanserunt. *Nego* minorem, ad cujus probationem dico, quod Adam habuit fidem, spem, &c. ex meritis Christi prævisi ut glorificatoris, sicut Angeli, ut dictum est suprâ disp. 12. quæst. 2. contra Thomistas. Vel dico, quod Adam peccando amisit nobis fidem & dona supernaturalia, quæ in nos transfudisset, si non peccasset.



## DISPUTATIO XVIII.

*De servitute, oratione & Sacerdotio Christi.*

**I**N hac disputatione examinanda sunt omnia quæ Christo Domino conveniunt per comparisonem ad Patrem æternum.

## QUÆSTIO UNICA.

*An Christus ut homo sit verè servus Dei  
An oraverit? An sit Sacerdos? & an  
potestatem regiam, non solum spiritua-  
lem, sed etiam temporalem habue-  
rit?*

**A**Dvertendum est, quòd servitus est quadru-  
plex. Prima est *naturalis*, quæ omni crea-  
turæ convenit respectu Dei, ut probat illud Sap.  
16. *Tibi factori suo creatura deserviens*. Secun-  
da est *legalis*, quæ à lege & non à natura est in-  
troducenda. Tertia est *peccaminosa*, qua homo  
subjicitur peccato, aut diabolo, ut probat illud  
Joan. 10. *Qui facit peccatum, servus est peccati*.  
Quarta est *pœnalis*, qua homo obedit Deo, me-  
tu pœnæ subeundæ, ut probat illud Rom. 2. *Non  
accepistis spiritum servitutis iterum in timore*.

Dico 1. quòd Christus ut homo est verè &  
propriè servus Dei, tantùm servitute naturali.  
Tum quia Christus ut homo est sub potestate  
Dei, & omnes suas actiones, suosque labores  
in ejus obsequium tenetur impendere, titulo  
creationis & conservationis. Tum quia Deus,  
est Dominus omnium creaturarum: ergo Chri-  
stus est servus Dei, non servitute legali, quia  
servitus legalis excludit amicitiam, jus ad hæ-  
reditatem Domini, & communicationem cum  
Domino in bonis & honore; nec servitute  
peccaminosa, quia peccatum non fecit; nec ser-  
vitute pœnali, quia obediebat Deo propter  
Deum ipsum: ergo servitute naturali tantùm.

Dico 2. quòd Christus in hac vita mortali  
verè oravit, & nunc orat in cælo. Tum quia  
Christus ut homo, erat subditus & servus Dei:  
ergo ipsi convenit orare Deum, ut probat illud  
Luc. 6. *Exiit in montem orare, & erat pernoctans*


*in oratione.* Tum quia *Advocatum habemus apud Patrem Iesum Christum justum.* Jon. 2. *Et semper vivens ad interpellandum pro nobis:* ergo orat in cœlo.

*Dices* 1. Mens Christi fuit Deo beatificè unita ab instanti conceptionis: ergo non potuit orare, cùm oratio sit elevatio mentis in Deum. 2. Christus habet omnem potestatem, ut probat illud Matth. 28. *Data est mihi omnis potestas in cœlo & in terra:* ergo non orat, cùm oratio connotet potestatis carentiam. Resp. ad 1. mentem Christi potuisse ascendere in Deum per actus intellectus & volûtatis inferiores visione, per quos Deo sua desideria pro se vel pro aliis proponeret, ut ait Gonet. sicuti beati in cœlo similimodo pro nobis & seipsis orant. Ad 2. nego consequentiam, quia oratio includit etiam cultum quem Christus debebat Deo, qui cum potestate optimè compatitur, dum potestas est dependens ab alio supremo, qualis est Deus, à quo Christus suam accepit potestatem.

*Dico* 3. Quòd Christus ut homo, fuit verè & propriè sacerdos, & habuit jus regum directum seu temporale, & potestatem in totum universum excellenti quodam modo. Patet 1. pars. Tum quia ordinatus fuit ad sacrificandum & orandum pro delictis & peccatis populi; *Tradidit enim semetipsum pro nobis oblationem & hostiam Deo.* Tum quia fuit verè mediator inter Deum & homines, *Vnus mediator Dei & hominum homo Iesus Christus,* ait Apost. 1. ad Timot. 2. Tum quia est caput Ecclesiæ. Patet etiam 2. pars. Tum quia in sacra Scriptura dicitur Rex regum & Dominus dominantium Apoc. 9. & Act. omnium Dominus. Tum quia data est ei omnis potestas in cœlo & in terra: Matth. ultimo. Tum quia Deus omnia subjecit sub pedibus ejus: Psal. 8.

*Dices* 3. Joan. 18. habetur Christum dixisse, *Regnum meum non est de hoc mundo.* Resp. Hoc esse

esse intelligendum quoad exertitium, non verò quoad potestatis jus: noluit enim uti potestate regia quam habebat, quia venerat in alium finem, *Filius hominis* (inquit Matth. 20.) *non venit ministrari, sed ministrare; & dare animam suam, redemptionem pro multis.* Dices: ergo illa potestas fuit otiosa & inutilis. Nego, quia fuit heroica humilitatis virtus non uti dominio: ergo non fuit otiosa nec inutilis, quia conducit ad excellentiam Christi.



## DISPUTATIO XIX.

*De adoptione & predestinatione Christi.*

**I**N unam disputationem duas confundere, consentaneum judicavi propter utriusque brevitatem; unde sic

## QUÆSTIO I.

*An Christus in quantum homo, sit Filius adoptivus Dei?*

**S**Uppono tamquam certum apud omnes, adoptionem sic deffiniri, *Gratuita & liberalis assumptio extraneæ personæ ad hereditatem*; unde examinandum est, an hæc definitio conveniat humanitati Christi, seu an sit extraneæ?

Dico igitur, quòd Christus ut homo non debet dici Filius Dei adoptivus. Hæc conclusio est Scoti in 3. dist. q. unica, quem sequuntur Ma-

frius, Poncius, Frassen, Boyvin & alii. Prob. 1. Si Christus ut homo esset Filius Dei adoptivus, necessario non esset Filius proprius; cum Filius adoptivus & proprius sint diversi, ut patet ex Epist. Conc. Francof. ad Episcopos Hispaniæ, pag. 153. colum. 2. ubi habetur, *Adoptivus siquidem non habet aliam significationem, nisi ut Iesus Christus non sit proprius Filius Dei; quia adoptio non est, nisi charitatis copulatio, qua Pater adoptione sibi copulat Filium, quem proprium non habebat*; sed Christus ut homo appellatur Filius proprius: proprio enim Filio non pepercit, ait Paulus ad Rom. 8. ubi Adrianus Pontifex sic loquitur: *Nam si proprium appellat, quomodo erit adoptivus?* ergo Christus ut homo, non est Filius adoptivus Dei. Deinde, Christus loquens de Deo Patre, ait, *Ascendo ad Patrem meum & Patrem vestrum*; ex quibus verbis insert idem Pontifex, Christum non esse Filium Dei, filiatione qua Apostoli erant Filii Dei; aliàs dixisset, *Ascendo ad Patrem nostrum*, quoniam erat homo sicut Apostoli; sed Apostoli erant Filii adoptionis, ut fatetur Paulus ad Rom. 8. ergo Christus non est Filius adoptivus Dei.

Prob. 2. Ille qui adoptatur, debet esse extraneus adoptanti, & alienus ante adoptionem, ut patet ex definitione; sed Christus quatenus homo, nunquam fuit Deo Patri extraneus, & absque jure ad hæreditatem Dei: ergo non potuit adoptari. Prob. minor 1. Humanitas seu homo non potest adoptari, nec propriè dici extraneus, aut in carentia juris ad hæreditatem, antecedenter ad subsistentiam & ultimum complementum naturæ, seu antequàm subsistat & sit omninò completus; subindeque adoptio quæ est assumptio personæ, sequitur naturam personatam, cum sit assumptio ad hæreditatis fruitionem, & fruitio sit operatio, quæ à supposito provenit; sed humanitas Christi

sti subsistit, & ultimò completur per subsistentiam divinam: ergo non potest concipi ut extranea, nec in carentia juris ad hæreditatem Dei, cum per illam subsistentiam sit Deo substantialiter conjuncta, & per communicationem idiomatum habuerit quidquid Verbum divinum habet, antequam contraxisset carentiam juris, si propria subsistentia subsistere debuisset, & priusquam dicenda fuisset extranea & aliena à Deo. 2. Gratia adoptionis nullum jus supponit in subiecto quod ad hæreditatem adoptat, ut patet, cum gratia adoptionis det primum jus ad hæreditatem: sed gratia habitualis, per quam homo acquirit formaliter jus ad hæreditatem Dei, supponit in Christo jus ad gloriam: supponit enim, ut patet ex dictis cum Doctore, humanitatem subsistentem & unitam Verbo: ergo non datei jus, subindeque non est forma adoptans Christum, nec extraneum aut alienum reperiens. 3. Ille qui est adoptandus, oportet, quod ex vi generationis suæ, nihil habeat, quod sit à Patre, nec quod habeat concomitanter aut de congruo jus hæreditandi; sed humanitas Christi, seu Christus ut homo ex vi generationis suæ habet suppositum, quod est à Patre & divinum; aliàs B. Virgo non esset mater Filii Dei, & habet concomitanter & de congruo jus hæreditandi, quia unio hypostatica est fundamentaliter & radicaliter sanctitas & jus ad gloriam.

*Dices I.* Extraneitas ad adoptionem requisita, per gratiam habitualement duntaxat tolli potest; sed Christus fuit prius subsistens & existens, quam gratia habituali illustratus: ergo fuit extraneus, & consequenter per gratiam adoptatus. Resp. negando majorem, quia extraneitas potest etiam tolli per physicam & realem conjunctionem, & unitatem suppositi & personæ cum Filio Dei; unde licet infusi gratiæ supponat humanitatem existentem & subsistentem; tamen non supponit ipsam extraneam & alienam,



quia per unionem qua subsistit & existit in Verbo, unitur realiter cum Deo. *Iustabis*, Contritio unit hominem cum Deo, qua non obstante homo est extraneus & per gratiam adoptatur: ergo licet per unionem uniatur, est etiam extraneus, donec per gratiam jungatur Deo. Resp. negando paritatem, quia contritio non unit substantialiter, formaliter, mutuò & physice hominem cum Deo, sicut facit unio hypostatica: ergo contritio non excludit extraneitatem, sicut unio hypostatica.

*Dices 2.* Gratia habitualis Christi est ejusdem speciei cum nostra: ergo ponit in Christo jus ad gloriam sicut in nobis. Prob. consequentia: Gratia non potest esse in subiecto, quin ipsi communicet suum effectum formalem, qui nihil aliud est quam ipsa forma communicata subiecto: ergo communicat Christo eundem effectum quem communicat nobis. Resp. negando consequentiam, quia gratia habitualis non confert jus adoptionis ex vi formalitatis gratiæ, sed ex diversis præsuppositis & connotatis, scilicet ex connotato extraneitatis; unde cum in Christo non connotet extraneitatem, sicut in homine, sequitur, quod non adoptat Christum sicut homines. Ad prob. nego consequentiam, quia gratia ex sua ratione formali non est forma adæquata constituens filiationem adoptivam; exigit prætereà extraneitatem, sicut v.g. comestio, ut sit forma adæquata constituens cœnam, requirit connotationem temporis vespertini: ergo gratia licet sit in Christo sicut in nobis, tamen in ipso non est forma adoptans, sicut in nobis, ex defectu extraneitatis.

*Dices 3.* D. Hilar. 2. de Trinit. ait, *Potestatis divinitas non amittitur, dum carnis humilitas adoptatur.* Ad Rom. 1. *Christus prædestinatus est Filius Dei*, quod non potest intelligi nisi de Filio adoptionis: ergo Christus ut homo, est Filius.

Filius Dei adoptivus. Resp. ad 1. D. Hilarium locutum fuisse de adoptione latè sumpta, quæ pro quacumque assumptione voluntaria & gratuita sumitur; unde cùm humanitas sit assumpta à Verbo, dicitur adoptata; non verò in proprio sensu, in quo sumitur à juristis. Ad 2. resp. nego consequentiam, quia hoc potest intelligi de Filio naturali, in sensu in sequenti conclusione explicando.

Dico 2. quòd Christus in quantum homo, per gratiam unionis est Filius Dei naturalis formaliter, *Ly in quantum* determinante in recto, non naturam, sed suppositum ut in illa subsistens; non reduplicativè, sed specificativè. Prob. ex illo Luc. 1. *Quod nascetur ex te sanctum, vocabitur Filius Dei*; sed non vocabitur Filius Dei adoptivus, ut probat prima conclusio: ergo naturalis: sed non naturalis reduplicativè, seu quatenus homo & reduplicat humanitatem. Tum quia homo sic sumptus, non procedit à Deo in similitudinem naturæ. Tum quia si in hoc sensu esset Filius naturalis, esset unum & idem ens cum Patre, quod est falsum: ergo est Filius naturalis specificativè sumptus, id est, Christus in quantum homo subsistens substantia Verbi, est Filius naturalis Dei, & prout *Ly naturalis* opponitur *adoptivo* & idem est ac *Filius proprius*: Ideoque Christus adorandus est adoratione patriæ, ut docent omnes Theologi; Filius enim Dei est: ergo cultu quem Deo exhibemus, adorandus est.

Ratio hujus adorationis exhibendæ est, quia Christus quatenus Deus homo debet unica adoratione adorari, ita ut ejus humanitas prout hypostaticè unita verbo divino, adoranda sit eadem adoratione patriæ, qua ejus divinitas & substantia divina adorantur, ut asserit Scotus in 3. dist. 9. quæst. unica §. *de tertio articulo*. Nec valet dicere Christum esse minorem Patre secundum humanitatem, & consequenter non

320 DE INCARNATIONE.  
esse adorandum adoratione patriæ qua adoratur Deus, non valet, inquam, quia adoratur quatenus est Deus homo, & prout humanitas est subsistens persona divina, quæ non habet conceptum minoritatis.

---

## Q U Æ S T I O II.

*Quisnam sit terminus primarius  
& principalis prædestinationis Christi?*

**D**Ico, quòd beatitudo, seu gloria animæ Christi, est primarius & principalis terminus prædestinationis Christi; & filiatio Dei naturalis, est terminus secundarius & minùs principalis. Prob. Humanitas Christi fuit priùs prædestinata ad summam gloriam, quàm ad unionem hypostaticam, per quam ex Gonet, Christus est Filius Dei naturalis: ergo gloria, non verò filiatio Dei naturalis, est terminus primarius & principalis prædestinationis Christi, seu id ad quod primariò prædestinatus est. Consequentia patet. Prob. antecedens: Ordo executionis est contrarius ordini intentionis, ut probat hoc axioma, *Quæ sunt priora in intentione, sunt posteriora in executione*; sed in executione, humanitas fuit priùs unita hypostaticè Verbo, quàm sanctificata gratia; & priùs sanctificata gratia, quàm beata: ergo id ad quod primariò & principaliter fuit prædestinata à Deo humanitas, est ejus gloria; & filiatio Dei naturalis, est terminus secundarius. 2. In prædestinatione aliorum hominum, in sententia Gonet, ut patet in 1. tom. gloria est terminus primarius & principalis; & filiatio Dei adoptiva quæ sit per gratiam, est terminus secundarius.

secundarius & minùs principalis; prædestinatio enim (inquit) fit ante prævisa merita: ergo Christus fuit etiam priùs prædestinatus ad gloriam, quàm ad unionem & filiationem Dei naturalem.

*Instare* posset Gonetus: ergo cùm ut patet ex dictis in 1. tom. prædestinatio hominum fiat post prævisa merita, oportet, quòd Christus sit priùs prædestinatus ad filiationem Dei naturalem, quàm ad gloriam. Resp. negando instantiam & paritatem. Ratio est, quia in nobis gloria est præmium & coronæ, in Christo autem quoniam Filius naturalis Dei est, non habet rationem præmii nec coronæ, sed hæreditatis: ergo potest intendi in Christo priusquam filiatione, & quàm omne id quo est sanctus, cùm inter dona & beneficia, majus & nobilius priùs intendatur; at in nobis cùm sit præmium, non potest intendi nisi ex cognitione filiationis adoptivæ & gratiæ.

*Quæres*, quot modis prædestinatio Christi sit causa nostræ prædestinationis? Resp. esse causam in triplici genere causæ, ut ait Gonet. nimirum in genere causæ finalis, ut probat illud ad Ephes. 1. *Prædestinavit nos in adoptionem filiorum per Iesum Christum, in ipsum*; exemplaris, ut probat illud Apost. *Quos præscivit & prædestinavit conformes fieri imagini Filii sui, ut sit ipse primogenitus in multis fratribus*; & in genere causæ meritorie, ipse enim est, *Qui lavit nos à peccatis nostris in sanguine suo*, ut ait Joan. Tandem, hæc responsio patet in Conc. Trident. pluribus in locis, & suadetur ratione, cùm constet Christum esse finem, exemplar & caput prædestinatorum.

Obj. 1. Gonetus: Colligitur ex variis locis Scripturæ, præsertim ex illo ad Rom. 1. *Qui prædestinatus est Filius Dei*, quibus verbis explicat præcipuū terminum prædestinationis Christi & principaliter intentum, nimirum filiationem

nem Dei naturalem: Unde Aug. lib. de prædest. SS. cap. 15. ex illis verbis Apost. sic infert, *Prædestinatus ergo Iesus, ut qui futurus erat secundum carnem Filius David, esset tamen in virtute Filius Dei*; subindeque censet Christum ut Filium David, quod est idem ac Christum ut hominem, fuisse prædestinatum ut esset Filius Dei naturalis. Subdit Apostolus, *Secundum spiritum sanctificationis ex resurrectione mortuorum*, ut declaret terminum secundarium ad quem prædestinatus est Christus, ut nimirum sit sanctus & sanctificator aliorum, & gloriam resurrectionis per sua merita acquirat. Item Joan. 1. explicatur terminus primarius prædestinationis Christi, cum dicitur, *Et Verbum caro factum est*; secundarius verò cum subditur, *Et vidimus gloriam ejus, gloriam quasi unigeniti à Patre, plenum gratia & veritatis*.

Resp. Verba Apostoli, D. Augustini, & Evangelistæ intelligenda esse de prædestinatione Christi in ordine executionis, non verò in ordine intensionis, ut est quæstio, ut consideranti patebit: verum enim est, quòd homo in executione prius prædestinatus est Filius Dei, quàm beatus, quia unio hypostatica, ratione cujus Christus est Filius Dei, præcedit visionem Dei. Omitto rationem qua probat contra Durandum, Lorcam & Ysambertum, Christum esse prædestinatum propriè loquendo ad filiationem Dei naturalem, quia ut ipse fatetur non impugnatur Scotum.

Oj. 2. Ille dicitur terminus primarius & principalis prædestinationis Christi, qui fuit primò & principaliter intentus, & subsecutus ex ejus prædestinatione; sed filiatio Dei naturalis sic se habet: ergo &c.

Confirm. Unio ad Deum secundum esse, quæ præstatum à gratia unionis, perfectior est unionem ad Deum secundum operationem, in qua  
con-

consistit beatitudo; sed quod excellentius est, ad inferius ut ad finem non ordinatur: ergo humanitas Christi non fuit ordinata ad unionem hypostaticam ut medium, & ad beatitudinem ut finem; sed contra, beatitudo ut fini subordinatur unioni hypostaticæ, & consequenter non fuit prædestinata ad beatitudinem ut finem & terminum principalem, sed ad filiationem naturalem Dei.

Resp. negando minorem, quia unio hypostatica ordinatur ad visionem Dei qua Christus videt divinam essentiam, subindeque est id, quod est primò & principaliter intentum, & ultimò in executione subsecutum, licet unio hypostatica sit ens divinum per essentiam seu per substantiam, & visio participativè: hoc enim non obstat, quia visio & unio intenduntur & subsequuntur secundum proprium & debitum ordinem; unde cum visio habeat rationem finis, & unio rationem mediæ ad ipsum finem, in intentione visio præcedit unionem. Ad confirm. Resp. cum Delgadillo tract. de Incarn. diff. 6. dub. 2. negando majorem.

### Q U Æ S T I O III.

*An Christus meruerit prædestinationem nostram, ut est comparativa, & electio unius præ alio?*

**P**Rædestinatio nostra dupliciter considerari potest. 1. quatenus est dilectio. 2. quatenus est electio unius ad gloriam præ alio; unde hic discutiendum est, an Christus meruerit electionem illam, id est, an meruerit prædestinationem, prout dicit electionem Petri, v. g. comparative ad Judam reprobam? Gonet. creditur.

Scotum negativam docuisse sententiam ; aliter tamen sentiunt Poncius , Delgadillo , Felix & alii recentiores contra aliquos Scotistas , quos citat & sequitur Mastrius .

Dico igitur Christum meruisse prædestinationem nostram sub ratione electionis consideratam . Prob. 1. Christus meruit Angelis gratiam & gloriam essentialem , ut dictum est supra ; ergo meruit etiam electionem nostram ad gloriam . 2. Meritum Christi est omnis spiritalis boni fons & caput : *Vocavit enim nos vocatione sua sancta , non secundum opera nostra , sed secundum gratiam quæ data est nobis in Christo Iesu* , 2. ad Timot. 1. Aliàs sequeretur , quòd electi & prædestinati , in electione sese jactare possent : ergo est causa meritoria prædestinationis nostræ , etiam prout est comparativa & electio unius præ alio . 3. Merita Christi fuerunt prævisa ante prædestinationem hominum , ut est comparativa & electio unius præ alio . Tum quia Christus est omnium prædestinatorum primus , Tum quia ex Doctore , fuit prævisus in primo signo : ergo potuit Deus propter illa merita prædestinare ad gloriam illos homines quos prædestinavit , & consequenter de facto eos propter Christi merita prædestinavit . Tum quia proposuit Deus omnia , sive quæ in cælis , sive quæ in terris sunt , restaurare in Christo . Tū quia conducit ad majorem excellentiā & dignitatē Christi .

Prob. denique : Si prædestinatio Petri v. g. prout est electio ejusdem præ alio , nimirum Juda , non dependeret à meritis Christi prævisis , sequeretur 1. quòd Petrus salvus factus fuisset , etiam si Christus non venisset ; sed hoc est falsum ; Christus enim venit necessario salvum facere genus humanum , ut colligitur ex SS. Patribus : ergo & illud , unde sequitur . Prob. major : Nam decretum quo Deus prædestinavit Petrum , & ipsum elegit præ alio , à meritis Christi independens , fuisset irrevocabi-

cabile, infallibile & efficax: ergo etiam si Christus non venisset, executioni demandatum fuisset. 2. Quod Christus non esset causa efficiens meritoria prædestinationis nostræ, ut patet; sed hoc est falsum: *Benedixit enim nos omni benedictione spiritali in caelestibus in Christo*, ut ait Paulus ad Ephes. 1. ergo meruit nobis prædestinationem & electionem ad gloriam, quod verum esse probat ipsemet Christus dicens Joan. 15. *Non vos me elegistis, sed ego elegi vos*, quæ verba de electione ad gloriam intelligunt expostores, & præsertim August. lib. de prædest. SS. cap. 19. ubi sic concludit: *Ergo illos elegit ad obtinendum regnum suum.*

*Dices* 1. Prædestinatio electorum revocatur in divinam voluntatem, & appellatur in sacra Scriptura opus misericordiæ, *Prædestinavi enim nos secundum propositum voluntatis suæ in laudem gloriæ gratiæ suæ*, ait Apost. ad Ephes. 1. ergo non dependet à meritis Christi. Resp. 1. Voluntatem Dei fuisse motam & incitatam per electorum merita, ut probatum manet in 1. tom. ubi dictum fuit prædestinationem fieri ex prævisis meritis. Resp. 2. negando consequentiam, quia prædestinatio ad gloriam à SS. Patribus gratuita dicitur, & opus misericordiæ respectu electorum, non verò respectu Christi, propter cujus merita Deus eos prædestinavit.

*Dices* 2. Joan. 17. habetur Christum dixisse Deo Patri: *Rogo pro eis quos dedisti mihi, Pater sancte serva eos quos dedisti mihi, quos dedisti mihi custodiri*, quo loquendi modo (inquit Mastrius) significatur acquisitionem illorum non fuisse promeritam quoad priam voluntatem dandi illos Christo, alioquin dici non possent à Patre Christo donati: ergo. Resp. negando consequentiam; nam Christus meruit exaltationem nominis sui, ut fatetur Mastrius, nihilominus Paulus ait, *Christus humiliavit semetipsum factus obediens usque ad mortem*, propter



Scotum negativam docuisse sententiam ; aliter tamen sentiunt Poncius , Delgadillo , Felix & alii recentiores contra aliquos Scotistas , quos citat & sequitur Mastrius .

Dico igitur Christum meruisse prædestinationem nostram sub ratione electionis consideratam . Prob. 1. Christus meruit Angelis gratiam & gloriam essentialem , ut dictum est supra : ergo meruit etiam electionem nostram ad gloriam . 2. Meritum Christi est omnis spiritualis boni fons & caput : *Vocavit enim nos vocatione sua sancta , non secundum opera nostra , sed secundum gratiam quæ data est nobis in Christo Iesu* , 2. ad Timot. 1. Aliàs sequeretur , quod electi & prædestinati , in electione sese jactare possent : ergo est causa meritoria prædestinationis nostræ , etiam prout est comparativa & electio unius præ alio . 3. Merita Christi fuerunt prævisa ante prædestinationem hominum , ut est comparativa & electio unius præ alio . Tum quia Christus est omnium prædestinatorum primus , Tum quia ex Doctore , fuit prævisus in primo signo : ergo potuit Deus propter illa merita prædestinare ad gloriam illos homines quos prædestinavit , & consequenter de facto eos propter Christi merita prædestinavit . Tum quia proposuit Deus omnia , sive quæ in cœlis , sive quæ in terris sunt , restaurare in Christo . Tū quia conducit ad majorem excellentiā & dignitatē Christi .

Prob. denique : Si prædestinatio Petri v. g. prout est electio ejusdem præ alio , nimirum Juda , non dependeret à meritis Christi prævisis , sequeretur 1. quod Petrus salvus factus fuisset , etiam si Christus non venisset ; sed hoc est falsum : Christus enim venit necessario salvum facere genus humanum , ut colligitur ex SS. Patribus : ergo & illud , unde sequitur . Prob. major : Nam decretum quo Deus prædestinavit Petrum , & ipsum elegit præ alio , à meritis Christi independens , fuisset irrevocabi-

cabile, infallibile & efficax: ergo etiam si Christus non venisset, executioni demandatum fuisset. 2. Quod Christus non esset causa efficiens meritoria prædestinationis nostræ, ut patet; sed hoc est falsum: *Benedixit enim nos omni benedictione spirituali in celestibus in Christo*, ut ait Paulus ad Ephes. 1. ergo meruit nobis prædestinationem & electionem ad gloriam, quod verum esse probat ipsemet Christus dicens Joan. 15. *Non vos me elegistis, sed ego elegi vos*, quæ verba de electione ad gloriam intelligunt expostores, & præsertim August. lib. de prædest. SS. cap. 19. ubi sic concludit: *Ergo illos elegit ad obtinendum regnum suum.*

*Dices* 1. Prædestinatio electorum revocatur in divinam voluntatem, & appellatur in sacra Scriptura opus misericordiæ, *Prædestinavi enim nos secundum propositum voluntatis suæ in laudem gloriæ gratiæ suæ*, ait Apost. ad Ephes. 1. ergo non dependet à meritis Christi. Resp. 1. Voluntatem Dei fuisse motam & incitatam per electorum merita, ut probatum manet in 1. tom. ubi dictum fuit prædestinationem fieri ex prævisis meritis. Resp. 2. negando consequentiam, quia prædestinatio ad gloriam à SS. Patribus gratuita dicitur, & opus misericordiæ respectu electorum, non verò respectu Christi, propter cuius merita Deus eos prædestinavit.

*Dices* 2. Joan. 17. habetur Christum dixisse Deo Patri: *Rogo pro eis quos dedisti mihi, Pater sancte serva eos quos dedisti mihi, quos dedisti mihi custodiri*, quo loquendi modo (inquit Mastrius) significatur acquisitionem illorum non fuisse promeritam quoad primam voluntatem dandi illos Christo, alioquin dici non possent à Patre Christo donati: ergo. Resp. negando consequentiam; nam Christus meruit exaltationem nominis sui, ut fatetur Mastrius, nihilominus Paulus ait, *Christus humiliavit semetipsum factus obediens usque ad mortem*, pro-

*per quod & Deus exaltavit illum, & donavit illi nomen quod est super omne nomen: ergo prædestinati possunt dici Christo donati, quamvis sint acquisiti.*

*Dices 3.* Prædestinati fuerunt electi antecedenter ad prævisionem Passionis ac meritorum Christi; nam ut ex suprâ dictis cum Doctore constat, si Adam non peccasset, Christus venisset: quia erat caput prædestinatorum & primogenitus, quod probat prædeterminationem nostram præcedere prævisionem peccati & Passionis: ergo electi fuerunt prædestinati antecedenter, idcirco independenter à meritis Christi. Resp. argumentum supponere omnia Christi merita à Passione illius dependere, quod est falsum, quia meruit per actus dilectionis à Passione independentes, ut patet ex dictis suprâ: Unde neganda est consequentia, quia licet prædestinati fuerint antecedenter ad prævisionem Passionis Christi & meritorum ejusdem in carne passibili, non fuerunt prædestinati antecedenter ad prævisionem meritorum Christi absolutè nec meritorum Christi glorificatoris, sub quo titulo, ex Doctore, venisset, etiamsi Adamus non peccasset.

Ad meritum condignum, seu ad merendum de condigno non est necesse pati aut mori, nec habere carnem passibilem; sed sufficit elicere aliquod opus bonum, honestum, in gratia sanctificante propter Deum, ut patet ex definitione meriti in proprio loco tradita, & ex conditionibus ad merendum requisitis, inter quas non reperitur hæc de carne passibili, nec de morte subeunda: ergo Christus ut glorificator prævisus, atque ut eliciens sub hoc titulo actus dilectionis & amoris, quos eliciisset, etiamsi venisset in carne impassibili, potuit mereri nostram prædeterminationem, ut est comparativa & electio unius præ alio; quamvis prædestinati fuerint electi antecedenter ad prævisionem passionis ac meritorum Christi ut redemptoris & in carne passibili. Pro-  
batur

batur consequentia : nam ad Eph. II. legitur , *Elegit nos in ipso*, id est Christo , *ante mundi constitutionem* : Igitur sine Christo Deus non elegisset nos , idcirco electio nostra pendet à Christo , non ut à Christo redemptore , ut tradit objectio ; ergo ut à Christo glorificatore , alioquin Deus non elegisset nos in Christo , quod est contra Apostolum . Christum esse causam nostræ prædestinationis , clarè demonstrant autoritates , & præsertim ista , quæ est act. 4. vers. 12. *Et non est in alio aliquo salus , nec enim aliud nomen est sub cælo datum hominibus , in quo oporteat nos salvos fieri* : quibus verbis suadetur merita Christi prædestinati & prævisi , esse causam prædestinationis & salutis hominum .






# TRACTATUS II.

## *De Sacramentis in communi.*

**E**XAMINATIS omnibus quæ more scholastico de gratia & de Christo Domino dicuntur, modò agendum est de Sacramentis; cum nedùm sint uberrimi gratiæ rivus & fontes Salvatoris, in hoc cantico Isajæ; *Haurietis aquas de fontibus Salvatoris*, prænuntiati; sed etiam illa cœlestis medicina omnibus hominibus à Christo præparata, ut ait Scotus noster in 4. dist. 1. litt. A. *Samaritanus ille piissimus, spoliatum videns hominem & atrociter sauciatum, miserationis affectu compatiens, medicinam attulit efficacem, qua curatis ipsius vulneribus, ac plena reddita sanitate, in sui principium, à quo descendens ab Ierusalem deviaverat, finaliter reducatur.* Unde sit



## DISPUTATIO I.

### *De essentia Sacramenti.*

**P**riusquàm ad Sacramentorum numerum, effectus & institutorem deveniamus, de essentia Sacramenti secundùm se sumpti, agendum est.

QUÆ.

## Q U Æ S T I O I.

*An solum in genere signi, vel etiam in genere causæ, Sacramentum in communi debeat constitui?*

**I**N hac quæstione explicanda est, propria definitio, Sacramenti natura; sed prius sciendum est, hoc nomen *Sacramentum* diversimodè usurpari. Apud Priscos Latinos sumebatur olim pro pecunia quam litigantes apud summum Pontificem deponebant, ut qui causa caderet, pro lite injustè suscepta, ea pecunia mulctaretur, ut constat ex Cicerone Orat. pro Milone. Apud Jurisperitos usurpatur pro juramento, ut patet ex Tertul. lib. de Idolatr. cap. 19. In Scriptura verò sumitur pro occulto mentis secreto seu mysterio, ut colligitur ex illo Tob. 12. *Sacramentum Regis abscondere bonum est*, ubi Græcè habetur, *Mysterium Regis abscondere bonum est*, & Vulgata Latina, *Sacramentum Regis abscondere bonum est*. Tandem apud Patres, Concilia & Theologos, hoc nomen *Sacramentum* sumitur pro signo sensibili rei latentis & occultæ, ut infertur ex Apost. ad Ephes. 5. ubi matrimonium appellat Sacramentum, quia est signum sensibile latentis conjunctionis Christi cum Ecclesia; *Sacramentum hoc* (inquit) *magnum est: ego autem dico in Christo & in Ecclesia*. Unde D. August. D. Bern. & alii dicunt Sacramentum esse sacrum signum. Hinc constat Sacramentum non esse in genere causæ, loquendo de causa strictè sumpta pro causa physica efficiente, sed formaliter signum.

Dico igitur Sacramentum sic definiri, *Signum sensibile gratiam Dei, vel effectum ejus gratuitum, ex institutione divina efficaciter significans, ordinatum ad salutem hominis viatoris*.

Ita

Ita Doctor in 4. dist. 1. quæst. 2. §. *de tertio principali*. Prob. Illa definitio est vera & propria, quæ convenit soli definito, ut dicunt Philosophi; sed hæc definitio convenit Sacramento dumtaxat: ergo est vera & propria. Prob. minor explicatione singularum illius particularum: Dicitur *signum*, ut conveniat veluti per genus cum aliis signis quæ Sacramenta non sunt. Dicitur *sensibile*, quia debet inducere hominem, qui tantum per sensus in cognitionem ducitur, ad notitiam rei spiritualis, nempe gratiæ sanctificantis. Dicitur *gratiam Dei efficaciter significans*, ut distinguatur ab aliis signis, quæ non causant id quod significant, nec sunt ejus instrumentalis causa, sed solum demonstrant & indigitant. Dicitur *vel effectum ejus gratuitum*, ut definitio conveniat sanctissimo Eucharistiæ Sacramento, quod non significat gratiam inhærentem & accidentalem, sed gratiam per se subsistentem, puta corpus Christi. Dicitur *ex institutione divina*, ad insinuandum 1. Sacramentum infallibiliter causare gratiam, modò persona suscipiens sit disposita. 2. A solo Deo incarnato fuisse institutum: Unde hæc Christi verba ad Magdalenam *Remittuntur tibi peccata tua*, non sunt verè Sacramentum, quia non fuerunt ab eo instituta ad significandam gratiam in Ecclesia Dei. Dicitur tandem *ordinatum ad salutem hominis viatoris*. Tum quia Sacramenta sunt fontes aquæ salientis in vitam æternam, ad quam tendit homo viator dumtaxat. Tum quia sunt medicinæ, solis ægris necessariæ; sed omnia hæc dicuntur tantum de Baptismo, Confirmatione, Eucharistia, Pœnitentia, Extrema Unctione, Ordine & Matrimonio: ergo definitio tradita competit omni & soli Sacramento.

*Dices* 1. Si Sacramentum esset signum sensibile, vel esset naturale, vel ad placitum? sed non est naturale; aliàs non significaret gratiam quæ  
super-

supernaturalis est; nec ad placitum, quia signum ad placitum, est ens rationis: ergo Sacramentum non est signum sensibile. Resp. negando minorem quantum ad 2. partem. Ad cujus prob. dico cum Doctore in 4. dist. 1. quæst. 2. Sacramentum pro formali esse ens rationis, licet absolute loquendo, ens reale dicendum sit, quia est reale fundamentaliter & materialiter: nam relatio signi ad significatum in qua consistit, non est realis, sed rationis, cum signum sit ex instituto: ergo Sacramentum pro formali non est reale; sed tantum pro materiali & fundamentaliter. *Instabis:* ergo Sacramentum pro formali, est opus intellectus humani. Resp. negando instantiam, quia dantur entia rationis quæ sunt actu independentes ab intellectu humano, & resultant ex sola positione fundamenti & termini, ut v. g. relatio creatoris ad creaturam, Civitas, Respublica &c. quæ formaliter sunt entia rationis, independentes ab intellectus operatione.

*Dices* 2. Sacramentum non est unum ens per se, sed per accidens: ergo non potest definiri, cum definitio solum enti quod est unum per se, competat. Resp. negando consequentiam, quia definitio competit enti quod est unum per se in genere moris, & logicè, sicut enti quod est unum per se, physicè aut metaphysicè: Unde cum Sacramentum sit unum per se in genere moris & logicè, licet physicè sit unum per accidens, est definibile: nam relatio apud Philosophos definitur, quamvis fundamentum & terminum involvat: ergo Sacramentum potest etiam definiri, quamvis essentialiter dicat relationem signi ad significatum. *Instabis:* ergo Sacramentum reponitur in aliquo prædicamento, sicut cætera quæ sunt unum per se. Resp. negando instantiam, quia in prædicamento collocantur tantum ea quæ sunt unum per se reale & physicum, non verò id quod est unum per



per se in genere moris aut logicè, & artificiosum, quale est Sacramentum, quod constituitur ex rebus & verbis, intentione tantum unitis.

Ex dictis *Inferes* 1. Sacramentum esse signum practicum gratiæ, cum habeat vim causandi gratiam & remittendi peccata, & sit signum faciendi, quod significat, ut suadet illud Joan. 3. *Nisi quis renatus fuerit ex aqua & Spiritu sancto, non potest introire in regnum Dei.* In quo Sacramenta novæ legis distinguuntur à Sacramentis veteris legis, quæ non habebant vim causandi gratiam, sed eam solum per Passionem Christi dandam esse figurabant. 2. Inanes esse ac omnino rejiciendas omnes definitiones, quibus Lutherani & Calvinistæ Sacramenta definire solent; dicunt enim non minùs impiè, quàm stolidè, Sacramenta non esse signa practica, nec effectiva gratiæ quæ suscipientes sanctificat, sed tantum signa externa & notas Christianæ professionis, quibus à Judæis, Turcis & Paganis discernimur; quod falsum esse, ex dictis infertur.

Præterea: Sacramenta sunt instituta ad erudiendos homines obcæcatos, ut notat divus Bonaventura, humano more, atque adeò sensibilibiter & practicè, scilicet causando gratiam sanctificantem, qua homo eam suscipiens adoptatur, seu assumitur ad æternam hæreditatem: Christus enim ipsa Sacramenta instituens, nullum alium habuit finem, nisi nostram salutem & justificationem, quæ fieri nequit sine aliqua mutatione intrinseca, ut homo de peccatore fieret justus; quæ quidem mutatio fieri non potest nisi per formam de novo advenientem per Sacramentorum collationem seu per gratiam animæ in hærentem. Undè cum erudire sensibilibiter moreque humano, & mutare intrinsecè, à signis practicis procedant; sequitur, quòd Sacramenta novæ legis sunt signa practica gratiæ: frustranea certò esset Sacramentorum institutio,

si Christus solum intendisset instituere signa externa & notas Christianæ professionis, quibus à Judæis, Turcis & Paganis discernimur, quia Sacramenta non remanent visibiliter in suscipientibus, ut eos distinguant; quæ de causa necesse est ipsa esse signa gratiæ practica, ejusque sub genere instrumenti operativa.

---

## Q U Æ S T I O II.

*Cujus rei sacra Sacramentum sit signum, & an sit signum unius rei tantum?*

**A**Dvertendum est sanctitatem, quæ est sacramenti signum, dupliciter sumi posse, perfectè scilicet & imperfectè. Sanctitas imperfecta, est externa & legalis. Perfecta, est interna & inhærens animæ. Sanctitas perfecta & interna consistit in immunitate à peccato, & rectitudine voluntatis. Sanctitas verò legalis, aut imperfecta & externa, in veteri lege non reddebat hominem intrinsecè sanctum, nec à peccato purum; sed tantum tollebat ab ipso immunditiam, quam per tactum mortui, aut per alios modos contraxerant; unde sanctitas legalis est tantum sanctitas exterior corporis quam legalia conferebant, ut sanctificati possent ingredi templum, admitti ad sacrificium, & cum aliis sine legis transgressionem conversari.

Dico igitur 1. de ratione Sacramenti esse significare perfectam sanctitatem, quæ est per gratiam. Ita definitum est in Trid. sess. 7. can. 6. his verbis, *Si quis dixerit Sacramenta novæ legis non continere gratiam quam significant, aut gratiam ipsam, non ponentibus obicem non confer-*

ferre, quasi signa tantum externa sint, accepta per fidem gratiæ vel justitiæ, & nota quædam Christianæ professionis, quibus apud homines discernuntur fideles ab infidelibus, anathema sit. Prob. Tum quia sanctitas est perfecta animæ sanitas, peccatum verò ejusdem infirmitas, ut apud Patres cautum est; sed Sacramentum significat perfectam animæ sanitatem, ut insinuat illud Jac. 5. *Infirmatur quis in vobis? Inducat Presbyteros Ecclesiæ; & ut constat ex illo ad Ephes. 5. vers. 25. Christus dilexit Ecclesiam, & seipsum tradidit pro ea, ut illam sanctificaret mundans lavacro aquæ in Verbo vitæ: ergo significat perfectam ac internam animæ sanitatem. Tum quia Sacramentum ex vi illius, quod significat, debet distingui ab aliis signis quæ non sunt Sacramenta; sed sanctitas imperfecta non distinguit Sacramentum, benè verò sanctitas perfecta: nam signum crucis, aqua benedicta, panis benedictus, lotio pedum &c. sunt signa sanctitatis, & in hoc cùm novæ legis signis seu Sacramentis conveniunt: ergo distingui debent per quemdam effectum intrinsecum, seu per sanctitatem intrinsecam & perfectam, quam alia signa Sacramentalia quæ sunt in Ecclesia, non significant. Tum quia Sacramentum fuit à Christo Domino institutum in sanctificationem animarum nostrarum, & remissionem peccatorum, ut dicunt Concilia, Patres & Scriptura: sed animæ nostræ sanctificari non possunt, nec peccata remitti, nisi per veram, realem & intrinsecam infusionem gratiæ sanctificantis, ut dictum est in 3. tomo: ergo de ratione Sacramenti est perfectam sanctitatem significare.*

*Dices* 1. Sacramenta veteris legis habebant rationem veri & propriè dicti Sacramenti; sed hæc Sacramenta non significabāt perfectam & internam sanctitatem, quæ est per gratiam: ergo de ratione Sacramenti non est significare perfectam sanctitatem. Resp. Sacramenta veteris legis

gis significasse perfectam & internam sanctitatem figurativè, antecederet & respectivè, quia conferebant sanctitatem legalem, & significabant sanctitatem perfectam, per Sacramenta novæ legis, quorum erant figuræ, & ad quæ erant ordinata, conferendam; ideòque Sacramentum legis antiquæ à sanctitate perfecta, quæ est finis & complementum, denominatur Sacramentum, non verò à sanctitate imperfecta & legali, quam conferebat.

*Dices 2.* Plurima sunt signa practica gratiæ, quæ veram & perfectam sanctitatem significant, quæ tamen non habent rationem Sacramenti, ut v. g. Agnus Paschalis, lignum vitæ: ergo de ratione Sacramenti non est significare perfectam sanctitatem, quæ est per gratiam. Resp. negando antecedens de significatione qua Sacramenta significant; illa enim signa significant gratiam conferendam hominibus per Christum; at Sacramenta sunt signa practica quæ conferunt ex opere operato sanctitatem quam significant: ergo de natura Sacramenti duntaxat, est significare sanctitatem perfectam.

*Dico 2.* Quòd de ratione Sacramenti est significare perfectam sanctitatem, in actuali usu & susceptione Sacramenti conferendam. Prob. 1. Sacramenta novæ legis sunt signa practica sanctitatis, quæ est per gratiam, eamque conferunt non ponentibus obicem, ut ait Trident, sess. 7. can. 6. idcirco qui debite suscipit Sacramentum, recipit gratiam sanctificantem & sanctitatem, ut suadent hæc verba in definitione Sacramenti posita, *Efficaciter gratiam significans*; ergo Sacramentum significat sanctitatem, in actuali usu & susceptione ipsius, conferendam. 2. Sacramenta veteris legis distinguuntur à Sacramentis novæ legis; sed Sacramenta veteris legis solam habebant gratiæ significationem, illius nempe quæ nobis conferenda erat per novæ legis Sacramenta ex meritis Christi: nostra verò  
non

336 DE SACRAMENTIS.  
non solum habent gratiæ significationem; sed  
etiam causationem: ergo eam causant, dum di-  
gnè suscipiuntur; alias nulla posset assignari di-  
versitas inter Sacramenta antiqua & nova, quod  
est contra Trident. sess. 7. can. 2.

*Dices;* Adultus qui Baptismum fictè suscepit,  
recipit gratiam post desitionem Baptismi, si  
habeat intentionem verè recipiendi Baptismum,  
id est, recipit gratiam recedente fictione: ergo  
Sacramentum non confert gratiam in actuali usu  
& susceptione. Resp. Sacramentum causare  
gratiam in susceptione digna & debitè facta, non  
autem absolutè in quacumque susceptione, ut  
infra dicemus.

Dico 3. Sacramentum significare tria, scili-  
cet Passionem Christi, gratiam, & gloriam:  
nam Sacramentum est signum gratiæ, cujus  
causa efficiens meritoria est Passio Christi, &  
finalis est gloria, cum Sacramenta sint fontes  
aquæ salientis in vitam æternam, ut constat in  
sacra Pagina: ergo hoc ipso, quod Sacramen-  
tum significat gratiam, significat etiam Passio-  
nem & gloriam. Deinde, hoc patet in hac An-  
tiphona, *O sacrum convivium in quo Christus su-  
mitur, recolitur memoria Passionis eius, mens  
impletur gratia, & futura gloria nobis pignus  
datur;* quippe in Sacramento Eucharistiæ 1.  
*Recolitur,* seu significatur *memoria Passionis,*  
quia Sacramentum est signum rememorativum.  
2. *Mens impletur gratia,* quia Sacramentum  
est signum demonstrativum gratiæ quam in no-  
bis causat. 3. *Futura gloria nobis pignus datur,*  
quia est signum prognosticum: ergo Sacramen-  
tum novæ legis de ratione sua intrinseca tria si-  
gnificat conferendo sanctitatem perfectam, scili-  
cet Passionem Christi præteritam, præsentem,  
& gloriam ad quam tendimus, nosque ducit ip-  
sum sacramentum; sed principalius significat  
gratiam sanctificantem. Tum quia in conceptu  
ipsius gratiæ includuntur habitudines ad Passio-  
nem

nem Christi & ad gloriam, quas sacramentum significat tantum ratione gratiæ: ergo id, quod principalius significat, est gratia ipsa. Tum quia Sacramentum est primò & principalius institutum ad significandam gratiam: ergo primò & principalius eam significat.

Id verum esse liquidò constat ex definitione sacramenti in præcedenti quæstione tradita, quæ iterum hic apponitur, *Signum sensibile, gratiam Dei vel effectum ejus gratuitum, ex divina institutione efficaciter significans, ordinatum ad salutem hominis viatoris*: ibi enim exprimitur gratia; exprimitur etiam gloria quæ est vita illa æterna ad quam ordinatum est sacramentum; exprimitur tandem passio Christi Domini, saltem implicite, quia illud signum sensibile seu sacramentum est institutum à Christo, qui cum illud instituere meruerit per merita suæ sacratissimæ passionis, ratione cujus dicitur causa gratiæ ex opere operato, necesse est, quòd exprimat passionem Christi, sitque ejus signum rememorativum.

### Q U Æ S T I O III.

*An Sacramentum sit semper res aliqua sensibilis, & hoc sit illi ita essenziale, ut de potentia Dei absoluta non possit institui Sacramentum in aliqua re spiritali & insensibili?*

**D**ICO. 1. Sacramentum constare de facto rebus sensibilibus. Tum quia constat in sacra Scriptura, ut dicemus loquendo de sacramentorum particulari institutione. Tum quia patet ex definitione sacramenti. Tum quia Ecclesia

est visibilis: ergo habet sacramenta sensibilia & visibilia; cùm sacramenta sint ejus arma. Tum quia homines, ad quos congregâdos Ecclesia utitur sacramentis, sunt sensibiles & visibiles: ergo sacramenta sunt sensibilia. Tum quia Ministri sacramentorum quos Christus instituit, sunt visibiles & sensibiles: ergo instrumenta quibus utuntur, sunt etiam sensibilia. Tum quia sunt aliqua sacramenta quæ Catholicus sæpè suscipere tenetur: ergo ut cognoscat se sacramentum suscepisse, oportet, quòd sacramentum sit sensibile, cùm homo per sensus res percipiat, & beneficio eorundem unum ab alio discernat.

*Dices;* Sacramentum Pœnitentiæ fit essentialiter & intrinsecè ex actu contritionis, qui est actus sensibilis: ergo saltem istud sacramentum non constat de facto rebus sensibilibus. Resp. Actum contritionis esse partem sacramenti Pœnitentiæ, quatenus significatur per aliquid sensibile, nimirum per cordis compunctionem, & ratione absolutionis, confessionis & satisfactionis, quæ sunt partes sensibiles ad quas dicit ordinem: ergo restat sacramentum Pœnitentiæ de facto constare rebus sensibilibus, sicut alia sacramenta, & esse omninò signum sensibile eo modo quo homo dicitur sensibilis, quâvis constet anima spirituali, quæ non est per se sensibilis.

Dico 2. Potuisse à Deo institui sacramenta ex rebus insensibilibus; verum tamen est, quòd talia sacramenta non essent ejusdè rationis cum iis quæ modò sunt, quia ista sunt signa sensibilia, illa verò essent signa insensibilia; sed essent sacramenta, prout sacramentum significat tantùm signum ex opere operato conferens gratiam sanctificantem, in quo sensu conclusio debet esse communis. Prob. Nam non repugnat r. ex parte Dei, qui ad gratiam conferendam potuit uti rebus spiritualibus, sicuti usus est materialibus. Nec ex parte rei spiritualis, cùm subjiciatur omnipotentiae & providentiæ Dei, sicut res sen-

sensibilis. Nec ex parte effectus producendi, gratiæ scilicet, quippe cum non habeat minorem proportionem cum rebus spiritualibus quam cum sensibilibus; ad positionem rerum spiritualium conferri potuit; quemadmodum confertur ad positionem signi & rei sensibilis: ergo ex nullo capite repugnat. *Deinde*, sacramentum est signum à Deo institutum voluntariè, id est, à Deo, qui aliud signum institueri potuit; cum non sit signum naturale, sicut fumus ignis; sed voluntarium & ad placitum. Ratio rei est, quia nulla creatura ex natura sua est significativa gratiæ: ergo sicut elevare voluit rem sensibilem, ut significaret & conferret gratiam, potuit elevare rem insensibilem, puta internam mentis operationem, adorationem, actum dilectionis, &c.

Sacramenta novæ legis non producunt gratiam physicè, sed solum moraliter, ut dicemus in disputatione tertia quæstione secunda; hoc est, non sunt signa nec instrumenta gratiam physicè continentia, sed solum ex divina ordinatione; quæ statuit atque decrevit conferre gratiam ad dignam positionem aut collationem hujusmodi signorum; ut docet universa Scotistarum Schola, quod etiam descendunt plures ex extraneis, ut Gandavenfis, Canus, Ledesma, Caspensis & alii, quibus conjungi potest D. Ambr. de dignit. sacerdot. ubi ait, *Homo manum imponit & Deus largitur gratiam*: ergo Deus eandem gratiam conferre potuit ad positionem alicujus signi spiritualis & interni, puta internæ mentis operationis, adorationis, actus dilectionis, &c. subindeque potuit instituere sacramenta ex rebus insensibilibus & spiritualibus, cum res sensibiles gratiam non contineant, & spirituales atque insensibiles divinam voluntatem movere valeant.

*Dices*: Sacramenta non possunt institui, nisi in ipsorum collatione requiratur minister, qui



sit notus à fuscipiente; sed nullus notus ab illo cui confertur sacramentum, potest esse minister rei insensibilis, ut est manifestum: ergo sacramentum non potest institui ex re spirituali & insensibili. *Respondeo* negando minorem, quia ipsemet qui traderet signum, esset minister sacramenti simul & fuscipiens, nec hoc repugnat naturæ sacramenti, ut patet in matrimonio.

---

## Q U Æ S T I O I V.

*An res sensibiles quibus in Sacramentis utimur, debeant esse determinate à Deo?*

**P**Ræfens difficultas sub alio titulo agitari solet, nempe an necesse sit uti certa materia ad unumquodque sacramentum, eaque debeat esse determinata à Deo?

Dico igitur, in sacramentis novæ legis utendum esse materia à Christo determinata. Hæc conclusio colligitur ex Trident. sess. 21. cap. 2. ubi declaratur fuisse semper in Ecclesia potestatem in dispensatione sacramentorum *salva illorum substantia*, per quam exceptionem intelligunt Patres, materiam & formam sacramentorum; unde si Ecclesia non possit mutare materiam nec formam sacramentorum, signum est, quod res sensibiles & materiales quibus in sacramentis utitur Ecclesia, sunt à Christo determinatæ.

Prob. Sacramenta à solo Deo instituta fuerunt ut instrumenta ad conferendam gratiam. Tum quia nulla creatura ex se habet virtutem conferendi gratiam, quæ est ens supernaturale ex se petens creari. Tum quia sunt signa & instrumenta moralia. Tum quia solus Deus est author gra-

gratiæ, & consequenter sacramentorum, seu signorum gratiæ institutor: ergo materia qua uti debent Ministri in sacramentorum administratione, est determinata à Deo qui sacramenta determinavit: nam dum sacramenta instituit & determinavit, ipsorum constitutiva etiam determinavit; sed sacramenta constant materia & forma: ergo materia & forma sunt à Deo determinatæ; ac proinde materiam sacramentorum pro libito mutare non licet. Tandem, solius Dei est sanctificare homines: ergo solius etiam Dei est determinare res aut instrumenta quibus homines sanctificantur.

*Dices 1.* Nulla fuit necessitas, nullaque ratio in Deo determinandi res sensibiles quibus in sacramentis utimur: ergo materia non est à Deo determinata. Resp. negando antecedens, licet ratio hæc sit nobis incognita: *In talibus enim rebus* (inquit August. epist. 3. ad Volusianum) *tota ratio facti, est potentia facientis*; alioquin dicere liceret, Christum non instituisse septem sacramenta, quod est hæreticum.

*Dices 2.* Sacerdos virtute Ordinis habet potestatem absolvendi à peccatis, tamen sunt quedam peccata quorum absolutionem Ecclesia reservat Papæ & Episcopis: ergo Ecclesia mutavit materiam Sacramenti Pœnitentiæ. 3. Matrimonium clandestinum ante Concilium Trident. erat validum, modò autem Ecclesia sic ordinante est invalidum: ergo Ecclesia mutavit materiam Sacramenti Matrimonii. 4. Olim per solam manuum impositionem, tamquam materiam, Sacerdotium conferebatur; modò autem, Ecclesia sic ordinante, confertur per traditionem panis & vini in calice cum determinatis verbis; imò nunc in Ecclesia Græca nedum Episcopi Schismatici, sed etiam Catholici & Romanæ Communionis, dum Græcos Presbyteros ordinant, sciente & consentiente summo Pontifice (ut Cardinalis de Lugo seipso

præfente accidiffe testatur, ut refert Gonetus) non per calicis & patenæ porrectionem id faciunt, fed per manuum impositionem super caput ordinandi: ergo materia sacramentorum non fuit à Chrifto determinata.

Resp. ad 1. negando consequentiam, quia Sacerdos virtute ordinis non habet poteftatem absolvendi omnes homines ab omnibus peccatis abfolutè & indeterminatè; fed tantùm absolvendi eos homines in quos jurisdictionem habet: Unde cùm summi Pontificis & Epifcoporum fit assignare fubditos, fequitur, quòd Sacerdos non poteft absolvere peccata, nifi ea quæ ipfi ab Epifcopo fubjciuntur, & in quæ jurisdictionem accipit à Pastore cui commiffæ fuerant oves; non defectu poteftatis quam habet ex vi ordinis, fed ex defectu jurisdictionis: ergo refervatio cafuum aut perfonarum non mutat materiam Sacramenti Pœnitentiæ. Ad 2. nego consequentiam, quia matrimonii clandestini invaliditas non provenit ex defectu legitimæ materiæ, nimirum confensus conjugum aut partium, fed ex defectu circumftantiæ neceffariò ad contractus validitatem requifitæ, fcilicet præfentiæ parochi & testium, quam circumftantiam, Ecclefia addere potuit Sacramento Matrimonii, abfque ulla variatione in materia ejufdem. Ratio eft, quia materia hujus sacramenti à Chrifto inflituta, eft verus contractus naturalis & civilis, cujus validitas dependet à conditionibus à Republica præfcriptis, quibus non pofitis eft irritus, ficut alii contractus naturales & civiles; hinc fit quòd cùm Chriflus voluerit contractum effe materiam Sacramenti Matrimonii, juxta difpofitionem juris, Concilium, quod eft regula juris Ecclefiaftici, dum ordinavit contractum non effe validum, nifi quando fit coram parochi & testibus, non mutavit materiam Sacramenti Matrimonii, cùm non mutaverit contra-

tractum; sed requisivit illam conditionem ad validitatem contractus.

*Ad tertium Resp. 1.* cum Mastrio, Poncio & aliis, negando consequentiam, quia Christus non instituit nec determinavit materiam Sacramenti Ordinis specificè & in individuo, seu hanc vel illam materiam; sed solum genericè in aliquo signo sensibili, seu quamcumque materiam indeterminatè, quæ ex ordinatione Ecclesiæ significaret potestatem Sacerdoti traditam. Unde quia tam Ecclesia Latina quàm Græca confert Sacerdotium per signum sensibile, sequitur quòd ambæ validè conficiunt sacramentum, & verè servant materiam à Christo institutam, licèt utantur signis materialiter diversis.

*Resp. 2.* Frassen, Gonet. & alii, negando consequentiam, quia eadem materia utuntur Ecclesia Latina & Ecclesia Græca in Sacramento Ordinis: nam materia Ordinis sacerdotalis, nimirum panis & vini in calice, in ritu Græcorum est in altari, & moraliter solum à Sacerdote Græco tangitur; in ritu verò Latinorum est in manibus initiandorum, & physicè ab ipsis tangitur. Unde Ecclesia Latina & Græca, in substantia materiæ Sacramenti Ordinis conveniunt, & differunt tantum in accidentalitatu, scilicet in contactu calicis, quem Latini tangunt physicè & immediatè, & Græci moraliter & mediatè: dico mediatè, quia ut advertunt plures Authores, Græci tangunt altare in quo est calix, dum ordinantur. Hinc fit quòd cum tangere physicè, & tangere moraliter, non sint formaliter materia Sacramenti Ordinis à Christo determinata, & qua uti debent Ministri Sacramenti Ordinis sacerdotalis; sed modus ejusdem, quem Christus hominum arbitrio aut Ecclesiæ determinandum reliquit, Sacramentum Ordinis sacerdotalis habet materiam à Christo determinatam, sicut alia sacramenta, qua utuntur Ecclesia Latina & Græ-

ca, licet non habeat modum determinatum.

*Quæres, an in Sacramentis verba requirantur?*  
 Resp. affirmative. Tum quia patet ex sacra Scriptura & traditione Ecclesiæ: nam Matth. 18. ubi dicitur de Baptismo, *Baptizantes eos in nomine Patris, &c.* Actuum 8. de Confirm. dicitur, *Oraverunt pro ipsis, ut acciperent Spiritum sanctum; & paulò post, Tunc imponebant manus super illos, & accipiebant Spiritum sanctum:* ergo ad Confirmationem requiruntur verba, cum fiat per orationem. De Eucharistia, Matth. 26. & 1. Cor. 11. legitur, quòd *Iesus accepit panem, & benedixit ac fregit dicens: Hoc est corpus meum.* De Pœnitentia habetur Joan. 20. *Quorum remiseritis peccata &c.* De Extrema Unctione constat Jac. 5. cap. vers. 14. De Ordine & Matrimonio constat ex traditione Ecclesiæ: ergo in Sacramentis requiruntur verba. Tum quia constant essentialiter rebus & verbis, ut videbimus in quæst. sequenti: ergo in Sacramentis requiruntur verba. Tum quia Sacramenta sunt signa quæ Christus reliquit Ecclesiæ ad regendos & congregandos fideles: ergo in ipsorum administratione requiruntur verba.

Huic sententiæ suffragatur Augustinus tract. 8. in Joan. ubi ait, *Accedit verbum ad elementum, & fit Sacramentum:* quibus verbis monet in Sacramentis Ecclesiæ necessariò requiri verba formaliter vel æquivalenter, ut verificari potest de quolibet Sacramento in particulari, sicuti consideranti patebit.

## QUÆSTIO V.

*An omnia Sacramenta novæ legis componantur ex rebus & verbis, sicut ex materia & forma, tamquam ex partibus essentialibus?*

**D**ICO 1. contra Durandum, omnia Sacramenta novæ legis constare ex rebus & verbis, vel formaliter, vel æquivalenter, tamquam ex materia & forma. Dixi, æquivalenter, quia licet in matrimonio semper interveniant verba formaliter, quoniam expresse pronunciantur à contrahentibus; tamen aliquando æquivalenter interveniunt, ut dum per signa & nutus notificatur consensus partium. Prob. 1. ex Conc. Florent. in litteris unionis, ubi postquam enumeravit septem novæ legis Sacramenta, sic concludit, *Hæc omnia Sacramenta tribus perficiuntur, rebus tamquam materia, verbis tamquam forma, & persona Ministri cum intentione*: ergo &c. 2. Res sensibiles quibus Sacramenta constant, determinantur per verba ad significandum hoc vel illud; v.g. panis qui est materia Sacramenti Eucharistiæ, ex se est indifferens & indeterminatus ad significandum hoc vel illud; sed per hæc verba, *Hoc est corpus meum*, quæ sunt forma, determinatur ad significandum Sacramentum Eucharistiæ: ergo Sacramentum est quoddam compositum morale, cujus materia sunt res, & verba sunt forma. 3. Sacramentum novæ legis fit ex materia & forma sensibilibus, cum sit signum sensibile: ergo ea ex quibus fit, sunt tamquam materia & forma, id est, præstant in Sacramento, quod est totum morale, id quod præstant in toto physico materia & forma; sed ea ex quibus fit Sacramentum, sunt res & verba, ut patet: er-

go Sacramenta constant ex rebus & verbis, tamquam ex materia & forma.

*Dices* cum Durando; Pœnitentia & Matrimonium sunt Sacramenta vera; sed non constant ex rebus sensibilibus & verbis: ergo omnia Sacramenta non constant ex rebus & verbis tamquam ex materia & forma. Major patet, minor prob. Sacramentum Pœnitentię perficitur solis verbis, nempe confessione Pœnitentis, & absolutione Sacerdotis: ergo non constat materia & forma; quia si constaret, materia esset distincta à verbis, quod est falsum, cum confessio & absolutio sint verba. Præterea, matrimonium perfici potest sine verbis, ut cum absentes contrahunt per litteras, & præsentés qui sunt muti, contrahunt per signa & nutus: ergo pœnitentia & matrimonium non constant ex rebus & verbis, tamquam ex materia & forma.

Resp. I. distinguendo minorem: Pœnitentia & matrimonium aliquando non constant ex rebus sensibilibus & verbis, formaliter, concedo; Æquivalenter, nego. Ad prob. dico, quod per *Ly rebus & verbis* non intelligimus res strictè sumptas, sed etiam omnia quæ verborum loco adhiberi solent ad aliquid significandum. Unde cum in Sacramento Pœnitentię, Confessio, & in Sacramento Matrimonii, litterę, nutus & alia signa, verborum loco adhibeantur ad utriusque partis consensum formaliter exprimendum, sunt æquivalenter materia, ac determinantur per absolutionem Sacerdotis quæ habet rationem formę determinantis confessionem pœnitentis ad significandum remissionem peccatorum. In Sacramento Matrimonii, quod interdum fit sine verbis, ut cum absentes contrahunt per litteras, & præsentés qui sunt muti, per nutus & alia signa, nutus unius quatenus determinat & complent nutus alterius; quamvis formaliter non sint forma, sunt tamen forma æquivalenter; & nutus alterius quatenus deter-

determinati & completi, quamvis non sint formaliter materia, sunt tamen ipsa æquivalenter, quod sufficit, ut patet in conclusione: ergo omnia Sacramenta constant ex rebus & verbis formaliter vel æquivalenter, tamquam ex materia & forma.

Dico 2. Quod res & verba sunt partes intrinsecæ & essentielles Sacramentorum novæ legis, excepto Sacramento Eucharistiæ, quod cum non consistat in usu, & sit res permanens, non potest intrinsecè constitui ex verbis. Hæc conclusio quoad primam partem est communis, quoad secundam verò est Scoti in 4. dist. 1. qu. 1. quem sequuntur Bellarm. Vasques, Ægidius, & omnes Scotistæ, dempto Poncio, contra Thomistas.

Prob. 1. pars: Res se habet in Sacramento (quod est quoddam totum morale & artificiale) sicut materia se habet in composito physico & naturali, scilicet ut pars determinabilis; verba verò se habent ut pars determinans, sicut forma physica se habet in composito physico & naturali, ut patet ex dictis: ergo quemadmodum pars determinabilis & pars determinans sunt intrinsecæ & essentielles partes in composito physico & naturali; ita res & verba sunt partes intrinsecæ & essentielles in composito morali & artificiali, puta in Sacramento.

Dicitur: Si res & verba essent partes intrinsecæ & essentielles Sacramenti, essent simul, quia ad compositionem totius requiritur simultas seu unio partium essentialium; sed in Sacramento res & verba non sunt simul, ut patet interdum in Sacramento Pœnitentiæ, ubi Sacerdos profert verba absolutionis, confessione & contritione peractis: ergo res & verba non componunt essentialiter & intrinsecè Sacramenta. Resp. negando majorem de simultate physica reali & temporis: nam simultas partium requiritur eodem modo, quo compositum est, id est, dum



verba tendunt, sed id quo verba tendunt, ut calor in visceribus terræ, non est id, quod sol intendit producere; sed potius id quo producit: ergo verba non remanent virtualiter in Sacramento Eucharistiæ. 2. Nihil est in Sacramento Eucharistiæ ex vi verborum, quod non sit effectus verborum: nam determinatio & modificatio verborum ad insensibiliter significandum corpus & sanguinem Christi, sub ipsis existentia per modum cibi & potus spiritualis, est effectus verborum, non verò virtus eorum, ut dicemus in solutione ultimi argumenti: ergo verba non remanent virtualiter in Sacramento Eucharistiæ. 3. Nullum esset discrimen inter virtutem rei aut causæ, & effectus ejusdem, quod est falsum, ut est evidens: ergo cum in Eucharistiæ, verbis transactis, nihil remaneat nisi ipsorum verborum effectus, ipsa verba non remanent virtualiter.

Prob. iterum eadem pars, & simul rejicitur responsio Gonetii: Omne constitutum, sive sit physicum, sive morale, formaliter & essentialiter sumptum, nihil aliud est quam illud ex quo essentialiter & intrinsecè componitur, tale enim est constitutum, quale est constitutivum; sed Sacramentum Eucharistiæ non est tantum res & verba, qui enim considerat formaliter Baptismum v. g. invenit signum, in quo nihil aliud est quam res & verba; at qui considerat formaliter Eucharistiam, nullum verbum adinvenit, sed tantum verborum effectum; quia si virtus verborum remaneret, Eucharistiæ non esset signum aut Sacramentum actuale, nec permanens: nam si verba actualiter constituent, constituunt eo modo quo sunt; sed sunt tantum virtualiter: ergo virtualiter constituunt Sacramentum Eucharistiæ. Deinde, Sacramentum Eucharistiæ esset ignobilius aliis ratione formæ intrinsecè constituentis: nam alia Sacramenta constituuntur per ipsamet verba actualia; Eucha-

charistia autem per verba virtualiter existentia: sed omne verbum actuale & permanens, in ratione constitutivi est perfectius verbo virtualiter tantum permanente; & constitutum per formam permanentem actu, est perfectius constituto per formam virtualiter tantum permanentem; unde cum Sacramentum Eucharistiae sit ceteris praestantius ratione formae, vel saltem non sit aliis ignobilius, non debet intrinsecè constitui ex verbis virtualibus, cum sit permanens & subsistens.

*Instabis* ex Conc. Florent. supra citato: Sacramenta constant rebus & verbis tanquam ex materia & forma: ergo nullum est excipendum. Resp. Conc. non dicere *constare*, sed *perficere*; aliàs Minister de quo loquitur, esset pars Sacramenti; unde sensus Concilii est, quod ad faciendum quodcumque Sacramentum tria requiruntur, materia scilicet, forma & Minister; quae omnia in consecratione Eucharistiae assignantur.

Obj. 1. Gonetius: Ex illis tanquam ex partibus essentialibus & intrinsecis constat Sacramentum Eucharistiae, ex quibus essentialiter & intrinsecè constat illud totum, quod assumptum est à Christo ad significandam & efficiendam gratiam per modum cibi spiritualis: sed istud constat essentialiter & intrinsecè ex rebus & verbis: ergo & Sacramentum Eucharistiae. Major constat; Sacramentum enim Eucharistiae physice sumptum, est illud totum, quod Christus assumpsit & instituit ad significandam & causandam praedictam gratiam. Minor verò prob. Si totum à Christo assumptum ad significandam gratiam in Sacramento Eucharistiae, non constaret intrinsecè ex rebus & verbis, sed solum ex rebus, nimirum ex speciebus panis & vini una cum corpore & sanguine Christi; cum (ut jam dictum est) quaelibet res nihil aliud sit absolute, praeter id quod est tota ejus-  
cileu-

essentia, verum esset dicere absolute, totum à Christo assumptum in Eucharistia ad significandam gratiam, nihil aliud esse absolute, præter species panis & vini unà cum corpore Christi: sed hoc falsum est; Christus enim absolute loquendo assumpsit præterea ad talem significationem verba consecrationis, aliàs enim sine illis, species & corpus Christi simul sumpta, essent signum sensibile gratiæ, ut in actuali eorum sumptione conferendæ, quod tamen est evidenter falsum.

Confirm. Id per quod aliquid, quod essentialiter & intrinsecè est sensibile signum gratiæ, fit formaliter signum sensibile illius, est pars intrinseca ejus & essentialis: sed Sacramentum Eucharistiæ, quod essentialiter & intrinsecè est signum sensibile gratiæ, constituitur formaliter signum sensibile illius per verba: ergo verba Sacramenti Eucharistiæ sunt pars intrinseca & essentialis ipsius. Major est evidens, minor verò prob. Per id Sacramentum Eucharistiæ constituitur formaliter sensibile signum gratiæ, quod solum in ipso habet rationem formæ ex se significativæ gratiæ; sed sola verba consecrationis habent in Sacramento Eucharistiæ rationem formæ sensibilis, & ex se significativæ gratiæ: licet enim species consecratæ, sive ut continentes corpus Christi, sint ex se sensibiles, non tamen ex seipsis, sed solum dependenter à verbis, tamquam à forma, habent quòd sensibilibiter possint significare Christum & ejus gratiam: secluso enim respectu ad talem formam (*Hoc est corpus meum*) hostiæ consecratæ non magis significant sensibilibiter Christum ibi esse præsentem, & ejus gratiam, quàm hostiæ non consecratæ: ergo &c.

Resp. ad argumentum, negando minorem: istud enim totum quod Christus assumpsit ad significandam & efficiendam gratiam per modum cibi spiritualis, dependet à verbis infie-  
ri &

ri & efficienter, quatenus verba sunt quibus Sacerdos adducit corpus Christi sub speciebus, non verò formaliter & intrinsecè, ita ut verba sint constitutivum intrinsecum & essentiale Eucharistiæ; implicat enim in terminis, aliquid esse formam, sive naturalem, sive artificialem, rei existentis, dum ipsum non existit; cum forma quæcumque det esse rei, & in esse specifico eam constituat. Ad prob. nego minorem, quia licet Christus assumpserit præterea ad talem significationem verba consecrationis, tamen non valet dicere ipsa consecrationis verba esse intrinsecam & essentialem partem Eucharistiæ, quia verba non fuerunt assumpta in genere formæ, sed in genere actionis; non in facto esse, sed in fieri: nam ad compositum tria requiruntur principia, scilicet privatio, materia & forma; tamen privatio non reperitur in ipso sicut materia & forma: ergo non valet dicere, quòd independentèr à verbis, species & corpus Christi simul sumpta, essent signum sensibile gratiæ, in actuali eorum sumptione conferendæ, quia dependent à verbis in fieri, & ab ipsis denominantur tamquam à causa efficiente, & quemadmodum nullum existit compositum independentèr à causa efficiente & privatione, licet causa efficiens & privatio non sint ejus partes essentielles; ita similiter species & corpus Christi simul sumpta, non possunt esse signum sensibile gratiæ independentèr à verbis, licet verba non sint pars essentialis Sacramenti Eucharistiæ in facto esse.

Ad confirm. nego minorem: implicat enim, ait Doctor, Sacramentum Eucharistiæ, quod est signum permanens & subsistens, constitui formaliter & intrinsecè per verba, quæ non sunt actu, nec formaliter. Ad prob. nego minorem, quia verba consecrationis habent tantum rationem causæ efficientis, & se habent per modum actionis, quia habent tantum cau-  
sali-

salitatem & efficaciam moralem hujus Sacramenti, quæ in hoc consistit, ut ad eorum prolationem, Deus ponat corpus Christi sub speciebus: ergo non constituunt intrinsecè Sacramentum Eucharistiæ, nec habent in ipso rationem formæ ex se significativæ gratiæ. Tum quia habent rationem actionis & causæ efficientis, ut dixi. Tum quia species consecratæ præter respectum quem dicunt ad ista verba: *Hoc est corpus meum*, tamquam ad causam effectivam & sensibilem Sacramenti, dicunt respectum ad corpus & sanguinem Christi, quæ ex vi verborum sub speciebus ponuntur & permanent. A primo respectu dicuntur sacræ efficienter & sensibilibiter. Ab alio verò dicuntur formaliter & actu consecratæ. Ratio est, quia verba transeunt, & unio cum corpore & sanguine remanet speciebus remanentibus: ergo falsum est, quòd hostiæ consecratæ non magis significant Christum esse ibi præsentem & ejus gratiam, quàm hostiæ non consecratæ, quæ nullum respectum dicunt ad corpus Christi, licet dicant respectum ad verba, veluti ad causam efficientem instrumentalem, sicut hostiæ consecratæ.

Obj. 2. Cum in Sacramento Eucharistiæ verba consecrationis, quæ sunt pars totius ceremoniæ à Christo adhibitæ & institutæ in ejus celebratione, determinent species panis & vini ad rei sacræ, & spiritualis nutritionis significationem, sicut in Baptismo verba: *Ego te baptizo*, determinant infusionem, seu asperisionem aquæ ad significandam spirituales ablutionem, si non obstante illa paritate, Sacramentum Eucharistiæ non constaret sicut Baptismus ex rebus & verbis, tamquam ex partibus intrinsicis & essentialibus, maxime quia cum Sacramentum Eucharistiæ non sit aliquid transiens sicut Baptismus, sed remanens, non potest sicut Baptismus intrinsecè constitui ex aliquo transeunte, cujusmodi sunt verba: sed hæc ratio nulla

la est: ergo nec illud, quod ex ea deducitur. Prob. minor: Ut aliquid permanens dicatur intrinsecè constitui ex aliqua re, non est necesse, quòd res illa formaliter, sed sufficit, quòd virtualiter remaneat in ipso: mixtum enim absolutè & verè dicitur intrinsecè constitui ex elementis, licèt ipsa elementa non remaneant in ipso formaliter, sed tantùm virtualiter: sed licèt verba consecrationis transeant formaliter, virtualiter tamen remanent in speciebus panis & vini, utpotè cùm istæ species remaneant à verbis illis determinatæ & modificatæ ad sensibilibiter significandum corpus & sanguinem Christi sub ipsis existentia per modum cibi & potus spiritualis, talisque determinatio sit virtus verborum realiter formaliter ipsas species actuans, quia realiter tactæ fuerunt & percussæ à verbis: ergo, &c.

Resp. 1. concessa majori in sensu explicato; verum enim est, quòd verba consecrationis determinant in genere actionis species panis & vini ad rei sacræ & spiritualis nutritionis significationem, non verò in genere causæ formalis, negando minorem. Ad prob. nego maiorem; nam ut aliquid permanens dicatur intrinsecè constitui ex aliqua re, formaliter, actu, essentialiter & immediatè, necesse est, quòd res illa formaliter remaneat; aliàs non esset actu, nec formaliter permanens; tale siquidem est constitutum, quale est constitutivum essentialiter & præsertim in doctrina Thomistarum, ex qua constat, quòd totum compositum nihil aliud est formaliter & realiter, quàm partes intrinsecæ & essentielles, ut unitæ & conjunctæ; idcirco dum partes existunt virtualiter tantùm, compositum est etiam virtuale tantùm: ergo totum formaliter & actu existens, includit partes formales & actuales: *Ad exemplum* de mixto, dico, quòd mixtum non constituitur intrinsecè & essentialiter ex solis  
ele-

elementis in ipso virtualiter remanentibus, ut constat, quia remanet actu in mixto forma substantialis, quæ habet virtutem producendi qualitates similes iis quas elementa continent; ideoque mixtum non componitur essentialiter ex quatuor elementis secundum substantiam, nec secundum suum esse, sed secundum virtutem eò quod scilicet ex ipsis corruptis producatur forma mixti, quæ virtualiter continet elementorum qualitates, vel alias similes qualitatibus elementorum: ergo concludendum est, ut aliquid permanens dicatur intrinsecè constitui ex aliqua re, non sufficere, quod virtualiter remaneat in ipso; quamvis aliquod compositum, putà mixtum, præter materiam & formam actuales contineat aliud virtualiter.

Resp. 2. negando minorem. Ad cuius prob. concessa majori, nego minorem: Falsum enim est, quod verba virtualiter remaneant in speciebus panis & vini. Tum quia colligitur ex dictis supra in responsione ad instantiam. Tum quia species non remanent à verbis determinatæ & modificatæ formaliter ad sensibilibus significandum corpus & sanguinem Christi, sed tantum efficienter; unde verba non remanent virtualiter, licet remaneat eorum effectus, scilicet sacramentum; ideoque Sacramentum Eucharistiæ non constituitur intrinsecè & essentialiter ex verbis, cum nullus effectus ex causa efficiente constituatur, sed ex iis quæ essentialiter & intrinsecè contrahet, de quibus in proprio loco dicemus.

*Quæres, an verba sacramentalia sint concionatoria, vel consecratoria?* Resp. Verba requisita in sacramentis novæ legis esse consecratoria, seu virtute divina facientia, quod significant, non verò purè concionatoria, & solum ad instruendum fideles ordinata. Ita communiter docent omnes Theologi contra Lutherum, Calvinum & alios. Prob. 1. Eisdem verbis fit à nobis con-

consecratio, quibus facta fuit à Christo, ut probat hoc præceptum Christi: *Hoc facite in meam commemorationem*: sed verba hæc à Christo dicta, non sunt concionatoria, sed significativa & consecratoria, ut probant hæc verba Confirmationis Act. *Oraverunt pro ipso, ut acciperent Spiritum sanctum*, quod indicat verba esse operativa & significativa: ergo verba sacramentalia non sunt concionatoria, sed significativa & consecratoria. Tum quia sunt verba practica, ut dictum est. Tum quia Apost. 1. ad Cor. 10. vocat verba quibus consecramus, verba benedictionis, ait enim: *Calix benedictionis cui beneaurimus, nonne communicatio sanguinis Christi est?* ergo sunt consecratoria, ut concludunt D. Thom. Suarez, & alii. Tum quia minister interdum non percipit verba sacramentalia quæ profert; infantes etiam quibus confertur Baptismus, non intelligunt concionem: ergo finis qui ab eo debet intendi ultra prolationem verborum, non est significare doctrinam, nec concionari, sed aliquid ad quod instituta sunt conficere, & consequenter non sunt concionatoria, sed consecratoria & significativa practice.

*Dices;* Dum Christus instituit Ministros sacramentorum, instituit ipsos Prædicatores; præcepit enim eis, ut docerent, baptizantes omnes gentes: ergo verba sacramentalia sunt concionatoria. Resp. negando consequentiam, quia Christus instituit Apostolos Prædicatores, & sacramentorum Ministros: aliud enim est docere, & aliud baptizare; ideoque dum docebant, non baptizabant, sed docebant, ut baptizarent, quia adultorum justificatio fidem exigit, fides auditum verbi Dei, & auditus prædicationem: nam quomodo credent sine prædicante? ergo hæc verba: *Ego te baptizo*, non sunt concionatoria, sed consecratoria, practica & significativa.



## Q U Æ S T I O VI.

*Qua mutatio ex parte materiae vel  
formae, reddat Sacramentum  
invalidum?*

**D**Ico, mutationem essentialem materiae aut formae reddere sacramentum invalidum, non verò accidentalem. Prob. 1. pars: Partibus intrinsicis & essentialibus mutatis, necessario mutatur compositum; v. g. mutata forma ligni, totum seu compositum mutatur & resultat aliud, & sic de cæteris; sed materia & forma, juxta Christi institutionem sunt partes intrinsicæ & essentialis ex quibus sacramentum componitur; unde materia & forma essentialiter mutatis, mutatur sacramentum; sed mutatio aut variatio sacramenti, est nedum invaliditas ejusdem, sed etiam corruptio: ergo nullum datur sacramentum, dum materia & forma essentialiter mutantur. Quod non contingit, dum mutatio est tantum accidentalis, sive in materia, sive in forma; quia mutatio accidentalis non destruit sensum verborum à Christo institutorum, nec naturam rei.

*Primò*, ex dictis inferes, quòd si loco panis, fructus; loco vini, aqua, in Eucharistia; loco olei olivarum, ponatur oleum nucum, vel alterius in Extrema Unctione; loco balsami ponatur oleum rosaceum in Confirmatione, & sic de cæteris, invalida erunt sacramenta.

*Secundò*, quòd mutatio moralis in materia reddit etiam sacramentum invalidum: nam si loco panis usualis, ponatur pasta; & loco vini, ponatur acetum, nullum erit sacramentum; at pasta & panis usualis, vinum & acetum, sunt ejusdem speciei physicè, sicut caro cruda & cocta, & distinguuntur tantum moraliter: ergo mutatio sub-

substantialis moralis in materia remota Sacramentorum, tollit valorem Sacramenti. *Dices*; si Sacerdos poneret mustum in calice consecraret, sed mustum non minùs differt à vino, quàm acetum: ergo acetum non reddit Sacramentum invalidum. *Resp.* negando minorem, nam vinum & mustum non distinguuntur moraliter, sicut vinum & acetum, sed tantùm accidentaliter, quia acetum habet diversas affectiones & proprietates à proprietatibus vini, at mustum est verum vinum.

*Tertiò*, quòd mutatio substantialis in materia proxima, in multis Sacramentis tollit valorem Sacramenti: nam in Baptismo requiritur ablutio, posset tamen quis abluere vestem pueri, tunc adesset materia remota & forma, & non esset Sacramentum, ut notat Eminentissimus Cardinalis noster de Laurea: ergo mutatio substantialis in materia proxima tollit valorem Sacramenti.

*Quartò* inferes, quòd mutatio materiæ sive proximæ, sive remotæ, secundùm qualitatem non tollit valorem Sacramenti: nam si consecratio fiat in pane azimo vel fermentato, valet Sacramentum. Similiter si aqua in Baptismo sit calida, vel frigida, & sic de aliis, quæ salvant substantiam materiæ remotæ, vel proximæ.

*Quinto*, quòd mutatio materiæ secundùm quantitatem in augmento non tollit valorem Sacramenti. Ratio est, quia nullum augmentum materiæ destruit illam, ut est evidens: tam enim est substantia lapis, quàm rupes. Adverte tamen, quòd mutatio materiæ secundùm quantitatem in decremento, potest aliquando reddere sacramentum invalidum; quia non minùs est essentialis sacramento forma, quàm materia: sed diminutio formæ reddit sacramentum invalidum: ergo, &c. *Deinde*, Sacerdos potest consecrare plures hostias, & nequit consecrare mi-

nimam & indivisibilem partem exiguae hostiae, nec unam vini guttulam, quia materia debet esse moraliter sensibilis & visibilis. *Dices*; Christus conservatur in quavis parte hostiae, etiam in minima, separatione facta: ergo potest in ipsa produci ex ei verborum. *Resp.* negando consequentiam, quia aliqua exiguntur, ut res sit, quae ad conservationem ejusdem non sunt necessaria: nam ut materia consecratur, debet esse demonstrabilis, debet quoque dicere ordinem ad usum materiae ex qua conficitur sacramentum, v.g. panis debet dicere ordinem ad nutritionem, & sic de cæteris; at post consecrationem, hoc non est necessarium, ut conservetur: ergo diminutio materiae, seu mutatio materiae secundum quantitatem in decremento potest reddere sacramentum invalidum, quod non potest dici de mutatione in augmento.

*Sexto* Inferes, quòd mutatio materiae secundum ubi, reddit aliquando sacramentum invalidum; v.g. si Sacerdos proferret verba circa materiam in aliquo loco dissito possitam, sacramentum esset nullum & invalidum, quia requiritur, quòd materia sit praesens, saltem praesentia morali, quae quidem praesentia aut propinquitas pendet ex morali prudentum judicio.

*Septimo* inferes, quòd mutatio formae secundum voces tantum seu idioma, non reddit sacramentum invalidum. Tum quia sensus verborum remanet: idem enim est dicere quantum ad sensum & intentionem Ecclesiae: *Ego te baptizo in nomine Patris, & Filii, & Spiritus sancti*, ac dicere idiomate Gallico, *Je te baptise au nom du Pere, & du Fils, & du S. Esprit*. Tum quia sequeretur, omnes Ministros Ecclesiae uti debere idiomate Hebraeo, aut Syriaco; quoniam Christus dum Sacramenta instituit, alterutro hoc idiomate usus est.

*Octavò*, Quòd dum mutatio verborum fit secundum quantitatem in augmento, non reddit sacramentum invalidum: v. g. si Sacerdos baptizando diceret, *Ego te baptizo in nomine Patris qui te creavit, & Filii qui te redemit, & Spiritus sancti qui te justificavit*, validum conficeret sacramentum, modò haberet intentionem rectam, faciendi quod Ecclesia facit; quia talis Minister intenderet, quod intendit Ecclesia, & verè pronunciaret verba quæ ad baptizandum Christus instituit: ergo verum sacramentum conficeret. Adverte tamen, quòd dum additio est verborum repugnantium, interposita in forma sacramenti, reddit illud invalidum: v. g. si Sacerdos diceret, *Ego te baptizo in nomine Patris geniti, Filii generantis Patrem, & Spiritus sancti Patre & Filio majoris*, sacramentum esset nullum, quia talis additio tollit formam institutam à Christo, cum mutet significationem & sensum verborum.

*Nonò*, Quòd si aliquis Sacerdos proferat corruptè verba sacramentalia, vel ex industria, vel ex imperitia, vel ex balbutie, aut lapsu linguæ, si corruptio sit tanta, ut auferat omninò locutionis sensum, invalidum reddit sacramentum; si verò sit talis quæ sensum verborum non tollat, non reddit sacramentum invalidum. Ratio est, quia in primo casu est mutatio essentialis quæ reddit sacramentum invalidum; & in secundo est variatio accidentalis, cum idem verborum sensus remaneat: v. g. si Sacerdos diceret, *Ego te baptizo in nomine matris*, ex ignorantia aut lapsu linguæ, certò nullum Sacramentum conficeret; at si diceret ex ignorantia aut lapsu linguæ, aut ex balbutie, *Ego te baptizo in nomine patriæ, aut patræ, aut patriæ*, Baptismus esset validus, ut definivit Zacharias Papa in cap. *Retulerunt* de consecratione dist. 4. quia in hoc casu ignorantia non mutat sensum verborum à Christo institutorum, sicut in primo.


*Quæres*, an Minister ex intentione inducendi novum ritum etiam reprobatur ab Ecclesia, proferens verba Sacramentalia, additione, diminutione, aut quovis alio modo non tollente legitimum sensum, mutata, verum conficiat Sacramentum, si habeat voluntatem faciendi quod facit vera Ecclesia? Resp. affirmativè. Ratio est, quia validitas Sacramenti dependet ab intentione Ministri, de faciendo, quod facit Ecclesia; à materia & à forma, ut constat ex Conc. Florentino citato dicente, *Hæc autem omnia Sacramenta tribus perficiuntur, rebus, verbis & intentione Ministri*; non autem ab animo fidei, vel hæretico: ergo Sacramentum in casu supposito, esset validum. Deinde, si Sacerdos Latinus consecraret in pane fermentato cum intentione introducendi in Ecclesiam Latinam ritum Græcorum, verum conficeret Sacramentum: ergo, &c.

*Dices*: Ille Sacerdos Latinus in tali casu non haberet intentionem Ecclesiæ, imò haberet intentionem contrariam; cum intenderet introducere errorem quem Ecclesia vetat: ergo Sacramentum esset invalidum. Resp. negando antecedens, quia haberet duas intentiones, prima vellet facere, quod Ecclesia facit, & secunda vellet introducere alium ritum faciendi; unde cum secunda terminetur & ordinetur ad primam, & prima ad Sacramentum, hæ duæ intentiones non essent contrariæ formaliter; sed tantum materialiter & circumstantialiter, quod non officit intentioni ad validitatem Sacramenti requisitæ.

Secunda intentio quæ est de novo ritu introducendo, non destruit primam quæ est de intentione Ecclesiæ sequenda: possibile quidem est quòd quis deputatus à principe velit facere plusquam vult ut faciat princeps v. g. quin intentioni principis contradicat: unde cum minister ille de quo est quæstio, introducendo novum

ritum, intendat facere, quod facit Ecclesia, & reverà faciat, quod Ecclesia facit, licèt faciat plusquàm Ecclesia, scilicèt addendo verba aliqua legitimo priorum verborum sensui non officientia, cum non contradicat intentioni Ecclesiæ, verum efficit sacramentum, quod ex Florentino, ut perficiatur, materiam, formam & intentionem ministri dumtaxat exigit. Hæc omnia in nostro casu reperiuntur, ut supponimus.

*Quæres 2.* An interruptio verborum faciat essentialē aut substantialē mutationem? *Respondet*, quòd interruptio parva facit mutationem accidentalem; at verò si notabilis sit, facit mutationem substantialē: hinc est, quòd si quis in baptismo diceret *ego te*, & deinde iret ad aliquid faciendum, seu desisteret & aliquid aliud faceret, & postea rediret & pronunciaret *baptizo*, & iterum desisteret, & postea pronunciaret *te in nomine patris*, &c. invalidè baptizaret. Ita docent Jannerus, Bellarminus & alii. Idem dico de aliis Sacramentis in quibus notabilis verborum interruptio faceret etiam substantialē mutationem, quæ ut dixi facit sacramentum invalidum: secus dicendum est de mutatione accidentali, quæ facit solum illicitum. Ratio est, quia unusquisque Ecclesiæ minister tenetur se gerere juxta praxim & usum communem in Ecclesia receptum; igitur addens in sacramentis, eaque accidentaliter mutans, peccat mortaliter, estque gravi pœna puniendus.



## DISPUTATIO II.

*De existentia Sacramentorum.*

**C**UM sacramenta instituta fuerint propter hominem, & homo considerari possit in statu innocentiae, in statu legis naturae, in statu legis scriptae sive Mosaicae, & in lege Evangelii; hic visa sacramenti natura, investiganda est ejus existentia quoad omnes illos status.

---

## QUÆSTIO I.

*An aliqua Sacramenta fuerint de facto in statu innocentiae, vel futura fuissent Adam non peccante, supposito saltem quod posterius ejus peccassent?*

**S**UPpono tamquam certum apud omnes Theologos, Deum de facto nullum instituisse sacramentum in statu innocentiae. Tum quia ut ait Doctor, *Pro statu innocentiae non fuit congruum institui sacramentum sicut post lapsum.* Tum quia nullibi in Scriptura, Conciliis, aut SS. Patribus fit mentio sacramenti instituti pro illo statu. Tum quia durante statu innocentiae, nullus fuit morbus: igitur nec medicina; *Tolle enim morbos, tolle vulnera, & nulla erit medicinae causa,* ait August. quia non est opus valentibus Medicus, sed male habentibus, ut docet Christus Matth. 9. Unde difficultas est 1. An Deus ex vi præsentis decreti (non autem ex vi alte-

alterius; certum enim est, quòd potuisset instituere sacramenta) instituisset aliquod sacramentum, si status ille durasset, id est, Adamo & posteris ejus in statu innocentiae perseverantibus? 2. An Adamo non peccante, Deus instituisset aliqua sacramenta in illo statu innocentiae, si multi ex Adami posteris peccassent? Gonetius existimat partem affirmativam esse de mente Doctoris subtilis, quia (inquit) ipse Scotus asserit Christum venturum, etiam Adamo non peccante. At aliter sentiunt de mente Scoti, Hyquæus, Mastrius, Frassen, Faber & alii recentiores, cum quibus

Dico, quòd si Adam in statu innocentiae permansisset, etiam si multi ex ejus posteris peccassent, pro illo statu nulla fuissent à Deo instituta Sacramenta ex vi præsentis decreti. Ita Doctor in 4. dist. quæst. 3. §. de tertio articulo litt. D. ubi ait, *Pro statu etiam innocentiae non fuit congruum institui Sacramentum sicut post lapsum, quia & si tunc homo non potuit nisi ex sensibilibus cognoscere intelligibilia; tamen nullum sensibile fuit necessarium tanquam conferens ad salutem, removendo aliquod impedimentum salutis, ut scilicet possit dici propriè medicina.*

Prob. 1. Deus de facto nullum sacramentum instituit pro statu innocentiae, in quo Adam fuit creatus, ut docet communis opinio Scottistarum, & ut in principio quæstionis patet: ergo ex vi præsentis decreti nullum sacramentum instituisset, si diù durasset status innocentiae. Antecedens est certum. Prob. consequentia 1. Si Deus ex vi præsentis decreti quo Sacramenta in lege Evangelica instituit, ea in statu innocentiae instituisset, facta hypothese de duratione ejusdem, de facto ea instituisset pro illo brevi tempore: nam ea instituisset propter utilitatem hominum innocentium, vel propter dignitatem & gloriam status innocentiae, vel propter cultum divinum, aut aliud motivum;



sed tam fuissent utilia Sacramenta primis parentibus in statu innocentiae in quo fuerunt, quam si in ipso permansissent; imò utiliora, quoniam posterorum confirmatio in statu innocentiae, à perseverantia primorum parentum dependebat. Præterea, pro statu innocentiae tam fuit congrua gloria, aut dignitas, cum duratio rerum naturam, nec essentiali statum variet: Deus etiam erat à primis parentibus, eorumque posteris adorandus in illo statu innocentiae, ac si diù durasset. Tandem: nullum fuisset motivum quod non fuerit pro illo brevi tempore quo status innocentiae in Adamo duravit: ergo si Deus ex vi præsentis decreti instituisset Sacramenta, si status innocentiae diù perseverasset, ea de facto instituisset pro illo brevi tempore .2. Sacramenta ex vi propriæ naturæ & institutionis habent rationem mediorum, hominem ad finem conducentium, & consequenter dari debent in illo instanti in quo homo tendit ad finem, & ad ipsum ordinatur; sed Adam in statu innocentiae tendebat ad finem, & erat ad ipsum à Deo ordinatus: ergo si Deus decrevisset dare illi hæc media, si in eodem statu diù perseverasset, ea illi dedisset in principio ejusdem status innocentiae, ut in illo tunc obtinere potuisset id quod obtinisset per eadem Sacramenta, si in statu innocentiae perseverasset.

Confirm Decretum de instituendis Sacramentis in statu innocentiae, est conditionatum, vel absolutum? Non primum; quia Sacramenta à nulla conditione dependent, quoniam si dependerent, vel à peccato, vel à perseverantia status innocentiae? Si à peccato: ergo si Adam non peccasset, Christus etiam si venisset, nullum Sacramentum instituisset. Si à perseverantia status innocentiae: ergo statu innocentiae deficiente, seu Adamo peccante, nullum Sacramentum Christus instituisset, quod falsum esse probat septem Sacramentorum existentia. Unde decretum de

Sacramentis instituendis est absolutum : ergo non est pro statu innocentiae ; & consequenter cum in ipso non instituerit illa, nec ea instituisset ex vi praesentis decreti, si diù durasset. Prob. consequentia: Decretum absolutum est infallibile & inevitabile sublato quocumque alio: ergo si praesens decretum de instituendis Sacramentis, esset pro statu innocentiae, instituta fuissent in illo statu, quod est falsum ; idcirco Deus non decrevit instituere Sacramenta nisi post lapsum ; ideoque ex vi praesentis decreti quo Sacramenta instituit, non instituisset ea in statu innocentiae, si diù durasset, sed potuisset ex vi alterius, quod non disputamus.

Prob. 2. Si status innocentiae durasset, seu si Adam non peccasset, etiamsi multi ex ejus posteris peccassent, nulla fuisset necessitas Sacramenti : ergo Christus quanvis fuisset, nullum Sacramentum instituisset. Consequentia patet. Prob. antecedens: Necessitas Sacramentorum est moralis, seu ex vi decreti de eorum institutione, quia prout sunt elementa & entia physica, fuerunt in statu innocentiae. Prima necessitas propter quam Deus decrevit instituere Sacramenta, est sanctificatio hominum ; altera vero est eorum instructio de rebus supernaturalibus, cum nullum alium effectum in nobis praestent ; per Sacramenta siquidem vel recipimus gratiam aut ejusdem augmentum, vel res supernaturales ediscimus ; sed si status innocentiae durasset, posterii omnes Adami accepissent gratiam per modum naturae, & scientiam quae ad eos dirigendos in operibus justitiae supernaturalis necessaria fuisset, cum peccatum originale sit causa ignorantiae : ergo nulla fuisset necessitas.

Prob. minor 1. Scotus loco citato ait, *Ex hoc apparet, quod in statu patrie nullum congruit Sacramentum*. Et paulò post addit, *Pro statu etiam innocentiae non fuit congruum institui Sa-*

*eramentum, sicut post lapsum: ergo ex Doctore, cum non fuerit congruum, nulla fuit necessitas; cum necessarium, sit congruum. 2. Si fuisset necessitas instituendi Sacramentum, maximè propter peccata quæ posteri commisissent; sed ex hoc non deducitur sufficiens necessitas. Tum quia Sacramenta ex propria institutione sunt ordinata tantùm in remedium peccati originalis, vel actualis ab originali provenientis dumtaxat. Tum quia in illo statu Deus providisset de remedio opportuno, statui innocentiae magis proportionato: ergo nulla fuisset necessitas.*

*Prob. 3. Sacramenta habent efficaciam à morte & Passione Christi: ergo ex vi præsentis decreti non fuisset in statu innocentiae, si durasset, cum Christus non fuisset mortuus; etiam si venisset Adamo non peccante. Prob. antecedens 1. Sacramenta sunt quædam medicinæ spirituales: ergo totam virtutem accipiunt à medico & medicina salutis, quæ est mors & Passio Christi. 2. Sacramenta ex SS. Patribus sunt fontes è latere Christi crucifixi emanantes. 3. Sunt signa, homines cum Deo reconciliantia. 4. In sacra Scriptura dicuntur arma militiæ nostræ: ergo habent efficaciam à morte Christi; subindeque si status innocentiae durasset, nullum fuisset Sacramentum, cum Christus nec mortuus, nec passus fuisset.*

*Dices 1. Qui vult finem, vult etiam media in quocumque statu in quo vult finem; sed in statu innocentiae Deus voluit hominibus gloriam quæ est finis: ergo voluit etiam sacramenta quæ sunt media ad gloriam: & consequenter si status innocentiae perseverasset, Sacramenta instituta fuissent. Resp. distinguendo majorem: Dum finis dependet à mediis absolute & per se, concedo; Dum dependet tantùm ratione alicujus impedimenti & per accidens, nego: Nam ordinate volens, potest velle finem quin velit media à quibus finis non dependet absolute & per se. undè concessa minori, nego consequente.*

sequentiam: quia gloria dependet à Sacramentis ratione infirmitatis & impedimenti, quæ per Sacramenta tolli possunt, quoniam sunt medicinæ; & consequenter cum in statu innocentiae nulla fuisset infirmitas, nullumque impedimentum, Sacramenta non fuissent necessaria ad gloriam consequendam, nec media.

*Instabis:* In statu innocentiae, si diù durasset, homines potuissent peccare, sicut de facto Adam peccavit: ergo in statu innocentiae potuit esse infirmitas & impedimentum ad gloriam consequendam. Resp. negando consequentiam, 1. Quia peccatum in statu innocentiae ab aliquo ex Adami posteris commissum, non expulisset gratiam originalem, quæ in doctrina Scoti est distincta à gratia habituali, & consequenter per alia media, quàm per Sacramenta, homo gratiam recuperare potuisset, nimirum per actus contritionis & amoris Dei; subindeque si status innocentiae perseverasset, nullum Sacramentum institutum fuisset, quia impedimentum aut infirmitas ex peccato proveniens, à Sacramentis fuisset independens. 2. Quia licet in statu innocentiae habuissent Adæ posterii potentiam ad peccandum, non tamen ita facilem ut modò. Tum quia tunc fuissent sine peccati fomite, qui est effectus peccati. Tum quia ut ait Doctor in 2. dist. 20. quæst. unica §. *ad primum argumentum*, cum D. Anselmo, si status innocentie durasset, mirabiliter fuissent adjuti Filii ne peccassent, tum propter justitiam originalem, tum propter doctrinam parentum: ergo nullum fuisset impedimentum ad gloriam consequendam exigens Sacramentum.

*Instabis* iterum: Si status innocentiae durasset, Christus qui venisset, instituisset Sacramentum Eucharistie, ut colligunt plures Scotistæ ex illo Joa. 13. *Cum dilexisset suos qui erant in mundo, in finem dilexit eos*: ergo. Resp. Frassen, concedendo instantiam, licet nostrâ tueatur sententiâ. Resp. tamen, negando instantiam, quia licet motivum

instituenti hoc Sacramentum sit amor, datur tamen aliud motivum, quod est primarium & principalius, nimirum ratio sacrificii Passionis Domini-  
cæ rememorativi, ut liquidò constat ex oratione sanctissimi Sacramenti, ubi dicitur, *Deus qui nobis sub Sacramento mirabili, Passionis tue memoriam reliquisti*; unde cum istud primarium & principalius motivum defecisset, si status innocentiae durasset, & ipso motivo deficiente, defecisset etiam secundarium & minus principale, sequitur, quod Christus non instituisset Eucharistiæ Sacramentum.

*Insuper*; Si Adamus non peccasset, Verbum divinum carnem assumpsisset, quamvis defecisset unum ex motivis incarnationis: ergo etiam instituisset Sacramentum Eucharistiæ, cessante ratione sacrificii. Resp. negando consequentiam, quia redemptio hominum non est principalius, nec primarium motivum incarnationis, ut dictum est in 3. tom. & consequenter ipso cessante, subsistere potuit primarium & principalius; at ratio sacrificii est ratio principalior & primaria, movens ad institutionem Sacramenti Eucharistiæ, quod quidem Sacramentum institutum est per modum convivii, & cibi & potus, quæ nomina supponunt materiam passibilem: ergo cessante hac ratione sacrificii, nullum remansit motivum instituenti huiusmodi Sacramentum; cum remoto principaliori motivo, cesset minus principale.

*Dices 2.* Institutio Sacramentorum non est contra debitum ordinem & perfectionem status innocentiae; imò ad ejus perfectionem tendit. Tum quia in illo statu, gratia quam habuissent homines, potuisset augeri per Sacramenta quæ vivorum appellantur. Tum quia Sacramenta Ecclesiæ Dei exornant & locupletant: ergo si status innocentiae durasset, Deus in ipso aliquod Sacramentum instituisset. Resp. reverà Sacramentorum institutionem non fuisse contra debitum ordinem & perfectionem status innocentiae, dicatamen fuisse contra ordinem convenientiæ, & natu-

naturam Sacramentorum, quæ cum sint medicina, in remedium peccati dumtaxat institui possunt: perfectio enim esset universo, si Spiritus sanctus assumeret naturam humanam; tamen eam non assumet, quia est contra ordinem convenientiæ & exigentiæ, licet non sit contra ordinem & perfectionem universi. Ad 1. prob. dico quod homines propriis actibus cum auxilio Dei elicitis, & ex opere operantis, augmentum gratiæ potuissent acquirere: ergo fuisset contra ordinem congruentiæ & ordinatæ agentis, pro illo statu Sacramenta instituere. Ad 2. prob. concessio antecedente, nego consequentiam; quia sunt ornamenta & divitiæ, quæ suppleant imperfectionem, quatenus supponūt in homine, seu in membris Ecclesiæ vulneratis per peccatum originale & actuale ex ipso proveniens, infirmitatem & bonorum operum inopiam ad consequendam gratiam per proprios actus, & ex opere operantis; at status innocentie erat infirmitatis & inopiæ expers: ergo non erat congruum per Sacramenta illum exornare, nec fuisset perfectior.

*Dices 3. cum Brancato:* In statu innocentie dictasset humana ratio, Deo deberi summum cultum intellectus & voluntatis, perfectissimo modo exhibendum: ergo fuissent in illo statu Sacramenta propriè dicta. Antecedens patet. Prob. consequentia: Nam summus Dei cultus non consistit in solis actibus internis, sed debet etiam per externos manifestari, sicut nec modò sufficit fidem & charitatem internam habere, nisi externis signis comprobetur: ergo fuissent in illo statu actus externi religionis, putà sacrificia & alia. Resp. concessio antecedente, negando consequentiam; perfectissimus enim modus exhibendi Deo cultum, est exhibere illum in corde perfecto & in statu innocentie. Ad prob. nego consequentiam, si per *Ly alia* intelligantur Sacramenta: verum enim est, quod in statu innocentie fuissent sacrificia per quæ homines summum Deo exhib-

buissent cultum, non autem Sacramenta, licet in ipsis, cultus Deo exhibeatur. Ratio est, quia sacrificia sunt de jure naturali, ut docet D. Thomas; Sacramenta verò non sunt de jure naturali, cum instituta fuerint veluti medicinæ propter infirmos: ergo quia status innocentix si durasset, jus naturale retinisset, & infirmos non habuisset, homines pro illo tunc cultû Deo exhibuissent per sacrificia, non verò per Sacramenta.

*Dices 4.* Ex Doctore loco citato, congruum fuit post lapsum Sacramenta institui, quia homo in statu naturæ lapsæ non potuit spiritalia & invisibilia cognoscere, nisi per signa sensibilia, nimirum Sacramenta, quæ sunt instrumenta gratiæ invisibilis: sed hæc ratio tenet in statu innocentix: ergo ex Scoto, si status ille durasset, Deus instituisset Sacramenta. Resp. negando minorem. Tum quia colligitur ex eodem Doctore, qui ut ostendat rationem non habere locum in statu innocentix, loquitur de statu innocentix, sicut de statu patriæ, ut patet in probatione. Tum quia statui innocentix, qui perfectissimus erat, modus ille obscurus significandi & ænigmaticus non conveniebat; aliàs tunc natura humana habuisset perfectiorem notitiam de rebus supernaturalibus, quod est falsum.

*Dices 5.* cum Boyvino: Deus non reliquisset homines sine remedio: ergo credibile est, quòd pro tunc instituisset Sacramenta. Resp. negando consequentiam, quia in statu innocentix nulla fuisset infirmitas; ideòque nullum remedium esset relinquendum.

*Inflabis:* In statu innocentix verè fuit Sacramentum matrimonii; nam sancti Patres exponunt illud ad Ephes. 5. *Sacramentum hoc magnum est, et in Christo & in Ecclesia*, de matrimonio Protoparentum, quorum conjugium fuit figura unionis Christi cum Ecclesia: ergo si innocentix status durasset, fuisset Sacramentum matrimonii ex vi præsentis

de-

decreti: Nego instantiam, quia conjugium Protoparentum non erat verè Sacramentum in statu innocentiae, nec fuisset, si talis status durasset; sed solum quatenus est officium naturæ, & speciei propagandæ necessarium; quamvis ex consequenti significet unionem Christi cum Ecclesia. Nec per hoc licet inferre Protoparentum conjugium fuisse verum Sacramentum, alioquin sequeretur, quòd omnes figuræ quæ Christi adventum præcesserunt, fuissent revera id quod Christus fuit, quod est omninò improbabile.

## Q U Æ S T I O II.

*An in statu legis naturæ fuerint vera Sacramenta, tam pro adultis, quam pro parvulis, eaque immediate à Deo determinata fuerint, & necessaria necessitate medii ad salutem?*

**P**ER legis naturæ statum, Theologi intelligunt tempus ab Adamo lapso usque ad Moysen, cui data fuit lex à Deo in summitate Montis Sinai, quæ duravit à Moyse usque ad Christum; unde homo ab Adamo lapso usque ad Moysen, fuit sub lege naturæ: à Moyse usque ad Christum, in lege scripta: & à Christo usque ad finem mundi, est & erit in lege Euangelii & gratiæ. Difficultas igitur est 1. An in statu naturæ, seu ab Adamo peccante usque ad Moysen, fuerint aliqua Sacramenta vera pro adultis & pro parvulis? 2. An talia Sacramenta fuerint à Deo determinata, sicuti determinata sunt in lege gratiæ, an verò relicta in hominum arbitrio? 3. An fuerint necessaria ad salutem necessitate medii? Quantum ad primum & tertium difficultatis membrum, affirmant omnes

Theo-



Theologi. Quantum ad secundum, Gonetus docet Sacramenta legis naturæ fuisse relicta in hominum arbitrio; Scotus verò aliter sentit.

Dico igitur 1. Quòd in lege naturæ fuerunt vera Sacramenta pro parvulis & pro adultis in remedium peccati originalis & actualis, eaque sensibilia & exteriora, atque necessitate mediæ ad salutem necessaria. Prob. 1. pars ex D. Gregor. Papa lib. 4. Moral. cap. 2. dicente, *Quod agit apud nos aqua Baptismi, hoc egit apud veteres pro parvulis sola fides, vel pro majoribus virtus sacrificii.* 2. ex D. August. lib. 5. contra Julianum cap. 9. sic dicente, *Non est credendum ante datam circumcisionem famulis Dei, quandoquidem illis inerat mediatoris fides, nullo ejus Sacramento opitulatos esse parvulis suis, quamvis quid illud esset, aliqua necessaria causa, Scriptura sacra tacere voluerit.* 3. ex Doctore in 4. dist. 1. quæst. 7. §. Respondeo, dicente, *Nullo tempore dimisit Deus cultores suos sine remedio necessario ad salutem; sed omni tempore post lapsum fuit necessaria ad salutem deletio peccati originalis: ergo quocumque tempore aliquod remedium efficax erat ad hoc.* 4. Deus durante statu naturæ volebat salutem omnium: ergo dabat omnibus medium ad salutem; sed principalius, imò & unicum parvulis ad salutem remedium, est deletio peccati originalis: ergo in statu naturæ in quo erat peccatum originale, erat etiam remedium, putà aliquod Sacramentum.

Prob. 2. pars: Tum quia Sacramentum in lege naturæ erat remedium: ergo modo humano applicari debebat; sed modus humanus exigit, ut per aliquod signum sensibile & externum, non verò per actum fidei internum fieret: ergo in lege naturæ Sacramentum erat signum sensibile & externum. Tum quia si Sacramentum fuisset aliquid insensibile, nempe solus actus fidei interioris parentum in Christum venturum, ad parvulos suos explicitè vel implicitè directus, ut volunt adversarii, sequeretur 1. quòd parvulo ab-

sen-

senti potuisset applicari illud remedium, nimirum fides interna; sed hoc est ridiculum: ergo.

2. Quod unus plures parvulos simul justificare potuisset, quod est falsum: ergo. Tum quia per tale Sacramentum puer Deo initiabatur, & Ecclesiæ visibili conjungebatur: ergo per applicationem remedii visibilis, externi & sensibilis, non autem per fidem internam.

Prob. 3. pars: Sacramentum in lege naturæ, erat quoddam signum externum & sensibile, ut dictum est, & determinatum à Deo, ut dicemus in conclusione sequenti, ad delendum peccatum originale: ergo erat necessarium necessitate medii ad salutem, cum deletio peccati originalis sit omnino ad salutem necessaria.

Dices 1. De Sacramentis nihil definiendum est, nisi quod in Scriptura revelatum est; cum sint signa gratiæ, quæ supernaturalis & invisibilis est: sed nullibi in sacra Scriptura revelatur, fuisse Sacramenta in lege naturæ, ut ait D. August. supra citatus: ergo. Resp. 1. hoc argumentum militare etiam contra illos qui actum internum fidei admittunt. 2. Nego minorem: Constat enim implicite & illative, quod sufficit. 3. Constat ex SS. Patribus: ergo licet in sacra Scriptura non constet, nihilominus autoritate Patrum quibus Spiritus sanctus veritates manifestare voluit, dici potest nostra propositio.

Dices 2. Sacramenta in lege naturæ nullam causalitatem habere poterant; erant enim egena & vacua: ergo pro illo statu nullum fuit propriè Sacramentum, quoniam de ratione & natura Sacramenti propriè dicti, est conferre gratiam. Resp. Sacramenta legis naturæ non habuisse causalitatem activam & ex opere operato, quam habent Sacramenta novæ legis, sed fuisse signa moraliter moventia & excitantia Deum, ut ob merita Christi futuri, gratiam conferret, ea ritè, & debite suscipientibus. Unde non dicuntur egena & vacua absolute, sed comparatione

ad Sacramenta novæ legis, quorum erant figura & umbra.

Dico 2. Sacramenta legis naturæ non fuisse relicta in hominum arbitrio, sed determinata immediatè à Deo in particulari. Ita Scotistæ cum Doctore. Hæc conclusio est contra Gonetum. Prob. Tum quia solius Dei est, non verò humani arbitrii determinare justificationem hominum, & peccati originalis deletionem per gratiam, ut est evidens: ergo solus Deus determinavit in lege naturæ Sacramenta, per quorum applicationem, gratia erat conferenda; quoniam Sacramenta pro illo statu, sicuti pro isto statu, specificabantur à gratia & applicabantur propter ipsam. Tum quia Sacramenta in lege naturæ, erant remedia & quædam medicinæ spirituales propter infirmitatem, aut sanitatem recuperandam, à solo Deo cognitam: ergo solus Deus, qui verus medicus est, præparavit & determinavit remedia, seu Sacramenta infirmis legis naturæ, nec ea hominum arbitrio præparanda aut eligenda reliquit. Tum quia si Deus reliquisset hominum arbitrio Sacramenta, magna fuisset inter ipsos contentio, an istud, vel aliud signum esset idoneum ad peccatum originale delendum; sed contentio est vitanda: ergo. Tum quia incredibile est Deum revelasse peccatum originale esse delendum per signum externum, parvulis à parentibus applicandum, & non revelasse quale signum; quippe cùm propemodum infinita sint signa sensibilia, homines remansissent suspensi, aut ad minus semper dubitare potuissent; sed Deus revelavit Prophetis & viris sanctis signa seu Sacramenta: ergo revelavit ea determinatè & distinctè, seu ista signa esse Sacramenta, non verò illa.

Obj. 1. Gonetus: Cùm status legis naturæ esset à Christo remotior statu legis scriptæ, fidem in ipsum habebat magis obscuram, & consequenter non exigebat Sacramenta à Deo in particulari

lari determinata: *Secundò*, cùm eo tempore nondum esset Scripturæ sacræ usus, neque homines in unum corpus adunarentur, vix potuisset divina talium signorum determinatio omnibus innotescere.

*Denique*, non est assignabile ex Scriptura, aut traditione aliquod signum sensibile, in quo determinatè Sacramentum in remedium peccati originalis Deus in lege naturæ instituerit; aliunde verò nulla asserri potest hujus determinationis congruentia, sed potius ejus indeterminatio congrua erat statui illius legis, ut ostensum est: ergo absque fundamento Scotus & Ricardus asserunt illud Sacramentum fuisse immediate à Deo determinatum in particulari.

Resp. primam rationem non officere conclusioni nostræ, quia ex determinatione Sacramentorum in particulari, non sequitur statum legis naturæ habuisse fidem clariorem, quàm status legis scriptæ, ut est evidens: *Deinde*, licet status legis naturæ esset à Christo remotior statu legis scriptæ, & fidem magis obscuram habuisset; tamen non valet ex hoc inferri non habuisse Sacramenta determinata, quia major fidei claritas in lege scripta, ex Prophetarum vaticiniis, ex revelationibus, aliisque signis Salvatoris venturi, proveniebat: ergo non est locus recurrendi ad Sacramentorum indeterminacionem, ut salvetur differentia fidei in utroque statu, cùm determinatio sit omninò admittenda, supposita Sacramentum necessitate: necessarium enim erat homini in statu naturæ, sicut in aliis, scire certam operandi regulam, & ad salutem perveniendi idonea media, & consequenter determinata.

Ad *secundam rationem*, dico quòd facilè divina talium signorum determinatio innotescere potuit, omnes siquidem sciebant Sacramenta esse necessaria ad delenda peccata & sanctitatem obtinendam, ut fatentur omnes: ergo eadem  
noti.

notitia, aut manifestatione, vel inspiratione, ea scire poterant determinatè & distinctè: imò facilius fuisset habere notitiam determinatam, quàm confusam & vagam in hac materia. *Deinde*, quamvis vix potuisset innotescere, tamen ex rei difficultate non licet inferre privationem ejusdem, quia difficultas non est impossibilitas: ergo ratio non concludit.

*Ad denique*, dico quòd militat contra ipsum: nam non est assignabile ex sacra Scriptura in lege naturæ fuisse Sacramenta, ut fateatur ipsa Gonet. quo nonobstante concedit in ipso statu fuisse vera Sacramenta: ergo licet non constet de ipsorum determinatione, possunt nihilominus illà concedere. Dico tamen quòd quamvis non constet explicitè, constat tamen implicitè: nam pro omni statu ex sacra Scriptura ad divinam providentiam pertinet dare & manifestare hominibus signum salutis & remedium, & præsertim dum viribus propriis cognosci nō potest: ergo ad eandem providentiā spectat determinare quodnam esset in statu naturæ, ut esset omnibus manifestū. *Deinde*, quid hujusmodi determinatione congruentius? 1. Ne fluctuaret homo de certitudine signi pro se adhibiti, si sciret illud non fuisse determinatum, & electum à Deo. 2. Electio aut determinatio Sacramentorum, non est sicut applicatio eorundem, quia applicatio pertinet ad Ministros, & electio ad causam & authorem; at homines non sunt causa Sacramentorū, sed tantū Ministri: ergo congruum fuit relinquere hominibus applicationē, non verò electionē & determinationē; aliàs homines in statu legis naturæ fuissent authores Sacramentorum, quoniam elegissent quid voluissent in Sacramentū & signum ad delendum peccatum originale, quod est falsum: ergo Scorus cum fundamento asserit illud Sacramentum fuisse immediatè à Deo determinatū in particulari. 3. Figura aut umbra determinatur sicut illud cujus est, cum sit quodammodo imago; sed

sed sacramenta in lege naturæ erant figura Sacramentorum novæ legis : ergo erant determinata à Deo .

Hic obiter observa authoritatem divi Gregorii adductam supra in prima conclusione , qua probari videtur actum fidei internum , aut solam fidem fuisse in lege naturæ Sacramentum , non esse intelligendam seu accipiendam pro solo habitu fidei , aut pro actu interiori tantum , sed pro actu exteriori sensibili protestatione fidei : ille autem actus sufficienter potuit habere rationem Sacramenti , ut ait Scotus loco citato §. *ad primum*. Hanc protestationem esse sensibilem probat idem Doctor dicens , *Ista protestatio fiebat in verbo aliquo invocandi Deum , vel offerendi parvulum Deo* ; unde divus Gregorius sic est intelligendus , & pro nostra conclusione afferendus , non verò pro opposita , quæ tuetur fidem internam & insensibilem fuisse in lege naturæ Sacramentum : quod iterum impugno hac ratione sequenti .

Remedium aut Sacramentum , quod erat in lege naturæ ad delendum peccatum originale , erat applicandum aut conferendum pueris natis & præsentibus , quia de natura medicinæ est recipi ab infirmo , & remedii est applicari vulneri actuali dumtaxat ; atqui actus purè internus fidei & intentionalis potest æquè dirigi ad pueros in utero Matris existentes , aut nondum natos , ac ad eos qui sunt extra uterum , ad absentes sicut ad præsentés : ergo hujusmodi actus fidei non poterat in lege naturæ esse remedium determinatum à Deo ad delendum peccatum originale parvulorum , nec Sacramentum . Tum quia talis actus fidei poterat dirigi circa absentes . Tum quia si verum sit , quòd poterat dirigi , sequeretur quòd remedium in lege naturæ erat perfectius baptismo , & majorem habebat efficacitatem , cum baptis- mus præsentibus dumtaxat applicari possit ; quod est falsum , alioquin sequeretur statum naturæ fuisse perfectiorem statu Evangelii .

QUÆ-

## Q U Æ S T I O III.

*An in lege Mosaica, præter circumcissionem, alia fuerint vera Sacramenta, & quot?*

**D**ico, quòd in veteri lege præter circumcissionem fuerunt alia Sacramenta propriè dicta; imò plura habuit Sacramenta status legis antiquæ seu Mosaicæ, quàm status legis gratiæ. Prob. 1. pars. Tum quia in Conciliis dum Patres loquuntur de Sacramentis veteris legis, loquuntur in numero plurali, ut constat ex Trid. sess. 7. can. 2. & ex Florent. in decreto Eugenii: ergo in lege Mosaica erat plus quàm unum Sacramentum, & consequenter circumcisio non erat solum Sacramentum. Ita sentiunt SS. Patres. Tum quia in veteri lege comestio agni Paschalis erat figura Eucharistiæ; & circumcisio, Sacramenti Baptismi: ergo erat aliud Sacramentum præter circumcissionem.

Prob. 2. pars. Tum ex August. lib. 19. contra Faustum cap. 13. ubi sic ait: *Sacramenta veteris legis ablata sunt quia impleta; & alia sunt instituta, virtute maiora, utilitate meliora, actu faciliora, & numero pauciora*: ergo ex D. August. in lege veteri, numerus Sacramentorum erat major. Tum quia quod est perfectius, est rarius; sed Sacramenta novæ legis sunt perfectiora Sacramentis antiquæ legis: ergo lex antiqua habuit plura Sacramenta, quàm lex nova. Tum quia plures sunt corporum imagines, quàm corpora ipsa, ut notat Gonet. ergo in statu legis antiquæ numerus Sacramentorum erat major, quia in illo statu Sacramenta erant figuræ & imagines Sacramentorum. novæ legis, ut notat Hugo Victorinus lib. 1. de Sacramentis part. 11. cap. 6. dicens: *Prima Sacramen-*

*ta legis naturalis, quasi veritatis umbra; quæ verò tempore legis Moysis, quasi quædam imago veritatis; quæ autem sub gratia novissimè consequuntur, jam non umbra vel imago, sed ipsum corpus veritatis: ergo status legis antiquæ plura habuit Sacramenta, quàm status legis novæ.*

*Quæres, an post Christi adventum, seu in nova lege, aliqua debuerint esse Sacramenta, diversa ab his quæ erant in lege veteri? Resp. affirmativè. Tum quia cùm per divinæ incarnationis mysterium, homo novas acceperit vires, & in Dei Filium aut hæredem, & cohæredem Christi, ut ait Apost. adoptatus fuerit, perfectioribus Sacramentis initiari debuit. Tum quia exhibendum erat in nova lege, quod lex antiqua promittebat; Sed Sacramenta veteris legis erant umbræ Sacramentorum novæ legis: ergo hæc Sacramenta erant exhibenda, ut figuræ essent veræ. Tum quia Sacramenta veteris legis erant elementa egena & vacua: ergo in nova lege erant instituenda alia Sacramenta, plena & effectiva gratiæ. Tum quia status novæ legis est status perfectior: ergo debuit habere Sacramenta perfectiora, & consequenter habuit Sacramenta diversa ab his quæ erant in lege veteri.*

*Insuper: Christus Dominus est omnium novæ legis Sacramentorum immediatus institutor, ut decisum fuit in Tridentino sess. 7. can. 1. & sess. 14. de Extrema Unctione can. 1. ubi legitur: Si quis dixerit Extremam Unctionem non esse verè & propriè Sacramentum à Christo domino nostro institutum, & à Beato Iacobo promulgatum, sed ritum tantùm acceptum à patribus, aut signum humanum, anathema sit: ergo in nova lege habemus Sacramenta distincta à Sacramentis, quæ patres nostri habuerunt in lege scripta: nam si haberemus eadem, Christus non esset immediatus institutor Sacramentorū, cùm fuissent & extitissent ante adventum Christi, & uteremur circumcisione, quæ, ut dicemus, erat*  
Sa-



Sacramentum in veteri lege : unde cum Christus sit Sacramentorum nostrorum institutor, & circumcisio sit nobis prohibita 1. Corinth. cap. 7. vers. 19. *Circumcisio nihil est*; & ad Galatas 5. vers. 2. ait, *Ecce ego Paulus dico vobis, quoniam si circumcidamini, Christus vobis nihil proderit*, certum est nos in nova lege habere Sacramenta distincta à Sacramentis legis scriptæ.

*Dico*: Sacramenta veteris legis instituta fuerunt, ut in perpetuum subsisterent; ita ex variis Scripturæ locis & præsertim ex 12. & 14. Levitici: ergo adhuc subsistunt & sunt nostra. Probatur consequentia: Deus non mutatur, & ideo voluit homines post Christi adventum sanctificari per eadem remedia & Sacramenta, per quæ voluit homines sanctificari ante adventum Christi; cum in utroque statu, homines sint in eadem infirmitate, & tendant ad eundem finem, & gratia sanctificans in nova lege non sit distincta specificè à gratia veteris legis seu Mosaicæ.

Respondeo distinguendo antecedens: Sacramenta veteris legis instituta fuerunt, ut subsisterent in ratione signi, nego; in ratione significati, concedo: circumcisio enim erat figura baptismi, & sacerdotium Aaronicum figura sacerdotii legis Evangelicæ in perpetuum conservandi, quo adveniente cessavit sacerdotium Aaronicum, quia adveniente veritate, cessare debet figura quæ ejusdem veritatis vices gerebat: ex quo sequitur vetera Sacramenta fuisse instituta, ut subsisterent tantum in ratione significati, non verò in ratione signi. Quare neganda est consequentia, ad cujus probationem dico Deum non mutari, quamvis in lege nova nobis alia dederit Sacramenta, quia juxta variam temporum differentiam, de remediis convenientioribus disposuit divina providentia; Nonne, quin Deus mutetur, *diurnis tempora nocturna vertuntur? quies nostra variantur ætates? adolescentiæ pueritia non redituræ cedit; juvenus adolescentiæ, non maturæ*

*sura: juventutis senectus, senectus autem morte fitur, inquit Augustinus epist. 5. Hæc omnia mutantur, nec mutatur divina providentiæ ratio qua fit ut ista mutantur.*



## DISPUTATIO III.

*De gratia Sacramentali.*

**V**Isis Sacramentorum natura & existentia, modò examinandus est eorum effectus, qui est gratia; unde fit

## QUÆSTIO I.

*An Sacramenta novæ legis sint causa gratiæ, eamque conferant ex opere operato non ponentibus obicem?*

**D**ico 1. Sacramenta novæ legis gratiam conferre non ponentibus obicem; subindeque non esse solum signa executiva fidei, vel notas quibus Fideles ab infidelibus discernuntur. Ita expressè definitum est in Trid. sess. 7. can. 6. Prob. 1. Quod remittit peccata, confert gratiam; cum peccata non deleantur formaliter nisi per gratiam, quemadmodum gratia non expellitur nisi per peccatum; sed per Sacramenta, peccata remittuntur, ut constat ex illo Act. 2. *Baptizetur unusquisque vestrum in remissionem peccatorum: ergo Sacramenta novæ legis conferunt gratiam.* 2. Sacramenta dicuntur fontes aquæ salientis in vitam æternam: ergo conferunt gratiam quæ ducit ad vitam æternam. 3. Baptismus non con-

confertur ad excitandam, nec designandam extrinsecè fidem, cùm detur parvulis qui non sunt capaces excitationis nec cognitionis fidei: ergo confertur ad delendum peccatum originale, & ad conferendam gratiam, cùm salventur, dum statim post Baptismum moriuntur. 4. Si Sacramenta novæ legis essent tantùm necessaria ad excitandam fidem, & ad distinguendos Fideles ab infidelibus; sequeretur, quòd nullum Sacramentum esset simpliciter necessarium, quia homo posset excitari ad fidem ex concionibus & internis illuminationibus, per quam fidem fideles ab infidelibus distinguerentur.

*Dices, Ex Apost. Hebr. 10. Iustus ex fide vivit:* ergo sanctitas non causatur per Sacramenta, sed per fidem, & consequenter Sacramenta novæ legis non conferunt gratiam. Et ad Ephes. 5. ait: *Mundans eam*, scilicet Ecclesiam, *lavacro aquæ, in Verbo vitæ*: sed Verbum vitæ, est ex fide, & operatur excitando fidem; ergo Baptismus mundat excitando fidem. Resp. quòd hæc verba intelligenda sunt dispositivè & antecedenter, non verò formaliter, quia Sacramentum Baptismi confert fidem simul cum gratia; & ipsa fides est fundamentum gratiæ; unde sine gratia, justus non est formaliter justus, nec vivit, sed tantùm dispositivè.

Dico 2. Sacramenta novæ legis conferre gratiam ex opere operato. Ita definitum est in Trid. sess. 7. can. 8. Prob. Sacramentum conferre gratiam ex opere operato, nihil aliud est quàm eam conferre immediatè per seipsum ex virtute quam habet ex Passione Christi, quæ est opus operatum; non verò ex merito conferentis vel recipientis; sed Sacramenta novæ legis sic conferunt gratiam: ergo conferunt eam ex opere operato. Prob. minor. 1. Sacramenta sunt medicinæ spirituales à Christo institutæ: ergo non habent virtutem sanandi à bonitate applicantis aut recipientis, quod idem est ac eam habere.

habere ex opere operantis, sed à seipsis & ex virtute Christi, qui ea ordinavit in ara crucis; quod idem est ac ex opere operato. 2. Si non conferrent gratiam per seipsa & per virtutem quam habent ex Passione Christi, non differrent ab observantia præceptorum, nec ab operibus meritoriis, nec a sacramentis antiquæ legis; sed hoc est falsum, ut liquidò constat: ergo, &c.

*Dices:* Exigitur aliqua dispositio in suscipiente Sacramentum: ergo Sacramenta non causant gratiam ex opere operato. Resp. negando consequentiam; quia causalitas Sacramenti ex opere operato non excludit dispositiones operantis; ut advertit Gonet. sed tantum opus operantis tamquam principium gratiæ.

Satis est ad Sacramenti ex opere operato gratiam productivi rationem, quod ex se habeat aptitudinem gratiæ productivam, quam si non producat, id contingit per accidens ex appposito obice, & idè causalitas Sacramenti ex opere operato non excludit operantis dispositiones: quælibet enim forma, & quodlibet instrumentum, dispositiones exigunt in subiecto, nihilominus causant effectum vi propria. Panis etiam ut nutriat, dispositiones exigit in stomacho, anima in corpore, & gratia sanctificans in anima suas exigunt dispositiones: ita similiter Sacramenta, licet dispositiones exigant, causant gratiam ex opere operato. Præterea, sunt quædam Sacramenta, ut baptisumus & absolutio Sacramentalis, quæ conferri possunt non habentibus usum rationis: quoad primum patet, cum infantibus statim post ortum conferatur: quoad secundum quod est absolutio, potest conferri his qui in periculo vitæ sunt, etiam si vi morbi oppressi non habeant usum rationis, vel sensuum, dummodò constet eos desiderasse absolutionem, ut declarant Carthag. 4. can. 76. & Arausican. 1. can. 2. ergo omnia Sacramenta non exigunt semper dispositiones actuales in

fulcipientem, nec virtutem aut probitatem in ministro, & consequenter Sacramenta causant gratiam ex opere operato, seu visua, ut causæ instrumentariæ: dixi *ut causa instrumentariæ*, quia Deus solus est causa princeps, cum nulla creatura possit efficienter producere gratiam sanctificantem.

*Instabis:* Opus operantis est tamquam principium gratiæ: ergo Sacramenta non causant gratiam ex opere operato. Probatur antecedens ex illo 1. Petri cap. 3. vers. 21. *Quod & vos nunc similis formæ salvos facit baptisma, non carnis depositio sordium, sed conscientiæ bonæ interrogatio in Deum per resurrectionem Iesu Christi:* quibus Apostolus indicat excitationem fidei resurrectionis Christi, quæ est interrogatio bonæ conscientiæ, habere vim sanctificandi, seu esse principium gratiæ sanctificantis.

Respondeo negando antecedens, ad cuius probationem dico, quod Petrus indicat solum nullum esse ponendum obicem, sed omnem dispositionem esse adhibendam per interrogationem bonæ conscientiæ apud Deum. ut Sacramentum nullum inveniatur obicem, & producat gratiam: vel dico, quod salus à baptismo proveniens non est emundatio sordium carnis, sed animæ sanctificatio, quam idem Apostolus appellat interrogationem bonæ conscientiæ, seu conformitatem animæ cum Deo. Hæretici alias sacre Scripturæ authoritates obijciunt, eas tamen omitto, quia probant actiones operantis sive in recipiendis sive in administrandis Sacramentis, non esse instrumenta gratiæ operativa, sed solum dispositiones, ut ipsa Sacramenta producant gratiam.

## QUÆSTIO II.

*Quomodo Sacramenta producant gratiam, an instrumentaliter physicè, vel solum moraliter?*

**S**uppono tamquam certum, quòd sacramenta novæ legis non sunt meræ conditiones sine quibus non, respectu gratiæ, quia Sacramenta exigunt effectum in genere moris, quemadmodum meritum exigit præmiũ; & habent jus ad gratiam, sicut meritum habet jus ad gloriam & præmium: ergo non sunt conditiones. sed causæ gratiæ; unde difficultas est, an sint causæ physicæ, vel morales? Pro cuius intelligentia, supponendum est quòd causa physica est illa quæ per actionem realem attingit ipsius rei entitatem & productionem: Moralis verò est illa quæ non attingit effectum per actionem suam, sed movet causam efficientem ad effectus productionem, vel jussu, vel prece, vel merito, vel consilio, vel prohibitionem,

Dico, Sacramenta novæ legis non concurrere physicè ad causandam gratiam, sed dumtaxat moraliter. Ita Scotus in 4. dist. 1. quæst. 5. §. *Ad primam ergo quæstionem dico*, quem sequuntur omnes Scotistæ & plures extranei. Prob. 1. Non sunt multiplicandæ causalitates sine necessitate, ut concedunt omnes: ergo non est admittenda causalitas physica in Sacramentis novæ legis. Prob. consequentia 1. ex Gonet. Hic n. 138. & 140 concedit Sacramenta novæ legis esse causas instrumentales morales respectu Dei, in ordine ad gratiæ productionem; sed hæc causalitas moralis sufficit ad productionem gratiæ Sacramentalis: ergo non est admittenda causalitas physica. Prob. minor: Illud sufficit ad aliquem effectum, cum quo effectus ille ponitur; sed gratia ponitur per Sacramenta,

etiamſi non habeant cauſalitatē phyſicā, poſita ſola cauſalitate morali; cū virtualiter contineant merita Chriſti, & à Deo ordinata & inſtituta ſint ad productionem-gratiæ: ergo cauſalitas moralis ſufficit, & conſequenter non eſt admittenda phyſica. Prob. 2. eadem minor, ſcilicet cauſalitatē moralem ſufficere: Gonetus hic n. 81. concedit Baptiſmum cum fictione ſuſceptum, poſtea recedente fictione, non cauſare gratiam phyſicè, ſed tantū moraliter: ergo aliqua Sacramenta habent cauſalitatē moralem ſufficientem ad gratiæ productionem, ſubindeque ſuperflua eſt cauſalitas phyſica. Prob. 3. Quod SS. Patres, & Concilia dicunt de Sacramentorum cauſalitate reſpectu productionis gratiæ, ſalvatur per cauſalitatē tantū moralem; nihil enim aliud dicunt quā Sacramenta cauſare gratiam, abſque ulla mentione de modo: ergo cū hæc cauſalitas moralis quæ competit Sacramentis, ſalvet iudicia Patrum, & ad productionem gratiæ ſufficiat, non eſt admittenda cauſalitas phyſica. Tum quia non eſt neceſſaria. Tum quia maximas patitur difficultates, ut videbimus infra. Tum quia nulla eſt neceſſitas admittendi cauſalitatē phyſicā.

Confirm. Sacramenta novæ legis ſunt cauſæ instrumentales gratiæ, eadem virtute qua ſunt Sacramenta; ſunt enim cauſæ instrumentales gratiæ, quia ſunt ſacramenta: aliàs res & verba eſſent ex ſeipſis cauſæ instrumentales gratiæ; quod eſt inauditum; ſed ſacramenta quatenus talia, ſunt aliquid morale: ergo ſunt etiam cauſæ morales gratiæ. Prob. minor: Sacramenta novæ legis non ſunt talia ex natura rei; aliàs eſſent ſacramenta, quatenus ſunt elementa: ſed ex divina inſtitutione, qua Deus decrevit conferre gratiam ad applicationem

nem Sacramentorum, quemadmodum decrevit dare gloriam ad positionem operis meritorii: ergo sacramenta sunt signa gratiæ, moralia; subindeque sunt causæ morales gratiæ, sicut merita sunt causæ morales augmenti ejusdem, & gratiæ, quia sicut operari sequitur esse, ita modus operandi sequitur modum essendi.

Prob. 2. Causa physica est illa quæ influxu sibi proprio & reali attingit effectum, ut ex dictis patet; sed Sacramenta non attingunt gratiam influxu proprio & reali: ergo non sunt ejus causa physica, sed moralis. Majorem concedit Gonetus. Minor verò prob. Nulla causa potest attingere effectum influxu proprio & reali, quin existat. Tum quia actio est actus rei existentis. Tum quia absurdum est quòd aliquid per se & immediatè agat, quin existat; sed sacramenta non existunt, dum gratia producitur: nam dum sacramentum matrimonii per procuratorem contrahitur, gratia producitur in contrahentibus, quando in ipsis non est amplius materia nec forma sacramenti: ergo Sacramenta non sunt causæ physicæ, sed morales tantum gratiæ. Prob minor: Gratia non producitur in anima, donec Sacramentum sit perfectum & completum. Tum quia causa principalis non utitur causa instrumentali imperfecta & incompleta. Tum quia si Sacerdos diceret tantum *Hoc est* non consecraret, & sic de cæteris; sed tunc Sacramenta non existunt (excepto sanctissimo Sacramento altaris) quia consistunt in motu & actione, quæ successiva sunt: ergo sacramenta non existunt, dum gratia producitur, & consequenter non attingunt ipsam influxu physico & reali. Præterea, sæpè distant localiter ab homine, in cujus anima est causanda gratia, ut patet in Sacramento Pœnitentiæ; nam dum Sacerdos pœnitentem absolvit, verba non tangunt physico influxu pœnitentem: ergo causant, quin existant, quod est contra re-



gulam physicorum, & contra Gonetum hic n. 79. ubi ait, *Existentia ens est conditio necessaria ad agendum, quam Deus non potest supplere*: ergo Sacramenta producant gratiam moraliter tantum.

Resp. Gonet. dupliciter. 1. n. 8. ait argumentum esse verum, dum instrumentum est artis vel naturæ, falsum verò dum instrumentum est divinæ virtutis, quale est sacramentum: hoc enim inter instrumenta primi & secundi generis reperitur discrimen, quòd cum in instrumentis naturalibus aut artificialibus, virtus causæ principalis non sit ita diffusa, ut per seipsam possit immediatè contingere passum, vel subjectum operis naturalis vel artificiosi, necesse est, quòd mediante instrumento illam deferente, reddatur ipsi præsens, subindeque quòd instrumentum naturæ vel artis contingat immediatè passum seu subjectum in quo debet produci ejus effectus: econtra verò cum virtus Dei, ob ejus immensitatem sit omnibus rebus intimè præsens, non requiritur, quòd mediante instrumento reddatur præsens subjecto in quo gratia vel alius effectus supernaturalis producitur, nec per consequens quòd instrumenta divinæ virtutis tale subjectum immediatè contingant; sed in rem distantem operari possunt. Unde Christus Matth. 8. sola voce sanavit servum Centurionis absentem, &c. *Æstimatoria* licet non sit nisi in capite, operatur tamen instrumentaliiter in pede, ipsumque movet localiter, ut instrumentum naturale animæ, quia ipsa anima cui conjungitur, & quæ est causa principalis talis motus, formaliter in pede existit: cur ergo similiter Sacramenta & alia divinæ virtutis instrumenta non poterunt operari in subjectum distans, cum Deus qui est causa principalis gratiæ miraculorum, omnibus rebus intimè præsens sit, & immediatè ac intimiùs quàm anima pedi, ipsis  
con-

conjungatur? *In ipso enim vivimus, movemur & sumus.* Act. 17.

Contra 1. Hæc responsio non evacuat argumentum de existentia instrumenti physici, licet satisfacere videatur de proximitate aut indistantia ipsius. Probat enim instrumentum divinæ virtutis posse operari in rem distantem, ut patet in voce qua Christus sanavit servum Centurionis absentem; sed non probat instrumentum divinæ virtutis operari & non existere: ergo cum Sacramenta conferant gratiam quin existant, quod ad causalitatem physicam requiritur, signum est, quod non sunt instrumenta physica divinæ virtutis, sed moralia. 2. Responsio probat, quod instrumentum divinæ virtutis non reddit Deum præsentem subjecto in quo effectus producitur, ut contingit instrumento naturali & artificioso, quia (inquit) Deus ob immensitatem est omnibus rebus intimè præsens, de quo nemo dubitat; sed non probat instrumentum influere & operari quin sit præsens passio aut subjecto: nam licet Sacramentum non reddat Deum præsentem passio, ut instrumentum artificiosum reddit artificem præsentem subjecto; amen non debemus inferre ipsum instrumentum non esse præsens subjecto: nam *primò*, Deus qui est causa principalis, in sententia Thomistarum, non potest agere quin sit præsens passio, ipsumque tangat: ergo à fortiori instrumentum quo utitur, debet esse præsens passio aut subjecto, illudque tangere. *Secundò*, si causa principalis physica operari nequeat, quin vel per se, vel per instrumentum sit præsens passio, ut insinuat responsio Gonetii: quomodo instrumentum operari poterit, quin sit præsens passio & illud contingat? Tum quia instrumentum physicum mediat inter causam principalem & subjectum. Tum quia virtus causæ principalis attingit passum,

sum, & in ipso producit effectum mediante instrumento: ergo cum sacramenta non existant, nec tangerent subjectum, dum gratia producitur, non sunt instrumenta physica, sed moralia. Ad illud de Christo, dico, quod intelligi debet de causalitate morali, ut patet ex dictis in 3. tomo.

*Ad exemplum de æstimatoria*, dico 1. quod non probat causam instrumentalem posse agere, quin in se existat, cum ipsa æstimatoria existat in capite, dum instrumentaliter operatur in pede: ergo non evacuat difficultatem. Dico 2. falsum esse æstimatoriam operari instrumentaliter physicè in pede: nam pes qui operatur & movetur, non movetur immediatè per virtutem à potentia æstimatoria ipsi communicatam; sed per virtutem animæ: unde pes non est instrumentum physicum æstimatoriæ, sed animæ; nec instrumentaliter in ipso pede agit, cum anima in pede non utatur æstimatoria, sed pede: nam pes non potest esse instrumentum animæ in capite, licet anima sit in capite: ergo licet Deus sit omnibus rebus præsens, non potest uti sacramentis aut aliis instrumentis physicis, quin ipsum instrumentum sit præsens subjecto & existat.

*Resp. 2.* Gonet. argumentum esse verum de contactu virtutis & causalitatis, non autem de contactu suppositi & rei: quamvis (inquit) implicet contradictionem, quod instrumentum physicè influat in effectum causæ principalis, nisi causalitate & virtute à causa principali derivata, spiritualiter passum contingat: agere enim est virtute activa actu dare esse, & ipsa productio & actualis efficientia est virtualis & realis contactus, &c.

*Contra 1.* Hæc responsio non evacuat argumentum de existentia, cum non probet instrumentum physicum non debere necessario existere, ut agat, licet probet non debere per se  
sub.

subjectum attingere. Contra 2. Illa virtus sacramenti quæ attingeret subjectum, deberet esse instrumentum causæ principalis, nempe Dei; aliàs sacramentum nobiliori modo produceret gratiam, dum attingeret subjectum per suam virtutem, quàm dum attingeret illud per se, quod est falsum; sed non potest esse instrumentum Dei, quia Deus decrevit & instituit uti sacramento seu signo sensibili & visibili: ergo si necesse sit instrumentum physicum attingere subjectum, & virtus quæ invisibilis est, non sit electa in instrumentum seu in signum gratiæ, oportet quòd sacramentum attingat per se subjectum. *Deinde*, illa virtus per quam sacramentum attingeret subjectum, esset introducta in subjectum per ipsum sacramentum agens instrumentaliter, alioquin non esset virtus sacramenti: sed non potest produci, nec introduci in subjectum, quin sacramentum attingat illud, vel per se, vel per suam virtutem; non per suam virtutem, quia daretur virtus de virtute: ergo per se & immediatè: & consequenter de ratione instrumenti physici est, ut subjectum in quo debet recipi effectus, physicè contingat, ut in ipso recipiatur virtus instrumenti; sed sunt sacramenta quæ non contingunt subjectum in quo recipitur gratia, ut fatetur Gonet. in argumento de poenitentia: ergo non possunt introducere virtutem operativam in subjectum; ideoque non sunt instrumenta physica. *Denique*, id quod à sacramentis provenit & nobis communicatur, est gratia, quia instituta sunt ad productionem solius gratiæ (exceptis illis quæ imprimunt characterem) ergo in subjecto non potest recipi virtus sacramenti quæ sit instrumentaliter productiva gratiæ, & consequenter oportet, quòd physicè contingat subjectum.

Prob. 3. Hæc verba consecrationis, *Hoc est corpus meum*, vel saltem species consecra-

tæ panis & vini, quæ sunt sacramentum Eu-  
 charistiæ, non causant physicè instrumentali-  
 ter corpus Christi ibi, ut advertit Doctor in  
 4. dist. 1. quæst. 5. §. *contra istam opinionem*:  
 ergo cætera verba Sacramentalia non causant  
 physicè effectum quem significant, seu gra-  
 tiam quam recipimus. Consequentia patet, si  
 antecedens sit verum. Tum quia corpus Chri-  
 sti, seu gratia subsistens, est primus effectus  
 & primum significatum in Eucharistiæ Sacra-  
 mento, sicut gratia accidentalis aut augmentum  
 ejusdem, est in aliis Sacramentis. Tum quia  
 sacramentum Eucharistiæ non requirit appli-  
 cationem aut receptionem, ut sit perfectum  
 & completum, quia si à nemine susceperetur,  
 adhuc esset perfectum & completum Sacramen-  
 tum significans invisibile corpus Christi. Tum  
 quia hæc verba, *Hoc est corpus meum*, sunt  
 productiva & significativa alicujus rei invisibi-  
 lis, sicut ista, *Ego te baptizo*; subindeque si ista  
 physicè operentur, etiam illa; & si illa operentur  
 tantum moraliter, etiam ista. Prob. igitur an-  
 tecedens, nempe ista verba, *Hoc est corpus meum*,  
 non habere causalitatem physicam: Corpus  
 Christi non potest esse sub speciebus panis sine  
 transubstantiatione panis in corpus; sed sola vir-  
 tus infinita transubstantiat actione physica, ait  
 Doctor: ergo hæc verba, *Hoc est corpus meum*,  
 non producant instrumentaliter physicè id quod  
 significant; ideoque nec ista, *Ego te baptizo*.  
 Prob. antecedens: Transubstantiatio est actio  
 convertiva substantiæ panis in substantiam cor-  
 poris Christi: sed conversio unius substantiæ in  
 aliam, est actio arguens potentiam infinitam,  
 sicut creatio & annihilatio: ergo nulla creatura  
 potest ad illam physicè concurrere, sed tantum  
 moraliter.

Obj. 1. Gonetus ex verbis illis Christi Joan. 3.  
*Nisi quis renatus fuerit ex aqua & Spiritu san-*  
*cto, non potest introire in regnum Dei*: ut enim  
 ait

ait D. Thom. illis significatur, per Sacramenta novæ legis causari gratiam instrumentaliter, & per virtutem Spiritus sancti principaliter: ergo sicut Spiritus sanctus principaliter physicè causat gratiam, ita & Sacramenta novæ legis instrumentaliter physicè: instrumentum enim causæ physicæ principalis, etiam physicum esse debet, & physicè causare.

Confirm. ex variis loquendi modis quibus Scriptura utitur ad causalitatem nostrorum sacramentorum significandam: nam Joan. 3. dicuntur homines renasci ex aqua; ad Tit. 3. salvari per lavacrum regenerationis; ad Ephes. 5. mundari lavacro: sed hi modi loquendi, causalitatem physicam indicant: ergo, &c. Minor prob. Nam particula *Ex* communiter indicat causam physicam vel materialem, juxta quod dicitur annulus fieri ex auro, vel efficientem & instrumentalem, sicut animal dicitur gigni ex semine: constat autem homines renasci spiritualiter ex aqua baptismali, non tamquam ex causa materiali: ergo ut ex instrumentali physica, & tamquam ex spirituali semine. Idem indicant particula *Per*, & ablativus casus; eum enim in communi modo loquendi, causam physicam instrumentalem scriptionis volumus indicare, dicere solemus, quod hoc scriptum est calamo, vel per calamum: ergo similiter cum dicimur mundari lavacro, aut per lavacrum, convenientius id intelligitur ut per instrumentum physicum, quam ut per instrumentum solum morale.

Resp. 1. Conetum teneri etiam ad solutionem hujus argumenti: nam hic art. 3. §. 2. n. 75. ubi respondet ad istud argumentum, *Baptismus qui in puncto sue receptionis gratiam non confert, propter recipientis obicem sive fictionem, recedente postea fictione, eam confert, ut docent D. Aug. & D. Thomas; sed tunc eam non causat physicè, cum tunc non sit, sed transferit: & quod non est*

*physicè agere nequeat; ergo solum moraliter, & relictis variis Thomistarum solutionibus quas ipse adducit, ait n. 81. Verior tamen ac probabilior est solutio & doctrina aliorum Thomistarum asserentium Sacramenta quæ imprimunt characterem, recedente fictione, non causare gratiam physicè, sed solum moraliter. Undè cum argumentum Gonetii specialiter agat de Baptismo, militat contra ipsum; ergo ut salvetur responsio, dicendum est, quòd Scriptura intelligenda est de causalitate morali.*

Resp. 2. hæc omnia rectè explicari posse per causalitatem moralem: dicitur enim, *Christus lavit nos à peccatis nostris in sanguine suo: & postea Per mortem Christi salvi facti sumus*: vulgò dicitur aliquid effici litteris, præceptis, &c. quæ tamen constat morales tantum causas esse.

Resp. Gonet. n. 14. licèt hoc verum sit, quando constat de morali tantum causalitate sermonem esse, ut in his exemplis contingit, quia manifestum est ea non posse aliter intelligi; in re tamen adeò dubia, qualis est ea in qua versamur, de qua non apparet, quòd non possit nisi moraliter exponi, quis sibi persuadeat Spiritum sanctum ejusmodi voces quibus vim sacramentorum nostrorum significare voluit, semper minùs propriè, ac præter solitum usum, ad moralem dumtaxat & metaphoricam causalitatem significandam usurpasse, & tamen nusquam explicuisse se in illo sensu esse locutum?

Contra: nam hæc res de qua loquimur, non est dubia, licèt in Scriptura homines dicantur renasci & salvari per sacramenta; quia pluribus in locis, homines dicuntur etiam generari per Passionem & crucem Christi, tamen certum est, quòd crux est causa moralis. Apostolus dicit, *Per Evangelium ego vos genui*, quod non potest intelligi physicè, sed moraliter; ergo

idem

idem dicendum est de locis in argumento adductis. *Deinde*, si res dubia sit, ut fatetur Gonet. & evidenter constet de causalitate morali, quæ sufficiens est, ut concedit suprâ de Sacramento cum fictione recepto, frustra igitur recurrit ad causalitatem physicam quæ est difficilior intellectu, & maximas involvit difficultates solvendas. *Denique*, si non liceat nostram sequi sententiam, quia Spiritus sanctus non explicuit se locutum fuisse de causalitate morali, ut ait Gonet. neque licebit ipsi eadem ratione docere sententiam de causalitate physica, quia Spiritus sanctus in locis citatis non explicuit se in illo sensu locutum fuisse.

Obj. 2. ex Trident. quod sess. 7. can. 6. jubet sub anathematis pœna credere Sacramenta novæ legis continere gratiam quam significant, quod etiam asserit Florentinum in Decreto unionis; at hoc verificari nequit de continentia locali & materiali, quomodo aqua v. g. continetur in vase, medicina in pixide, vel pecunia in bursa: gratia enim cum sit qualitas spiritalis, non occupat locum, ut ait D. Bonavent. in 4. dist. 1. art. 1. quæst. 3. Non potest etiam hoc intelligi de continentia formali per inhaesionem, eo modo quo accidens dicitur contineri in subjecto cui inest; gratia enim cum sit accidens spirituale, completum & permanens, non inhæret Sacramentis quæ sunt res corporeæ; sed residet in essentia animæ quæ spiritalis est: ergo necessario hoc debet intelligi de continentia virtuali, quæ propria est causæ efficientis principalis, vel instrumentalis, quo pacto illuminatio & calefactio in sole & igne continentur, & planta in semine, & effectus artis in instrumento artificis. Ex quo facile intelliges (inquit) quo sensu Sacramenta novæ legis à SS. Patribus & Theologis *vasa gratiæ* interdum appellantur, quia scilicet eam virtualiter



liter continent, ut ejus causæ instrumentales; sicut arma vocantur in Scriptura, *Vasa interfectoris*, *Vasa mortis*; & instrumenta musicæ, *Vasacantici*, eo quòd prædictos effectus, velut causæ instrumentales, virtualiter continent.

Resp. Concilia loqui contra illos qui negant gratiam dari per Sacramenta, non verò contra modum: unde cum causalitas aut continentia moralis, salvet quòd dicunt Concilia & Patres de causalitate sacramentorum, nostra conclusio non pugnat contra Concilia. Quòd verum esse sic evinco: Concilia, Patres & sacra Scriptura dicunt, quòd Sacramenta causant simpliciter gratiam: sed hoc salvatur per moralem causalitatem, quia quòd aliquem effectum moraliter causat, etiam si in illum physicè non influat, dicitur nihilominus causare illum simpliciter; aliis causa finalis & causa exemplaris, quæ non influunt physicè in effectum, ut dicunt omnes, non essent causæ simpliciter, quòd est contra philosophum; Meritum dicitur causa augmenti gratiæ; quin causet illud physicè: ergo causalitas moralis salvat continentiam & causalitatem sacramentorum respectu gratiæ, in sensu Conciliorum, Scripturæ & Patrum: hinc est, quòd brevitatis gratia omittendæ sunt plures Authoritates Patrum, quibus Gonetus probat Sacramentum causare gratiam physicè; cum omnes habeant eundem sensum, & sint præcisè de causalitate, non autem de modo: nam dum loquuntur de sacramentis respectu gratiæ, sicut de instrumentis physicis, scilicet ut de aqua respectu piscium, de semine respectu hominis, de igne respectu calefactionis aquæ, & de aliis similibus quæ causalitatem physicam habent, non intendunt insinuare sacramenta se habere respectu productionis gra-

gratiæ, sicut illa instrumenta physica se habent respectu productionis eorum effectuum, id est, causare physicè; sed tantum veritatem effectus ex parte sacramentorum, id est, intendunt probare, quod sacramenta producant infalibiliter & necessariò gratiam sicut ignis emittit calorem in aquam; ac si dixissent, quod Sacramenta producant gratiam inevitabiliter in subiecto disposito, sicut ignis producit calorem, prout *Ly sicut* non denotat modum producendi, sed effectum productum ex parte causæ producentis. Omitto etiam Authoritates D. Thomæ in §. 4. positas, quibus Gonetus probat mentem Doctoris Angelici. Et adduco rationes positas in §. 5. quarum prima est hæc quæ sequitur.

Obj. 3. Opinio illa quæ Sacramentis novæ legis causalitatem solum, moralem attribuit, non sufficienter salvat dignitatem illorum supra sacramenta veteris legis, nec nobiliorem causandi modum in illis, quàm in istis agnoscit: constat enim moralem causalitatem non defuisse Sacramentis antiquis, cum enim essent signa Passionis Christi futuræ, cujus intuitu Deus in antiqua lege gratiam conferebat, vim quandam moralem excitandi Deum habebant, ad conferendam gratiam, ob merita Christi futura; unde si Sacramentis novæ legis nulla alia virtus tribuatur, quàm vis illa moralis & excitativa, manifestum est ea non elevari supra sacramenta vetera, nec ab illis disterre quantum ad modum operandi, sed tantum ex parte rei causatæ, majoris scilicet & abundantioris gratiæ, quam causant Sacramenta novæ legis, quatenus significant Passionem Christi præteritam, quam Sacramenta vetera repræsentabant solum ut futuram; quod docet D. Thomas.

Confirm. Sacramenta novæ legis differunt à Sacramentis legis Mosaicæ , eaque superant in hoc , quòd Sacramenta vetera erant tantùm signa gratiæ , nova autem sunt non solùm signa , sed etiam causæ illius ; sed hoc intelligi nequit de sola causalitate morali : ergo in Sacramentis novæ legis præter causalitatem moralem , realis & physica admittenda est . Minor prob. Causalitas moralis , si quæ in sacramentis novæ legis intervenit , non excedit rationem signi : ergo quando Sacramenta nostra per hoc dicuntur differre ab antiquis , quòd ista sunt tantùm signa gratiæ , illa verò simul causæ & signa , hoc de causalitate solùm morali intelligi nequit . Consequentia patet : Antecedens prob. Sacramentis nostris non potest competere causalitas moralis , ratione alicujus actus moralis , quem ipsa exerceant & eliciant ; sicut meritum aut satisfactio , vel redemptio , sunt actus moralis causalitatis : ergo illis solùm potest competere causalitas moralis secundùm aliquid relictum ab actibus moralibus , ut contineant eorum valorem & efficaciam in effectum ; hæc autem continere nequeunt , nisi significando & repræsentando talem efficaciam & valorem ; sicut chyrographum repræsentat obligationem debitoris , & denarius plumbeus est signum voluntatis regiæ dandi tale officium , vel dignitatem : ergo omnis causalitas moralis communicata Sacramentis , solùm potest esse per modum signi significantis efficaciam actuum meritoriorum & moralium Christi . Et hujus ratio est , quia non est causalitas moralis in istis inanimatis , nisi in quantum movent voluntatem aliquam , ut ipsis positis conferat effectum , quæ motio fieri ab eis non potest , nisi ut à signo .

Confirm. ampliùs : Chyrographum est tantum

tum causa moralis largitionis pecuniæ , in quantum excitat memoriam hominis , ut recordetur se debere , & vincatur , si neget ; sed non excitatur ejus memoria , nec vincitur per chyrographum , nisi quia illud est signum voluntatis & consensus prioris exhibiti ; unde si adessent alia signa quibus probaret non consensisse , rescinderetur contractus , & nulla foret obligatio : ergo causalitas moralis non transcendit rationem signi ; subindeque si Sacramenta novæ legis causent tantum moraliter gratiam , & sint tantum veluti chyrographa promissionem Dei de largienda gratia , earitè suscipientibus significantia , non erunt veræ causæ gratiæ , sed tantum signa illius ; subindeque à sacramentis veteris legis non different.

Resp. negando suppositum , nempe causalitatem moralem sacramentorum non salvare sufficienter illorum dignitatem super sacramenta veteris legis . Tum quia Sacramenta novæ legis gratiam moraliter continent : Christus enim instituens illa , merita sua alligavit ipsis , & Deus cum Christo pactum iniit de tribuenda gratia iis omnibus quibus ipsius merita per susceptionem Sacramenti applicarentur : At Sacramenta veteris legis non continebant propriè moraliter merita Christi , aut pretium gratiæ : ergo Sacramenta legis novæ sunt nobiliora . Tum quia Sacramenta novæ legis causant gratiam moraliter ex opere operato , & antiqua ex opere operantis : ergo nostra sunt nobiliora , seclusa etiam causalitate physica .

Ad 1. confirm. nego minorem , quia causalitas moralis est vera causalitas , ut patet in Philosophia , quæ inter causas veras & reales ponit moralem . Ad cujus prob. nego antecedens , quia signum nullo modo est causa significativa.

ficati, sed potius econtra, ut patet de igne, qui est causa signi, nempe fumi; at Sacramenta novæ legis non solum sunt signa gratiæ, sed etiam causæ, quemadmodum merita non sunt tantum signa gloriæ, sed etiam causa. Ratio hujus rei est, quia pura signa nullo pacto movent voluntatem causæ principalis; at sacramenta movent infallibiliter voluntatem Dei ad productionem & collationem gratiæ, sicut merita movent ad collationem augmenti gratiæ & gloriæ: ergo excedunt rationem signi. Ad prob. nego antecedens, quia causalitas moralis competit sacramentis, quatenus sunt verba & operationes Christi, quæ movent Dei voluntatem ob intrinsecam bonitatem moralem: ergo non est solum per modum signi, sed per modum causæ.

Ad 2. confirm. dico maximum esse discrimen inter sacramenta & chyrographum. Tum quia Sacramenta sunt signa practica rei, seu gratiæ quam significant; at chyrographum & denarius plumbeus, sunt signa merè speculativa; & consequenter non efficiunt id quod significant, sicut sacramenta. Tum quia denarius plumbeus, chyrographus &c. non sunt causa solutionis, nec debiti, nec faciunt, ut rex debeat, sed tantum ut constet de debito: nam debitum & obligatio ad solvendum, præcedunt chyrographum. Unde chyrographus & denarius plumbeus sunt signa solum repræsentativa debiti, & ad recordationem aut manifestationem ejusdem dumtaxat, instituta; at Sacramenta nostra non sunt mera signa gratiæ, sed causæ, quæ Deum movent ad productionem ejusdem, sicut mors Christi movet Deum ad remissionem peccati generis humani, & preces ipsius ad operanda miracula, cum omnia novæ legis sacramenta fiant nomi-

mine Christi, qui per talem ministrum operatur, & illis rebus & vocibus utitur ad loquendum cum Deo, ad producendum effectum sacramentalem: ergo Sacramenta non sunt sicut denarius plumbeus, chyrographus &c. licet moraliter dumtaxat gratiam causent. Tum quia bonitas moralis alicujus operis à rege accepti, & chyrographus ejusdem regis, quo receptio operis firmatur, non se habent eodem modo respectu solutionis debiti: nam bonitas operis movet ut causa ad solvendum, & chyrographus non movet ad solvendum, sed est tantum signum receptionis operis, & recordationis debiti; at sacramenta sunt signa quæ ob bonitatem moralem movent Deum ad producendam gratiam: ergo non sunt tantum signa gratiæ communicatæ, sed sunt causa; subindeque non sunt sicut denarius plumbeus &c. Omitto secundam rationem qua Gonetius probat ex causalitate physica instrumentorum divinæ justitiæ, ignis scilicet inferni, quia constat ex dictis in 2. tomo ignem infernalem non torquere dæmones actione physica.

Obj. 3. Sacramentum Pœnitentiæ physice producit gratiam: ergo & alia Sacramenta novæ legis. Consequentia patet ex paritate rationis. Antecedens prob. primò: Eo modo producit gratiam Sacramentum Pœnitentiæ, quo Sacerdos pœnitentem absolvens; sed hic physice producit gratiam: ergo. Minor prob. Tum quia ad veritatem horum verborum: *Ego absolvo te*, necessarium est, ut Sacerdos verè & realiter peccata remittat; sed hoc non potest nisi verè & realiter producendo gratiam, atque adeò physice, cum causa physica & realis sit illa quæ verè & realiter influit in effectum, & efficientia moralis, sit impropria tantum & metaphorica causalitas. Tum etiam quia non apparet, quo  
modo

modo Sacerdos verè sententiam proferat, si moraliter tantùm peccata remittat: sicut enim qui chyrographum exhibet, quo oblato debitum solvitur, non dicitur solvere tale debitum; ita si Sacerdos administrando Sacramentum Pœnitentiæ, habeat tantùm offerre Deo Sacramentum, veluti chyrographum, quo oblato & applicato, Deus conferat gratiam, non poterit dici Sacerdos causare gratiam remissivam peccati.

Confirm. Sacramentum Pœnitentiæ se habet per modum judicii, & in eo Sacerdos gerit vices judicis, & pœnitens vices rei; sed judex in humanis, non excitat alium ad absolvendum reum, nec impetrat ejus absolutionem, sed propria autoritate à principe sibi commissam eum absolvit: ergo & Sacerdos in tribunali pœnitentiæ, verba illa, *Ego absolvo te*, proferens, non solùm excitat moraliter Deum ad illi tribuendam gratiam à vinculis peccatorum solventem, nec solùm à Deo impetrat ejus absolutionem, sed autoritate Christi sibi commissam, verè instrumentaliter eum absolvit, & gratiam remissivam peccati, ut divinæ virtutis instrumentum, physicè ei confert, & producit in anima ejus.

Resp. 1. negando consequentiam: Nam ex Goneto, ut patet suprà, Baptismus cum fictione receptus, causat moraliter gratiam recedente fictione; cætera verò physicè: ergo non implicat, quòd Sacramentum Pœnitentiæ causet eam physicè, cætera verò moraliter.

Resp. 2. negando antecedens: Ad prob. concessa majori, nego minorem: Ad prob. dico quòd ut Sacerdos propriè & realiter absolvat & sit judex, non requiritur, quòd producat physicè gratiam, sed sufficit, quòd habeat auctoritatem judicandi & proferendæ sententiam, qua posita communicet gratiam, & absolvat reum à peccatis, sive physicè, sive moraliter; quia

quia Deus est qui per Sacerdotem moraliter absolvenrem, physicè absolvit reum: ergo sicuti causa moralis, est causa vera & realis, licèt physicè non influat in effectum, ut patet de causa finali; ita iudex moraliter absolvens, & physicè proferens sententiam, est verè & realitèr iudex, & Sacramentum Pœnitentiæ est verum & proprium iudicium, cùm reus sit propriè & physicè absolutus per gratiam remissivam peccati, productam physicè à Deo, & moraliter à Sacramento. Ex his infertur solutio confirmationis. Omitto quartam rationem qua probat Gonet. Sacramenta causare physicè gratiam, ex causalitate physica humanitatis Christi ad productionem gratiæ, quia constat ex dictis in 3. tom. humanitatem Christi esse causam moralem.

Obj. ultimò: Admittendus est in Sacramentis novæ legis, modus producendi gratiam instrumentaliter physicè, si ille sit possibilis, & si non repugnet aliquod corporeum, quale est sacramentum, ad productionem rei spiritualis, qualis est gratia sanctificans, elevari: sed in hoc nulla est implicantia: ergo. Major patet: Minor verò in qua est difficultas, prob. 1. ratione quam innuit S. Doctor: Deus cùm sit rerum omnium Dominus, & ejus actio se extendat ad totam naturam entis creabilis, eique ad nutum omnia obediant, quamlibet creaturam potest assumere ut instrumentum physicum ad producendum quidquid est in potentia, saltem obedientiali alterius creaturæ; sed gratia sanctificans continetur in potentia obedientiali anime, cùm ex ea educatur: ergo potest Deus elevare quamlibet creaturam, etiam corpoream, ad producendam instrumentaliter physicè gratiam sanctificantem in anima. 2. eadem minor suadet: Intellectus agens elevat phantasina corporeum, ut instrumentaliter causet species intelligibiles spirituales in intellectu residentes: ergo



ergo à fortiori Deus qui est agens infinitæ virtutis, potest elevare aquam, & voces sensibiles & corporeas, ut physicè gratiam spirituales & supernaturalem causent instrumentaliter in anima. Omitto tertiam probationem minoris desumptam ex causalitate ignis inferni, quæ cum, ut ex dictis in 2. tom. constat, non sit physica, non est hic brevitatibus gratia adducenda.

Resp. negando minorem. Tum quia causalitas physica gratiæ impossibilis est repugnans creaturæ, ut patet ex fundamentis nostræ conclusionis. Tum quia non decet dare sacramentis plusquàm ex institutione Dei obtinuerunt. Tum quia causalitas physica non magis extollit sacramentorum dignitatem, nec meliùs explicat SS. Patrum mentem. Tum quia corporeum non potest elevari ad productionem rei spiritualis. Ad 1. prob. nego majorem. Tum quia ex Gonetom. 1. Deus non potest elevare intellectum, qui intellectivus est, ad visionem Dei sine lumine gloriæ; nec oculum corporeum ad videndum Deum, qui spiritualis est. Tum quia falsum est dari in omnibus creaturis potentiam obedientialem activam aut passivam ad quodlibet producendum, aut recipiendum, ut dictum est in 1. tom. tract. de visione disput. 3. quæst. 2. Tum quia si probatio valeret, probaret utique Angelum posse recipere albedinem, corpus posse producere spiritum, & naturale supernaturale, quod est falsum. Tum quia gratia non educitur de potentia obedientiali animæ, ut probatum manet in 3. tom. tract. de gratia disp. 4. quæst. 2. Ad 2. prob. nego antecedens, quia nulla potentia potest producere aliquem actum, nisi ad illum habeat virtutem inchoatam, quod dici non potest de Sacramentis respectu gratiæ, quia corporea sunt, & gratia spiritualis est. Omitto quæstionem in qua Gonetus quærit,

*An Sacramenta novæ legis, Christi & Dei mortalia instrumenta ad causandam gratiam, dici possint? cum constet ex dictis.*

---

### Q U Æ S T I O III.

*Quam gratiam causent Sacramenta novæ legis, an primam, vel secundam?*

**S**uppono tamquam certum 1. Theologos per primam gratiam intelligere illam gratiam habitualement, quæ expellit & delet peccatum, & quæ advenit homini in peccato mortali existenti. Per secundam verò intelligere illam gratiam, quæ nullum peccatum mortale expellit, quia advenit subjecto jam grato, quam plures appellant augmentum gratiæ habitualis. 2. Sacramenta novæ legis dividi in Sacramenta mortuorum, & sacramenta vivorum. Sacramenta mortuorum sunt, Baptismus & Pœnitentia, quia sunt Sacramenta, quæ Christus pro mortuis, seu in peccato mortali existentibus instituit. Cætera verò dicuntur Sacramenta vivorum, quia Christus ea instituit pro viventibus vita spirituali animæ, quæ est vita gratiæ: Baptismus enim & Pœnitentia dantur peccatoribus, alia verò non dantur nisi confessis & corde contritis, seu justis. 3. Tandem suppono tamquam certum, primam aut secundam gratiam dupliciter produci posse, per se scilicet & per accidens: Illa Sacramenta dicuntur per se causare gratiam, quæ sunt instituta à Christo ad conferendam talem gratiam: Ea dicuntur causare illam per accidens, dum causant [gratiam,

tiam , ad quam conferendam non sunt instituta .

Dico 1. non omnia Sacramenta novæ legis causare per se primam gratiam . Prob. 1. Sacramenta novæ legis causant gratiam habitualement, quatenus sunt instituta ad causandam gratiam, & causant solum illam propter quam sunt instituta; sed non omnia sunt instituta ad causandam primam gratiam: ergo non omnia causant illam per se . Prob. minor: Christus instituit Baptismum ad delendum peccatum originale & actuale dum est cum originali , pœnitentiam ad delendum peccatum actuale; alia verò Sacramenta instituit ad perficiendam, corroborandam & reficiendam animam: sed institui ad delendum peccatum, est institui ad causandam per se primam gratiam, ut patet ex notabili: ergo non omnia sunt instituta ad causandam primam gratiam . 2. Sacramenta mortuorum distinguuntur à Sacramentis vivorum; sed distinguuntur quia per se causant primam gratiam, quam Sacramenta vivorum per se supponunt: ergo . 3. Peccator ut talis nequit dignè suscipere Eucharistiam, sicut potest dignè suscipere absolutionem: ergo Sacramentum Eucharistiæ non causat per se primam gratiam, seu remissivam peccati, sicut Sacramentum Pœnitentiæ .

*Dices* 1. cum Luthero: Omnia Sacramenta sunt ejusdem rationis, & omnia instituta sunt propter peccatum: ergo omnia causant eandem gratiam. 2. Quodlibet Sacramentum est causa gratiæ: ergo omnia Sacramenta causant gratiam eodem modo, cum gratia habitualis sit ejusdem speciei. Resp. ad 1. distinguendo antecedens: Omnia Sacramenta sunt ejusdem rationis quoad effectum & causalitatem in ordine ad causam principalem, concedo; Quoad prærequisita ut causent, nego antecedens: Unde cum ut Sacramenta vivorum causent gratiam,

exi-

exigant in suscipiente vitam seu gratiam, quam Sacramenta mortuorum non exigunt; sequitur, quod non omnia causant per se primam gratiam, licet omnia sint ejusdem rationis, & opponantur peccatis. Ad 2. distinguo consequentiam; Causant eodem modo in ordine ad Deum, qui est causa principalis, concedo; omnia enim Sacramenta causant moraliter: In ordine ad effectum, nego; quia ut dixi, Sacramenta vivorum causant per se secundam gratiam moraliter, & Sacramenta mortuorum causant per se primam gratiam.

Dico 2. Sacramenta vivorum per accidens interdum causare primam gratiam. Ita Doctor in 4. dist. 9. quæst. unica §. *de secundo dico* in fine, ubi habetur: *Dicitur, quod diligenti inquisitione facta secundum possibilitatem nostræ fragilitatis, & præmissa confessione, quantum videtur hominis sufficere, si tunc communicet, non peccat; imò si qua alia peccata lateant, per istud Sacramentum etiam remittuntur: ergo ex Doctore, Eucharistia quæ est sacramentum vivorum, remittit peccata (quod idem est ac conferre primam gratiam) sed non remittit illa per se, ut constat: ergo per accidens, vel nullo modo remittere potest, quod est contra Scotum & Trident. sess. 13. can. 5. ubi habetur: *Si quis dixerit vel præcipuum effectum Eucharistiæ esse remissionem peccatorum, vel ex ea non alius effectus provenire, anathema sit; quibus verbis Conc. indicat remissionem peccatorum esse effectum Eucharistiæ, aliàs non diceret Præcipuum, si nullatenus esset in numero effectuum; sed non remittit peccata per se: ergo per accidens.**

Prob. Potest quis dignè & fructuosè recipere sacramenta vivorum, etiam si habeat aliquod peccatum mortale: ergo Sacramenta vivorum possunt per accidens delere peccata mortalia,

seu conferre primam gratiam . Consequen-  
tia patet, quoniam Sacramenta vivorum non  
suscipiuntur fructuosè , dum suscipiens est  
in peccato mortali . Prob. antecedens : nam  
qui factis omnibus diligentis , putans se  
esse justificatum , oblitus tamen invincibili-  
ter alicujus peccati mortalis de quo nul-  
lum habuisset dolorem, sive perfectum, sive  
imperfectum , ut contingere potest Sacerdo-  
tibus qui non semper confitentur , dum Mis-  
sam celebrare volunt , nisi conscii sint pec-  
cati mortalis; accederet bona fide ad Sacra-  
mentum Eucharistiæ , non teneretur ille ,  
supposito examine , confiteri nec elicere  
actum contritionis, nec attritionis, cum nul-  
lius materiæ conscius esset ; sed ille tunc di-  
gnè reciperet Sacramentum . Tum quia patet  
ex Doctore suprâ citato . Tum quia ille non  
ponit obicem , facit enim non solum id  
quod ex ipso exigit Apost. 1. Cor. cap. 11,  
dicens , *Probet autem seipsum homo* , sed  
etiam quod potuit . Tum quia ponere obi-  
cem , idem est ac nolle remove impedimen-  
tum, quod in isto casu dici nequit : ergo  
reciperet gratiam quæ est fructus hujus Sa-  
cramenti , sed non reciperet secundam , quia  
non habebat gratiam, nec erat vivens : nam  
peccatum cujus erat oblitus , factis omnibus  
diligentis , non fuit remissum per Sacramen-  
tum, nec per attritionem, nec per contritio-  
nem, ut suppono, nec per oblivionem, ut est  
manifestum : ergo fuit remissum per Sacramen-  
tum Eucharistiæ, subindeque causat per acci-  
dens primam gratiam .

Confirm. Ecclesia dat Sacramentum Extre-  
mæ Unctionis agonizantibus non confessis, nec  
communicatis : ergo credendum est Ecclesiam  
ordinasse, ut hoc Sacramentum tunc illis subve-  
niat, & per accidens primam gratiam confe-  
rat ; & hoc credunt Fideles , cum adeò solli-  
citi

citi sint non discedere sine Extrema Unctione, licet non sit Sacramentum tantæ necessitatis, sicut Baptismus & Pœnitentia, quoniam si certò non deleteret peccatum mortale, ad quid illud administraret Ecclesia agonizantibus non confessis? ergo Sacramenta vivorum causant per accidens primam gratiam, ut suadent hæc verba Jacobi 5. *Et si in peccatis sit, remittentur ei.*

Prob. 2. Si Sacramenta vivorum non possent per accidens causare primam gratiam, maximè, quia Deus ea instituit ad causandam secundam, & Sacramenta mortuorum ad causandam primam; sed hæc ratio non obstat: ergo. Prob. minor: Non minùs ordinata sunt Sacramenta mortuorum ad causandam primam gratiam, quàm sacramenta vivorum ad causandam secundam: sed hoc non obstante, sacramenta mortuorum per accidens causant secundam gratiam, ut patet in illo qui peccata venialia vel mortalia jam remissa dumtaxat confitetur: ergo sacramenta vivorum possunt causare primam per accidens.

Prob. 3. Causalitas primæ gratiæ in Sacramentis vivorum spectat ad ipsorum excellentiam & dignitatem, saltem dum suscipientes bona fide accedunt, nullumque obicem ponunt: ergo asserendum est, quod Sacramenta vivorum possunt per accidens, in aliquo casu causare primam gratiam. Consequentia patet: Antecedens prob. 1. Sacramenta novæ legis sunt instrumenta moralia gratiæ: ut dictum est cum omnibus Scottis, id est, sunt instrumenta quibus debite positis, Deus confert gratiam, & in hoc consistit Sacramentorum excellentia & finis: ergo si Sacramenta vivorum haberent virtutem causandi gratiam primam, saltem per accidens & in aliquo casu, essent excellentiora.

2. Si Sacramenta vivorum non possent causare nisi secundam gratiam, sequeretur, quòd Sacramenta mortuorum essent excellentiora, quia causant per se primam gratiam, & per accidens secundam: ergo ad sacramentorum vivorum excellentiam spectat, causare per accidens primam gratiam.

3. Magis extollit misericordiam Dei, & firmat spem fidelium: certi enim sunt, quòd modò faciant quod possunt, gratiam recipient & peccatorum remissionem consequentur: ergo &c.

*Dices* 1. Ex nullo sacræ Scripturæ, aut Patrum, aut Conciliorum loco constat, Sacramenta vivorum causare primam gratiam: ergo non est asserendum; quia de his quæ à divina voluntate pendent, juxta Scripturas loquendum est. Resp. negando antecedens, constat enim ex Scriptura Jac. 5. suprâ, ex Trident. suprâ citato; & constat adhuc ex D. Aug. serm. 28. de verbis Domini dicente: *Qui vulnus habet, medicinam requirit; vulnus est, quia sub peccato sumus; medicina est, cæleste & venerabile Sacramentum*, scilicet Sacramentum Eucharistiæ, quod venerabile dicitur. D. Ambr. lib. de benedict. Patriarch. cap. 9. ait: *Panis hic remissio peccatorum*; quod si nequeat intelligi de per se, saltem de per accidens intelligi debet. Unde dum Scriptura, Patres & Concilia asserunt sacramenta vivorum primam gratiam causare non posse, loquuntur regulariter, & juxta ordinariam sacramentorum causalitatem, non verò de omni modo causandi, nimirum tam per se, quàm per accidens.

*Instabis*: Sacramentum Eucharistiæ institutum fuit à Christo per modum cibi & potus: ergo sicut cibus corporeus nequit nutrire nec resuscitare mortuos, ita neque cibus  
spi-

spiritualis, qualis est Eucharistia, poterit causare gratiam resurrectionis, sed tantum augmentum vitæ spiritualis, nimirum gratiæ. Resp. negando consequentiam & paritatem, quia cibus corporeus non habet vitam in semetipso, nec est formaliter principium vitæ; ideòque non potest tribuere vitam, nisi quatenus per actionem viventis convertitur in substantiam aliti; at Eucharistia est, cibus habens vitam in semetipso, & est principium vitæ, *Ego* (inquit Christus) *sum panis vivus*; & quemadmodum homo, dum panem manducat, convertit panem in suam substantiam per actionem viventis, ita Christus in Eucharistia hominem in se, ut inquit August. *Crede, & manducabis me, & non me converteres in te, sed te converteres in me*: ergo non implicat, quòd cibus spiritualis det vitam mortuis.

*Dices* 2. Sacramenta mortuorum distinguuntur à sacramentis vivorum, quia illa causant primam gratiam, ista verò secundam: ergo ut salvetur distinctio, asserendum est sacramenta vivorum non posse causare primam gratiam. Resp. Sacramenta mortuorum non distingui à sacramentis vivorum, præcisè quia causant primam gratiam, sed quia causant illam per se & ex vi institutionis; unde cum sacramenta vivorum causent illam solum per accidens, & numquam per se, salvatur distinctio. *Deinde*, ex adversariis, Sacramenta mortuorum causant secundam gratiam per accidens, quin sint Sacramenta vivorum: ergo sacramenta vivorum possunt per accidens causare primam gratiam, quin sint sacramenta mortuorum. *Instabis*: ergo sacramenta causare possunt præter intentionem Christi, quod falsum est. Resp. negando instantiam. Tum quia licet prima intentio Christi sit de gratiæ augmento, secundaria tamen est de pri-



ma gratia ; aliàs Sacramenta mortuorum numquam causarent augmentum gratiæ , quod est contra fidem Ecclesiæ . Tum quia dum dicimus Sacramentis vivorum competere per accidens productionem primæ gratiæ , per *Ly per accidens* non intelligimus: *fortuito & absque consilio* , nec independenter à divina voluntate ; sed tantum , quod non competit illis ex vi primariæ institutionis : ergo dum causant primam gratiam , non causant illam præter intentionem Dei .

*Dices* 3. Sacramenta novæ legis nullam effectum causant, dum ponitur obex , ut docet Trident. sed dum in subjecto non præcedit prima gratia , datur obex , cum detur peccatum : ergo Sacramenta vivorum nullam gratiam causant , dum in subjecto non præcedit prima . Resp. negando minorem , quia per obicem , Concilium non intelligit peccatum non remissum præcisè ; sed peccatum volitum seu cognitum , & positivè non retractatum : ergo dum homo putat se justificatum esse & absque ullo peccato , factis omnibus diligentis ad examen & cognitionem peccati necessariis ; licet peccatum aliquod habeat , nullum obicem ponit ; ideoque primam gratiam recipit per Sacramentum Eucharistiæ .

## Q U A E S T I O IV.

*Quid addat gratia Sacramentalis supra gratiam habitualem?*

**S**uppono Sacramenta aliquam gratiam addere à gratia habituali distinctam. Tum quia gratia habitualis ex se non est Sacramentalis, cum ille qui extra Sacramentum justificatur, habeat gratiam habitualement absque Sacramentali. Tum quia sacramenta, cum sint diversa, diversas gratias causant: ergo gratia sacramentalis non est ipsamet gratia habitualis quæ est ejusdem speciei in omnibus: unde hic examinandum est illud superadditum. D. Bonavent. & alii existimant gratiam Sacramentalem nihil addere supra gratiam habitualement, nisi connotationem extrinsecam, aut respectum ad Sacramentum tamquam ad causam. Paludanus & alii docent gratiam Sacramentalem esse habitum particularem à gratia habituali distinctum.

Dico igitur, quod gratia Sacramentalis addit supra gratiam habitualement jus ad specialia auxilia, ad actiones Sacramentales exercendas necessaria. Prob. 1. Gratia Sacramentalis non addit supra gratiam habitualement, quam sacramentum causat, solum respectum ad ipsum sacramentum tamquam ad causam, nec habitum realiter distinctum: ergo addit tantum jus ad specialia auxilia ad actiones Sacramentales exercendas necessaria. Prob. antecedens quoad 1. partem: Sacramenta vivorum non distinguuntur in ratione causæ, comparative ad effectum, puta ad gratiam habitualement, cum quodlibet eorum causet moraliter secundam gratiam, & omnia dicant eundem spe-

cificè respectum ad sacramenta ; sed gratiæ sacramentales distinguuntur ad distinctionem sacramentorum . quatenus sunt signa : ergo gratia sacramentalis non est tantum respectus ad sacramentum tamquam ad causam . Prob. 2. pars : Nulla est necessitas admittendi alium habitum à gratia sanctificante distinctum , ut est evidens : ergo &c.

Prob. 2. Per Sacramentum Baptismi , homo præter gratiam habitualement, peccati originalis remissivam , recipit jus quoddam ad auxilia , ad dignè alia sacramenta suscipienda , necessaria . Per Confirmationem præter augmentum gratiæ sanctificantis , recipit jus ad specialia auxilia ad fidem constanter profitendam necessaria ; *Per Confirmationem* , ait D. Bernard. serm. de Cœna Domini , *datur robur ad resistendum temptationibus infidelitatis* , & sic de cæteris : ergo sacramenta præter gratiam habitualement , producunt jus aut congruam exigentiam ad auxilia specialia ad actiones sacramentales exercendas necessaria .

*Dices* 1. Baptismus nullum effectum habet præter gratiam sanctificantem & characterem : ergo gratia Sacramentalis nihil aliud addit supra gratiam habitualement , quam respectum ad Sacramentum tamquam ad causam . Respond. negando antecedens , quia gratia sanctificans , quamvis sit jus ad gloriam ex se , non est tamen jus ad auxilia specialia ad suscipienda alia Sacramenta necessaria , hoc enim advenit illi per sacramentum Baptismi .

*Dices* 2. Gratia Sacramentalis sanctificat : ergo nihil aliud est , quam gratia sanctificans seu habitualis . Resp. distinguendo antecedens : gratia sacramentalis sanctificat concomitanter & denominativè , concedo ; formaliter , nego : Hoc etenim spectat ad gratiam habitualement ,  
quæ

quæ per sacramentum confertur simul cum gratia sacramentali.

*Dices* 3. Omne auxilium divinum datur gratis, quia ponitur in genere gratiæ; ac proinde nullum potest dari jus ad auxilia Dei specialia, & consequenter gratia sacramentalis non potest esse jus additum gratiæ habituali ad specialia auxilia ad actiones sacramentales exercendas necessaria.

*Respondeo* negando consequentiam: nam gratia habitualis est gratis data, nihilominus includit jus ad gloriam, seclusis propriis operibus, reverà non tamquam ad præmium, sed tamquam ad hæreditatem: ergo gratia sacramentalis potest esse jus ad auxilia specialia non immediatè ordinata ad gratiam, aut gloriam, sed ad exercendas actiones sacramentales, ut congruit illi qui sacramentum dignè suscepit. Nec implicat, quòd quis recipiat gratis, seu sine jure aliquod munus, & quòd eo recepto habeat jus ad auxilia necessaria ad exercendas actiones ad quas munus obligat illum; munus enim potest dari gratis, & ea quæ exigit, ut exerceatur, possunt dari necessario.

*Quæres*, an gratiæ Sacramentales dari possint extra sacramenta? *Respondeo* negativè, quippe cum gratia Sacramentalis addat suprà gratiam habitualement jus ad specialia auxilia ad actiones sacramentales exercendas necessaria v. g. Gratia Sacramentalis Baptismi, jus ad auxilia ad dignè recipienda alia Sacramenta; certum enim est, quòd non baptizatus (& sic de cæteris) non potest habere tale jus, quia non potest recipere alia sacramenta, quin sit baptizatus: nam jus datur propter auxilia necessaria, auxilia dantur propter actiones exercendas, & actiones sacramentales sunt exercendæ propter sacramentum receptum. *Deinde*, gratia sacramentalis quatenus est jus ad auxilia specialia de quibus agitur, fundatur in

gratia quatenus est effectus Sacramenti in re, vel in voto: ergo dari non potest independenter à sacramentis.

*Dices*: Actuale auxilium gratiæ non exigit statum gratiæ sanctificantis, ut certissimum est apud omnes Theologos; alioquin peccatores non haberent illud, quod est falsum: ergo &c. *Respondet* negando consequentiam; quia auxilium de quo agit antecedens, est in ordine ad gratiam sanctificantem obtinendam immediatè, & dubium est de auxilio necessario ad exercendas actiones Sacramentales, quæ cum non obligent nisi eos, qui gratiam receperunt cum Sacramentis, hi solum habere possunt hujusmodi jus.

Hinc est, quod qui gratiam habituales non recepit cum Sacramento Matrimonii, verbi gratia, non acquisivit jus ad auxilia specialia, quæ sanctos conjuges juvant ad sustinenda onera matrimonii, ut notat etiam noster Frassenius. Nec inde tamen sequitur Deum non dare illi tale auxilium, dum petit illud; sed dat illud ex mera liberalitate & misericordia, sicut dat peccatoribus gratiam actualem, ut agant poenitentiam; non verò ex aliquo jure seu debito acquisito, quale est illud quod acquiritur in susceptione sacramentorum.



## DISPUTATIO IV.

*De charactere Sacramentali.*

**V**iso principali & primario Sacramento-  
rum effectu, qui est habitus gratiæ san-  
ctificantis; modò examinandus est alter, puta  
character.

## QUÆSTIO I.

*An & quæ Sacramenta novæ legis  
imprimant characterem?*

**C**haracter varias significationes patitur.  
Apud Græcos importat figuram, ut pater  
ex illo ad Hebr. 1. ubi habetur: *Figura sub-*  
*stantiæ ejus*, in Græco ponitur *Character*. Signi-  
ficat etiam notas, scripturas &c. Tandem apud  
Theologos & SS. Patres significat aliquod si-  
gnum spirituale & indelebile à Deo impressum  
suscipienti Sacramentum, initerabile, quo Fi-  
deles Christo consignantur, & ad ipsius cultum  
destinantur.

Dico per tria Sacramenta imprimi characte-  
rem, nimirum per Baptismum, Confirmatio-  
nem & Ordinem; non verò per alia quatuor,  
nempè per Eucharistiam, Pœnitentiam, Ex-  
tremam Unctionem & Matrimonium. Tum

quia definitum fuit in Trident. sess. 7. can. 9. de Sacramentis in genere : *Si quis dixerit in tribus Sacramentis, Baptismo scilicet, Confirmatione & Ordine, non imprimi characterem in anima, hoc est signum quoddam spirituale & indelebile, unde ea iterari non possunt, anathema sit.* Tum quia Christianus tripliciter dumtaxat distinguitur ab alio. 1. Ut Christianus simpliciter à non Christiano. 2. Ut fortis miles ab infirmo. 3. Ut perfectus à non perfecto : sed hi tres characteres habet Christianus per Baptismum, Confirmationem & Ordinem : ergo hæc tria dumtaxat Sacramenta imprimunt characterem.

*Dices* 1. Sacramenta vetera non causabant characterem : ergo nec nova. 2. Sunt aliqua Sacramenta novæ legis, quæ non imprimunt characterem : ergo nullum imprimit. Prob. consequentia : Ea quæ non imprimunt illum, sunt perfectiora : ergo signum est, quòd nullum Sacramentum imprimit illum. Respon. ad 1. negando antecedens, quia circumcisio imprimebat characterem in suscipiente, ut colligit Brancatus ex Scoto. Ad 2. nego consequentiam ; ad cujus prob. concesso antecedente, cum Sacramentum Eucharistiæ, quod characterem non imprimit, sit nobilius, nego consequentiam ; quia character non est signum nobilitatis, nec perfectionis, nec necessitatis, sed tantum distinctionis aut officii, juxta Dei institutionem.

Resp. 2. gratis concessio antecedente, negando consequentiam. Tum quia per Sacramenta novæ legis, homines specialiter deputantur cultui divino, adscribuntur militiæ Christi in terris militanti, & habent efficaciorè potestatem circa cœlestia & divina : illud enim Christi ad Petrum : *Quodcumque solveris super terram, erit solutum & in cœlis*, omnibus

bus successoribus ejus dictum fuit: ergo baptismus, confirmatio & ordo debent causare characterem; quamvis in lege veteri, nullum Sacramentum impreserit illum. Ad secundum, nego consequentiam; ad cujus probationem nego antecedens absolutè sumptum nam Extrema unctio, Pœnitentia & Matrimonium non sunt perfectiora Baptismo; Sacramentum Eucharistiæ dumtaxat est nobilius: ergo argumentum nihil concludit contra nos.

*Dices 2.* Ideò dicimus Sacramenta causare gratiam sanctificantem, quia hoc reperitur in sacra Scriptura; sed non reperitur, quòd baptismus, confirmatio & ordo causent characterem: ergo non causant illum.

Respondeo 1. concedendo antecedens & negando consequentiam; quia id constat ex Concilio Tridentino suprà citato, & ex Florentino in Decreto Eugenii: & hoc sufficit ut dicamus tria Sacramenta causare characterem, quia Concilii generalis autoritas, si legitimum sit, & confirmatum, est velut autoritas Evangelii dist. 15. cap. *Sicut sancti Evangelii*.

Respondeo 2. negando secundam partem; nam de baptismo ait Apostolus ad Ephes. 4. versic. 30. *Nolite contristare Spiritum sanctum Dei, in quo signati estis in diem redemptionis*: ibi non loquitur de signo adoptionis filiorum Dei, quod est gratia, cum loquatur ad improbos, ut notant ibi plures expositores: sed de caractere baptismi, quofumus fideles & denominamur baptizati. De Confirmatione constat ex 2. Corinth. cap. 1. vers. 21. & 22. *Qui autem confirmat nos vobiscum in Christo, & qui unxit nos Deus, qui & signavit nos, & dedit pignus Spiritus in cordibus nostris*: ubi à pignore Spiritus sancti, quod



quod est gratia, distinguit signaculum permanens in baptizatis, etiam amissa gratia. De Ordine autem constat ex illo 2. ad Timoth. 4. versic. 14. *Noli negligere gratiam quæ in te est, quæ data est tibi per Prophetiam cum impositione manuum presbiterii*: Ibi Apostolus loquitur de dono permanente in quocumque ordinato, quod non potest esse gratia, quæ sæpè amittitur & recuperatur: ergo est character, & consequenter ex sacra Scriptura constat baptismum, confirmationem & ordinem causare characterem.

Quantum ad rationem ob quam hæc tria Sacramenta imprimunt characterem, est quia homo debet recipi in familiam Christi, & hoc fit in Baptismo: in militiam ad defensionem fidei Christianæ, & hoc fit in Confirmatione: tandem in familia Caristi debent esse pastores qui alios dirigant, & in Ecclesiam introducant, & hoc fit in Ordine. Ita Scotus in 4. dist. 6. quæst. 10. Igitur tria dumtaxat imprimunt characterem; alia autem quatuor nullum gradum specialem, & distinctivum constituunt in Ecclesia Dei, quia ex seipsis nihil indissolubile causant, quo adveniente, homo remaneat irrevocabiliter in aliquo gradu Ecclesiæ Dei ad ipsius utilitatem.

## QUÆSTIO II.

*Quid sit character sacramentalis ?*

**S**uppono cum Gonetio contra Durandum, characterem non esse solam relationem rationis, aut denominationem extrinsecam. Tum quia est signum impressum animæ, ut colligitur ex Conciliis, & præsertim ex Trident. sess. 7. can. 9. Tum quia est ens physicum ab anima realiter distinctum, ut docet Doctor. Tum quia est principium agendi, & terminus actionis realis. Unde difficultas est, an sit quid relativum, vel absolutum? Gonetus existimat Scotum in 4. dist. 6. qu. 10. docuisse characterem esse aliquid reale, non absolutum, sed relativum; at omnes Scotistæ, tum veteres, tum recentiores, dicunt Doctorem in hac materia esse problematicum, quod est certissimum, ut patet ex eodem Doctore loco citato §. *ad questionem*, dicente, *Utrumque salvari potest, quod sit scilicet forma respectiva, sicut jam ostensum est, vel quod sit forma realis absoluta*: quo non obstante Maironius, Bassolius, Vorrillon, & alii veteres Scotistæ; Hyquæus, Aretinus, Poncius & alii quos citat & sequitur Matrius, Frassen & Cavellus docent characterem esse formam absolutam in doctrina Scoti.

Dico igitur characterem esse formam absolutam, ad secundam speciem qualitatis pertinentem. Hæc conclusio est probabilior in doctrina Scoti in 4. dist. 6. quæst. 10. §. *ad quæ-*

*questionem*, litt. D. ubi ait, *Respondeo ergo quòd si character ponatur accidens absolutum, potest poni in secunda specie qualitatis, vel etiam in prima; nec alterum istorum potest evidenter improbari*. Præterea, Doctor in eodem §. evidenter & expresse probat characterem esse in genere qualitatis: ergo ex doctrina Scoti probabilius est characterem esse formam absolutam, quàm relativam; cum apud Scotistas, qualitas & relatio distinguantur.

Prob. 1. pars: Si character esset relatio, haberet terminum absolutum & correlationem, extra fundamentum ipsius characteris existentes; cum omne relativum in doctrina Scoti terminetur ad absolutum, & in doctrina omnium Philosophorum habeat relativum: sed nihil cognoscitur extra animam Christianam existens, quod possit terminare characterem, & ad ipsum referri: ergo character non est quid relativum, sed absolutum. Prob. minor: Si esset aliquid, maxime Christus sub ratione capitis & peculiaris Domini, ut dicunt adversarii; sed hæc ratio non valet: ergo. Prob. minor 1. Illud non est terminus relationis, quo subato relatio remanet; quippe cum relatio à termino dependeat, debet destrui destructo termino; sed in triduo mortis, Christus non erat existens, nihilominus character Baptismi & ordinis Apostolis erat impressus: ergo signum est, quòd Christus non est terminus characteris; subindeque cum nullus possit assignari terminus, dicendum est ipsum esse formam absolutam. 2. Omne relativum resultat ex natura extremorum, seu fundamenti & termini; sed character non resultat ex anima & Christo, sed imprimitur & à Deo infunditur; aliàs omnis anima haberet characterem: ergo non est relatio. 3. Si Christus esset characteris

ter-

terminus, omnes characteres essent ejusdem speciei, cum unitas specifica relationis ab unitate termini proveniat; sed hoc est falsum, quia character Sacramenti Baptismi, non est character Sacramenti Ordinis: ergo character est forma absoluta.

*Dices* 1. Character quo quis deputatur à rege ad aliquod ministerium, non est realis, nec forma absoluta, sed relatio rationis: ergo character quo Deus deputat Christianos ad aliquod ministerium in Ecclesia exercendum, est relatio rationis. Resp. negando paritatem; hæc enim est differentia inter Deum & homines, quod homines eligunt & deputant, absque nova electi aut deputati mutatione, quia rex aut princeps dum eligit, non constituit hominem idoneum ad officium; at Deus intrinsecè mutat, & idoneum constituit illum quem ad officium aliquod exercendum eligit; ideoque imprimit aliquam formam realem & intrinsecam.

*Dices* 2. Ratio signi est relativa, cum sit respectus significati ad significans; sed character est signum, ut dicunt SS. Patres & Concilia: ergo est quid relativum. Resp. distinguendo majorem: Ratio formalis & constitutiva signi, est relativa, & respectus significati ad significans, nego; fundamentalis & materialis, concedo majorem. Distinguo pariter minorem: Character est signum fundamentaliter, concedo; Formaliter, nego minorem & consequentiam: Nam causa entitativè sumpta & formaliter, est ens absolutum, licèt dicat respectum ad effectum; hædera suspensa, est signum vini venalis; voces sunt signa conceptuum; & Sacramenta sunt signa gratiæ: tamen nemo dicit hæc omnia esse formaliter relationes; licèt quatenus sunt signa, relationem connotent.

*Dices* 3. Omnis forma absoluta accidentalis, est delebilis à subjecto in quo est, & suscipit magis & minus, cum sit accidens, quod habet contrarium, & qualitas quæ est capax intentionis: sed character est indelebilis, ut dictum est quæst. præced. & est in omnibus æqualis; nullus enim est magis baptizatus, nec magis confirmatus quam alius, nec magis Christianus ratione characteris: ergo character non est forma absoluta, sed relativa.

*Resp.* 1. argumentum militare etiam contra adversarios, quia relatio prædicamentalis est separabilis à subjecto, ut dicunt omnes Philosophi nostri, & capax intentionis: possibile enim est, quod album A, sit magis simile albo C, quam album B.

*Resp.* 2. distinguendo 1. partem antecedentis: Forma absoluta accidentalis est delebilis à subjecto in quo est, si sit forma naturalis & educta, concedo; si sit supernaturalis & creata, qualis est character, nego: quia tales formæ, licet accidentales sint, per annihilationem tantum à subjecto separantur; ideoque non habent contrarium, nec oppositum, nec delentur physice nisi Deo sic volente, quod etiam de characterе fatemur, cum de potentia absoluta deleri possit, id est annihilari. Nec valet dicere gratiam esse formam creatam, spiritualem & supernaturalem; Non valet, quia gratia non deletur, nec à subjecto physice separatur per oppositum seu peccatum, sed per annihilationem, ut dictum est in 3. tomo, quia decrevit Deus annihilare & auferre gratiam, interveniente peccato; sic enim instituere potuit de characterе: nam gratia physice sumpta, est etiam ex natura sua indelebilis sicut character, & character est an-  
nihi-

nihilabilis sicut gratia. Ad 2. partem antecedentis, dico characterem esse intentionis capacem, quamvis secundum gradualem latitudinem sit æqualiter in omnibus: hoc enim provenit ex divina voluntate ordinante, omnes qui Baptismum, Confirmationem & Ordines suscipiunt, ad æqualem denominationem Christiani, Sacerdotis & Confirmati, quia character est intentionis capax sicut gratia; sed non est necessitas augendi characterem sicut gratiam: ergo licet character sit indelebilis, & in omnibus æqualis, nihilominus est forma absoluta, sicut gratia habitualis; ut suadet responsio nostra.

Prob. 2. pars conclusionis, nempe characterem pertinere ad secundam speciem qualitatis. 1. Qualitas quæ est formaliter principium operationis, pertinet ad secundam speciem qualitatis, quæ est potentia; sed character est qualitas ex divina ordinatione ad aliquam operationem ordinata: nam character ordinatur ad cultum Dei, & ad aliqua munera pro Christo & Ecclesia exercenda: ergo reponitur in secunda specie qualitatis. 2. Character causat notitiam Christiani, vel Sacerdotis, aut Confirmati, in intellectu proportionato: Angelus enim cognoscit & distinguit ratione characteris animam Sacerdotis ab anima laici: ergo est potentia.

Dices; Character est qualitas supernaturalis: ergo non potest pertinere ad secundam qualitatis speciem, quæ est potentia naturalis. Resp. cum Doctore supra citato dicente, *Tamen potentia supernaturalis, si est absoluta, & accidentalis, & spiritalis, bene potest pertinere ad idem genus intermedium cum habitu naturali*: ergo character, licet sit supernaturalis, in secunda qualitatis specie poni potest.

Entia supernaturalia ut spes, fides, charitas

tas & unio hypostatica, quam Scotistæ dicunt esse ens reale relativum ab extremis unitis distinctum, ut probatum manet in tertio tomo tract. de incarnat. disp. 5. quæst. 3. sunt in aliquo prædicamento; cum Philosophi reponant in categoriis omnia entia realia, excepto ente infinito, quod est Deus: igitur quamvis character sit supernaturalis, potest nihilominus dici potentia, sicut gratia habitualis dicitur qualitas; quia potentia prædicatur in recto de omni potentia creata, sicut qualitas prædicatur de omni qualitate creata, quin supernaturalitas impediat.

### Q U Æ S T I O III.

*Quædam sit subjectum proximum  
& immediatum characteris  
Sacramentalis?*

**S**uppono tamquam certum, animam esse subjectum remotum characteris, ut definitum fuit in Trident. sess. 7. can. 9. *Siquis dixerit in tribus Sacramentis, Baptismo scilicet, Confirmatione & Ordine, non imprimi characterem in anima, hoc est, signum quoddam indelebile, unde ea iterari non possunt, anathema sit: non autem proximum & immediatum. Ratio est, quia character immediate ordinatur ad operationem; ideoque in subiecto operativo subiectari debet. Unde difficultas est, in quam ex potentiis animæ subiectetur immediate?*

Dico igitur, quod subjectum proximum & im-

me-

mediatum characteris non est intellectus, sed voluntas. Ita Scotus in 4. dist. 6. quæst. 11. §. dico ergo ad quæstionem. Prob. 1. ex Doctore dicente, 1. *Character autem si ponatur in esse, convenienter ponitur dispositio ad gratiam Sacramentalem: ergo congruum est ponere characterem in voluntate.* 2. Character & gratia sunt in eodem subiecto; sed gratia sanctificans, quæ est à charitate indistincta, est in voluntate: ergo character est etiam in voluntate, in sententia Scoti.

Prob. iterum ex Doctore: Character est signum vel fundamentum obligationis animæ ad Deum: ergo rationabile est, quod ponatur in illa potentia, cujus est primò obligari; talis autem est voluntas, quia præcisè per ejus actum aliquis se obligat principaliter: illa enim quæ concurrunt ibi ex parte intellectus, vel alterius potentiæ in homine, non sunt nisi quædam præambula ad firmum velle, quod est rationabiliter proponere, vel vovere; vel quædam signa manifestantia illud esse firmum. Ita Scotus: ergo ex Doctore character est in voluntate.

Confirm. Homo caractere insignitus, cognoscit se in familia Christi adscriptum, & ad observantiam legis divinæ & fidei defensionem obligatum per characterem; sed character non potest obligare hominem ad tanta munera exercenda, nisi sit in voluntate. Tum quia voluntas est potentia libera, cujus virtute, observantia legum fit meritoria, honesta & laudabilis. Tum quia obedientia est actus voluntatis. Tum quia qui obligat alium; intendit sibi voluntatem illius subicere: ergo character est in voluntate.

Prob. denique: Character Sacramentalis, qui per se ordinatur ad exhibendum cultum Deo,  
in



in ea potentia immediate subjectari debet, ad quam pertinet exhibitio talis cultus; sed exhibitio cultus divini pertinet ad voluntatem: in ea enim residet virtus religionis, quæ divinum cultum habet pro suo objecto: ergo in voluntate, non verò in intellectu, character existit.

Resp. Gonet. distinguendo majorem: In ea potentia subjectari debet immediate character, ad quam pertinet exhibere cultum Deo, abstrahendo ab hoc, quòd exhibitio talis cultus bene vel male fiat, concedo majorem; ad quam pertinet exhibere cultum Deo, bene & religiosè, nego majorem. Similiter distinguo minorem (inquit) ad voluntatem pertinet exhibere cultum Deo, secundum quòd bene & religiosè debet fieri, concedo majorem; absolute, & abstrahendo ab hoc quòd bene vel male fiat, nego minorem & consequentiam. Sic enim sumptus divinus cultus, non pertinet ad virtutem religionis, sed ad virtutem fidei in intellectu residentem, & ad characterem ut dirigentem habitum fidei, & imperantem actiones illas quibus Dei cultus perficitur.

Contra 1. Congruentius est characterem subjectari in ea potentia ad quam pertinet exhibere cultum bene & religiosè, quàm ad potentiam ad quam pertinet exhibere cultum Deo, abstrahendo ab hoc, quòd talis exhibitio bene vel male fiat, cum character ordinetur ad exhibendum cultum Deo bene & religiosè. 2. Exhibitio cultus divini, aut exhibere cultum Deo, in se est elicitive à voluntate: exhibere enim, idem est ac reddere, dare, assentiri &c. quæ omnia à voluntate eliciuntur: ergo exhibitio cultus absolute, & abstrahendo ab hoc, quòd bene vel male fiat, pertinet ad voluntatem. 3. Exhibitio cultus formaliter sumpta, non pertinet ad

virtutem fidei, sed ad virtutem religionis, quæ est in voluntate. Tum quia beati in quibus nulla est fides, exhibent cultum Deo. Tum quia exhibitio cultus est formalitèr actus liber & meritorius; stante enim fide, voluntas denegare potest cultum Deo: ergo exhibitio cultus ex natura sua pertinet ad voluntatem. Tum quia exhibitio cultus divini præsupponit fidem, & producit ex amore: ergo est actus voluntatis.

Obj. 1. Gonet; cum enim character per se primò ordinetur ad actus divini cultus, quibus fit protestatio fidei, debet habere pro subjecto immediato illam potentiam in qua immediatè subiectatur habitus fidei; sed habitus fidei immediatè subiectatur in intellectu: ergo & character.

Confirm. Sicut fides est radix totius ædificii spiritualis; ita etiam character est fundamentum omium actionum & passionum hierarchicarum. quæ sunt tradere divina & recipere: ergo debet constitui in eo subjecto in quo est fides.

Resp. negando majorem 1. Quia licet fides sit actus intellectus, tamen protestatio fidei est actus imperatus à voluntate; voluntas siquidem est primum principium actus credendi: quia ergo character ordinatur ad actus quibus fit protestatio religionis, est in voluntate, sicut fides in intellectu. *Præterea* ex Gonet, dispositio non debet esse in subjecto in quo est forma ad quam est dispositio; aliàs concederet characterem esse in voluntate, quia gratia Sacramentalis ad quam est dispositio, est etiam in voluntate: ergo à fortiori quamvis character ordinetur ad actus divini cultus, quibus fit protestatio fidei, tamen ex hoc non debet esse in subjecto in quo est fides. Ad confirm. nego consequentiam, quia comparatio characteris

cteris cum fide, est tantum in ordine ad effectus & munera, non verò in ordine ad subjecta: nam character residens in voluntate, potest tradere divina & recipere, sicut fides residens in intellectu, est radix omnium virtutum spiritualium.

Obj. 2. ex D. Dionys. cap. 2. de Ecclesiast. Hierarch. ubi ait characterem esse *Lumen divinum illuminans nos, & configurans Christo*; at lumen & configuratio, non pertinent saltem immediatè ad voluntatem, sed ad intellectum; lumen quidem, quia volunta est potentia cæca; configuratio verò, quia figura seu imago Dei, cui nos configurat character, est in intellectu, & non in voluntate, nisi ratione intellectus, & ex consequenti; propter quod Filius Dei qui in divinis per intellectum procedit, vocatur figura substantiæ Patris: ergo character est in intellectu, non verò in voluntate.

Resp. D. Dionys. loqui in sensu comparativo, non verò in sensu formali; aliàs character esset formaliter fides, quod est falsum. Tum quia ille qui recipit Sacramentum Ordinis, non recipit habitum fidei, & recipit characterem: & ille qui recipit Baptismum cum fitione, recipit characterem & non recipit fidem. Tum quia character dicitur lumen, quia sigillando hominem, indicat illum deputatum esse & electum per tale signum in Christi domesticum, militem & ministrum, quo pacto character servi dicitur etiam lumen, quia illuminat alios ut illum cognoscant esse servum. Tum quia gratia sanctificans in variis sacre Scripturæ locis dicitur etiam lumen: ergo cum character non sit lumen formaliter, sed tantum metaphoricè, sicut Christus est leo, agnus &c. non debet esse in intellectu in quo est formale

male lumen, cùm in voluntate residendo, valeat indicare hominem esse militem Christi &c. Idem dico de configuratione, quia character configurat nos Christo, quatenus nos obligat ad imitandum vitam ipsius; & de configuratione morali, quæ in voluntate consistit.

Obj. 3. Qualitates quarum subjectum immediatum est voluntas, per se determinant ad bonum vel malum morale, ita ut non possit voluntas eis uti indifferenter ad bonum vel malum morale; at character non determinat per se ad bonum vel malum morale, sed relinquit indifferentem voluntatem ad utendum ipso ad bonum vel malum morale: ergo non subjectatur immediatè in voluntate, sed in intellectu.

Resp. negando minorem: Character enim est qualitas quædam supernaturalis, quæ inclinat & determinat voluntatem ac professionem fidei externam, ad exhibendum Deo cultum, ad ministranda vel recipienda Sacramenta, & ad alios religionis actus exercendos, quemadmodum spes determinat voluntatem ad sperandum, & charitas ad diligendum &c.

Obj. denique: Illa potentia in homine debet esse subjectum immediatum characteris Sacramentalis, quæ suo actu ut elevato per characterem, debet alias potentias movere & dirigere ad actiones, vel passionem pertinentes ad cultum Dei; sed intellectus practicus est talis potentia, utpote qui per actum imperii sibi proprium debet movere & dirigere alias omnes facultates ad opus: ergo intellectus practicus immediatum subjectum characteris Sacramentalis esse debet. Gonet. fuse probat maiorem, sed omitto probationes, quia nulla probatione indiget; unde


Resp. concessa majori, cum character esse debeat in potentia quæ movet & dirigit ad actiones, vel passionem pertinentes ad cultum Dei, negando minorem: quia ut fuse dixi in tract. de actibus humanis, agendo de actu imperii, voluntas est illa potentia quæ per actum imperii sibi proprium, movet alias facultates ad opus, puta intellectum ad credendum, ad inferendam mediis aliis potentiis actionem ex officio protestativam fidei contra hostes Christi, & sic de cæteris: ergo character immediate subiectatur in voluntate.

Quæres, an character insit animæ indelebiter? Resp. affirmativè. Tum quia constat ex Conciliis, Patribus & omnibus Theologis. Tum quia character non habet contrarium, cum sit potentia. Tum quia est compatibilis cum omni peccato. Tum quia datur ut signum distinctivum: ergo oportet, quod existat, existente subjecto; sed subjectum, quod est anima, est incorruptibile: ergo. Tum quia remanet in beatis & in damnatis: ergo.

Dices: Post mortem nulla est necessitas, nullave capacitas administrandi, aut recipiendi Sacramenta, atque exhibendi Deo cultum exteriorem: ergo character non debet remanere. Nego consequentiam, quia character alium habet finem præter assignatos, nimirum distinguere fideles ab infidelibus, milites Christi ab inimicis ejus, & ministros aut dispensatores mysteriorum Dei ab aliis: ergo debet remanere in alia vita, in bonis ad ornatum, & in damnatis ad confusionem & ignominiam. Nec valet hic reponere damnatos esse indignos omni dono supernaturali, & omni effectu Sacramentorum esse privandos; quia hoc de dono ad solatium conducente intelligendum est.

Dices

*Dices* iterum: Character ordinis non est indelebilis, sed est amissibilis; constat enim ex historia Ecclesiastica, ordinationes & Ecclesiastica munia plurimorum præfulum, utpote Photii Episcopi Constantinopolitani, Maximi Cynici ejusdem civitatis antistitis, & Proculi Episcopi Massiliensis, prorsus irrita ac nulla declarata fuisse: ergo &c. *Respondeo* negando antecedens, ad cujus probationem dico ordinationes horum præfulum & aliorum quæ afferri possunt, non fuisse irritas & nullas, sed solum illicitas, ut ex eadem historia compertum est: ergo habuerunt characterem & auctoritatem Episcopalem, qua privari minimè possunt, quamvis privari potuerint honoribus, gradibus & officiis. Idem dico de aliis ordinatis.



## DISPUTATIO V.

*De Sacramentorum Institutore, Ministro, numero, & ordine.*

**G**ratia brevitatis cui studemus, tres disputationes sub uno & eodem titulo conjunctim examinandæ sunt; ponenda est igitur

## Q U Æ S T I O I.

*An potestas ministerialis instituendi Sacramenta, & potestas excellentia quæ fuit in Christo, homini puro communicari potuerit?*

**O** Mitto quæstionem in qua Gonetus quærit, *An Christus omnia legis novæ Sacramenta immediatè instituerit?* Tum quia certum est apud omnes Catholicos. Tum quia definitum fuit in Conc. Trident. sess. 7. can. 1. de Sacramentis in genere, ubi dicitur, *Si quis dixerit Sacramenta novæ legis non fuisse omnia à Iesu Christo Domino nostro instituta, anathema sit.* Tum quia Christus est caput Ecclesiæ, & author legis Evangelicæ: ergo est institutor instrumentorum Ecclesiæ, & author Sacramentorum. Unde difficultas nostra est, an aliqua pura creatura possit divinitus habere virtutem & potestatem instituendi Sacramenta, ex commissione, seu ministerialem & participatam quam habuit Christus in quantum homo? At ponderatis utriusque Doctoris, Angelici scilicet & Subtilis rationibus, existimo cum Poncio quæstionem esse de nomine: nam Gonetus concedit Deum non posse communicare puro homini potestatem principalem & authoritativam instituendi Sacramenta, seu signa efficacia gratiæ, sed solum commissionem aut authoritatem ministerialem & delegatam, ut possit determinare signa sensibilia, ad quorum præsentiam, ipse Deus infundat & creet gratiam, quod Scotus, nullusque Scotista negat: Doctor enim in 4. dist. 1. qu. 3. §. *De secundo dico* litt. D. ait, *In quantum*

*autem absolute est signum practicum* ( loquitur de Sacramento ) *posset institui ab aliquo alio*: igitur ut advertunt Suares , Delugo , Pontius & alii , D. Thomas & Scotus conveniunt in re , & in modo loquendi tantum differunt .

Dico igitur , quòd potestas ministerialis instituendi Sacramenta potuit homini puro communicari. Prob. Purus homo potuit à Deo accipere virtutem satisfaciendi pro omnibus de condigno , & esse verè & propriè Redemptor , sicut Christus , ut dictum est in 3. tomo cum Scotistis: ergo purus homo potuit accipere à Deo commissionem eligendi signa sensibilia , ad quorum præsentiam Deus promississet conferre gratiam ; qui quidem homo esset Sacramentorum institutor , sicut alius esset hominum Redemptor . Prob. consequentia 1. Ideò Christus ut homo est causa & author Sacramentorum , quia est causa principalis meritoria gratiæ , quæ est effectus Sacramenti : sed ille purus homo , qui de potentia absoluta de condigno satisfecisset , fuisset causa principalis meritoria gratiæ : ergo ex commissione potuisset esse causa efficiens sicut Christus ut homo fuit . 2. Sacramenta sunt causæ morales gratiæ , ut dixi supra cum Scotistis , id est producant gratiam , quia movent divinam voluntatem ad conferendam gratiam , quam Christus nobis in passione meruit ; sed ille purus homo de potentia absoluta meruisset nobis gratiam , quam Deus nobis conferre promississet per signa sensibilia ( si sic disponere voluisset ) ab ipsomet homine eligenda : ergo instituere potuisset Sacramenta .

Confirm. Christus ut homo meruit instituere Sacramenta , quia Deus acceptavit mortem & Passionem ; & virtute mortis acceptatæ , qua Deus se obligavit infallibiliter concurrere ad



productionem gratiæ, cum signis sensibilibus quæ Christus ad conferendam gratiam determinare voluit, Christus est verè Sacramentorum author; sed Deus opera illius hominis acceptare potuisset ac se obligare ad conferendam gratiam, & ad productionem ejusdem concurrere cum quibuscumque signis sensibilibus: ergo fuisset author Sacramentorum ex commissione, & Deo delegante, sicut Christus. Nec hoc implicat ex parte Dei qui est omium Dominus, nec ex parte hominum qui subjiciuntur Deo omnes æqualiter, nec ex parte Sacramentorum, aut gratiæ.

Prob. 2. Institutio Sacramentorum nihil aliud est quàm destinatio alicujus rei sensibilis in signum efficax gratiæ, ad cujus præsentiam, Deus infallibiliter dat gratiam; sed purus homo posset ex potestate sibi à Deo delegata ad instituendum aliquod signum (quam Christus habuit) instituere aliquam rem sensibilem, in signum efficax gratiæ, efficax & infallibile ex vi promissionis divinæ illi puro homini factæ: ergo non implicat, quòd purus homo, Deo sic ordinante, Sacramenta instituat. Prob. Christus ut homo non habuit ex se illam potestatem instituendi Sacramenta; sed Deus, ex Doctore, potest eligere purum hominem ad omne ministerium & officium ad quod elegit Christi humanitatem: purus enim homo potuit nos redimere, esse caput Ecclesiæ &c. quæ Christus homo habuit ex electione speciali, & quæ potuit non habere, etiam stante unione; hinc est, quòd cum Christus ut homo Sacramenta instituerit ex commissione & electione, potueritque, Deo sic volente, ea non instituere stante unione, Deus potuit eligere purum hominem ad Sacramenta instituenda.

*Instabis* : In hoc casu ille homo non esset author, nec institutor Sacramentorum ; sed tantum causa instrumentalis , aut declarativa . Resp. negando instantiam , quia ut aliquis dicatur author & institutor alicujus rei , non requiritur , quod nullo modo acceperit ab alio potestatem id instituendi , alias D. Franciscus non esset Institutor Ordinis nostri Seraphici , quia à summo Pontifice accepit potestatem ; sed sufficit , quod pro nutu voluntatis suæ juxta auctoritatem illi concessam , eligat istud medium præ alio , & constituat illud signum significativum & moraliter productivum gratiæ , quæ omnia in illo puro homine essent . *Præterea* , instantia probat hominem illum non esse causam principalem & auctoritatis , non autem causam commissionis , delegatam & ministerialem : nam summus Pontifex instituere potest in Ecclesia nonnullas ceremonias , & esse author ipsarum ; licet valeat eas instituere ex vi potentiæ quam à Deo accepit : ergo ut aliquis sit author Sacramentorum , non requiritur , quod nullo modo potestatem acceperit ab alio .

*Dices* I. cum Mastro ; Illius propriè est Sacramentum instituere , cujus est non tantum signum imponere , sed etiam efficaciam illi ad producendum id quod significat , conferre ; sed solus Deus hoc potest : ergo solus Deus potest propriè Sacramentum instituere . Resp. distinguendo majorem : Illius est propriè Sacramentum instituere , absolutè , authoritative & magis principaliter , cujus est non tantum signum imponere , sed etiam efficaciam illi ad producendum id quod significat , conferre , concedo ; Authoritate delegata , & virtute commissionis à Deo emanatæ , nego . Similiter distincta minori , nego consequentiam ; quia homo institueret authoritate delegata , & ex com-

missione à Deo emanata ; ideòque ut esset propriè author , non deberet conferre Sacramentis virtutem efficacem producendi gratiam ; nam Christus ut homo præcisè non habet à se authoritatem , nec virtutem cōfrendi rebus sensibilibus efficaciam ad producendam gratiam ; hoc enim à divinitate hypostaticè accepit ; nihilominus est verè author ; idem igitur dicendum esset de puro homine , à Deo ad hujusmodi institutionem deputato .

*Dices 2.* cum Vasquez : Instituire propriè , est rem primò statuere & incipere ; sed soli Deo primò convenit statuere & incipere Sacramenta : ergo solus Deus potest ea instituire . Resp. negando majorem : ille enim qui rem primò statuit & incipit , est causa primaria & authoritativa , & ille qui ex commissione statuit , dicitur etiam verè statuere . Justitiæ præfectus instituit res in Provincia , quarum dicitur verè & propriè author , quamvis eas instituat authoritate regis , & tantum ex vi commissionis .

*Dices 3.* Deus non potest communicare homini virtutem creandi : ergo nec virtutem instituendi Sacramenta , cum ex D. August. justificatio impij sit quid majus quàm creatio cœli & terræ . Resp. negando consequentiam & paritatem . Tum quia licet justificatio sit major ex parte facti , tamen ex parte modi , creatio est difficilior & major , ut ait D. Thomas . Tum quia creatio arguit virtutem infinitam , quæ creaturæ communicari non potest ; at virtus instituendi Sacramenta non est infinita : ergo potest communicari puræ creaturæ .

Præcipua hujus disparitatis ratio est , quia Sacramenta sunt instrumenta moralia , seu moraliter operativa gratiæ , ut suprâ dictum est , ad quorum positionem Deus largitur gratiam , ut

in-

inquit D.  
tali: his  
ne instit  
non est r  
quam re  
ficat, q  
turum ad  
pro grat  
cans cre  
detur ad  
stus de  
eminer  
sto ad  
etiam c  
homo  
caput  
gratiam  
dictum  
manet  
condig  
condig  
bent c  
vus T  
conven  
clesiæ  
testate  
est cre  
sentia  
vina  
stum  
unior  
per e  
clesia  
uation

inquit Divus Ambrosius de dignitate Sacerdotali: hinc est, quòd ut quis ex divina ordinatione instituat hujusmodi gratiæ instrumenta, non est necesse, quòd habeat virtutem creandi, quam reverà nemini Deus dare potest; sed sufficit, quòd Deus promittat ei se gratiam largiturum ad quodcumque signum voluerit eligere pro gratia conferenda, cùm ipsa gratia sanctificans creetur immediate à Deo, & ab ipso meretur ad positionem signi sensibilis, quod Christus destinavit. Idem dicendum est de potentia eminentiali aut excellentiæ, quæ fuit in Christo ad instituenda Sacramenta: cùm possit etiam communicari puro homini: quia purus homo de potentia Dei absoluta potest constitui caput omnium hominum, & habere omnem gratiam quam habuit humanitas Christi, ut dictum est in tract. de Incarnat. ubi probatum manet purum hominem potuisse satisfacere de condigno, qui quidem homo potuit mereri de condigno causalitatem quam Sacramenta habent circa gratiam sanctificantem. Ita docet divus Thomas asserens potestatem excellentiæ convenire Christo quatenus est caput totius Ecclesiæ, & quatenus est Deus convenire ipsi potestatem auctoritatis, quæ incommunicabilis est creaturæ, sicut incommunicabilis est illi essentia divina; hæc quippe potestas & essentia divina identificantur. Nec valet obijcere Christum habuisse potestatem excellentiæ ratione unionis, quia hoc est falsum; habuit enim eam per eandem rationem per quam est caput Ecclesiæ, de qua ostendimus in tractatu de incarnatione.

## Q U Æ S T I O II.

*Quinam sint Sacramentorum  
Ministri ?*

**G**onetus existimat Scotum in 4. dist. 6. qu. 1. affirmare Angelos etiam de lege ordinaria, posse esse Sacramentorum Ministros; at aliter de mente Doctoris sentiunt Frassen, Mastrius, Brancatus & alii Scotistæ: nam loco citato Litt. D. ait, *Generaliter etenim congruum est ab homine viatore conferri Baptismum, & non ab Angelo aliquo. Tum quia Christus qui instituit, homo fuit. Tum quia in Sacramento est aliquid sensibile, & aliquid spirituale, & per consequens magis congruit Ministro, utenti sensu & intellectu, quam purè intellectu: ergo ex Scoto solus homo est Minister ordinarius Sacramentorum.*

Dico igitur 1. Quodd de lege ordinaria, soli homines sunt Sacramentorum Ministri. Tum quia colligitur ex Apost. 1. ad Cor. 4. *Sic nos, existimet homo ut Ministros Christi & dispensatores mysteriorum Dei.* Tum quia solis viatoribus concessa fuit Sacramentorum ministratio, ut colligitur ex his verbis Christi Apostolos alloquentis: *Hoc facite in meam commemorationem.* Et Joan. 20. v. 23. *Quorum remiseritis peccata, remittuntur eis.* Tum quia ordinarius susceptor Sacramentorum, est solus homo viator: ergo & Minister.

Dico 2. De potentia & lege extraordinaria, Angelos posse Sacramenta conficere & administrare. Ita Doctor in 4. dist. 6. quæst. 1. ubi sic ait, *Simpliciter ergo nullum suppositum*

*natum*

*natura intellectualis excluditur à posse baptizare*, quibus verbis Doctor probat Angelum non esse Ministrum ordinarium, sed posse esse Ministrum absolutè loquendo, ut denotat illa particula *Simpliciter*, & paulò post addit, *Dixi autem generaliter suppositum naturæ intellectualis*, quia si bonus Angelus baptizaret in corpore assumpto cum omnibus prædictis conditionibus, tunc supponendum esset, verum esse ejus Baptismum, quia non fieret nisi de præcepto Dei, nec esset ille baptizatus ab Angelo iterum baptizandus, sicut Michael prohibuit Episcopo dedicare Ecclesiam suam in Monte Gargano, asserens eam à se dedicatam fuisse: ergo ex Doctore, Angelus de lege extraordinaria potest esse Minister Baptismini.

Prob. iterum: Tum quia Angeli in corporibus assumptis possunt proferre verba sensibilia cum intentione faciendi, quod facit Ecclesia. Tum quia ita liberum est Deo committere Angelis ministerium Sacramentorum, sicut hominibus, cum Deus non necessitetur ab hominibus, ut ipsis dumtaxat Sacramentorum ministerium committat. Tum quia legimus in nostris Chronicis, Angelum, Eucharistiam sua manu porrexisse D. Bonaventuræ Doctori Seraphico: ergo Angeli possunt divinitus Sacramenta conficere & administrare. *Instabis*: Paulus ad Hebr. 5. ait: *Omnis Pontifex, id est Minister Sacramenti, debet assumi ex hominibus, ut offerat dona & sacrificia*. Dico Apostolum loqui de Pontifice ordinario & juxta institutionem, non verò de lege extraordinaria.

*Dices* 1. Sacramenta constant veris verbis, sed verba ab Angelis in corporibus assumptis prolata, non essent vera verba: ergo Angeli etiam de potentia extraordinaria non

possunt conficere vera Sacramenta. Resp. negando minorem, nam ut verba sint vera, id est verè Sacramentalia, non requiritur absolute, quòd sint vera vitaliter & verè humana; sed sufficit, quòd sint significativa, & cum debita intentione prolata. Unde cum verba ab Angelo in corporibus assumptis prolata, essent verè significativa cum intentione, essent Sacramentalia, quamvis non essent vitalia nec humana.

*Dices 2.* Angeli non possunt suscipere Sacramenta: ergo nec conficere nec administrare. Resp. negando consequentiam. Tum quia in Angelis nulla est infirmitas: ergo nullam suscipere possunt medicinam, licet possint eam conficere. Tum quia in suscipiente requiruntur dispositiones, quæ non requiruntur in administrante: ergo.

*Dico 3.* Quòd homo etiam comprehensor, sive beatus, est de lege ordinaria, sive ex vi institutionis Christi; absque ulla alia commissione nova Minister idoneus Sacramentorum. Tum quia character qui est signum quo Christus Ministros Ecclesiæ & milites ejusdem, signare voluit, remanet post hanc vitam; cum sit indelebilis, ut dictum est: ergo beati in patria conservant potestatem ordinariam, quam habebant in via, ad Sacramenta conficienda & administranda: Et consequenter si beatus, Deo permittente, descenderet de cælis, & corpus proprium assumeret, ut puerum baptizaret, Baptismus ille esset à Ministro idoneo ex vi institutionis Sacramenti & ordinario, licet casus esset extraordinarius. Tum quia status viæ & status patriæ non variant Sacramentorum institutionem: ergo si homo in via sit Minister ordinarius, etiam in patria.

*Dices:*

*Dices:* Sacramenta ex vi institutionis, sunt instrumenta ordinaria Ecclesiæ visibilis: ergo ipsorum Ministri ordinarii debent esse membra ejusdem Ecclesiæ; sed beati sunt membra Ecclesiæ triumphantis: ergo. Resp. distinguendo consequentiam. Ministri ordinarii quantum ad actualem administrationem ordinariam, debent esse membra Ecclesiæ militantis, concedo; Ministri ordinarii quantum ad jus & idoneitatem administrationis, nego: Unde cum beati sint in jure, & sint idonei, sunt Ministri ordinarii; licet non sint membra actualia Ecclesiæ militantis. *Tandem*, sufficit, quod sint membra Christi, qui est Sacramentorum author & princeps: sed beati sunt membra Christi: ergo &c.

His addo, quod Angelus potest de potentia extraordinaria administrare Sacramenta. Tum quia constat ex dictis in secundâ conclusione. Tum quia lex antiqua ordinata fuit per Angelos in manu Moysis mediatoris, ut legimus Actuum 7. vers. 38. & ad Galat. 3. vers. 19. & ideò poterunt novæ legis Sacramenta per eosdem ministrari, cum non sit major ratio de Sacramentis conferendis, quàm de lege communicanda: ergo beati possunt, saltem de potentia absoluta, administrare sacramenta, cum non sint magis comprehensores, quàm Angeli.



## Q U Æ S T I O III.

*An ad valorem Sacramenti requiratur  
intentio Ministri, qua inten-  
dat Sacramentum  
perficere?*

**S**uppono intentionem Ministri esse omni-  
no necessariam ad validitatem Sacramen-  
ti, ut expressè fanciunt Concilia Florent. in  
Decreto unionis, & Tridentin. sess. 7. can.  
11. Unde difficultas est, quæ & qualis de-  
beat esse hæc intentio? Plures Theologi di-  
cunt cum Catherino intentionem faciendi ac-  
tum externum præcisè, & quatenus est  
actus materialis & sensibilis, sufficere ad vali-  
ditatem Sacramenti, absque alia intentio-  
ne interna conficiendi Sacramentum; contra  
quos

Dico 1. Ad valorem Sacramenti non suf-  
ficit in Ministro intentio faciendi solum ac-  
tum externum, sed requiritur insuper in-  
tentio faciendi illum ut sacramentalem. Hæc  
opinio est probabilior altera. Prob. *Primo*  
Concil. Tridentin. sess. 7. can. 11. requirit in  
Ministro intentionem faciendi, quod facit Ec-  
clesia; sed hæc intentio non est solum in-  
tentio adhibendi materiam & proferendi for-  
mam, materialiter sumpta, quia dum Con-  
cilia definiunt intentionem faciendi quod Ec-  
clesia facit, damnant hæreticos asserentes sa-  
cramentum esse validum, quamvis jocose & per-  
ludum ministretur ejus forma, ut liquidò con-  
stat ex Trident. sess. 14. can. 9. sed est inten-  
tio adhibendi materiam, & proferendi formam,  
quatenus sunt partes essentielles Sacramenti, &

ut

ut ex ipsis fiat sacramentum verum & integrum.

*Secundò*, Si intentio faciendi tantum actum externum esset intentio faciendi, quod facit Ecclesia; id est, si intentio adhibendi tantum res & dicendi verba, sufficeret, sequeretur 1. quòd dum Sacerdos intendens & volens consecrare decem hostias, quas præsentes habet, & post consecrationem reperit duodecim, omnes essent consecratæ, quia adhibuit duodecim hostias & actum externum; sed hoc est falsum, quia in hoc casu nulla hostia est consecrata: ergo hoc provenit ex defectu intentionis internæ determinantis materiam, & faciendi Sacramentum ex materia præsentis; cum si dixisset, *Hoc est corpus meum*, cum intentione conficiendi sacramentum ex materia consecrabili sibi præseente, omnes hostiæ essent consecratæ. 2. Sequeretur, quòd mater lavando puerum in balneis, dicens ex devotione: *Ego te lavo in nomine Patris &c.* baptizaret; similiter dum lector in mensa Religiosorum præfert hæc verba Apost. *Hoc est corpus meum*, consecraret panem; sed utrumque est falsum: ergo ad valorem sacramenti requiritur intentio conficiendi Sacramentum.

*Tertiò*, Non potest aliquis nomine & potestate principis operari validè, nisi velit & intendat, quod vult princeps, cujus nomine & potestate operatur; aliàs nomine proprio, propriaque authoritate operaretur, & absolute independenter ab influxu & ministerio principis, quod est contra suppositum; sed Minister Sacramentorum operatur ut Minister Christi & Ecclesiæ: ergo ut operetur validè, oportet, quòd faciat & intendat, quòd Christus intendit & fecit; aliàs id quòd faceret, non esset actio Christi; sed dum Christus Sacramenta instituit, habuit in-

intentionem conficiendi Sacramentum : ergo .

*Quintò* , Necessariò requiritur ad valorem Sacramenti certa verborum forma , ut determinetur indifferentia materiæ : certum enim est, quòd si Sacerdos panem præ manibus habens & consecrare intendens, diceret , *Ego te absolvo* , non consecraret : ergo requiritur etiam aliquid quo determinetur indifferentia formæ ; hæc siquidem verba , *Ego te baptizo* , aut *Ego te absolvo* , varias significationes habere possunt ; cum baptizare idem sit ac lavare ; absolvere idem sit ac dispensare &c. sed verba non possunt determinari nisi per intentionem conficiendi Sacramentum , & determinandi verba sensibilia ad conferendam gratiam , aut augmentum ejusdem : ergo necessariò requiritur .

*Dices* 1. Alexander Patriarcha Alexandrinus approbavit Baptismum datum à puero Anastasio ludente cum aliis pueris : ergo intentio interior Ministri non est absolutè necessaria . Resp. Anastasium habuisse intentionem baptizandi & faciendi quod facit Ecclesia , licet acceperit illam actionem pro materia ludi ; quia non intendebat primariò ludere , nec animus jocandi ferebatur in substantiam Sacramenti . Tum quia interrogatus, cur id fecisset ? respondit se voluisse facere quod Episcopus Alexandrinus faciebat . Tum quia non baptizabat quosvis pueros, sed Catechumenos : ergo habebat intentionem baptizandi , non autem jocandi .

*Dices* 2. Baptismus ab ebrioso datus, est validus, ut suadet Doctor in 4. dist. 6. q. 5. in fine ubi ait cum D. August. *Non timeo assuetum generari ad ebrietatem : quia illa consuetudo mala non prohibet* : ergo intentio non requiritur , quia ebriosus intentionem habere nequit. Resp. Doctorem loqui de ebrioso assueto , ut suadent

dent hæc verba *Quia illa consuetudo*, qui potest habere intentionem, ideòque validè baptizare; non verò de ebrio actuali, qui dum baptizat, invalidè baptizat, quia ebrietas actualis impedit usum rationis & intentionem. Unde nego consequentiam; cùm Doctor non approbet Baptisum ab ebrio actuali datum, sed ab ebrioso assueto.

*Dices 3.* Minister potest sine fide conficere Sacramentum: ergo etiam sine intentione; cum fides sit intentionis radix. Prob. antecedens: Dum hæreticus baptizat eum intentione faciendi, quod facit Ecclesia Genevensis, vel Anglicana, validè baptizat: ergo. Resp. concessio antecedente cum probatione, quia dum hæreticus baptizat cum intentione faciendi, quod facit Ecclesia Genevensis, habet virtualem intentionem faciendi, quod facit Ecclesia Romana; negando consequentiam cum probatione: quia non implicat, quòd homo intendat facere, quod Ecclesia facit, licèt non habeat fidem Ecclesiæ.

*Dices 4.* Positis materia & forma, quæ sunt partes essentielles Sacramenti aut compositi Sacramentalis, debet poni Sacramentum: ergo sufficit intentio exterior ponendi partes, seu materiam & formam. Resp. negando consequentiam. Tum quia sicut partes non sunt totum sine unionè & actione ex parte causæ efficientis, ita similiter materia & forma non sunt Sacramentum sine intentione Ministri, qui est causa efficiens ministerialis; unde licèt Sacramentum non includat intentionem Ministri tamquam partem, includit tamen illam tamquam conditionem omninò necessariam. Tum quia materia & verba non sunt partes Sacramenti quomodocumque considerata, sed tantùm quatenùs Sacramentalia, seu quatenùs ponuntur & proferuntur ab habente intentionem faciendi, quod facit Ecclesia.

*Dices* tandem : Sequeretur , quòd Sacramenta essent incerta & dubia , quia non possumus esse certi de intentione Ministri : ergo intentio ponendi actum externum debet sufficere , ut Sacramentum sit validum . Resp. negando consequentiam , quia licet sacramenta non sint certa certitudine fidei , cum non nobis constet per revelationem de intentione Ministri , nec certitudine physica , cum intentio non appareat sensibus nostris ; sunt tamen certa certitudine morali , quæ sufficit ad pacandos animos , & ad justificationem & salutem .

*Quæres* 1. An deficiente intentione Ministri ad valorem Sacramenti requisita , Deus suppleat illius defectum , & conferat sine vero Sacramento , effectum Sacramenti , v.g. si Minister ex malitia non intendat baptizare puerum , an Deus ex sua infinita misericordia conferat illi gratiam sine vero Baptismo ?

Resp. Gonet. negativè . Patet enim ( inquit ) ex illa lege generali Joan. 3. *Nisi qui renatus fuerit ex aqua &c.* Et ex D. Augusti epist. 1. 28. ad Jeronym. dicente ; *Quisquis dixerit , quòd in Christo vivificabuntur parvuli , qui sine Sacramenti ejus participatione de vita exeunt , hic profectò contra Apostolicam prædicationem venit , & totam damnat Ecclesiam : At hoc esset falsum , si puer ille effectum Baptismi , scilicet gratiam , sine vero Baptismo reciperet : ergo &c.*

Confirm. Puer sine debita materia vel forma baptizatus , ex malitia vel ignorantia Ministri , gratiam non recipit , ut omnes concedunt : ergo nec ille , qui sine debita intentione baptizatur . Consequentia manifesta est ; nam tam benè deficit sacramentum ex defectu intentionis Ministri , sicut ex defectu formæ vel materiæ , ut definit Florentinum in Decreto unionis , ubi dicitur omnia sacramenta tribus perfici , nimirum

rum materia, forma & intentione Ministri, quorum si aliquid desit, non perficitur sacramentum. Ita Gonetus.

At hæc responsio, salva reverentia tanti Doctoris, non plenè satisfacit; unde ad illud Joan. 3. dico, quòd hæc verba, *Nisi quis renatus fuerit &c.* intelligi possunt de necessitate Baptismi in re ipsa, aut in apparentia, & in facie Ecclesiæ suscepti, seu quando vitium intentionis exterius non proditur, & parentes moraliter præsumunt puerum esse baptizatum, & si baptizatus esset adultus, crederet se baptizatum esse. Ita exponunt authores gravissimi; unde cum puer ille Baptismum suscepisset in facie Ecclesiæ, ita ut parentes, imò & ipse, si esset adultus, essent in certitudine morali de validitate Baptismi, validitas hujus Baptismi multum congruit divinæ misericordiæ. Ad D. August. dico, quòd loquebatur de puero absque Baptismo tam in re ipsa, quàm in facie Ecclesiæ suscepto, decedente, quod est certum apud omnes, nullumque consortium habet cum nostro casu. Ad confirm. concessio antecedente, consequentia negari potest; quia intentio Ministri quam Concilium exigit, se tenet ex parte causæ efficientis, nempe Ministri; materia verò & forma sunt causæ intrinsecæ & essentielles; unde cum Deus nequeat supplere defectum causarum intrinsecarum essentialium & formalium, & possit supplere defectum causæ efficientis, ut patet in omni Philosophia, credendum est, quòd in hoc casu, dum agitur de salute hominis, suppleat id quod deficit, dum potest supplere illud via ordinaria, & servatis instrumentis & modis quibus Ecclesia visibilis utitur, & consequenter supplet defectum intentionis, licet non suppleat defectum materiæ aut formæ, quæ sunt causæ essentielles Sacramenti.

Resp. affirmativè. Tum quia Christus, qui  
tam-

tamquam summus Sacerdos & Ecclesiæ caput, nunquam in necessariis deest, supplet defectum intentionis Ministri. Tum quia facienti, quod in se est, Deus non denegat gratiam: ergo eum puer in persona parentum faciat, quod in se est, Deus dat illi gratiam sanctificantem. Tum quia cum Deus sit causa instituens principalis, & causans salutem hominum mediis Sacramentis, congruum est, quod in eo casu in quo Sacramentum est nullum absque ulla suscipientis culpa, sed solum conferentis, suppleat misericordia sua defectum in iis quæ ad salutem sunt necessaria. Tum quia intentio Ministri in isto casu subordinatur intentioni Christi Domini, ut applicatio Sacramenti sit efficax; quia injustum videtur punire aliquem pro iniquitate alterius, cujus ipse non est particeps, nec physicè, nec moraliter: ergo licet intentio Ministri deficiat, intentio Christi qui author Sacramentorum est, sufficit.

Dico 2. Intentionem actualem non esse absolute necessariam ad valorem Sacramenti, habitualement verò non esse sufficientem, bene tamen virtualem. Prob. 1. pars: Intentio actualis est ea qua Sacerdos Sacramentum conficiens, actu & de facto intendit conficere illud quod Ecclesia facit; vel est illa quam Sacerdos habet, dum sacramentum conficit: sed hæc intentio non est absolute necessaria: ergo. Prob. minor: Tum quia in actionibus moralibus & meritoriis, non est absolute necessaria intentio actualis, sed sufficit virtualis; alias nemo posset recitare Officium divinum sine intentione actuali: ergo etiam in sacramentalibus. Tum quia Deus non obligavit hominem ad impossibile; imò nec ad nimis difficile.

Prob. 2. pars: Intentio habitualis est illa qua Sacerdos est expeditus, v.g. ad baptizandum, quæ

quæ quidem promptitudo oritur ex habitu acquisito; vel est illa intentio causata ex actibus administrandi Sacramenta, inclinans Sacerdotes ad eosdem actus; sed hæc intentio non sufficit: ergo. Prob. minor: Tum quia talis actus non est omninò deliberatus, cum possit esse in dormientibus, qui multa faciunt ex habitu in quibus non laudantur, nec vituperantur: ergo non sufficit; quia Minister in Sacramento debet operari humano modo, hoc est cum deliberatione & iudicio. Tum quia est indifferens, & consequenter non potest influere in sacramentum.

Prob. 3. pars: Intentio virtualis est, quando propter distractionem, Minister non intendit actu facere, quod fecit Christus; sed antea voluit, & ex vi illius intentionis non interruptæ, nec revocatæ per actum contrarium, actionem Sacramenti perficit; sed hæc intentio sufficit ad valorem sacramenti: ergo. Prob. minor. Tum quia influit in effectum. Tum quia actualis est difficillima, & habitualis est nulla, ut dictum est: ergo virtualis debet esse sufficiens. Tum quia licet actu transierit, manet tamen in virtute, ratione primi propositi, quo quis se ad agendum applicuit humano modo. Tum quia intentio virtualis sufficit ad actionem meritoriam & demeritoriam: ergo etiam ad actionem sacramentalem.

*Quæres*, an sit verum Sacramentum, ubi error erga personam cui confertur, intervenit? v. g. dum putat aliquis se baptizare puerum, & nomen Petri illi imponit, & baptizat puellam. Resp. quòd si Minister sit ita dispositus, ut velit nedum illi personæ præsentì, sed cuicumque sibi objectæ conferre Sacramentum, verè conficit Sacramentum: Si autem Minister sit ita dispositus, ut velit tantum illi personæ in individuo & præsentì, & non alteri conferre Sacramentum, si alius supponatur, tunc non conficit



ficat verum Sacramentum. Idem dicendum est si Sacerdos putans & intendens se audire confessionem Petri dumtaxat, audiat confessionem alterius, & absolvat, & in aliis Sacramentis similiter.

*Dices:* Error circa substantiam personæ in Matrimonio reddit Sacramentum nullum; certum enim est, quod error personæ dirimit & invalidat Matrimonium, ut dicemus in proprio loco: ergo etiam alia Sacramenta. *Respondeo* negando consequentiam: ratio disparitatis est, quia error in Matrimonio tollit consensum contrahentis, in quo specialiter consistit, sicque supposito tali errore, tollitur consensus seu forma Sacramenti: at in aliis Sacramentis, error personæ nihil tollit, quod sit sacramento essenziale, modò minister sit ita dispositus, ut velit nedum illi personæ præsentī, sed etiam cui-cunque sibi objectæ, conferre sacramentum, & persona velit suscipere illud non obstante ministri errore: quod suaderi potest facto Isaac Genes. 27. qui benedictionem dedit Jacob cum eam Esau dare intenderet; quæ benedictio fuit grata Deo, & Jacob verè eam suscepit, non obstante errore personæ, quia Isaac reverà habebat intentionem benedicendi unum ex filiis suis, eumque primogenitum instituire volebat in domo sua, quamquam erraverit in persona.

## Q U Æ S T I O IV.

*An per malos Ministros, valide  
possint Sacramenta con-  
ferri?*

**D**ico breviter contra Donatistas, peccatores & infideles, valide Sacramenta conficere, si adhibeant omnia ad illorum valorem requisita; ita omnes Catholici. Prob. tum ex Tridentin. sess. 7. can. 12. & can. 4. de Baptismo, ubi habetur: *Si quis dixerit Baptismum, qui etiam datur ab hæreticis in nomine Patris, & Filii, & Spiritus sancti, cum intentione faciendi quod facit Ecclesia, non esse verum Baptismum, anathema sit.* Tum quia Ecclesia Catholica non rebaptizat baptizatos ab hæreticis. Tum quia Minister operatur auctoritate & potestate à Deo accepta; sed Deus non aufert hanc potestatem propter peccatum aut infidelitatem Ministri: ergo valide baptizat, licet sit hæreticus, vel schismaticus, vel peccator, dummodò reliqua necessaria concurrant. Prob. minor: Potestas conficiendi Sacramenta non est gratia gratum faciens, sed gratis data; nec datur in utilitatem Ministri, sed aliorum: ergo non tollitur per peccatum.

*Dices* 1. D. Ambr. lib. de initiandis, ait, quòd Baptismus perfidorum non sanat, sed polluit; ut refert Scotus in 4. dist. 5. quæst. 1. in principio, quod confirmat Apost. ad Rom. 14. *Quod non est ex fide, peccatum est*: ergo. Resp. quòd Patres per Baptismum perfidorum, intelligunt Baptismum perfidum, seu datum sine forma & sine intentione; non autem verum Baptismum cum omni requisito datum à Ministro perfido & hæ-

hæretico . Ad Apost. dico intelligendam esse per *fidem*, conscientiam: ac si dixisset, quod non est ex conscientia recta, peccatum est, ut dixi in 3. tomo .

*Dices* 2. Nemo dat, quod non habet; sed infidelis non habet gratiam: ergo non potest eam dare per sacramentum; nam *ab immundo quis mundabitur*? at Eccl. 34. Resp. distinguendo majorem: Nemo dat, ut causa principalis, concedo; ut causa instrumentalis moralis, nego. Unde concessa minori, nego consequentiam; quia Minister non dat gratiam, nec mundat, ut causa physica principalis, sed ut causa ministerialis: ergo non est necesse, quod habeat id quod dat: nam Medicus infirmus dat aliquando sanitatem ægrotis, quam non habet.

*Dices* 3. Christus influit gratiam in membra seu in suos fideles, per Ministros tamquam per membra sui & Ecclesiæ: sed hæretici & infideles non sunt membra Ecclesiæ: ergo per ipsos non potest Christus gratiam in suos Fideles influere. Resp. negando 2. partem majoris, nempe quod Christus influat gratiam in suos fideles per Ministros tamquam per membra unita corpori & viventia, sed tantum tamquam instrumentum divinæ misericordiæ & providentiæ, quo Christus uti potest, etiam si sit inanimatum, modò sit ipsi conjunctum per quandam actionem: artifex enim operatur per manum quæ vivit, & per securim quæ non vivit: ergo Christus potest influere gratiam in suos fideles, per Ministros sine vita spirituali seu gratia.

*Dices* 4. Deus declarat Levit. 21. vers. 16. & 17. & 18. se nolle in ministerium suum, hominem maculam habentem: ergo per ministros malos non potest validè conferri Sacramentum. Nego consequentiam, quia Deus hoc

hoc declarat, ut nos doceat, nulum ministrum non debere accedere ad ministerium, non quòd Sacramentum aut Sacramentum sit invalidum, sed illicitum, cum de facto peccet minister, qui Sacramenta solemniter administrat in peccato mortali. Sic intelligendæ sunt omnes authoritates Scripturæ, quibus adversarii impugnant nostram conclusionem quam expressè definivit Concilium Constantiense sess. 8. ubi damnatur hæc propositio Joannis Vuiclef, *Si Episcopus vel Sacerdos est in peccato mortali, non ordinat, non conficit, non consecrat, non baptizat*: unde Concilium non exigit fidem nec probitatem in ministro, ita ut Sacramentum non possit esse validum, quin minister sit fidelis & bonus; aliàs sequeretur, inquit Scotus, quòd nullus posset esse certus, an sit baptizatus, vel non; cum nemo possit esse certus de fide & bonitate alterius.

*In abi.*: Nemo potest esse certus de intentione ministri quæ ad validitatem Sacramenti requiritur, tamen Christianus credit se baptizatum. Resp. Scotus negando paritatem de intentione, & bonitate ministri: ratio discriminis est, quia probabiliter præsumi potest quòd ministri talem actum exercentes, intendant facere illud, ad quod actus secundum se ordinatus est; sed non ita posset haberi certitudo de bonitate. Ita Doctor subtilis in 4. dist. 5. quæst. 1. §. *veritas questionis*, ubi expressè tractat & probat nostram conclusionem, quam defendunt etiam sancti Patres, & præsertim Divus Augustinus tract. 5. in Joan. relatus in cap. si justus 1. quæst. 1. ubi legitur, *Si justus fuerit minister, computo eum cum Paulo qui gloriam suam non quaerit dicens, Ego plantavi, Apollo rigavit, Deus autem incrementum dedit. Qui verò fuerit superbus minister, cum diabolo computatur; sed non contaminatur donum Christi. Quia per illum purus fluvius transit, & venit ad fertilem terram*;

458 DE SACRAMENTIS.  
& cap. neque & cap. nonne. declaratur hominum  
in alitia non prophanari Sacramenta.

---

## Q U Æ S T I O V.

*An Ministri Sacramenta in peccato  
mortali ministrantes, semper pec-  
cent mortaliter?*

**A**Dvertendum est cum Goneto, ministrum Sacramentorum esse duplicem, scilicet ex officio, sive solemnitatis, & necessitatis. Primus dicitur ille qui conficit Sacramenta, speciali consecratione ad ea conficienda deputatus, qualis est Sacerdos celebrans Missam, absolvens à peccatis, & cum ritu & solemnitate baptizans. Secundus verò, sine aliqua speciali consecratione & deputatione Sacramenta ministrat.

Dico 1. quòd Minister solemnitatis, Sacramentum conficiens vel administrans in peccato mortali, peccat mortaliter. Prob. Tum quia transgreditur mandatum; Deus enim ait Isa. 52. *Mundanis qui fertis vasa Domini.* Tum quia *Malis non est fas tangere symbola, id est, Sacramenta,* ait D. Dionys. cap. 2. Eccl. Hierarch. Tum quia debet se conformare Christo cujus est Minister, ut colligitur ex illo Levit. 19. *Sancti eritis, quoniam ego Sanctus sum.* Tum quia Sacramentorum administratio, dum fit à Ministro, qui est in peccato mortali, est quædam Dei irreverentia, & ipsorum Sacramentorum contaminatio; sancta enim, sanctè sunt tractanda; ergo dum Minister ex officio administrat Sacramentum in peccato mortali, peccat mortaliter. Unde sequitur, quòd si Minister existens in peccato mortali, debeat aliquod Sacramentum ministrare, antequàm administret ipsum, de-  
bet

bet confiteri peccata sua, si adsit confessorii oportunitas; quæ si non adsit, debet elicere actum contritionis.

*Dices 1.* Conjuges sunt Ministri Sacramenti Matrimonii, tamen dum conjuges reddunt aut petunt debitum in peccato mortali, non peccant: ergo nec Ministri aliorum Sacramentorum. Resp. negando consequentiam, quia debitum conjugale non est actio Sacramenti, nec Sacramentalis, sicut administratio Eucharistiæ, Confirmationis, &c.

*Dices 2.* Recipiens Sacramentum Pœnitentiæ, non debet esse in gratia: ergo nec Minister qui illud administrat. Resp. negando paritatem. Ratio est, quia Minister habet rationem agentis respectu gratiæ, suscipiens verò rationem patientis; ideòque non requiruntur ex parte patientis aut subjecti conditiones, quæ requiruntur ex parte agentis.

*Dico 2.* quòd Minister necessitatis & non consecratus, ministrans in peccato mortali, non peccat mortaliter. Tum quia Minister necessitatis non tenetur ad præceptum, sicut Minister ex officio, & solemnitatis. Tum quia necessitas dispensat à lege: ergo qui ex necessitate confert Baptismum puero moribundo, non peccat, etiamsi ipse sit in peccato mortali.

*Inferes 1.* Sacerdotem in peccato mortali celebrantem, duplex peccatum committere, unum quia conficit Sacramentum, & alterum quia illud recipit; quia conficere & recipere sunt duo actus, & consequenter dum mali sunt, duo peccata sunt. 2. Ministrantem Sacramentum Pœnitentiæ in peccato mortali, peccare mortaliter. 3. Esse peccatum mortale audire confessiones in peccato mortali, tametsi Minister habeat animum confitendi, vel habendi actum contritionis, antequàm pœnitentem absolvat à peccatis; quia audire confessiones, est actio Sacramentalis, & ordinatur ad Sacramentum: ergo

ut sit licita, exigit gratiam in audiente. 4. Ministrare Eucharistiam in peccato mortali, esse peccatum mortale. Tum quia est actio Sacramentalis. Tum quia tangere corpus Christi in peccato mortali, est peccatum mortale: *Quicumque enim exhibet se in aliquo actu ut ministrum Ecclesiae, mortaliter peccat, si sit in peccato mortali*, ait Div. Thom. sed dum Sacerdos ministrat Sacramentum Eucharistiae, tangit corpus Christi: ergo.

*Inferes* 5. Probabilius esse peccare mortaliter Diaconos & Subdiaconos solemniter sua officia exercentes in peccato mortali. Tum quia cantare Evangelium, & in vasis sacris Eucharistiae materiam præparare, eamque tradere Sacerdoti consecrandam, quæ sunt Diaconi & Subdiaconi officia, sunt actiones Sacramentales & ad Sacramentum ordinatæ. Tum quia 1. ad Timoth. 3. vers. 8. dicitur: *Diaconos similiter esse pudicos, non bilingues, non multo vino deductos, non turpe lucrum sectantes, habentes mysterium fidei in conscientia pura. Et hi autem probantur primum, & sic ministrent, nullum crimen habentes*. Excusantur tamen à peccato mortali minoribus Ordinibus initiati, si in peccato mortali sua officia exerceant. Tum quia materia est levis. Tum quia actus illi remotè tantum ad Sacrificium & Sacramentum ordinantur.

*Quæres* 1. An licitum sit petere & accipere Sacramenta à malo Ministro? Resp. affirmativè, si sit toleratus ab Ecclesia, & paratus ad ministrandum, dum aliqua necessitas urget. Patet tum ex Decreto Nicolai I. ut refertur q. 8. cap. *Sciscitanibus*, ubi respondens ad consulta Bulgarorum scribit: *Sciscitantibus vobis, si à Sacerdote, qui sive comprehensus in adulterio, sive de hoc fama sola respersus est, debeatis Communionem suscipere, nec nò? Respondemus...* Ab eo, donec Episcoporum iudicio reprobetur, Communio percipienda est. Tum quia petens & ac-

cipiens ab illo Sacramentum, non cooperatur peccato ipsius.

*Quæres. 2.* Quam dispositionem teneatur habere malus Minister in prædictis casibus Sacramenta ministrando? Resp. cum Goneto, quod debet facere quod in se est ad veram contritionem habendam, quamvis aliquando in re non sit contritus, sed in sua solum probabili æstimatione; quia sola attritio non tollit malitiam peccati mortalis, etiam in æstimatione peccantis, sicut contritio.

Confirmatur: Minister mortaliter peccat, dum Sacramenta ministrat in peccato mortali. Tum quia constat ex dictis. Tum quia dum agens morale non agit juxta regulas præscriptas, seu sicut oportet, peccat contra regulas, & legi divinæ contradicit; sicque qui Sacramenta ministrat in peccato mortali, non agit sicut oportet, & peccat: ergo malus minister, dum tenetur ministrare Sacramenta, debet ita se disponere, ut non sit in peccato, sed ut sit sanctus: atqui non potest extra confessionem ad hoc se disponere, nisi per actum contritionis; cum attritio sine Sacramento non perducatur ad justificationem, ut declarat sacra Tridentina Synodus sess. 14. cap. 4. ergo tenetur elicere actum contritionis.

## Q U Æ S T I O VI.

### *De numero & ordine Sacramentorum.*

**D**Ico 1. septem esse novæ legis Sacramenta, nec plura, nec pauciora. Ita omnes Catholicæ cum Trid. sess. 7. can. 1. Constat 1. ex pluribus locis sacre Scripturæ, in quibus habetur specialis institutio uniuscujusque Sacramen-



ti: sed ex sacra Scriptura colligitur tantum institutio Baptismi, Confirmationis, Eucharistiae, Pœnitentiae, Extremæ Unctionis, Ordinis & Matrimonii: ergo ex sacra Scriptura sunt tantum septem Sacramenta. 2. Constat ex figuris veteris testamenti: nam Deus septem diebus præcepit comedi azima, septem lucernæ erant in Sanctuario, septem instituit tubas Jubilæi.

3. Constat ex congruentia vitæ spiritualis cum corporali: nam homo in vita corporali ex parte sui requirit per se generationem, augmentationem & nutritionem, & per accidens requirit remedia sanativa contra morbos, & remedia confortativa contra morbi reliquias: & ex parte Reipublicæ cujus est membrum, requirit duo, scilicet parentes qui vitam corporalem hominum propagare possint, & magistratus qui eam gubernent & ordinent: ergo etiam in vita spirituali, requirit regenerationem, quæ fit per Baptismum; augmentationem, quæ fit per Confirmationem; nutritionem, quæ fit per Eucharistiam; remedium contra morbum peccati, quod fit per Pœnitentiam; & remedium contra peccatorum reliquias, quod fit per Extremam Unctionem: & ex parte Reipublicæ spiritualis cujus est membrum, requirit alia commembra, aut compartes, quod licet fieri non potest, nisi per Matrimonium. Tandem, requirit Principes & Magistratus spirituales, qui per Ordinem constituuntur: idcirco ex congruentia, septem dumtaxat debent esse Sacramenta.

Dico 1. Quantum ad ordinem naturæ seu generationis, Sacramenta convenienter sic ordinari, Baptismus, Confirmatio, Eucharistia, Pœnitentia, Extrema Unctio, Ordo & Matrimonium. Ita in Conc. Florent. sess. ultima, & Trident. sess. 7. can. 1. & in Catechismo Romano jussu Pii V. edito. Colligitur etiam evidenter ex comparatione vitæ corporis cum vita spirituali in homine.

Dico

Dico 3. Ordine perfectionis, Eucharistiam primum locum tenere inter omnia Sacramenta. Tum quia continet realiter & substantialiter Christum ipsum sub speciebus Eucharisticis. Tum quia consistit in esse permanenti. Tum quia est veluti finis cæterorum Sacramentorum, fons, & Sacramentum omnium Sacramentorum. ut ait D. Bern. Tum quia habet rationem Sacrificii & Sacramenti.

Dico 4. Baptismum esse priorem ordine necessitatis: & immediatè post, sequi Pœnitentiam, quoniam sunt Sacramenta simpliciter necessaria, seu necessitate medii; cum hoc tamen discrimine, quòd Baptismus est omnibus necessarius pro culpa originali delenda, Pœnitentia verò solis adultis peccatoribus pro culpa actuali remittenda, si post Baptismum susceptum contingat illos peccare. Deinde sequuntur Confirmatio, Eucharistia, Extrema Unctio, Ordo & Matrimonium.

Ex dictis inferes, lotionem pedum non esse propriè Sacramentum, quia non numeratur inter Sacramenta novæ legis, nec potest reduci ad Baptismum, quia non est signum efficax gratiæ: Christus enim instituit eam, ut Apostolis exemplum præberet humilitatis & ad internam animi munditiam hortaretur eos. Nec valet obijcere illud Joan. 13. ad Petrum, *Si non laveris te, non habebis partem mecum*; quia his verbis Christus noluit ostendere lotionem esse necessariam ad salutem, ut ostendit de Baptismo his verbis, *Nisi quis renatus fuerit ex aqua & Spiritu sancto, non intrabit in Regnum Cælorum*: sed ut Petrum ad debitam obedientiam comminatione sua excitaret, ut exponunt D. Basilus lib. 1. de Baptismo cap. 2. Chrysostomus, & Cyrillus. Nec valet obijcere aliquos Sanctos, qui docent lotionem pedum esse observandam in Ecclesia, quod necessarium esse inferunt ex illo Christi ad Apostolos, *Et vos debetis alter alterius lavare*.

*lavare pedes; exemplum enim dedi vobis, ut quemadmodum ego feci, ita & vos faciatis: qui volunt lotionem pedum servari in Ecclesia in memoriam actionis Christi erga Discipulos suos, & ut fideles gratiam obtineant ratione humilitatis, & Pastores ratione imitationis Christi; non autem ratione lotionis. Vel dico, quòd sancti Patres loquuntur de Sacramento generaliter sumpto. & improprie nominato, scilicet quatenus est signum aliquod sacrum significans.*

MAQ 817

FINIS QUARTI TOMI.



